




VT DOCET
FACIT

ET MARTI
ET MINERVAE

Aux Privilèges Du Roy



PARFAICT
CAPITAINE
AUTREMENT
L'ABBREGÉ
DES GUERRES
DE GAULE DES
COMMENTAIRES
DE CESAR.

*AVEC QUELQUES REMARQUES
sur icelles, suivy d'un Recueil de l'Ordre de Guerre des
Anciens: Ensemble d'un Traicté particulier de la Guerre.*

Troisième & dernière Edition augmentée d'un Traicté: De
l'Intérest des Princes, & Estats de la Chrestienté.

PAR MONSIEUR LE DUC DE ROHAN.



A PARIS,
Chez AVGVSTIN, COVRBE', Libraire & Im-
primeur de Monsieur Frere du Roy, dans la petite
Salle du Palais, à la Palme.

M. DC. XXXX.
AVEC PRIVILEGE DV ROY.

5, 29. 49.



AV ROY.



IRE,



Je vous adresse les marques de mon oyssiueté ; Vous y verrez un abregé des guerres de Cesar , le plus grand Capitaine qui l'aye iamais faite ; on vous remarquerez une conduite prudente en ses desseins , une diligence merueilleuse en ses executions , & une constance admirable aux difficultez qu'il a rencontrées au plus fort de ses affaires : s'il a tesmoigné quelquefois de la temerité , ç'a esté peu souvent , & pour monstrier seulement :

à ij

que son courage ne cedit à celuy d'A
xandre le Grand. Vous estes SIRE,
Monarque de la Belliqueuse Nation,
qu'il a eu tant de peine à subjuguer; Vous
y estes comme luy, tellement nourry dans
les fatigues, qu'elles vous sont tournées
en habitude, & y estes si heureux que vos
actions sont aujourd'huy les plus riches
ornemens de l'Histoire: Vous estes un
grand Prince, sur lequel toute la Chre-
stienté a les yeux fichez comme sur le
Restaurateur de sa liberté: si Vous conti-
nuez vos genereux desseins, Vous en rem-
porterez une gloire immortelle, & une
renommée qui égallera celle des plus grands
hommes de l'Antiquité. Mais la perfe-
ction de ce haut ouvrage consiste en la per-
seuerance: Considérez SIRE, qu'il s'est
veu plusieurs Princes auoir eu de beaux
commencements, qui pour s'estre laissez
aller trop tost au repos, ont perdu toute
reputation; pource que la gloire des
Grands Personnages s'éuanoit s'ils ven-
lent demeurer sans action; semblables en

cela à ceux qui nagent contre fil de l'eau, lesquels reculent en arriere, s'ils ne s'efforcent d'aller en avant. Vous y verrez aussi un Recueil de l'ordre de guerre des Anciens Grecs & Romains (vray fondement de tout l'Art militaire,) car encores que l'inuention de la poudre à Canon trouuée nouuellement, aye apporté du changement à la maniere de faire la guerre; neantmoins on en puise toutes les bonnes maximes. Ce que ie tasche de faire voir plus particulièrement par un petit traitté de guerre que i'y ay adjousté; où ie veux monstrier que la diuersité de nos armes à celles des Anciens, ne nous doit faire mespriser leurs ordres. Si i'agréé S I R E, à Vostre Majesté, i'obtiens ce que ie desire; Et pour toute recognoissance, ie vous supplie tres-humblement de ne me laisser inutile aux occasions qui s'offrent pour l'augmentation de vostre gloire, afin que chacun recognoisse dans l'execution de vos commandements, monobeïssance; dans

*vos emplois , ma fidelité ; & dans les
actions de la guerre , le peu de cas que ie
feray tousiours de ma vie pour le bien
de vostre service. Cependant ie prieray
Dieu.*

SIRE,

*Qu'il benisse vostre Regne , le comble de
longs iours , & vostre sacré Personne
d'une felicité sans exemple,*

*Vostre tres-humble, tres-obeissant &c.
tres-fidelle sujet & seruiteur,
H. de Rohan.*



Extrait du Privilege du Roy.



AR Lettres patentes du Roy, données à Paris le 20. iour d'Auril 1637. Il est permis à l'Autheur du liure intitulé, *Abbrege des guerres de Gaule des Commentaires de Cesar, avec plusieurs Remarques, & diuers autres Traictez de Guerre*, de le faire imprimer, vendre & debiter par tel Imprimeur ou Libraire qu'il voudra choisir, en vn ou plusieurs volumes, en telles marges, en tels caracteres, & autant de fois que bon luy semblera, durant neuf ans entiers, à compter du iours que chaque piece ou volume sera acheué d'imprimer pour la premiere fois. Avec defences à toutes personnes de quelque qualité & condition qu'elles soient, d'imprimer, ou vendre ledit liure en aucun lieu de l'obeissance de sa Majesté durant ledit temps, sans le consentement de l'Autheur, ou de ceux qui auront pouuoir de luy: à peine de trois mille liures demande, de confiscation des exemplaires

contrefaiçts & de tous despens, dommages
& intereſts. Declarant tous autres Priuile-
ges obtenus, ou que l'on pourroit obtenir
cy-apres pour ledit liure, ſous quelque titre
ou pretexte que ce ſoit, nuls, & de nul effect.
Comme il eſt plus amplement porté par les-
dites Lettres; à l'Extraict & aux copies des-
quelles ſadite Maieſté veut que ſoy ſoit ajou-
ſtée comme à l'Original, Signé Par le Roy en
ſon Conſeil, CONRART.



L'Autheur dudit Liure a choiſi Iean
Houzé, & Auguſtin Courbé, Mar-
chands Libraires à Paris, pour l'imprimer &
vendre, conformément aux clauses du Pri-
uilege cy-deſſus, duquel il leur a fait ceſſion
& tranſport.



PREFACE.



CE Liure n'auoit pas esté fait pour estre rendu public. L'intention de celuy qui en est l'Authueur estoit seulement de se desennuyer en le composant : ou pour mieux dire d'exprimer l'Idée d'un Art qu'il aimoit extrêmement, afin d'amuser par la Representation la passion qu'il ne pouuoit alors contenter par l'exercice. Mais comme nous voyons qu'encore que la Nature semble auoir eu dessein de dérober à l'usage & à la veüe des hommes, les perles & les metaux & d'autres choses pretieuses, Le besoin des Arts & la facilité du Commerce, ou l'ornement & le plaisir de la vie, sont cause qu'on les va chercher iusqu'au fons de la Mer & dans les entrailles de la terre. De mesme, l'utilité publique & la curiosité des honnestes gens, ont deliuré cet excellent liure de l'estat priué où l'on le vouloit retenir, & l'ont tiré de l'obscurité où l'on auoit resolu de le laisser, au iour où il a paru avec tant d'honneur & tant d'auantage.

PREFACE.

Les premières mains qui ont travaillé à rompre son premier destin & à le faire sortir de sa condition priuée, ont esté les plus nobles mains du monde. Le Roy qui a tousiours eu pour la guerre des inclinations passionnées, & qui est sans mentir vn des grands maistres de ce siecle en ce mestier, n'eust pas plustost sceu qu'il estoit fait, qu'il eut enuie de le voir. Du Cabinet de sa Majesté, il est venu à la presse par l'inuention d'un homme qui a creu qu'il luy estoit permis de rendre commune vne si belle source de preceptes & d'instructions militaires, sans le sceu mesme de celuy qui en estoit le maistre.

Pour t'apprendre plus particulièrement, Lecteur, quel est le prix de cet Ouurage, & quel le merite de celuy qui s'est donné la peine de le composer, il me suffiroit de te conuier à lire l'un, & de te dire le nom de l'autre. Mais ie ne desire pas me contenter de cela. Ie veux faire quelque chose d'auantage, & sans rien prester à vn sujet qui n'en a pas besoin, & qui est assez riche en luy-mesme & de ses propres biens; ie veux tascher de t'y faire remarquer des perfections que peut-estre tu n'auois pas apperceues, ou pour le moins au degré de bonté, que ie te descouvriray.

Comme la beauté du monde sensible naist de l'ordre qui s'y observe, & se forme de la iuste situation & du mouuement regulier des pieces de cette admirable machine. Ainsi, dans le train des choses Morales & le cours de l'humaine société, la perfection consiste en :

P R E F A C E.

ce que chaque partie garde le rang qu'elle y doit tenir, & accomplit les fonctions qu'elle y doit faire. En effet, quand les hommes s'attachent invariablement à leur deuoir, & s'efforcent de remplir les obligations sous lesquelles ils viennent ou prennent place dans le monde : Il n'y a point d'harmonie si excellente en la nature : Il ne se voit pas sous le Ciel de Spectacle si digne des yeux de Dieu. C'est l'vnique chemin, qui mene à la felicité, où tous aspirent.

De ces obligations dont le nœu est indissoluble, & la necessité inuolable, il y en a deux ou seules ou principales qui lient les hommes. La premiere les regarde seulement comme Individus d'une nature Raisnable, & selon la difference, qui les distingue & les separe du reste des animaux. Entant que tels, ils sont obligez de viure conformement à la dignité de leur Estre. Et comme entre les facultez de leur Ame la Raison est la plus releuée, elle doit estre aussi la faculté dominante, comme elle est le naturel & le flambeau de la volonté : Celle-cy ne doit point suiure de lumiere qui luy soit contraire : & comme elle nous donne de la superiorité sur les bestes, nous deuons aussi luy establir un empire sur les passions & sur les mouuemens de l'Appetit qui nous est commun avec les bestes. Et c'est en la pratique des Conseils de cette Puissance & en l'exécution de ses ordres que consiste ce qu'on appelle vertu ; ce qu'on dit finit honnesteté : ce qui constitue le Deuoir essentiel, & ce qui est le fondement du veritable Honneur de l'Homme.

P R E F A C E.

Cette premiere obligation est égale & uniforme en tous les hommes si tost qu'ils en sont capables, & il n'y en a point qui se puisse dispenser de vivre selon la Raison, & d'auster toutes ses actions à cette Regle. La seconde leur est en quelque façon ou le plus souvent volontaire, & ne tombe sur eux qu'entant qu'ils sont parties notables de la société civile & membres importants du Corps politique: qu'entant qu'ils y exercent une Authorité ou supreme & independante, comme les Souuerains, ou subalterne & inferieure, comme les Subjects. Cette Authorité ouvre à la vertu un Champ plus ample qu'elle en auroit, & une Carrière plus longue: luy fait ietter son influence plus loin, & la repandre en plus d'endroits, & la rend une des Causes & des Principes de la commune felicité. Outre cela, la Vertu des personnes publiques a cet aduantage sur celle des particuliers; qu'elle a plus d'attraits, & se fait plus d'Amans que l'autre, à cause des ornemens de la fortune dont elle se pare: de la puissance qui l'accompagne, & des Recompenses qui la suivent.

Ces deux obligations requierent que les Hommes estudient à s'en bien acquitter auant que de s'adonner à aucun autre exercice: & qu'il ne se face point partage ny distraction de leur Temps, qu'ils n'ayent accompli tous les deuoirs du Droit naturel & du Droit civil. Les autres Connoissances & Emplois n'en doivent auoir que l'espargne & la Reserve. Et neantmoins, il faut auoier que le Temps est la chose du monde dont la plus part

P R E F A C E.

la plus part sont les plus iniustes Dispensateurs , & les plus mauvais economies. Je ne parle pas de ceux qui sont profession ouuerte du vice , & dont la vie passe en celle des Demons ou degenerate en celle des bestes. Je parle de ceux qui ne croient pas mal faire , & qui semblent s'occuper honnestement , bien qu'ils ne vaquent qu'à des connoissances vaines , & à des occupations inutiles. Et soit que cela prouienne du defect de nostre condition , qui se degoute facilement de ce qui est commandé : ou du poids du Temperament , qui incline vers quelqu'autre chose : ou de la maniere de l'Institution qui nous y a accoustumez , ou de la force de l'exemple ; qui porte à l'imitation de ceux qu'on estime ; combien y en a-t-il qui prennent peine , à ne rien ignorer que ce qu'ils deueroient sçauoir , & à bien faire tout , fors ce qui est de leur charge. Le mal seroit encore supportable , s'il ne prenoit qu'aux ordres inferieurs d'un Estat , & s'il on n'auoit veu quelquefois des personnes sans preparation & sans capacité , monter iusqu'au Gouuernail , & iusqu'à ces places releuées , où reside l'autorité souveraine du Prince , & d'où descend sur les Peuples la bonne ou la mauuaise fortune , selon qu'elles sont remplies.

Quoy que c'en soit , comme la premiere obligation dont nous auons parlé , est pareille & vniforme en tous les hommes : La seconde est fort diuerse ; & prend différentes faces , selon la diuersité des rangs qu'on tient dans la Societé , & la difference des personnages qu'on y represente. Tous les vases qui seruent à vne grande Mat-

P R E F A C E.

son ne sont pas faits d'une mesme estoffe, & n'ont pas vne mesme vſage, & tous les membres du corps humain, ne sont pas des yeux & n'ont pas la conduite, & la direction des autres membres. Ainsi tous ceux qui agissent dans vn Estat; n'ont pas des emplois également nobles, & toutes les intelligences qui luy donnent le mouvement, ne sont pas du premier ordre.

Or de tous les Emplois dont se compose la vie civile; il n'y en a point sans doute de si illustre, que celui des Armes: ny dans la Republique ſeculiere des personnes si glorieuſes, que ceux qui les commandent, quand ils les commandent dignement. Je n'entens pas enfermer ſeulement dans l'enceinte de cette proposition, la pratique de la Discipline Militaire, ny les diſſicultez qui s'agitent, & les reſolutions qui ſe prennent dans le detail des occurrences & dans la rencontre des occasions de la guerre. J'y comprends encore les Conſeils en gros, & les Deliberations en general de la faire: ce qui ſe conçoit dans le cabinet, auſſi bien que ce qui s'eſcloſt à la campagne. Je ne diuiſe pas en cecy le ruiſſeau de la fontaine d'où il decoule: ny ne ſe ſepare les branches & le tronc de la racine qui les porte.

Je n'entens pas auſſi parler des Armes, qui ſont entre les mains d'un ambitieux pour n'en ſortir jamais: ny de la guerre que ſont ies Conquerans, qui n'a pas pour fin la paix; mais vne nouuelle guerre. Je condamne l'inquietude de Pyrrhus, qui ne veut ſe repoſer qu'apres auoir ſubiugué l'Italie, occupé l'Afrique, & dompté les Gau-

P R E F A C E.

les. Je trouue estrange la folie d'Alexandre, qui ne peut pas seulement gouter le repos par imagination, & qui ayant à grand peine commence la conqueste de ce monde, deuore de la pensee tous les autres que Diogene luy auoit bastis: & ie ne puis assez monstrer qu'au milieu du Christianisme, & dans la grande place d'une ville appartenante à vne nation qui s'en picque estrangement; on ait veu la figure d'un Chenal, qui foulant des pieds de derrière vne boule de cuiure, tenoit ceux de deuant auancez au dehors, avec cette trop orgueilleuse & insolente inscription, le monde ne nous suffit pas.

Je parle donc dans la proposition que i'ay auancée, de cette guerre qui tend au repos des Estats, & à la felicité des Peuples. Je parle des Armes qui assurent cette felicité: qui protegent les foibles contre la violence des plus forts qui les empeschent d'estre les victimes de leur vengeance, & la proye de leur auarice: qui soumettent à la puissance des loix, aussi bien les grands que les petits, & font regner la iustice, sans faire acception de personnes. En effet, si elles n'estoient tousiours prestes, à venir à son secours, & à fortifier son bras; Elle n'oseroit l'estendre sur les restes les plus relouées de l'Estat, & sur ces personnes puissantes, qui sont riches en dependances, & qui abondent en Seruiteurs, en Partisans, & en amis. Comme au contraire la tranquillité publique n'est iamais alteree, ny le calme des Estats trouble; que lors que la crainte des armes du Prince, cesse d'as l'esprit des Grands, & qu'ils se laissent gagner à l'esperance de pouuoir

En la
grand
Place
del'hi
panio
niole
quand
ellefut
prise
par
Carli
le &
par
drack.
Cum
denus.
Non
sufficit
Orbis

P R E F A C E.

opposer la force qu'on inuente à la force légitime. De là naissent les maladies mortelles des Estats, & ces furieux mouuements, qui ne s'y forment iamais s'ils sont longs, qu'ils n'en renuersent ou n'en esbranlent les fondemens, qu'ils n'en causent la dissipation ou la foiblesse, & si le vaisseau ne fait point naufrage de ce temps-là; il n'arrive iamais au port que maltraité de la mer, & fracassé de la tourmente.

Outre la seureté interieure d'un Estat, que les armes luy apportent; & la racine des esmotiōs intestines qu'elles y trenchent; Elles pouruoient encore à la seureté du dehors, & le couurent des attentats, & des inuasions des Estrangers. Il est certain qu'il n'y a rien de si tendre ny de si fragile, qu'une paix desarmée & nue: qu'il n'y a point de si pressante tentation de s'emparer du bien d'autrui, que la commodité; & qu'on se dispense facilement à couvrir les mers, & à rauager les terres de ses Voisins, quand on le peut faire impunement, & sans auoir peur de la Reuanche, & du droit de Represailles.

Cette double seureté; qui s'esleue principalement, & se maintient dans les Estats, par le benefice des Armes, reueille l'Industrie; & excite le traual des Habitans, qui ne cultivent pas volontiers vne plante, & ne sement pas de bon cœur vn Champ, dont ils apprehendent qu'un Larron ou vn Ennemy, ne volē la moisson, & ne raiuisse les fruits. Elle ouure encore dedans & dehors, & y fait fleurir le Commerce, qui est à la vie des hommes, vne profonde mine de toute sorte de biens, & qui n'enre
iamais

P R E F A C E.

jamais dans vn pays, que couronné d'abondance, & les mains pleines de richesses.

Mais pour mieux comprendre la noblesse des Armes, & la dignité de cette profession; Il faut considerer encore, qu'elles sont l'instrument de la Iustice qu'un Souuerain se rend à soy-mesme, contre un autre Souuerain, & du priuilege qu'il a, d'estre Iuge en sa propre Cause. C'est le plus auguste Caractere que le doigt de Dieu imprime & la plus belle effusion de sa puissance sur les hommes. C'est la Marque la plus expresse, & le trait le plus visible, de l'honneur que les Princes ont de le représenter, & d'estre ses Images en terre. Car pour la Iustice que les Souuerains exercent sur leurs sujets, & qu'ils sont obligez de leur distribuer; on en voit quelque ombre, & on en remarque quelque trace parmy les particuliers; où les Maistres & les peres imposent des loix, & ordonnent des peines, aux seruiteurs & aux enfans qui les violent. Mais pour celle qui se pratique de Souuerain à Souuerain; Elle est inseparablement attachée à leur qualité: Elle est incommunicable aux inferieurs: Elle ne peut descendre du trône.

On peut voir par là, & ie diray cecy par occasion, que l'usage des Duels, où les particuliers taschent de se faire iustice eux mesmes, & de tirer raison par leurs propres mains, des torts qu'il croient auoir receus des autres particuliers; est une manifeste usurpation du droit & de l'autorité du Souuerain. Aussi ce mal qui a commencé à se monstrier, & à s'estendre dans ce Royaume.

P R E F A C E.

me par le pernicieux exemple que François premier en a donné, & par la funeste permission que Henry II. en a accordée; s'est accru & a pullulé merueilleusement rant nos guerres Ciuiles, & dans cette generale depuuation qu'elles contiennent, de l'obeissance & de la fidelité, que les suiets doiuent au Prince. Du depuis certes il a monté à son comble, & s'est multiplié à l'insfiny, par l'indulgence de Henry le Grand, & durant la paix de son Regne, pour des causes qu'il n'est pas besoin de rechercher icy. Je reuiens au suiet que i'ay quitté.

Je dis donc pour vne plus ample preuue, & pour vne plus claire conuiction, de l'excellence de la Iustice, que les Souuerains exercent contre les autres Souuerains; qu'elle ne contient rien de bas ny d'obscur, & qu'elle n'a point de partie qui ne paroisse, & ne iette de la lumière. Qu'elle n'est pas seulement noble en sa source & en son origine, comme celle que les Souuerains rendent à leurs suiets; mais qu'elle l'est encore en son cours, & en tout ce qui en descend, & qui en emane. Qu'elle ne s'enferme pas toute sa gloire, en ce qui s'agite & se resout dans le Cabinet; mais qu'il en deriue encore beaucoup, sur ce qui se passe à la Campagne: & si celle du Conseil est plus pleine & plus solide; que celle de l'exécution est plus estendue, & qu'elle esclate plus fort aux yeux de la plus grand part des hommes. Aussi certes des personnes qu'on y employe, Il n'y en a point qui ne soit illustre, ou qui ne le deuienne, si elle s'y porte couragement: tout au contraire de la Iustice, que les Souuerains distribuent à

P R E F A C E.

leurs ſuiets, à l'exécution de laquelle on ne deſtine d'ordinaire, que des perſonnes infames ou viles.

Je diſ bien dauantage & ſonſtiens, que ce n'eſt pas ſeulement le meſtier des Princes, de preſider au Conſeil où les Arreſts de faire la guerre ſe forment: mais qu'il eſt encore de leur charge, d'aſſiſter à l'exécution, quand il n'y a point de cauſes raiſonnables qui l'empeschent, & il n'eſt que trop juſte que la teſte conduiſe les bras qui travaillent à une beſogne, dont le principal fruit luy en doit appartenir. Je ſçay pourtant que tout le monde n'eſt pas de cette opinion, & que l'inconſideration & la temerité de quelques Princes, qui ont eſté tuez ou faits priſonniers à la guerre, ont cauſé des maux ſi grands & ſi longs à leurs Eſtats; que quelques vns ont delà inferé qu'ils ne la doiuent pas faire en perſonne. Je ſçay que de deux freres, que le ſiecle paſſé a veu Empereurs l'un apres l'autre, Charles le Quint & Ferdinand; ce dernier eſtoit de cét ais, bien que celui-là fuſt du contraire. La diſgrace de deux Rois de Hongrie ſes predeceſſeurs, dont l'un auoit eſté tué à la bataille de Varnes, & l'autre à celle de Mogoſſe; l'auoit induit à choiſir ce party comme le plus ſeur, quoy qu'il ne fuſt pas le plus honneſte.

Mais il deuoit auoir apriſ par ſes propres malheurs, & par les pertes qui luy eſtoient arriuées; combien il euſt eſté à propos qu'il euſt aſſiſté aux expéditions qui furent funeſtes entre les mains de ſes Lieutenans, & qui euſſent peut-eſtre pris un train plus heureux, & receu une meilleure forme entre les ſiennes. Il ſe deuoit ſouuenir

P R E F A C E.

que ce ne fust pas tant la vaillance & la conduite des Turcs, qui leur donnerent la victoire à Ezechio & à Bude; que l'Imprudence & la lascheté de ses Generaux qui la luy firent perdre, & que si son frere apaisa les Espagnes esmeues: S'il estouffa la Rebellion naissante des Pays-bas, S'il humilia l'Allemagne coniurée contre luy: S'il dompta Thunis reuolté contre son legitime Maistre: s'il mit à la raison le Duc de Cleues, qui s'estoit allié du Roy de Nauarre, & s'il obtint quelques autres fameux succez; Illes deuoit en partie à sa presence qui auoit amené avec la Vertu, la bonne fortune dans ses Armées. Mais pour ne m'estendre pas hors de propos sur cette matiere & n'aller pas plus loin que mon but, il me suffira pour confirmer cette verité; que c'est vne des premieres fonctions des Souuerains, d'estre ordinairement eux-mesmes les conducteurs de leurs Armées, & les Directeurs des guerres qu'ils feroient de renuoyer le Lecteur à l'excellent & indicioux discours, qui en est fait en vn endroit de ce liure & à vn memoire, dont la teneur est dans Mariana, qui fust présenté à Ferdinand de Castille; lors qu'il mit en deliberation en son Conseil, s'il iroit en personne au Royaume de Naples, pour en tirer le grand Capitaine: ou sic estoit assez pour cela d'y enuoyer quelque Lieutenant muni de son auctorité, & de ses armes.

Il est donc indubitable, qu'il n'y a point de Mestier plus illustre parmy les hommes que celui des Armes: ny des vertus dans la société ciuile, qui obtiennent vne plus grande

P R E F A C E.

grande portion de la gloire qui s'y distribue, que les Militaires. Mais si cela est vray il n'est pas moins iuste, & s'il n'estoit pas, il se trouueroit peu de personnes, qui voulassent s'adonner à des vertus comme celles-là, dont l'acquisition est si difficile & l'usage si penible : qui ne germent & ne fleurissent que parmy les blessures, les pertes des membres, & les dangers continuels de la mort, & qui sont si souuent fatales à ceux qui les ont ; si elles ne recueilloient plus abondamment que les autres, la plus belle de toutes les recompenses humaines, qui est l'honneur & la louange, & si le nom de ceux qui les exercent, ne retentissoit plus hautement & plus long-temps que celuy du reste des hommes, dans la bouche de la Renommée.

Outre cette recompense qui est à vray dire, casuelle & fortuite, & n'est pas le prix infailible de toutes les bonnes actions qui se font à la guerre, ny le iuste prix de toutes celles qui la regoient, Elles en peuuent encore recevoir vne autre, si elles sont bien ordonnées, plus solide & plus certaine, & qui ne depend point de l'extravagance de la fortune, ny du caprice des hommes. C'est la gloire de l'autre vie, & l'immortalité bien heureuse. Car s'il m'est permis d'user icy d'une comparaison fort inegale, & de mettre en parallele les choses grandes & les petites ; L'exaltation de Iesus-Christ, & son eleuation à la gloire, sont venuees s'il en faut croire l'Apostre de ce qu'il s'est humilié deuant son Pere, & qu'il luy a esté obeissant iusques à la mort. Et partant on peut inferer delà,

P R E F A C E.

que l'obeïſſance la plus haute & la plus meritoire dans l'ordre des choſes ſeculieres, que les hommes puiſſent rendre à Dieu, en la perſonnes des autres hommes; eſt celle que les gens de guerre rendent au Prince, qui en eſt l'image: puis qu'ils la rendent juſques à la mort: puis qu'ils la ſouffrent ſouuent, & qu'ils s'y expoſent à toute heure pour luy obeïr. Autrement ce ſeroit à eux vne trop grande baſſeſſe de cœur, & vn trop grand excez de folie, qu'ils luy abandonnaſſent leurs biens, & prostituâſſent leurs vies qu'en cette qualité, & que ſans cela ils ſe ſoumiſſent avec vne dependance ſi abſoluë à vn homme qui n'a point vne origine diuerſe de la leur, ny vne fin differente: qui n'eſt point composé d'autres parties eſſentielles: qui eſt eſclairé du meſme Soleil, & ſouſtenu de la meſme terre, & qui ſera quelquefois plus infirme de corps, & plus imbecille d'eſprit, que pluſieurs de ceux qui luy obeïſſent.

Reuenons à la gloire que le monde donne aux actions Militaires; ſur laquelle il eſt à conſiderer qu'elle ne luit pas eſgalement, & avec vne meſure de clarté ſur tous les gens de ce Meſtier. Elle ſe leue & ſe-hauſſe comme la lumiere du iour, & ne faiſant que poindre ſur la teſte des ſimples Soldats; Elle va touſiours croiſſant ſelon les degrez des emplois où ils montent, & ne ſe trouue dans ſa plenitude, & pour le dire ainſi, dans ſon Midy, qu'en ceux qui exercent le Souuerain commandement dans les armes. Auſſi certes pour ſouſtenir dignement cet Employ, qui contient par Eminence toutes les Charges ſubalternes; Ceux là doiuent auoir eſté pourueus de tant

P R E F A C E.

de dons de Nature, & s'estres munis de tant de vertus acquises : doiuent auoir fait tant de bonnes actions, & rendu tant de preuues de ce qu'ils valent ; que ce n'est pas merueille, si de l'amas & du concours d'un si grand nombre de belles choses, dont chacune merite vne estime particuliere ; Il se forme & s'assemble en Ceux qui les possèdent, vne abondante source d'honneur, & vn tresor inestimable de gloire.

Et veritablement afin qu'un homme se mette en cét estat de perfection, si tant est qu'on y puisse paruenir, & réussisse Capitaine accompli, si tant est qu'il y en puisse auoir ; Il faut en premier lieu, quand on naist, estre heureusement regardé du Ciel pour cela, & auoir ce Caractere dont la nature marque & distingue, ceux qui sont capables d'y réussir ; C'est à dire auoir un Instinct particulier, & un poids occulte, qui pousse & panche vers cét Art, comme il y a d'autres Instincts qui inclinent à la Poësie, à la Peinture, à l'Architecture &c. Car il est vray que quand la raison suit la Nature, & que l'Electiō se ioint à l'inclination : on fait merueilles en quoy que ce soit, & que c'est proprement auoir vent & marée, quand on nauige. Comme aussi d'un autre costé, de s'appliquer à quelque chose avec un instinct contraire, & vne inclination qui resiste ; c'est vouloir travailler beaucoup pour auancer peu : c'est aller seulement à force de bras, contre le fil d'une riuiera rapide.

En suite de ces dispositions originelles, & de ces auan-
ces gratuites qui sont faites par la nature, Il est necessaire,

P R E F A C E.

Au li-
ure de
la vieil-
leſſe,
ce me
ſemb'e

pour deuenir grand Capitaine ; d'auoir le temperament fort, & la conſtitution du corps vigoureuſe pour reſiſter aux iniures de l'Air, & à la ruiſſance des ſaiſons pour faire de grandes Couruées & ſouffrir de longues fatigues : pour dormir peu & jeuner beaucoup, quand il eſt beſoin : bref pour fournir aux operations de l'eſprit, & à cette ardente & continue agitation, où doit eſtre l'ame d'un General pour paruenir à ſa grande fin qui eſt la victoire. Il n'eſtoit pas croyable ; dit Ciceron , avec quelle beauté d'eſprit, & quelle grandeur de courage le fils du ſecond Scipion l'Aphriquain eſtoit venu au monde. Il n'eſtoit pas poſſible de voir vne ame plus riche de qualitez naturelles, ny plus remp'ie des ſemences de toutes les vertus heroïques. Et neantmoins cette ame ſe trouua infuſe dans un corps infirme & mal ſain, & logée dans un palais mal baſty, & qui tomboit tout en ruine. Les inſtrumens interieurs dont elle ſe deuoit neceſſairement ſeruir pour les fonctions de la guerre ; ſe trouuerent gaſtez ou foibles, & l'intemperie de la matiere rendit ſteriles ces riches qualitez, dont nous auons parlé, & empeſcha ces diuines ſemences de fructifier, & de produire à la Republique la grandeur & la gloire qu'elle ſ'en eſtoit promiſe.

Pour ce qui eſt des connoiſſances, qui preparent & forment l'eſprit d'un homme qui aſpire au commandement des armées ; la ſcience des mœurs eſt des plus conſiderables. La raiſon eſt, d'autant qu'elle ayde à le purger & à le monder, pour le dire ainſi, de certaines inclinations

nations qui sont contraires aux fonctions de cette charge, & qui l'empeschent de la faire avec honneur, & d'y travailler avec succez. Telle est par exemple l'inclination à l'avarice, & le penchant de l'ame vers cette cruelle & insatiable passion qui ne vit que de proye, & ne s'entretient que de rapine: quine du iamais c'est assis, & dont l'audier ressemble à celle du feu, qui s'irrite & se fait grande à mesure qu'on luy fournit de l'aliment, & qu'on y jette des matieres combustibles. Cela pourtant est fort vilain & tient du prodige, qu'une mesme personne exerce vne autorité souveraine, sur quantité d'honnestes gens qui luy obeissent, & rende en mesme temps de la servitude & du culte à des choses insensibles, & à des metaux que la Bible appelle Idoles: Que celuy qui dispute de la gloire avec les Princes & les Monarques, & qui a l'honneur quelque fois de les auoir pour aduersaires, s'associe & se fasse compaignon d'un Fermier & d'un Partisan. Bref qu'un homme destiné à prendre des forteresses, à subinguer des Prouinces ennemies; ne vueille vaquer qu'aux conquestes qui se font sur la solde des gens de guerre, ny triompher que des despoüilles de ceux qui ne se defendent pas, & qui deuroient deuenir riches sous sa conduite. Aussi il n'y a rien qui luy en desrobe tant le respect & l'affection que cette humeur interessee & barbare; comme il ny a point d'attrait si puissant à gagner les cœurs, que la liberalité, ny des portes si aisées pour y entrer & s'en rendre Maistre, que les bienfaits. Il arriue de là, que l'obeissance qu'on rend, n'estant fon-

P R E F A C E.

dée que sur des mouuemens de crainte seruite, ou tout au p'ns sur quelque legere impression de deuoir & d'honneur qu'on conserue; est par consequent fort imparfaite: que toutes les factions militaires se font avec longueur & negligence, & finalement que les dispositions à la victoire s'affoiblissent, & le seruice du Prince se ruine.

Quand i'ay dit que la Morale peut seruir à redresser ce qu'il y a d'oblique dans l'ame, & à reformer ses mauuaises inclinations; ie n'entens pas qu'un General d'armée commence à s'appliquer à cette estude, quand il commence à exercer ce souverain commandement. Ce doit auoir esté vn des exercices de son institution, & cette culture a deu estre faite dans la ieunesse, & pendant que les inclinations sont encor en fleur, & comme en l'estat d'Innocence. Car certes comme il n'est pas mal-aisé de mener les Riuieres par où l'on veut qu'elles aillent, pendant qu'elles ne sont que Ruisseaux: & comme il est tres-difficile de les destourner de leur cours, & de la pente qu'elles ont prise quand elles sont deuenus fleuves. Ou comme on peut apprivoiser les bestes les plus sauuages & les plus farouches pendant qu'elles sont fort ieunes, & il est impossible de changer leur naturel, et d'adoucir leur ferocité, quand elles ont fait leur croissance. De mesme les inclinations des hommes, qui au commencement estoient traitables & souples, se font dures & inflexibles si l'on les laisse passer en meurs, & prendre vne longue coustume d'aller, où le poids naturel les porte & les sobriets les attirent.

P R E F A C E.

Vne autre raison pour laquelle la science des meurs est
 necessaire aux grands Capitaines ; est dautant que la
 vertu estant située sur vne mesme ligne avec le vice, &
 assise entre les extremittez qui le constituent ; Il y a dan-
 ger que nostre ame si elle n'est bien disciplinée, n'en sca-
 che pas tousiours remarquer les confins, & que sortant
 quelquefois du milieu qui borne & limite la vertu, elle
 n'entre de bonne foy dans quelqu'une des extremittez qui
 font le vice. C'est pourquoy il importe de la dresser &
 instruire par le moyen de la Philosophie, à connoistre
 toutes les erreurs qui se commettent, & à demesler tous
 les changes qui se donnent en cette matiere. Il y a bien
 d'auantage, c'est que l'une de ces extremittez où la vertu
 confine, ayant d'ordinaire ainsi qu'a remarqué Aristote,
 quelque chose de fort noir & de fort hydeux, cōme l'aua-
 rice, la lascivité, la fourberie, &c. & l'autre quelque
 chose de fort haut & de fort noble en apparence, comme
 la temerité, la prodigalité & la franchise immodérée ; Il
 arriue de là que les flatteurs & les ignorans, n'ont que
 trop de pretexte & d'occasion, d'applaudir aux inclina-
 tions qui portent vers cette seconde extremité, & que la
 raison a moins de honte de les retenir, à cause de cette
 forme plausible de bien, sous laquelle leurs objets se tra-
 uessissent ; que de retenir celles aux objets desquelles elle
 ne rencontre rien qui ne degoust & qui ne blesse. C'est
 pourquoy encore elle a besoin que la Philosophie vienne
 à son secours, & qu'elle la garentisse d'un danger si
 attrayant, & d'une embusche si specieuse.

P R E F A C E.

Sur tout la vaillance est crüe si belle, & tire apres-
 soy tant d'estime & de veneration; qu'elle a peine au-
 moins parmy nous, de paroistre laidé & de n'estre pas
 honorée; lors mesme qu'elle pert le corps de vertu, &
 n'en conserue que l'ombre: qu'elle s'emporte au delà de
 ses limites & se fait temerité. De sorte que tant s'en
 faut, que l'on s'oppose tousiours à l'inclination que les
 Grands ont quelquefois à cet excez & à ce desbordé-
 ment de courage, & qu'on tasche de modérer par le dis-
 cours, ce feu dont leur bile s'allume; & ces bouillons dont
 s'enfle leur sang à la veüe ou à l'ouye des obiers difficiles
 & terribles: qu'au contraire on y iette de l'huile et du
 souphre, par les loüanges immodérées qu'on donne à
 cette humeur auueugle & precipitée, qu'on appelle d'un
 autre nom. De là viennent & plus souuent, que de l'au-
 tre extremité de la vaillance les mauuaises suites des
 bons Conseils: la perte de la vie, ou de la liberté des Prin-
 ces, la reuolution des Estats, et leur passage sous d'autres
 Maistres.

Je pourrois alleguer vne infinité d'exemples pour la
 confirmation de ce que ie viens de dire. Mais ie me con-
 tenteray d'en apporter vn fort illustre et fort celebre, que
 le siecle passé nous a fait voir. Il seruira à mon suiet, &
 ne sera pas peut estre desagreable au Lecteur. Seba-
 stien penultiesme Roy de Portugal, auant que ce Royau-
 me fust vny à la Couronne de Castille, estoit venu au
 monde avec les plus riches dons de nature que Prince y
 eust paru il y auoit long-temps. Ce que les Elemens four-
 nissent

P R E F A C E.

nissent de plus précieux, & que les Astres influent de plus admirable dans la generation des grands hommes, s'estoit rencontré en la sienne; & il ne manquoit au Portugal qu'un autre Aristote, pour faire de Sebastien un autre Alexandre. Mais cela luy manqua. Il estoit d'un courage fort ardent, & naturellement agité d'un excessif desir de gloire. Il falloit reprimer cette violence, & diminuer cette passion, comme on abat la gaillardisse des terres qui sont trop grasses. Au contraire on luy laisse prendre son cours: on le laisse aller de toute son impetuosité, & par un zele certainement bon, mais non pas assez prudent, de ceux qui le gouvernoient, de convertir ce grand Prince de valeur, à la destruction des Infidelles; On en flamme davantage ce qui estoit déjà trop chaud, & l'on pousse encore ce qui n'estoit que trop rapide. Les exercices plus perilleux estoient les divertissemens plus agréables de ce Prince; Et on les luy conseille. Il affectoit d'aller à la chasse pour y combattre les bestes les plus furieuses, & à la Mer pour y naviger pendant l'orage; Et on l'enlouë. Aussi l'évenement ne trompa point en cecy la portée de ses causes, & la conclusion fust telle qu'e le devoit s'engendrer de la nature des ses principes. Ce courage mal ordonné & mal conduit, luy fust funeste, & luy fit perdre la vie avec la bataille, à la journée de Tomita, qui fut la premiere occasion où il l'employa. Le Portugal en suite de cela changea de face & en tomba sous un ioug odieux, & sous une domination qui luy a du depuis esté rousjours insupportable.

ââ

P R E F A C E.

Encore est-il mal-aisé, de quelques remèdes qu'on se serue, de guerir tout à fait l'inclination qu'on a à la temerité, & d'empescher quoy qu'on fasse, que la vaillance que la chaleur du temperament enfle & sousleue, ne passe quelquefois ses bords & ne sorte de son lit, & du iuste milieu que la Prudence luy a assigné. Celle d'Alexandre le fait voir clairement; de qui on ne peut pas douter qu'il n'ait souuent violé les loix de cette vertu, que son grand Maistre luy auoit dictées; & qu'emporté de l'ardeur eternelle de combattre qui le brusloit, & de cet indomtable appetit de gloire dont il estoit possédé, Il ne se soit tantost ietté en des dangers, où il a failly de demeurer, & n'ait tantost conduit ses Armées en des acceffoires où elles fussent peries, si la fortune ne les eust sauuées, & où il eust esté vaincu, si les ennemis eussent eu la hardiesse de le vaincre.

Le feu Roy de Swede mesme, quelque grand esprit qu'il eust naturellement, & de quelques grandes lumieres acquises qu'il l'eust esclaire, ne peut pas tousiours gouverner son courage par la raison. Il ne pût pas tousiours s'empescher de tomber en cette extremité de vaillance, qui le mît quelquefois en danger d'estre tué ou fait prisonnier, & cousta quelquefois la vie à quantité de ses plus braues gens, en des occasions, où apparemment il y auoit bien à gagner des coups & à esperer la mort, mais où raisonnab'ement on ne pouuoit pas acquerir de l'honneur, ny attendre la victoire. L'attaque de la ville d'Ingolstat, & celle du Camp du Valsstain deuant Nu-

P R E F A C E.

remberg ; meritoient bien d'auoir le succès qu'elles eurent. Et le dessein du passage du Lek, si memorable par l'eu-
nement & si indicielx certes en la forme de l'exécution,
estoit peut-estre hors des regles de la veritable vaillance ;
& peut-estre qu'il ne luy eust pas esté plus heureux,
que le furent par apres les deux attaques dont nous ve-
nons de parler ; si la fortune qui ne pouuoit pas encore se
separer de ce Prince, ne l'eust fait reüssir, en faisant d'a-
bord blesser & retirer Tilly, par la retraite duquel tou-
te son Armee perdit courage, & ne songea plus ny à
combattre ny à se defendre, mais à fuir & à se sauuer.

Maïs la precipitation dont il vsa à Lutzen, où il n'a-
uoit besoin que d'un peu de patience pour vaincre, est
inexcusable, & il n'y a pas lieu de colorer ny de defendre
son procedé ; d'auoir sans necessité mis en hazard avec sa
personne tout le fruit de ses peines passées, & toutes les
esperances de sa future grandeur. Il faut auoüer que
la fortune qui l'auoir veu si semblable à Cesar & à
Alexandre, durant le cours de la vie ; y voulut mettre
de la difference à la mort, en le laissant perir par sa
faute. Encore Gaston de Foix est-il moins à blas-
mer, pour s'estre precipité en un peril manifeste, à la
journée de Raouene, & pour auoir souillé par sa mort
le gain de cette bataille. Car outre qu'il se trouuoit
alors en la fleur de la ieunesse, où l'impetuosité & la vio-
lence sont plus pardonnablees qu'en un âge plus mûr &
plus auancé ; La mort de ce Prince fut p'ustost l'effet d'un
soudain mouuement de courage, & d'une surprise de in-

P R E F A C E.

gement que le fruit d'une temerité premeditée, comme la mort du Roy de Suede.

Par là on peut voir combien est petite l'ambition, & ridicule la hardiesse de ces Generaux qui hazardent leur personne à toute sorte d'occasions, & mettent leur vie à tous les iours. Ils monstrent bien qu'ils ne l'estiment pas, au point qu'Aristote veut qu'un honeste homme la prise; puis qu'ils en font si bon marché, & puis qu'ils font tant d'ostentation & de parade du mespris de la mort, qui leur peut estre commune avec un homme vain ou avec un desesperé: Il semble par là qu'ils se sentent coupables, de ne pouuoir contribuer autre chose à la fonction de leur charge, & qu'ils confessent tacitement qu'ils n'ont pas les autres qualitez qui sont les grands Capitaines.

Le courage de ces gens icy doit bien auoir autre portée, & une autre eleuation que la resolution de braver la mort; quand on a des tesmoins & qu'on est esclairé de plusieurs endroits. Il doit assseurer de telle sorte la raison, qu'une surprise ne la trouble point, & que l'arriuée d'un accident impremedité ne la mette pas en desordre, & ne luy oste pas la liberté d'agir, & de songer aux moyens d'y remedier. Il ne doit pas seulement tenir au dessous de soy tout ce quiluy peut venir de dehors, de fascheux & de contraire; Mais il se doit encore rendre superieur de soy mesme: se faire maistre absolu de ses mouuemens: s'establir dispensateur souverain de sa propre force, & s'acquiescer la facilité de la retenir ou de la laisser aller selon qu'il en sera besoin. Il doit auoir de la fermeté & de la constance

P R E F A C E.

la constance dans les desseins bien concertez, & que le murmure des siens, ny les brauades des ennemis. ny les mauuais bruits qu'on fera courir, ny la longue patience qu'il faudra exercer, ny les autres difficultez qui pourront interuenir; ne soient pas capables de l'en esbranler, ny de luy faire quitter auant qu'il soit temps, vne assiete que la Raison aura choisie. Il doit estre fier & redoutables au milieu mesme des disgraces, & apres les pertes: Il doit demeurer debout, quand tout tombera autour de luy, & estre la seule chose qui ne puisse pas estre forcée, & qui eschappe aux victoires des Ennemis, & à la déroute des Armées:

Il y a certes des courages de cette trêpe & de cette force. Iamais homme n'a guere esté plus mal-heureux, ny plus souuent battu à la guerre, que Pierre Stroszy du tēps de nos peres, & iamais le malheur n'a fait moins de tort ny moins d'outrage à un hōme. Il ne diminueoit rien de sa hardiesse ny de son actiuité: Il ne luy faisoit point perdre créace parmi les gens de guerre: Il n'ostoit presque rien de sa reputation: Il n'auoit pas si tost fait naufrage, qu'il ne travailât à rallier les piéces de son debris: qu'il ne formât quelque nouuelle entreprise, & que bien-tost apres il ne fust prest à tenter derechef le sort des Armes, & à se commettre vne autre fois à la fortune. De sorte que les bōs succès que les ennemis obtenoient sur luy, n'asseuroient iamais leur repos, & soit qu'il vainquit, ou qu'il fust vaincu; Il les laissoit tousiours en cernelle. Personne n'ignore la magnanimité de l'Admiral de Cast.l'on, & comme il

P R E F A C E.

conserva son auihorité parmy les siens, & demeura formidable aux ennemis de son party, apres quatre batailles perduës.

Je me suis vn peu estendu sur le sujet de la vailance, à cause qu'il n'y a point de veru parmy nous, dont on falsifie si fort la nature, & dont on fasse de si mauuais portraits & si peu ressemblans à la réalité de la chose. Le desordre ne seroit pas fort grand, s'il n'y auoit que la seule intelligence de gasteë, & si ses erreurs n'estoient que de simple taches qui la ternissent. Mais le mal est qu'elles descendent aux facultez inferieures, & sont principes d'actions qui ruinent quelquefois l'Estat, & font souvent perdre mal à propos les particuliers. Cela ne manque gueres d'arriuer, quand elles gaignent l'esprit des Chefs des armées, & se meslent dans la conduite des premiers moteurs de ces corps, qui ressemblent au Char du Soleil des Poëtes, qui ne peut estre mal gouverné, ny sortir de la ligne sur laquelle il doit rouler sans que toute la nature s'altere, & qu'une partie du monde se brusle.

Venons aux autres connoissances, dont les grands hommes dont nous parlons, doiuent estre pourueus. Il est certain qu'ils doiuent auoir vne mediocre teinture des deux principales parties des Mathematiques, de la Geometrie & l'Aritmetique. Qu'ils ne doiuent point ignorer l'usage des Cartes, ny la maniere dont s'exerce l'Artillerie: qu'ils doiuent scauoir en general l'operation & les effets qu'ont coustume de produire les Artifices de feu, qui en sont des accessoires & des dependances: qu'ils

P R E F A C E.

doiuent auoir quelque notion des mécaniques, & estre capables de distinguer entre les propositions d'un Charlatan, qui ne seront soutenues que de son impudence, & de l'autorité de quelque crédule introducteur: & celles d'un habile ingénieur qui n'auancera rien qui ne soit probable, & qui ne paroisse possible. Par ce moyen ils eviteront deux extremités également dangereuses, où ils pourroient autrement tomber; ou de s'engager mal à propos à une des pense inutile; ou de fermer la bource quand il la faudroit ouvrir, à la confection des travaux nécessaires, & des ouvrages qui peuuent acourcir ou rendre aysée l'exécution de quelque importante entreprise.

L'économie n'est pas une science des moins nécessaires & des moins essentielles que doit auoir un grand Capitaine. Elle a pour fin la subsistance des armées, & pour exercice le soin de les faire viure, & de les mettre à couvert autant qu'il se peut des iniures du temps, & de la violence des saisons. Elle est la base & le soutien de toutes les vertus, & de toutes les fonctions militaires. Sans elle la vaillance devient sterile, & les plus courageux & aguerris soldats du monde, ne sauroient se défendre avec tout leur courage & toute leur expérience contre la faim quand elle les attaque, ny résister à un ieusne de deux fois vingt & quatre heures, quand ils sont contraincs de le faire. C'est la seule victoire qui ne conste rien aux ennemis, & qu'on leur donne gratuitement quand une armée se détruit à faueur de viures. Ils acherient toutes les autres victoires, & ne les obtiennent d'ordinaire

P R E F A C E.

que par vne grande effusion de leur sang, & par la mort de plusieurs de leurs meilleurs hommes. Au contraire c'est vne chose deplorable que de belles & florissantes armées se ruinent d'elles mesmes, & se deffacent sans rien faire: que les vaillans ne méurent pas plus honnestement que les lasches, & que la faim tue quelquefois plus de gens en vne seule expédition, que ne feroient les ennemis au gain de plusieurs batailles. C'est pourquoy le premier & plus violent soin, qui doit occuper vn General; est celuy dont nous venons de parler, & l'Admiral de Chastillon auoit raison de dire, qu'une armée estoit vn Monstre, qu'il falloit tousiours commencer à former par le ventre, & penser à le nourrir auant que songer à le faire traualler.

Quand ie parle de faire viure vne armée: J'entens encore que c'est du deuoir d'un General de pouruoir aussi bien à la nourriture des cheuaux, qu'à la nourriture des hommes, & de n'estre pas moins curieux de prendre des postes & d'establiir des Conuois, pour l'abondance & la seureté du fourrage, que pour l'abondance & la seureté des viures. Ces soins neantmoins si inéuitables pour bien reussir, & si nécessaires pour obtenir enfin la victoire, ne peuuent pas entrer en la teste de tous les Generaux. Il y en a qui ont l'Ames si foible & si tendre, qu'ils ne s'aueroient se charger d'un faix si pesant, ny souffrir la piquette de ces espines. D'autres croitroient descendre trop bas & se faire tort, que de s'amuser à des choses si petites & si sombres, de si peu de bruit & si peu de montre. Ils ne veulent

P R E F A C E.

veulent rien faire qui ne soit esclaire' d'un grand iour, ny s'exercer qu'en des Champs spacieux, & sur des Carrieres magnifiques. La disposition d'un siege : l'ordre d'une bataille : le passage d'une riuere à la face d'une Armée qui s'y oppose, & semblables occasions qui éclatent sont les seuls objets dignes de l'attention de leur esprit, & de leur inquietude. Mais de faire des économes dans leurs Armées, & de Chefs principaux en deuenir les Maistres d'Hostels. De s'aller occuper d'abord qu'on prend un logement, ou qu'on s'empare d'une place, à empêcher qu'il ne se fasse point de gâst du fourrage ny des viures, & que ce qui deuroit durer un mois, ne se consume pas de trois iours. D'en faire dresser des Inventaires : d'en faire faire la distribution avec proportion & iustesse : de les faire filer, & de les mesnager comme des choses sacrées; ce seroit à leur auius prostituer leur Dignité, & profaner leur personne. Toutefois ils ne considerent pas, que la victoire est une chose excellente & si rare; qu'il n'y a rien de bas ny de vil, de tout ce qui peut seruir à la produire, & qu'elle ressemble au Char du Soleil des Poëtes dont nous auons desja parlé; en la structure duquel il n'entre rien que de riche, & n'y a point de piece qui ne soit faite de quelque matiere precieuse.

La mesme science a encor. une branche que nous auons designée, & qui est moins souuent en la puissance des Generaux que la premiere. C'est la mesure & la durée des Campagnes que les armées doiuent faire. Il

P R E F A C E.

est certain qu'elles ne doiuent pas estre trop longues, ny s'estendre fort auant dans l'hyuer, si l'on n'y est contraint par vne necessité ineuitable, ou obligé par quelque puissante consideration; comme pour acheuer vn siege qui aura esté plus long qu'on ne s'estoit imaginé: pour s'opposer à vne inuasion que l'ennemy sera prest de faire; pour executer quelque entreprise dont le succès pourra largement reparer ce qu'on pert & ce qu'on hazarde; pour reprendre vne place, du recouurement de laquelle depend le salut de tout vn Estat, ou le repos de quelque Prouince, comme les Hollandois ont continué durant l'hyuer le siege du Fort de S Rein, & nous auons repris Corbie. Hors de là il faut mestre de bonne heure l'armée en garnison, si l'on veut qu'elle serue vne autre année; & se souuenir qu'il n'y a rien dans vn Estat, qui merite d'estre conserué si chèrement que les vieilles troupes, ny dont on doine souffrir plus mal-volontiers l'affoiblissement & la diminution. Il ne se fait point à la guerre d'action considerable qu'elles ne fassent, & le Duc d'Alue disoit, qu'elles estoient les nerfs & les os, c'est à dire la vigueur & la solidité des armées, & les Nouuelles la chair qui seruidit à les estendre & à les parer: mais qui leur apportoit peu d'actiuité & de force. Outre qu'il n'est que trop iuste, que le repos succede à la peine & qu'on se delasse après auoir trauaillé. C'est le commun destin des choses sublunaires, que cette vifsiitude, & il n'y a que les ciens à cause qu'ils sont inalterables, dont le mouuement n'ait point de bout, & dont l'action soit continué.

P R E F A C E.

Les conditions naturelles & acquises, dont nous avons parlé jusques icy, ne suffisent pas pour l'entiere constitution, & pour l'accompagnement complet de la personne d'un grand Capitaine. Il est encore necessaire, qu'il soit versé au moins mediocrement en la Politique. Je ne dis pas pour estre admis dans le Cabinet, & pour monter à ce haut Tribunal du Prince, où se donnent les Arrests de vie & de mort contre les Estrangers; C'est à dire, où se prennent les resolutions d'entretenir quelque paix, ou de declarer quelque guerre. Pour cecy, il ne faut pas seulement avoir appris les Elemens, & éfleuré la surface de la science civile. Il faut avoir pénétré jusques dans son interieur: Il faut avoir trouué ce qu'elle a de plus caché & de plus secret, & mesuré la profondeur & l'estendue de ses Mysteres. Je veux dire outre cela, qu'elle doit enuoyer dans l'exécution de ses Arrests, & dans l'exercice de la guerre, quelques rayons de salumiere, & quelque influence de sa vertu, & que ce n'est pas assez à un General d'Armée, de sçavoir attaquer des places, & se battre à la campagne s'il n'a encore par exemple, l'Art d'entretenir les amis qui seruent dans certe volonté, de peur qu'ils ne se refroidissent: & ceux qui sont neutres dans leur indifférence; de peur qu'ils ne passent de l'autre costé. Si apres qu'il se sera rendu Maistre de quelque pays ou de quelque ville; Il ne sçait conserver sa conqueste, & se prenaloir de sa victoire: S'il n'a l'esprit de discernement, pour iuger du traitement qu'il deura faire aux Habitans; S'il est plus expédient d'user en

P R E F A C E.

leur endroit d'indulgence que de rigueur, & de les contenir avec vn frein doux, qu'avec vn frein rude. Si lors qu'il sera contraint de passer par quelque Pays amy; Il n'est capable de bien resoudre, s'il demandera le passage ou s'il le prendra, & de iuger de la consequence du refus, & de celle de l'vsurpation. S'il ne peut à peu près inferer par coniecture, & par la connoissance qu'il aura des interests des ennemis & de leurs maximes; quels dessein i's prendront en des occasions douteuses, & s'ils tourneront leurs forces d'un costé plustost que de l'autre: ou bien en quelle part ils feront la plus grande & plus forte impression, & en quelle la plus foible & la plus legere, pour prendre selon cela ses mesures. Ces connoissances & autres semblables, sont des branches & des ruisseaux qui sortent & coulent de la Politique.

Que cette conionction en un mesme sujet, & mesme en degre eminent de l'Art militaire & de la science civile, Soit non seulement possible, mais encore assez ordinaire, l'experience de tous les peuples & de tous les âges nous le fait voir. Des mesmes personnes qui composoient le Senat de l'ancienne Rome, se tiroient les Capitaines qui commandoient les armées de la Republique, & l'incomparable Conseiller de Pyrrhus, luy fit vne Relation fort fidelle, quand il luy raconta qu'il auoit remarqué dans ce venerable & Auguste corps, autant de Rois, que de Senateurs. Aux republiques de Grece, on ne separoit pas en deux Classes ceux qui estoient destinez au gouuernement des Armes, & à l'administration des affaires.

P R E F A C E.

affaires. Chez les Turcs, celui qui est le Chef des armes l'est aussi de la Justice, & cette double fonction s'assemble & unit en la dignité de Grand Visir, comme tout le monde sçait. En Espagne le Conseil d'Estat, n'est presque composé que de gens d'espée ou d'Eglise, & il y en a fort peu de ceux que nous appellons de Robe longue & qu'ils appellent Letrados. Parmi nous le maniment des affaires & la direction de la guerre ont souvent esté l'Employ d'une mesme personne, & on a veu dans les Negotiations de la paix des Connestables de Montmorency, & des Mareschaux de S. André, aussi bien que des Cardinaux de Lorraine, des Mornilliers, & des Aubespines.

Il ne se peut dire quel grand homme d'Estat estoit l'Admiral de Chastillon, & à quel degré de gloire il fust parvenu par là, si sa Politique eust changé d'obiet, & n'eust pas esté contraire à son Prince & funeste à sa Patrie. Ce fust vn des Autheurs de la Reuolution qui s'est faite au Pays bas, & vn des Architectes de la Republique, que le Prince d'Orange y a erigée. Durant sa prison de Flandres, & pendant le séjour de l'autre en France; Il luy ayda à tracer la figure & dresser le plan de cet Edifice, qui n'est pas encore bien affermy, apres tant d'années de travail, & tant de Millions de despenſe. Il eust fait en France la mesme chose, s'il y eust trouué la matiere aussi disposée que là, à recevoir la mesme forme, & si la presence du Prince, & les grands hommes qu'il eut en teste n'eussent rendu vains ses

P R E F A C E.

efforts, & demoly tousiours ce qu'il bastissoit. Il se glorifioit quelques iours auant sa mort, qu'il auoit cet auantage sur Alexandre & sur Cesar, de se trouuer apres la perte de quatre batailles, posseder le Roy à qui il auoit tant fait de peine, & regner dans le Cabinet, sur ceux qui l'auoient si mal traité à la campagne. En effet quelque dessein qu'on eust eu de l'attirer à la Cour pour le perdre, si tant est qu'on en eust eu, & quelques filets qu'on eust tendus pour l'attraper, Il est certain qu'il s'estoit tellement saisi de l'esprit de Charles, & acquis vn si grand Ascendant sur son humeur; que si la ialousie de la Reyne Mere & du Duc d'Anjou, n'eussent precipité la resolution qu'ils auoient prise de se deffaire de luy; apparemment il demeueroit le Maistre de Charles.

Que si la Republique de Venise n'a point voulu qu'aucun des membres qui la forment & constituent, eust la direction de ses Armées de terre, & si elle en laisse la conduite à des Chefs estrangers qu'elle prend à son service; Cela vient de la ialousie qu'elle a de se conseruer plus grande que Prince du monde, & du desir de destourner de chez soy, toutes les sources des guerres Ciuiles. Voila pourquoy, Elle ne met pas ses armes entre les mains de ses Citoyens, de peur que l'ambition ne leur inspirast la volonté de les tourner contre leur Patrie, & que l'autorité qu'ils se pourroient aquerir sur les gens de guerre, & le grand nombre d'amis & de creatures qu'ils auroient ou se pourroient faire; ne leur donnast le moyen d'executer cette pernicieuse volonté, &

P R E F A C E.

de changer l'égalité en laquelle ils naissent en vne supériorité qu'ils élèueroient sur les ruines de l'Estat, comme il est arriué à la Republique de Rome. Mais cela ne conclud rien contre la proposition que j'ay auancée, & il ne s'en ensuit autre chose, sinon qu'il n'est pas nécessaire que tous les Hommes d'Estat soient gens de guerre, & non pas qu'un grand Capitaine ne doine estre Homme d'Estat, au moins médiocrement.

Enfin on naist Soldat, mais on devient Capitaine, & la guerre est vn Art, au sommet duquel on ne vole pas, mais on y grimpe. C'est à dire qu'on y monte avec beaucoup de peine, & qu'on n'y parvient que peu à peu, & par succession de temps. C'est vne autre que la Nature commence, que l'Estude peut auancer, mais à qui l'expérience donne la perfection, & met la couronne. Que si l'on oppose à ceter Maxime l'exemple de Lucullus ou celui de Spinola, qui ont commencé ce mestier par où les autres le finissent: qui ont esté Capitaines aussi tost que soldats, & commandé auant qu'auoir obey. Je responds que ces exemples sont si rares, qu'on en voit dans le monde moins souuent que des Phenix, & que chaque siecle n'en porte pas vn. Et partant si les dons de la Nature & les succez de l'estude ont dispensé quelqu'un du besoin de l'expérience, pour estre vn grand Capitaine, & de cetter loy generale qui moine par degrez au bien, il ne faut pas qu'un autre pretende à vn Priuilege si extraordinaire, s'il ne se sent aussi d'extraordinaires qualitez pour l'obtenir, ny qu'il vaille faire vne chose commune, de

P R E F A C E.

ce qui n'adriue que contre le cours des choses.

En effect qui considérera les merueilles que Plutarque escrit, & que Ciceron raconte de la personne de Lucullus, & les auantages naturels qu'il luy attribuent, (principalement le dernier) si prodigieux, qu'ils seroient incroyables, si des Auteurs moins croyables les asseroient; la grande ardeur & l'extreme passion avec laquelle il s'attacha aux fonctions de sa charge, & la peine qu'il prit à s'en faire instruire, ne trouuera point estrange qu'il y ait fait vn progres si viste & si rapide, & qu'il soit si tost paruenü à vn lieu, où les autres n'arriuent que tard, & ne viennent que l'enient. Quire que la profession des Armes estant à Rome si commune qu'elle estoit generalement diffuse sur tous les membres de la Republique; il se faisoit sur ce suiet des discours continuels & des conferences frequentes, qui en laissoient de grandes impressions à ceux qui les escoüoient. Et comme pour l'Estude de l'Eloquence, qui estoit l'autre fameux exercice des Romains, la iueneſſe qui en estoit amoureuse, rendoit des soins & de la suicion aux Orateurs celebres, qui promoient p'aisir de l'instruire, & de luy faire part des fructs de leur travail, & de la conduire de leurs actions: Oraïres. Il y a de mesme de l'apparence, que ceux qui auoient dans l'esprit la passion de la guerre, & qui aspiroient à la gloire des Armes, se rendoient assidus auprès des grands Capitaines, pour les en ouyr discourir, & pour recueillir de leur bouche le resultat de leurs observations, & de leur experience. Il arriuoit de tout cela, que
comme

P R E F A C E.

comme ceux qui marchent au Soleil se haſtent ſans qu'ils y penſent ; Ainſi dans l'air de Rome , & dans l'ardeur martiale qui regnoit en cette ville , tous les particuliers ſe rendoient meſme ſans y ſonger , intelligens en l'Art militaire , & en prenoient vne fort viue teinture ; quand meſme ils n'euffent pas eu deſſein de la prendre. De ſorte qu'il ne faut pas s'eſtonner , ſ'ils y reuſſiſſoient plus promptement que ceux qui manquoient de ces auances , quand ils deſcendoient à la pratique & qu'ils reduiſoient en acte , ce qu'ils auoient en vne puiſſance ſi proche , & en vne derniere diſpoſition comme parlent les Philoſophes.

On peut dire auſſi du Marquis de Spinola , qu'il falloit neceſſairement que la nature l'eut preparé avec des ſoins tres-particuliers pour commander des Armées , & qu'il eut rendu parfaite cette excellente preparation par vne excellente culture. En effet outre la meditation continue qu'il faiſoit ſur vn meſtier , auquel il ſe deſtinoit de longue main ; Il auoit eu pour Precepteur Pompée Juſtinian Capitaine conſommé aux guerres de Flandres , & que par la cōmunication ils'eſtoit enrichy de la deſpoille , & auoit tiré l'eſprit & l'eſſence de la capacité de ce grand homme. Ajouſtez à cela que Lucullus & Spino-la'eſtoient venus au commandement d'armées fort diſciplinées & fort aguerries , & pouruenus d'Officiers fort intelligens & fort experimenter , & par conſequent qu'ils auoient le meſme auantage pour les faire bien agir , que ceux qui ont à monter des cheuaux extremement

P R E F A C E.

adroits & parfaitement aiustez, pour s'en servir en quelque occasion. Tellement que l'exemple de ces deux grands Personnages, ne peut estre tiré en preiugé ny en imitation pour d'autres, qui n'auront pas les mesmes qualitez qu'eux, & ne se rencontreront pas en des conionctures aussi fauorables.

Il est vray que cette regle n'est pas si generale, qu'elle ne souffre encore quelque exception, & il est pour le moins indubitable que les Souuerains en sont exempts, & qu'ils ne peuvent estre compris dans son estenduë. Ceux-cy n'ayent Capitaines, cōme tous les autres qui sont sous eux de profession militaire doiuent naistre soldars, & cette fonction leur est si propre & si naturelle comme nous l'auons prouué cy-dessus; qu'ils ne doiuent attendre ny experience, ny temps de probation pour l'exercer. On en peut encore dispenser ceux qui sont de leur sang, aumoins quand ils sont les plus proches. Cette proximité leur apporte tant de veneration, & leur gagne tant d'amour dans l'esprit des gens de guerre; que si leurs vœux n'y resistent, le seruice se fait sous eux plus religieusement & plus gayement que sous les Chefs qui leur sont inferieurs en naissance, bien qu'ils leur soient superieurs en merite & qu'ils les surpassent en capacité. Cela pourtant ne s'est pas tousiours pratiqué parmy nous, & l'on a veu du temps de nos Peres, François I. enuoyer le Dauphin, qui fut du de puis Henry II. faire ses premieres armes en Prouence sous le Connestable de Montmorancy, & de nos Princes du sang passer les Monts,

P R E F A C E.

pour servir sous le Marechal de Brissac, pour apprendre le mestier en vne si fameuse Escole.

25

Enfin il y a quelquefois des personnes si cheres au Prince, & sur lesquelles se fait vne si large emanation de sa faueur & de sa puissance; qu'on n'y requiert pas tant d'experiance qu'en d'autres, pour commander les armées. L'abondance de toutes choses qu'ils y font venir: la grande suite de braues gens qu'ils tirent apres eux, bref l'experiance d'autrui, dont leur conduite est esclairée; reparent avec auantage le defect de la leur propre. Hors delà personne ne doit presumer, de s'exempter del ordre receu, ny de sortir de la loy generale; qui ne peut estre violée, que le seruice du Prince ne soit fort hazardé, & que ceux qui l'entreprennent ne courent fortune de payer de leur honneur, vne vanité si mal digerée.

Ces choses esclaircies, & ces fondemens posez; Il me sera aisé d'esleuer là dessus l'Eloge d'un homme, qui tenant de sa Naissance l'obligation de s'appliquer à la plus noble & la plus illustre de toutes les professions de la vie; s'y est appliqué avec tant d'ardeur, & a cultivé avec tant de soin les semences que la Nature en auoit ietées dans son ame; qu'on peut dire sans le flatter, qu'il n'y a pas vne des conditions qui font les grands Capitaines, qu'il n'en ait receuë, ou qu'il ne se soit acquise. Je ne scay si ie dois parler icy de la Noblesse du sang, puis que ce n'est pas vn principe necessaire de vertu & de la grandeur de la Naissance, puis qu'elle n'est pas tousiours vne source de grandes actions, ny vn Astre de genereuses in-

P R E F A C E.

fluences. Toutefois puis que les Ancestres transmettent souvent avec leur sang, le germe de leurs mœurs à leurs Descendans: puis que la grandeur en laquelle on naît, esleve d'ordinaire l'Âme, & l'acoustume aux pensées hautes & aux desirs magnanimes: puis que l'Image de la vie des Predecesseurs, & la splendeur de la gloire qu'il ont. meritée; doiuent exciter leur posterité à les imiter, & à suivre les traces qu'ils luy ont marquées; Il ne faut pas laisser de dire que cette faueur de fortune, & ces avantages d'Origine, n'ont pas manqué à la personne dont ie parle, & que le Tige dont il est sorty ayant esté souverain, & fleury dans le monde il y a plusieurs siècles. Il s'y est ent tanté de rameaux des premieres Maisons de la Chrestienté; qu'il n'a pû tourner les yeux derriere soy, & se réfléchir sur le passé: ny regarder le present; & ce qu'il y a de plus releué dans l'Europe; qu'il n'ait veu de tous costez des suiets capables de le piquer d'un grand desir de ne passer pas sa vie dans l'obscurité, & d'aionster encore de nouveaux rayons à la lumiere de tant Alliances.

Aussi est il vray que cette noble passion, est la seule dont iamais il ait esté viuement espris, & que la Nature ou l'Education, ou l'Estude de la sagesse, l'ont purifié de toutes les autres qui naissent de l'erreur de l'Imagination, ou de la contagion de la matiere: de celles qui font follement courir apres un peu de terre que le Soleil a curieusement preparée, ou qui noyent & estouffent l'esprit dans le Corps, ou qui l'amollissent & le fondent par la volupté.

Outre

P R E F A C E.

26

Oltre cela, cette double temperance a seruy de rempart contre les maladies, à cét exquis temperament, & à cette rare bonté de corps dans laquelle il est nay; comme l'exercice qu'il a tousiours fait, en a chassé la mollesse & la langueur que produit l'oyssiveté, & luy a donné vne trempe capable de soustenir les plus longues & plus violentes contentions de l'esprit, & les plus insupportables fatigues & incommoditez de la guerre.

Qu'on ne s'imagine pas pourtant que la gloire dont ie l'ay figuré passionné, soit la principale fin pour laquelle il travaille. Il a encore vne plus noble visée: il connoit encore quelque chose plus digne de son amour & de ses poursuites. L'obiet qui le charme davantage, & qui le blesse le plus profondement, s'il m'est permis de le dire ainsi est la vertu. Mais il est vray qu'il ne l'a regardé pas toute seule: qu'il ne la considere pas sans aucune suite, qu'il se laisse encore toucher au bel esclat qui en rejallit, & à la bonne odeur qui en exhalle. En vn mot, qu'apres elle il recherche la gloire, & poursuit cette recompense du bien que la Philosophie conseille, & que la Religion ne defend pas de poursuivre. Quant aux autres obiets qui ne sont pas d'un ordre spirituel, ny des dependances de la vertu comme est la gloire; C'est vne chose constante, ou qu'il ne s'en est iamais piqué, ou qu'il les a tousiours méprisez.

Mais afin qu'on ne pense pas que ie fasse icy le Panegyriste plustost qui l'Historien, & que mon discours soit de la nature de certains portraits qu'on a esté plus cu-

āāā

P R E F A C E.

rieux de faire beaux, que de faire ressembler : afin qu'on ne s'imagine pas que i'aye p'ustost eu dessein d'éblouyr par les lumieres de l'Oraison, que de persuader par la verité des choses ; Je viens aux preuues les plus simples & les moins artificielles qui la confirment, qui sont les faits & les exemples. Pour demonstrier donc ce que i'ay dit, & pour faire voir encore que tous les lineaments & tous les traits, dont se compose la figure d'un grand Capitaine, que i'ay tracée cy-dessus, se trouuent en celuy de qui ie parle ; Je commenceray par ce qui l'acheue & la finit, qui est l'Experience. Celle-cy ne peut estre ny pleine ny consommée, si l'on n'est entré de bonne heure dans le mestier : si l'on n'y a demeuré long-temps : si l'on n'y a veu un grand nombre & vne grande variété d'occasions : si l'on n'y a exercé des fonctions différentes.

Or il est certain qu'aucune de ces conditions ne manque à Monsieur de Rohan. Il fit ses premieres armes sur le declin de la ligue, & lors que la Rebellion à qui elle auoit seruy de manteau, rendoit les abois ou au moins ne respiroit qu'en vn coin de la Bretagne. Mais ce fut lors aussi que la fortune exerceoit ses plus grandes violences contre le feu Roy, & faisoit ses derniers efforts pour le faire descendre du Throsne où elle auoit si vainement trauaillé à l'empescher de monter. Ce fut lors qu'apres la prise de Cambray, de six places de Picardie, arriuée en peu de temps ; pour combler l'iniure & aionter la honte à la perte, Hernant Teillo surprit avec vne poignée de gens ; & avec des Noix, vne ville qui estoit gardée

P R E F A C E.

par vn grand peuple armé, & dont les Remparts & les Bastions estoient bordezz d'Artillerie. Et par consequent ce fut en vne saison, où la vertu de Henry le Grand estoit obligée à déployer ce qu'elle auoit de plus fort : où les belles occasions estoient frequentes, & où finalement se fit ce memorable siege qui fut le deshonneur de l'Espagne, Chef d'œuvre du Marechal de Biron, de la sagesse du Duc de Mayenne, & de la magnanimité de Henry.

Après que la France fut en repos, & que le Traité de Vervins eust arresté l'agitation dont elle estoit trauaillée; M. de Rohan passa aux Pays-bas, où le Theatre de la guerre estoit encore ouuert, & sur lequel paroissoient le Comte Maurice & le Marquis de Spinola avec vne gloire presque pareille. Sur tout l'art d'assiéger les places y fleurissoit plus qu'en lieu du monde. Cét art, dis-je, qui ayant esté negligé depuis les Romains, & s'étant enseuely dans l'ignorance des siècles suiuaus, comme ces fleuves qui se perdent sous la terre pour en ressortir; ne s'estoit monstré (excepté vn rayon qui en parût sous Castruccio Castracani au siege de Pistoie) que sur la fin du siècle passé, où le Duc de Parme commença à le rétablir, & le feu Prince d'Orange luy redonna son ancienne forme, & tout le lustre qu'il auoit sous ses premiers Maîtres. Combien donc M. de Rohan peut auoir profité sous la discipline opposée de ces deux grands hommes dont nous parlons, & les belles choses qu'il peut auoir veues dans la concurrence où ils estoient entrez, non seulement d'Interests, mais encore de Reputation; i' n'y

n y
auoit
double
circon-
uallatiō
contre
la ville
& contre
le se-
gours,
comme
à celui
d'Ale-
xia.

P R E F A C E.

a personne qui ne le puisse iuger. Il fut du depuis en Piedmont à la seconde guerre que les Espagnols y allumerent apres la mort du feu Roy, & trouuailla sous le Duc de Sauoye, & le Mareschal d'Esdiuieres; quand ils prenoient la reuanche de la perte de Vercel, & que leurs Armes pouuoient penetrer iusqu'aux portes de Milan, si quelque grande consideration n'en eust arresté le cours du costé de France, & fait reuenir le vaisseau qui auoit le vent fort fauorable, & qui nauigeoit fort heureusement. Si M. de Rohan n'a pas appris le mestier sous de tels maistres, & s'il n'y a point fait des progresz considerables, Il faut, ou qu'il soit stupide, & qu'il ait l'esprit fort obtus, bien qu'il l'ait excellent & rare comme tout le monde le reconnoit: ou qu'il n'y ait point apporté de l'attention ny du soin, quoy qu'il soit, vray, qu'il s'y est tousiours appliqué tout entier, & que personne n'y a iamais vacqué avec vne plus grande liberté d'Ame.

Bien qu'en ces occasions il n'ait esté que volontaire, & seulement pour s'instruire, ou pour acquerir de l'honneur; Il y a eu pourtant des interualles où il a eu Charge, & où il a cōmandé, tantost dans l'Infanterie, & tantost dans la Cauallerie. Le feu Roy qui estoit vn si grand iuge du merite des hommes, & vn si digne Estimateur de la Vertu, particulierement de la militaire; L'auoit choisi pour estre General des Suisses en l'expedition qu'il meditoit en Allemagne, & pour le mettre à la teste de ces bataillons, dont il faisoit la base de son armée, & qu'il vouloit opposer à la vieille Infanterie des Pays-Bas.

Après

P R E F A C E.

Après la mort de Henry, il exerça cette charge à la guerre de Iuëllers, où se terminerent ces formidables preparatifs qui deuoient changer la face de l'Europe, & humilier cette superbe Maison, qui opprime ou qui menace tout ce qu'il y a d'independant & de libre. Du depuis il fit la charge de la Cauallerie legere, en la seconde broüillerie qui s'éleua parmy nous, sous le Regence de la Reine Mere.

Ces espreuues & ces emplois ont esté la matiere dont s'est formée son experience, & les eschellons par où il est monté au faiste du mestier, qui est le commandement general des Armées. Si ie pouuois parler icy du commencement auquel il l'a exercé sans rompre vne Amnistie, qui ne doit iamais estre violée; & sans oster le voile de deuant vn suiet, dont le Roy a voulu qu'il fust couuert; le me prometirois de faire confesser qu'il est malaisé d'en rencontrer, où tant de rares qualitez ayent concouru, & où elles ayent agy avec plus d'ordre & de conuenance. On y verroit paroistre la prudence & le courage: les stratagemes & la force ouuerte, la patience & la promptitude, la preuoyance & les resolutions soudaines: Ce qu'on doit commettre au hazard, & ce qu'il faut soustraire à la puissance de la fortune. On y verroit vne adresse merueilleuse, & des inuentions particulieres à mettre sur pied des troupes, & à les faire subsister, à les retenir dans le seruice sans argent, & avec vn lien si foible & vn nœu si lasche que la seule volonté. On y verroit conduire la guerre sous toutes les formes & avec

ë ë ë

P R E F A C E.

route la diversité qu'on la peut faire. On y remarquero des secours, des sieges & des surprises de places. L'art de faire marcher, loger, & combattre les Armées; de les faire agir selon la quantité de forces qu'elles contiennent à proportion de celles des ennemis, & suivant la nature du pays où elles travaillent. On y remarqueroit vne égale capacité & vne facilité incroyable, à faire toutes les principales fonctions qui se font dans vne armée. On y verroit vn homme, non seulement occupé à se défendre de ses Ennemis, & à résister à grandes forces; mais encore à s'asseurer des siens: à les retenir de son coste, & à les persuader ou à les contraindre de le suivre. On le verroit souvent réduit à ce dur & triste party, de convertir la nécessité en vertu, & ne pouuant pas faire ce qu'il eust voulu, d'ajuster son action à l'estat de ses affaires, de se retrancher là dedans, & d'y faire bonne mine. On y verroit des Exemples de cette audace Heroïque, & de cette Assurance intrepide, avec laquelle les grands hommes ont quelque fois entrepris des choses, qui ne pouuoient estre louées que par l'euénement; mais de l'euénement desquelles dependoit absolument le salut de leur personne, ou le bon-heur de leurs affaires: avec laquelle Cesar n'ayant qu'une simple Chaloupe, somma Domitius de se rendre, qui nauigeoit avec sept grands vaisseaux de guerre: avec laquelle le dernier Duc Guise pour donner de la Reputatiõ à la naissance de la ligue par quelque coup qui fit du bruit, & pour auoir vne frontiere ouuerte pour les secours estrangers; se présenta luy douzième sur le Pont.

P R E F A C E.

leuis d'une des portes de Mezieres: commanda au Capitaines de la Garde de l'introduire dedans: vit fermer sur luy sans s'étonner toutes les portes de la ville: caballa le peuple: harangua les Bourgeois, & leur persuada de faire ce qu'il vouloit, & d'acceptir la Garnison qu'il leur auoit preparée. Finalement on verroit que toutes ces qualitez semblent n'auoir esté si hautes & si remarquables, que pour rendre vn Hommage plus auguste à la vertu du Roy, sous laquelle elles se sont humiliées, & pour embellir sa gloire, par vne victoire qui estoit réservée à sa presence seule, & à cette rare felicité qui l'a tousiours accompagnée.

Je ne m'étendray pas dauantage sur vn sujet que ie n'ay voulu que designer, & sur lequel i'ay eu plutôt intention de couler, que de m'arrester. I'ajouteray seulement que quelque dessein qu'ait eü M. de Rohan de s'y embarquer, & de quelque vent qu'il y ait esté poussé, ce n'a esté ny l'inquietude de brouiller qui tourmente quelquefois les Grands, puis qu'il s'opposa de toutes ses forces aux Perturbateurs de la Paix, & aux Resolutions seditieuses qui se prirent à la Rochelle: ny l'Appetit des Richesses; qu'apparemment il ne pouuoit assouuir, quand mesme il en eust esté possédé, dans la condition d'un Parry, à la defence duquel les Riches ne vouloient entrer, & d'où s'il eust esté agité d'une si basse tentation que celle du bien, & prenable par vn appas si facile; Il s'est trouué des Coniunctures qu'on l'eust détaché volontiers à force d'argent & de Recompenses.

P R E F A C E.

Voyons-le maintenant en vn Employ plus plausible, & plus conforme à son inclination. Je ne parleray point de ce qu'il a fait pour le service du Roy en son Ambassade des Suisses, ny des forces Imperialles destinées contre les Grisons, qu'il arresta sur le bord du Rhin avec vne poignée de gens ramasséz à la haste, ralliez à la Huguenote comme luy-mesme disoit. Je le considereray seulement à la teste d'une Armee Royale, & agissant dans cette illustre querelle, qui exerce autour d'lay les plus grandes Maisons de l'Europe, & qui a cousté tant de sang & tant de vies, à la malheureuse & desolée Chrestienté. Le premier Champ où il a paru en cette qualité, a esté l'Alsace; Et bien que ce qu'il auoit ordre d'y faire, ne fust qu'une feinte, & qu'il luy fallut menacer là, pour assener plus seurement ses coups en vn autre endroit: Si est-ce que l'entrée que le Duc Charles y fit, l'obligea de tourner teste vers luy, & de s'aller opposer à ses desseins, qui ne furent point, comme l'euénement le monstra; ny d'accepter la bataille qui luy fut plusieurs fois présentée: ny d'entreprendre sur quelque place, ce qui l'ay'eust mal reussy: ny de s'assurer de quelque bon poste pour nourrir la guerre en ce pays-là; Mais de faire voir de ga le Rhin qu'il n'estoit pas mort, & d'apprendre le chemin pour y retourner vne autre fois; qu'il y pourroit estre mieux receu.

Du depuis il ne se passa rien de memorable dans l'Alsace, que le dessein que fit Mercy, de surprendre & d'enleuer le principal quartier de nostre Canallerie, &c
qui

P R E F A C E.

qui faillit de luy rëussir. Ce n'est pas que Monsieur de Roban n'en eust preueu le danger, & enuoyé des Ordres reiterez à celuy qui commandoit en quartier, de faire bonne garde, & d'aller mesme au deuant des Ennemis du costé où ils pouuoient venir à luy. Mais deux heures de sommeil plus qu'il ne s'estoit proposé, faillirent de luy estre fatales, & donnerent moyen à Mercy d'arriuer au quartier & d'y mettre d'abord tout en combustion & en desordre. Pendant cela nos gens qui estoient tous enuolopez dans le mesme danger, ne prirent pas tous le mesme chemin pour en sortir; & les vns se preparerent à repousser l'ennemy, & à luy arracher d'entre les mains ce commencement de Victoire, & les autres se sauuerent au quartier du General qui n'estoit pas loin, & ne laisserent rien à dire sur cet accident, de tout ce qu'une peur nocturne, & le desir de pallier une fuite lasche, leur pût figurer de sinistre. Pour Monsieur de Roban: il est fort vray, & ie le sçay avec certitude qu'il receut cette nouuelle avec autant de froideur que si elle luy eust esté indifferente, & qu'on ne vit paroistre en luy aucun signe d'émotion que contre ceux qui auoient fuy, ou contre ceux qui osèrent luy proposer des Conseils timides. La conclusion fut qu'apres auoir enuoyé deuant plusieurs Tambours, par un stratageme qu'il auoit veu pratiquer à Spínola, & qui ne nous fut pas inutile, & rallié ce qu'il auoit de forces aupres de luy; Il alla aux Ennemis qui commençoient à prendre la fuite, & qui emmenerent bien quelques Cheuaux apres auoir tué en fou dix de nos

P R E F A C E.

*Caualliers ; Mais qui laissent beaucoup plus des leurs
morts ou prisonniers , au combat ou en la retraite.*

*Vn peu apres cette Occasion je fis le passage de nostre
Armée par les Suisses , & en mesme temps la surprise
de la Valtelline. La forme de ce passage est si rare &
si inouïe ; que la Bienfaisance me deffend de la toucher
legerement , & la Vérité m'oblige de dire , que c'est vne
piece à seruir d'Ornement à l'Histoire : vn lieu à estre
traité par la Politique : vne action à instruire les plus
grands Capitainés , & vn preingé à cette Couronne,
pour en vsér à l'auenir en semblables conionctures. Il
falloit bien se donner garde pour le dessein qu'on auoit , de
passer lentement ou avec esclat ; Cela eust perdu le fruit
du passage , & ruiné toute l'esperance pour laquelle on
le faisoit , qui estoit de s'establir dans la Valtelline. Il
falloit donc le precipiter pour le dire ainsi , & le desrober
au sceu du monde. De le demander aux Suisses ; on ne pou-
uoit donner vn plus grand iour à vne chose qu'il falloit
nécessairement comme nous auons dit, tenir secrette , ny
retarder plus certainement ce qui estoit pressé , & qui
auoit besoin de diligence.*

*Que s'ils l'eussent refusé ; Ils auoit le loisir de se mettre
en estat de maintenir leur Refus , & d'empescher l'effet
de nostre demande : & nous n'auons pas ny la volonté
d'agir contre eux hostillement , ny le moyen de les forcer,
quand ils eussent esté sur leurs gardes. Et veritablement
ily a dans les petits Cantons tant de Zele ignorans , &
vn si grand nombre de personnes preuenues de cette ex-*

P R E F A C E.

31

reur qui est presque commune à tous les Catholiques qui ne sont pas François ou Venitiens ; que c'est blesser la Religion que toucher à la Maison d'Autriche ; qu'ils n'eussent pas manqué de faire du bruit & d'exciter des tumultes, plustost que consentir au passage d'une Armée, qui vray-semblablement luy alloit preparer de l'occupation, & donner de l'exercice du costé de l'Italie. Que s'ils se fussent résolus de l'accorder ; Il y a de l'apparence qu'ils ne l'eussent pas fait sans quelque dicte prealable, & sans les longueurs que traignent ces Assemblées ; où la conclusion est tousiours si reculée de ses Principes. Pour le moins il est certain qu'ils ne l'eussent pas fait qu'à leur maniere acoustumée, c'est à dire laissant filer l'Armée à petites troupes, & non autrement ; & qu'ils n'eussent pas innoué pour l'amour de nous, un Ordre aussi ancien que leur Republique, & aussi sacré pour eux, que leur liberté.

Il estoit donc nécessaire de les surprendre & de trouver un Temperament & un Milieu, comme, fait Monsieur de Rohan, entre des Actes d'Hostilité, par lesquels on force ce qui résiste, & la demande d'une chose qu'on n'ose pas refuser, d'autant qu'on ne peut pas l'empescher. Gaston de Foix s'estoit scruy de la mesme adresse ; lors qu'à une mesme temps qu'il entroit dans le pays du Marquis de Mantoue, pour aller secourir Bouloigne. Il luy en faisoit demander la permission : & le Marechal Horn apres s'estre saisi du pas de Stein, pour assieger Constance en envoya faire des excusés aux Suisses ; & insister sa pro-

P R E F A C E.

cedure par l'importance du besoin qu'il en auoit, & par la violence de l'occasion où il s'estoit engagé. Ce sont des coups que la necessité contraint quelquefois de faire, & que la rigueur des Loix de la guerre arrache. Ce sont des actions qui ont rien de malin ny d'aigre de la part de ceux qui les font, & dont la source qui est la volonté demeure saine & entiere. Ce sont de legers desbordemens d'une Riviere, qui rentre promptement dans son lit, & se renferme entre ses bords. Il faut pourtant, pour en dire ce qui en est, se servir de ce moyen, comme on se sert du poison en la Medecine, c'est à dire rarement, apres l'auoir bien preparé, & contre des maux extremes.

Quoy que c'en soit, il est à considerer au procedé de Gaston de Foix; qu'il ne demanda le passage par le Mantouan en le prenant, que pour ne perdre pas vn moment de temps en vne affaire qui pressoit, à attendre la responce, & pour ne paroistre pas faire violence à vn Prince foible avec lequel nous n'estions pas en broüillerie. Et partant il a en cela tesmoigné plus de prudence & de moderation, que non pas de hardiesse; d'autant que conduisant vne puissante Armée, il menoit avecque luy de quoy se faire chemin par tout, en vn pays qui n'estoit pas fort, & de quoy passer sur le vautre à tout ce qui eust ozé luy faire teste. L'action de Horn a eu sans doute quelque chose de plus vif & de plus hardy que celle de l'autre; Mais elle n'a pas esté couronnée du mesme succès, & elle deuoit recevoir son prix, & l'acheuement de son bon-heur de la prise de Constance qui n'ar-
riua

P R E F A C E.

32

riua point. Les Suisses en furent si fort esmeus, & sur tout les petits Cantons, & il s'esleua parmy eux vne si forte & si longue indignation contre cét Attentat; qu'on ne la peut iamais calmer, que Horn ne se fust retiré de dessus leur Territoire. Encore cette indignation ne luy fut elle pas entierement inutile, & elle luy seruit pour le moins, ou de suiet ou de pretexte, de leuer vn siege avec honneur, qu'il ne pouuoit continuer sans peril, & de donner à la satisfaction d'une ne Republique offensée, ce que peut-estre il eust fallu ceder aux Armes de Feria, & à la fortune de la guerre.

Mais au passage de Monsieur de Rohan, il n'y a pas à desirer vne belle Circonstance, ny vne suite favorable, qui ne s'y soit rencontrée. La grace de la nouveauté y est toute entiere, & il n'y a point d'Exemple que ie sçache iusques icy, qu'une Armée en Corps ait trauersé les Suisses, & fait vn Traicté si long & si difficile. Et par consequent ce n'a pas esté à luy vne mediocre hardiesse de l'auoir ozé entreprendre: ny vne commune prudence de l'auoir sçeu mesnager: ny vne fortune ordinaire de l'auoir fait reüssir. C'a esté vne espece de merueille qu'il ait esté conduit avec tant de secret & tant de silence; qu'on n'en ait pas seulement eu le vent en tant de lieux par où l'Armée passoit, qu'à mesure qu'elle y arriuoit: que la Renommée qui a tant d'aïles & tant de bouches; n'en ait pas au moins porté quelque bruit sourd, & publié quelque nouuelle confuse de là les monts, & que rien n'en soit paruenü aux oreilles de l'Ambassadeur d'Es-

o o o

P R É F A C E.

gne qui estoit aux Suisses, & qui avoit tant de suiets de veiller & de prendre garde à tout ce qui s'y faisoit, pour l'interest de la Valtelline. Il faut avouer qu'il a fallu user d'une grande diligence pour surprendre ainsi le monde, & pour prevenir la vitesse de Renommée: Qu'il a fallu apporter un grand Ordre & des soins extremes, pour faire vivre commodément l'Armée en une si grande haste qu'il a fallu sçavoir exactement la Carte de ce pays-là, pour ne prendre pas quelque fois le change en marchant, & pour ne suivre pas quelque fausse adresse. Finalement qu'il a fallu s'estre aquis une grande Authorité, & avoir employé une puissante Rethorique enuers des peuples si jaloux de leurs formes & de leurs Coustumes, pour leur faire digerer patiemment la nouveauté de ce passage: pour les empêcher de s'en plaindre: pour en obtenir le consentement.

Voilà donc Monsieur de Rohan dans la Valtellie, & Maître de cette Vallée, qui a esté tant d'années la pomme de Discorde, qui a divisé une partie de la Chrestienté, & donne tant d'amour & de jalousie à quelques-uns de ses Princes. Mais il ne demeurera pas long-temps paisible en une possession si enuieée. Il y trouvera de nouvelles & plus dangereuses difficultez qui l'exerceront, que celles dont il est sorty: Elles renaîtront apres qu'il les aura coupées, comme les testes de ce Monstre que les fables nous ont débité, & sa valeur qui aura à faire à tant d'ennemis, sera de toutes ses vertus la moins difficilement occupée.

En effet il estoit entré dans cette vallée, comme dans une place qu'on deuoit entreprendre de force : dont tous les dehors excepté du costé des Grisons, estoient déjà au pouuoir des Ennemis, & où des brèches auoient esté faites par la nature si larges, & en si grand nombre; qu'il estoit impossible de les reparer, & de les decouvrir toutes. Cela ne manqua pas d'arrriuer, & il se trouua bien-tost apres enfermée entre deux Armées qui l'inuestirent, l'une Imperiale, & l'autre Espagnole. Il auoit alors enuiron quatre à cinq mille hommes pour leur faire teste, & pour defendre les ouuertures de la Vallée. L'Imperiale commandée par Fernamont, soldat de reputation & composée de dux mille hommes, se presenta la premiere, bien que l'Espagnolle deust agir de concert, & faire en-mesme temps impression de son coste. Si cela eust esté Monsieur de Rohan auroit couru fortune de succomber, & d'obeyr à la loy generale du monde, qui veut que le foible en degre fort inégal, cede au plus fort, & que la grande multitude l'emporte sur le petit nombre. Mais son bon destin ne le permit pas, bien qu'il n'empeschât point, que celui qu'il auoit enuoyé pour s'opposer à Fernamont, ne laschât on ne fust obligé de lâcher le pied deuant luy, & que celui-cy ne s'emparât de la Vallée, & ne fit presque tomber en son commencement, & comme en sa fleur, l'Espérance que nous auons de la conseruer.

Il y auoit icy dequoy étonner vn courage moins ferme, que celui de M. de Rohan, & dequoy embarasser

P R E F A C E.

vn esprit moins accoustumé aux esprenues fortes, & aux diuers visages de la fortune. Aussi ce coup ne fut qu'une esprenue, pour faire voir dauantage la solidité de sa Vertu, & comme vn de ces nuages, d'où le iour sort plus agreable qu'il n'estoit auparauant. La Coniunction pourtant pour dire l'estat de la chose, ne pouuoit gueres estre plus fascheuse, & s'en demeler avec honneur, n'étoit gueres moins que remonter du fonds d'une abyssme. Les Grisons dont nous ne pouuions absolument nous passer, en estoient tombez en défaillance, & il falloit se haster de leur faire reuenir le cœur par quelque grand effet, si nous ne les voulions tout à fait perdre. Si nostre Armée n'étoit entierement étourdie de ce reuers; Elle en deuoit estre bien fort émeue, & s'il luy restoit assez de courage & de vigueur pour se battre; il ne luy pouuoit demeurer que fort peu d'esperance pour obtenir la Victoire. Au contraire, les Ennemis deuoient estre merueilleusement enfléz & fiers de la leur, & comme on iuge d'ordinaire des suites par les premiers succez de la guerre; Cety-cy ne leur deuoit pas auoir acquis vne petite Reputation en Italie & ailleurs, & on ne s'y deuoit pas facilement persuader, que nous les pussions chasser d'un pays, dont il ne nous auoit pas esté possible de leur empescher l'entrée.

Il estoit bien chatouilleux de prendre party en cette occurrence, & il y eut bien à disputer au Conseil de guerre, quand la chose y fut mise en deliberation. Il sembloit d'un costé qu'il y eust trop de remerité, d'aller
attaquer

P R E F A C E.

attaquer des Ennemis victorieux, & encore vne fois plus forts que nous, & qu'il estoit plus à propos d'attendre la levée qui se faisoit en Suisse, & qui cōmençoit desjà à marcher. Qu'il ne falloit iamais hazarder le total d'une affaire, avec vne partie de ses forces, ny commettre à la fortune, ce qui estant vne fois perdu, ne laissoit aucune espérance de ressource, ny aux ennemis aucune crainte d'estre troubléz en la jouissance de leur victoire, & en la possession de leur conquête. Que c'estoit le destin qui menagoit presentement nostre Armée, & la Constellation qui regnoit sur nos affaires de ce pays-là.

Ce sentiment certes n'estoit pas hors des regles de la commune prudence; & estoit celuy de la pluspart des Officiers de l'armée, parmi lesquels il y en avoit plusieurs de grand cœur, & sur qui ne pouvoit tomber le moindre soupçon de timidité. Mais l'aui contraire dont Monto-
sier fit l'ouverture, prenaht sur l'autre, & Monsieur de Rohan l'appuya, non seulement comme le plus honneste mais comme le plus conuenable. Il considera que les commencemens des choses estant d'ordinaire foibles & lents, les progrès en estoient forts & rapides: & comme il estoit fort aisé de détourner les vns de la pente qu'ils prenoient; il estoit fort difficile de retenir le courant, & de retarder l'impetuosité des autres. Et par consequent que le plus seur estoit de tascher d'etouffer promptement la reputation des armes des ennemis qui n'estoit encore que naissante, & d'arrester leur victoire auant qu'elle eust pris vn plus grand cours. Qu'il ne falloit pas tarder de

u u u

P R E F A C E.

deliurer les esprits des Grisons de la consternation où ils estoient tombez; & de prevenir les consequences de cét accidens qui ne pouuoient estre que funestes. Que si on ne se bastoit d'aller aux ennemis & de les combattre; il y auoit encore vne armée sur la frontiere du Milanois, qui foudroit sur nous auant que les Suisses nous eussent pû isandre que pour ceux-cy, il ne falloit pas douter qu'au bruit du désauantage que nous auons receu, la leuée n'en deuenit plus lente; & la demarche plus tardiuue. Que le mieux qui nous pouuoit arriuer, si nous attendions encore quelque temps, estoit de nous retirer en l'Etat des Venitiens; c'est à dire, sortir par vne porte honteuse, & entrer dans un pais étranger, pour y recevoir le traitement qu'on y fait aux Armées foibles & disgraciées, qu'on tâche de faire disperser pour en recueillir le débris, ou pour n'en auoir pas d'incommodité. Et partant puis que la perte de nos troupes deuenoit infaillible par le retardement, & que le mal se rendoit incurable si on ne luy donnoit loisir de s'en raciner; Il valoit mieux courir la fortune de la guerre, qui estoit au moins douloureuse, & s'exposer à l'incertitude de ses euénemens qui pouuoient estre propices. Qu'on estoit toujours en estat de vaincre, tant qu'on auoit moyen de combattre, & que ce n'estoit pas la premiere fois que de petites forces en auoient surmonté de grandes; & que le nombre auoit cédé au Courage & à la Discipline.

Enfin il consideroit, que quelque cause prochaine qu'eussent les euénemens de la guerre; il se faisoit toujours sur

P R E F A C E.

le General d'Armée, vne tres-viue reflexion du bonheur ou du mal-heur qui les auoit accompagnez. Et bien que l'entrée de Fernamont dans la Valtelline fust arriuée par le manquement ou par le malheur d'autrui; qu'il estoit en quelque façon obligé de le reparer : Que pour n'estre pas coupable enuers les Princes, il ne suffisoit pas tousiours de n'estre pas coupable, mais qu'il falloit estre encore heureux; Et puis qu'ils ne donnoient pas à leurs suiets leurs Armées à commander afin qu'ils ne fissent point de fautes, mais afin qu'ils obtinssent de bons succez; Ce n'estoit pas assez pour les contenter, & pour suivre leur intention de ne faillir pas, si l'on ne faisoit quelque chose de plus : ny de s'exempter de reproche; si l'on ne meritoit de la louange.

Cette resolution estoit trop genereuse & trop belle, pour n'estre pas fauorisée de la fortune, & nos gens marcherent vers les ennemis avec tant d'ardeur & tant d'ordre tout ensemble; que les ayans rencontrez au Val-Luin, & apres en auoir tué plusieurs, & fait plusieurs autres prisonniers; ils mirent le reste en deroute, & les contrainyrent de s'en retourner vn peu plus viste, & avec moins de grauité qu'ils n'estoient venus. Monsieur de Rohan ne laissa pas languir cette premier prosperité, ny ne donna loisir aux Ennemis qui estoient demeurez beaucoup plus forts que luy, de se reconnoistre, & de recueillir leurs esprits dissipez par la perte qu'ils venoient de faire. Il entra donc dans la Valtelline, & s'emparant des places de cette Vallée, où les autres ne l'osèrent

P R E F A C E.

attendre; les poursuivit si vivement qu'il les attrappa à *Mazze*, où ils s'estoient ralliez, & où ils avoient redressé une Armée plus puissante que la nostre. Ils ne recurent pas pourtant en celieu là un meilleur traitement, que celui qu'ils avoient reçu au *Val Luvin*. Au contraire, ils y furent si mal-menez; qu'ils y laisserent des leurs plus de trois mille hommes, ou prisonniers ou morts sur la place, ou noyez à la rivière d'*Agde*, & le reste fut si pleinement dissipé; que de dix mille hommes qui estoient descendus à la *Valtelline*, il n'en sortit pas quinze cens qui se rengèrent sous les Armes.

Par cette grande défaite, la Vallée fust purgée d'Imperiaux, & il n'en demeura que quatre cens aux Bains de *Bormio*, d'où Monsieur de Rohan se resolut de les deloger. Bien que la place fust presque inaccessible, & qu'il y fallut quasi grimper par toutes les Avenües: Cela n'empescha pas qu'elle ne fust emportée de force, & que nos gens n'y entrassent à travers une gresle de Mousquetades & de pierres. Mais cet avantage nous fust cherement vendu & il cousta la vie à Montosier, qui estant passé à la teste de ses Enfans perdus, ou pour les animer par son exemple à bien faire; ou pour se rendre plutost maistre de la place, & auparavant que *Frezelieres* qui devoit donner d'un autre costé, y fust arriué; fust acueilly d'un coup de pierre dont il mourut quelques iours apres. La perte d'un homme de si grand service fut tres sensible au General, qui jugeoit de son merite sans passion: Ses Rivaux le regreterent, & ceux-là mesmes qui

P R E F A C E.

26

qui n'aymoient pas sa personne, furent équitables à sa memoire. Je luy rendray icy ce témoignage que plusieurs considerations exigent de moy, qu'il n'y auoit en France Gentilhomme de son âge qui eust fait de meilleures actions que luy, ny à qu'il auenir prouit plus de gloire; si sa vertu eust rencontré pour s'exercer & pour s'estendre vn assez long espace de vie.

La Valtelline ayant esté si glorieusement reconquise, & rien ne paroissant à la frontiere qui nous peut faire de la peine; Monsieur de Rohan s'appliqua à faire construire des Forts, pour tenir le dedans en sujction, & le dehors en jalousie. Mais il ne iour pas long-temps de ce calme, & les ennemis n'auoient pas resolu de luy laisser à si bon marché, vne chose qui n'auoit point de prix pour eux. Pour cet effet, ils preparerent deux Armées le plus sourdement & au moindre bruit qu'il leur fust possible. Ils pensoient obtenir par la surprise, ce qu'ils se desffioient d'emporter par la force ouuerte; C'est à dire, nous deffaire & nous opprimer en nous prenant à l'impourueu; & en nous attaquant en mesme temps de diuers endroits. Mais ce dessein ne peut pas estre si secret, que la vigilance de Monsieur de Rohan ne l'éuentât, & les soins qu'il apporta à le decouurir, furent plus heureux que ceux que les ennemis employèrent à le cacher. Cela luy fit voir l'extremité où il estoit prest de tomber, & qu'il estoit perdu s'il se laissoit enfermer entre deux Armées qui venoient à luy; & s'il ne trouuoit moyen de les combattre separément, & sans estre obligé de partager la

à à à à

P R E F A C E.

sienne qui estoit petite, pour en opposer vne moitié à chacune des deux autres. Son salut donc dependoit de la prevention, & la prevention de sa diligence. Aussi certes elle fut telle, qu'elle eut le succez qu'elle meritoit. Fernamont fut le premier qui commença à s'ébranler, & à penetrer dans la Vallée. C'est une maxime que la Maison d'Autriche observe, de n'esloigner pas de l'employ les gens de service, pour vne disgrâce qu'ils auront receüe, ou pour vne faute qu'ils auront faite. Au contraire, elle presume que le desir de la reparer & de purger leur honneur, ioint à la vertu dont elle a fait l'experience, les fera mieux reüssir que d'autres qui n'agiroient pas par ce motif; & avec cet aiguillon dans l'ame. Toutefois ce l'a n'arriva pas à Fernamont, qui acheua d'estre malheureux, & de perdre sa reputation au Val de Frefle, où il se laissa surprendre.

Quelque auis qu'on luy donnât de la demarche de nostre Armée, Il ne le voulut jamais croire, & il ne pût se figurer qu'elle deüst venir à luy, qu'il ne l'eust sur le bras, & ne se trouuât enclos dans la Vallée, où Monsieur de Rohan l'attrapa à point nommé, comme il l'auoit projeté. Nostre Armée estoit de quatre mille hommes de pied, & de quatre cens cheuaux, & la sienne à peu près forte comme la premiere. La Vallée auoit quatre emboucheures, des trois desquelles nous nous fûmes presque en mesme temps, & ainsi allasmes par trois endroits à Fernamont. Celuy cy songeant plustost à sauuer les siens & à se retirer seurement, qu'à nous com-

P R E F A C E.

37

bataille fit neantmoins bonne mine, & nous mit en teste douze à quinze cens cheuaux pour nous tenir en échec, & donner moyen à son Infanterie de filer, & de faire sa retraite vers le Tyrol, par la quatriesme emboucheure qui estoit demeurée libre. Ce grand front de Caualerie, estonna d'abord quelques Compagnies des nostres, qui auoient eu ordre de les charger, & qui eussent infailliblement plié, si M. de Rohan n'y fust acouru pour les assseurer, pendant que les bataillons auançoient, & venoient aux Ennemis les piques baissées, & avec vn ordre aussi inste & aussi mesuré, que s'ils eussent fait l'exercice. Les Ennemis ne soustindrent pas long temps l'attaque qui leur fut faite, & ne tarderent pas de conueruir la resistance en retraite, & la retraite en vne fuite totale. Leur Caualerie pour se sauuer, passoit sur le vètre de l'Infanterie, & l'Infanterie tenoit les armes pour estre moins embarassée, & fuir avec plus de vitesse. Ils y laisserent près de deux mille hommes prisonniers ou morts, outre le butin qui s'y fit, qui ne fust pas peu considerable.

Icy la fortune enua vn bon heur à M. de Rohan, qui eust esté sans exemple s'il fust arriué, & qu'il auoit tasché de se procurer par sa preuoyance. C'est que si vn des principaux officiers de l'Armée, que ie ne nommeray point, se fust rendu, ou eust pu se rendre de bonne heur à Fresse, pour occuper, comme il en auoit receu le commandement, la quatrieme Auenue par où les Ennemis s'enfuirent; & il estoit impossible qu'il échapât vn seul, & qu'ils ne tombassent tous en nostre puissance.

P R E F A C E.

Le danger qui menaçoit nostre Armée, ne cessa pas par cette victoire, & il y auoit une autre tempeste à coniuurer du costé du Lac de Come, beaucoup plus dangereuse, que celle qui auoit éclaté par le Tyrol. Serbellon s'auançoit avec sept à huit mille Hommes de pied, & huit cens chevaux, pour nous fermer le passage des viures qui nous venoient de l'Estat des Vénitiens. C'estoit vn Chef de grand nom par my les siens, & qui outre les grands emplois qu'il auoit eus, & qu'il auoit souffert avec honneur, s'estoit freschement signalé à Norlinghen, & auoit eu grande part au gain de ceste bataille. Nostre armée ne pouuoit estre que réduite de la couruée qu'elle venoit d'essuyer, & ne deuoit pas se delasser par le chemin qu'elle estoit obligée de faire pour aller chercher l'Ennemy; qu'elle rencontra à Morbeigne. Il estoit-là logé fort auantageusement, estant maître du Bourg, & ayant deux Eglises au dehors, & les murailles de deux Cimetieres, dont il s'estoit accommodé. De l'attaquer en cet estat, & avec ces auantages de lieu & de forces, c'estoit euidentement pour nous une entreprise fort hazardeuse. Mais le peril n'estoit pas moindre de l'y laisser, ny les consequences moins mauuaises.

En cet Accessoire où Monsieur de Rohan se trouua réduit, & en ceste difficulté de prendre party, dont il estoit balancé, Il s'arresta au plus honorable, qui fut celuy du combat. Pour cet effet ayant mis l'armée en bataille, & séparé les Troupes en plusieurs Corps, pour attaquer par plus d'endroits, Il les fit marcher vers les Ennemis,

mis,

P R E F A C E.

mis, qui se mirent de leur costé en deuoir de les bien recevoir, & de se préualoir de la condition de Ceux qui sont à couuert & qui attendent. Celle de nos Combataus fut fort diuerse cette Iournée-là, & eut aussi vne fortune fort dissemblable: Il estoit impossible de mieux faire, que du costé où Canisy & Frezelieres donnerent: Mais il ne se peut imaginer vne plus honteuse & soudaine fuite, que celle que prit le Regiment de Leques tout entier, c'est à dire la quatriesme partie de toute nostre Infanterie. La terreur dont il fut d'abord saisi, fut si extreme; que iamais ny les prieres du Maistre de Camp qui l'en coniueroit, ny l'Authorité du general qui y accourut; ne le purent ramener, ny luy imprimer vn petit remors de sa lâcheté. Ce mauuais exemple fit encore eclipser deux Regimens. De sorte que l'affaire estant déplorée en cet endroit; & Monsieur de Rohan ayant tasché vainement de la remettre; Il se resolut de tourner du costé de Canisy & de Frezelieres, dont il n'auoit point de nouuelles, & au lieu d'y enuoyer comme on luy conseilloit, d'en aller luy-mesme apprendre.

Il se mit donc à la teste de ce qu'il auoit autour de luy, & faisant suivre le Corps de reserve, courut au bourg de Morbeigne où le Gros des Ennemis s'estoit rallié, & où se deuoit faire la decision de cette Iournée. Il faut auoier que Canisy & Frezelieres, comme nous l'auons desia dit, y firent parfaitement bien, & y rendirent comme par tout ailleurs, de grandes preuues de Vaillance. Mais il est vray qu'ils commençoient à decliner, quand
 e e e e

P R E F A C E.

Monsieur de Rohan arriva, & que si ce secours ne fust venu, ils alloient succomber sous la multitude des ennemis, & ceder à la plus grande force. La presence du General inspira aux nostres une nouvelle ardeur de combattre: les Ennemis sentirent bien-tost les effets, & il se fit vne si prompte reuolution de leur fortune, que lors qu'ils pensoient tenir la Victoire entre les mains, ils furent mis en deroute. Ils trouuerent à dire cette Iournée-la, près de trois mille hommes, & les Nostres en eurent la despouille toute entiere, à laquelle Monsieur de Rohan ne voulut point toucher, bien qu'il y eut quantité de Vaiselle d'Argent, & quantité d'Argent monnoyé pour le payement de l'Armée.

Dés ce iour, la possession de la Valtelline nous fut assurée, & les Troupes qui se ramassoient dans le Tyrel pour y descendre vne troisieme fois, se fondirent au bruit de cette Victoire. Apres cela, il ne s'y fit rien de fort remarquable, iusqu'à la defection des Grisons, que les deux entrées que Monsieur de Rohan fit dans le Milanois. La premiere se fit par la Montaigne de la Francesca, dont tous les pas furent forcez, quelques difficiles qu'ils fussent naturellement, & quelque resistance qu'apportât le Colonel Guasco à les defendre. Il entreprit cela en partie, pour venger le Duc de Parme des feux que les Espagnols allumoient en son pays, en les chassiant de la mesme peine: En partie pour tenir tousiours les siens en haleine, & pour leur trouuer aux despens de l'ennemy quelque rafraichissement & quelque douceur, qui leur fit

P R E F A C E

supporter plus gayement le service. La seconde entrée se fit apres la bataille du Nauilio, pour aller ioindre le Duc de Sauoye, & par vne Montaigne plus rude encore & mieux retrenchie que la Francesca. Cela n'empeschapas M. de Rohande la passer, en passant sur le ventre a tout ce qui se presenta pour s'y opposer, & de penetrer insqu'à la Ville de Leque, d'où il fut obligé de rebrousser, voyant que le Duc de Sauoye ne s'auançoit pas pour le recevoir, & qu'il n'y auroit point d'apparence, qu'il entreprit de trauerser le Milanois sans Canon, & avec si peu de forces que celles qu'il auoit alors. Quelque temps apres suruint sa grande maladie: pendant laquelle les signes du souleuement que quelques Grisons meditoient parurent visiblement, & les semences qu'il en conuoient de long temps, commencerent a pousser. Il ne fut pas a demy guery, qu'il se fit porter au lieu où le mal auoit son origine, pour essayer de l'estouffer auant qu'il eust pris sa croissance. On peut dire avec verité, que pour cela il n'oublia rien de ce que le discours & l'experience luy pûrent fournir d'inuention & d'adresse: qu'il ne reietta rien de ce que le Courage se peut proposer de difficile & de dangereux, qui peust seruir a son dessein. Qu'il mit sa vie en Compromis: qu'il abandonna sa liberté a la discretion d'Autruy, & qu'il la vit balotée au Senat de Coire, pour estre sacrifiée au plus grand ennemy de cette Couronne. Mais le mal fut supérieur a tous les Remedes qu'on employa pour le vaincre, & la pente par où il auoit pris son cours, se trouua si roide & si coupée, qu'il fut impossible de le retenir.

P R E F A C E

Je sçay bien que les ennemis de la France, & les François qui conspirent avec eux en sentimens & en passions: qui sont leurs seruiteurs sans gages, & font leurs affaires sans y auoir part; qui à leurs imitation diminuent toutes nos prosperitez, & amplifient toutes nos disgraces; Ont parlé de la perte de la Valtelline, comme d'un coup mortel à l'Estat: comme si apres cela tout estoit perdu pour nous: comme si tout ce qui s'y estoit passé ne nous eust de rien seruy, & qu'on eust ietté dans la mer toute la despence qu'on y auoit faite. Mais ceux qui considereront cette affaire sans preoccupation, & qui la peseront avec un esprit desin ^{teresse} *; trouueront, si ie ne me trompe, que le fruit que nous en auons recueilly n'est pas si petit, ny le dommage qui nous en est reuenu si grand que l'on a crié. Et veritablement il me semble que M. de Rohan n'a pas peu fait, d'auoir fait durant deux ans de continuelles diuersions des forces Ennemies, tant du costé d'Allemagne, que du costé d'Italie: d'auoir rendu les secours qui descendoient dans l'estat de Milan, plus lents, plus petits, & de plus grand coust, que s'ils fussent passez par la Valtelline. D'y auoir deffait trois Armées d'Imperiaux & d'Espagnols: D'auoir maintenu si hautement la Republique des Armes du Roy, principalement en Italie, où elle auoit un vn peu decliné apres le siege de Valence. Et ce qui est le plus considerable, & la principale fin de cette expedition, d'auoir osté vne pierre de scandale, où tant de Puissances s'estoient heurtées, il y de vingt ans, & éclaircy le monde d'une doute, qui eust esté vne matiere de discorde tant qu'elle*

P R E F A C E.

qu'elle eust duré, & vn Tison à fumer long-temps, si cette Occasion ne l'eust fait éteindre, C'est à dire, d'auoir assuré aux Grisons la souueraineté de la *Valtellino*, qui leur estoit contestée, & esté cause que les Espagnols qui l'auoient si opiniastrement combatüe, y ayent apporté leur consentement & donné les mains.

Que si le commerce de l'*Allemagne* avec l'*Italie*, leur est maintenant plus libre, & leur couste moins à entretenir, que quand nous estions Maistres du passage & de la galerie, qui ioint, & qui lie ces deux, pays. S'ils ont pu diuertir ailleurs les forces qu'ils auoient du costé du *Lac de Come*, à cause de la Jalousie qu'ils receuoient de celles que nous auions à la *Valtelline*; On considerera que nous auons aussi bouché de nostre part vne grande source de despenſe, que nous estions obligez de faire, à conseruer cette Vallée, & à nous assurer l'amitié des Grisons, qui nous la vendoient fort chèrement. En outre, puis que ce n'estoit plus nostre dessein d'attaquer par là l'estat de *Milan*, & que le Roy a eu de iustes causes de tourner d'un autre costé le principal effort de ses Armes; Il est certain que le mal qui nous pouuoit venir ailleurs, de l'Armée que les Ennemis tenoient sur le *Lac de Come*; n'estoit pas comparable à l'utilité que nous pouuions tirer de la nostre, aux autres endroits où elle seroit employée, comme l'experience nous l'a fait voir.

J'ajouteray pour derniere main, & comme pour finissement de la Relation que ie viens de faire, quelques considerations sur la conduite que *M. de Rohan* a ob-

P R E F A C E.

fermé en la guerre de la *Valtelline*. La premiere, qu'il n'a rien eu tant à cœur, ny travaillé à aucune chose avec un soin si tendu & si violent, qu'à la subsistance de l'Armée: qu'à faire venir les viures de dehors: qu'à empêcher que ce qui estoit dans la Vallée n'en sortit, ny se dissipât mal apropos: qu'à détourner les gruelées & les petites rapines, que les Officiers exercent quelquefois sur les soldats: qu'à faire de temps en temps des courses sur le païs Ennemy, pour leur faire gagner quelque chose, & pour leur donner de ces curées qu'ils ont si douces, & si conformes à l'humeur qu'ils ont beaucoup plus portée sans comparaison à prendre qu'à recevoir. Les maximes qu'il tient en cecy, sont à mon avis fort prudentes; Qu'un general d'Armée doit servir de Pere au soldats, & que le moins que puisse faire un Pere pour ses Enfans, est de leur chercher du pain, & de leur procurer de quoy vivre. Que les Armées ne deperissent point par la defection des Officiers, que la consideration de l'honneur, & l'intereft de la Charge y retiennent assez; Mais par la perte des soldats, qu'on ne sçauroit empêcher de se desbander, si l'on ne les empesche de souffrir au moins du costé du ventre. Que lors qu'ils ont pris une viue impression du soin qu'a le general de pourvoir à leurs necessitez. Il est assuré de les faire aller par tout où il voudra, puis qu'ils s'assurent qu'il ne les menera point en lieu où il ne sçache bien le moyen de les faire subsister. Et cela est si vray, qu'après deux ans de guerre: après plusieurs combats, & quelques attaques de peste; Il est sorti de la *Valtelline* en

P R E F A C E.

41

onze Cornettes; (Car l'Armée auoit esté renforcée de Caualerie & d'Infanterie) sept cens Cheuaux effectifs, d'excellente Caualerie, & en huit Regimens de gens de pied, plus de cinq mille hommes sous les armes, de la meilleure Infanterie sans contredit, qui fust dans l'Europe.

L'autre consideration est, que deux des principales Causes pour lesquelles M. de Rohan a tousiours battu les Ennemis, plus foible qu'eux en nombre de deux tiers, ou de la moitié; Ont esté l'une; la science qu'il a souuerainement, & en aussi haut degré, que Capitaine de ce siecle, de faire combattre des Troupes avec tous les auantages qui se peuuent tirer de la nature du lieu du combat, & des différentes manieres qu'il faut observer, selon les diuerses situations & figures du Terrein où l'on se trouue. La seconde, la Methode qu'il a tousiours pratiquée de diuiser son armée en quantité de petits corps, pour attaquer par plus d'endroits, & de disposer ces corps avec vne telle proportion & iustesse, que tous puissent venir au combat, sans que l'un empesche l'autre. Il arriue de là, qu'on a en quelque façon autant de Combatans que de soldats, & que lors que quelqu'un de ces corps est renuersé, le desordre n'est pas fort grand, ny la breche fort difficile à refaire, a cause qu'elle est petite, & qu'il y a d'autres corps tous prêts à subsistuer & mettre en sa place. Le contraire se voit aux Armées qui ne sont pas gouvernées par des Chefs si intelligens, où il n'y a gueres iamais qu'une partie des Troupes: qui puisse se remuer & agir, le reste de-

P R E F A C E.

meurant sans mouvement & sans action, & dont les corps auxquels elle se partage, sont d'ordinaire si grands, qu'il est mal-aisé de les remettre quand ils sont rompus: ny de reparer vne ruine qui ressemble bien-souuent à celle d'un Edifice qui tombent tout entier, qu'on ne peut re-tablir qu'en le faisant de nouveau.

La troisieme consideration est, qu'encore qu'un homme ne soit pas mal occupé, quand il a vne Armée à conduire, & des ennemis à combattre, s'est ce que l'employ que M. de Rohan a eu à la Valtelline, & presque par tout ailleurs, a tousiours esté mixte, & composé de negotiation & de guerre. Cela veut dire, qu'il faut qu'il soit grand homme de Cabinet, aussi bien que grand homme de Campagne: aussi excellent Politique, que bon Capitaine, & qu'il ait l'esprit merueilleusement robuste & vaste, pour pouuoir en mesme temps fournir à deux fonctions dont chacune separément n'a pas trop pour estre bien exercée, d'une force ordinaire, & d'une commune capacité.

Cela estant; & ce que nous auons dit dans tout le cours de cette Preface, ayant esté étably par raison, ou confirmé par exemples; Il est aisé de iuger quelle doit estre la bonté & la valeur d'un liure, qui est l'expression & l'Image de la science d'un homme si habille & si consommé au suiet qu'il traite. Et certes, quand il n'auroit que fait l'Abregé des Commentaires de Cesar, & l'Extrait de ce diuin Liure, avec les Remarques qu'il y a adioustées, C'est à dire, tiré l'esprit de ce qu'il y auoit de bon, & separé le
pur,

P R E F A C E.

pur ; pour le dire ainsi , de ce qu'il y pouuoit auoir d'impur
 en la conduite militaire du plus grand Capitaine que le
 monde ait iamais veu. Quand il n'auroit qu'aussi-tout
 cela à l'usage de la guerre moderne , & selon la differen-
 ce que l'Artillerie a apportee à l'ancienne ; Il auroit fait
 vn Travail inestimable en son genre , & ie pense qu'on ne
 pouuoit dauantage obliger le public de ce costé là , que de le
 luy communiquer. Mais il ne s'est pas contenté de cela , &
 il n'y a point de partie dans toute l'estendue de cette ri-
 che matiere , qu'il n'ait touchée distinctement , & qu'il
 n'ait traitée en Maistre , comme on le pourra iustifier par
 la lecture de ce Liure.

Que s'il y en a qui trouuent estrange, de voir des Liures
 d'un homme de cette Naissance & de cette Profession;
 I'ay desia dit au commencement que son intention n'auoit
 pas esté de travailler pour le public , ny d'exposer au jour
 ses Observations & ses pensées sur l'Art Militaire, bien
 qu'il les eut redigées par escrit. Mais quand cela eut esté,
 Je dis qu'il ne faudroit pas s'en estonner dauantage ; que
 de ce que le Soleil ne garde pas toute sa lumiere pour soy,
 & qu'il en fait part aux autres Astres , & aux choses
 Inferieures: que de ce que les Corps odoriferans ne retien-
 nent pas au dedans d'eux ces douces & charmantes quali-
 tez , qu'ils exhallent au dehors ; & en vn mot de ce que
 c'est vne propriété inseparable de la nature du bien, de se
 communiquer & de se resspandre. Outre que l'exemple
 de Cesar, dont la plume a erigé de si beaux monumens à
 sa gloire , & qui a presque laissé autant de preceptes, qu'il

o o o o

P R E F A C E

a raconté de ses actions militaires, doit mettre à couu-
 r ceux qui estant nés pour agir, ne sçauroient se delasser plus
 honnestement de l'action, qu'en s'appliquant à escrire les
 choses qu'ils ont faites, & qu'il importe que la posterité
 sçache, ou ce les que ceux de leur profession doiuent faire.

I'aionste à l'exemple du premier des Césars, celuy
 d'un Cesar moderne, & du plus grand Cesar veritable-
 ment, qui ait gouuerné l'Empire depuis Charlemagne,
 qui est Charles le Quint. Celuy-cy accompagna le pre-
 sent qu'il fit à son fils de la Resignation de tant de Royau-
 mes, & d'une succession si vaste; d'un Traité de l'Art
 de faire la guerre, si particulier & si specifique; qu'il des-
 cendiufqu'à la conduite qu'il obserueroit faisant la guerre
 au Turc, & à celle qu'il suiuroit faisant la guerre à la
 France, &c. Là on voit entre autres choses fort exacte-
 ment & regulierement, la façon de fortifier des Camps
 & de loger des Armées, que Fabrice Colonne auoit com-
 mencé d'introduire, & avec laquelle il fit eschouer M. de
 Lautrec à la Bicoque: & dont le Duc d'Alue s'est du de-
 puis si vilement seruy; que par ce moyen il a souuent
 triomphé sans auoir combattu, & fait des gains notables
 à la guerre, sans courir fortune de faire des pertes.

Je ne veux pas finir ce discours sans dire vn mot de moy-
 mesme, & supplier le Lecteur de croire, qu'encore que la
 passion que i'ay pour M. de Rohan, qui a des fondemens
 tres-iustes, m'ait mis la plume à la main pour parler de
 luy; ce n'est pas la passion qui luy a donné le mouuement,
 & qui l'a conduit, mais la seule verité autant que ie l'ay

P R E F A C E.


connûe. Quele Rapport que i'ay fait de quelques-vnes de ses actions, est d'autant plus naïf & plus fidelle; qu'il n'est pas tissu de Memoires qu'on m'ait offerts, ou que i'aye recherchez pour cette occasion: Mais de ceux que i'ay eu le soin de recueillir de temps en temps selon l'occurrence des affaires, & que i'ay demeslez icy de la foule des autres de semblable nature, que i'auois mis ensemble, & donné en garde à ma memoire pour contenter ma curiosité; ou pour m'en seruir, si par hazard i'en auoit besoin.

Is y trouuera quelque digression, qu'il eust peut-estre esté à propos de retrancher, ou quelque matiere trop estendue pour vne Preface. A quoy, si cela est, ie n'ay rien à respondre, sinon que i'ay failly, & qu'on a bien quelquefois de la peine à se defendre de l'abondance lors qu'elle vient, & à moderer l'actiuité de l'imagination quand elle s'échauffe. Que si les dernières fueilles cōtiennent vne Relation escripte à peu près selon les loix de l'Histoire, au moins selon l'Idée que i'en ay conçue, & qu'on a mise au iour, & par consequent peu cōuenable peut estre à la condition d'une Preface, qui semble ne deuoit estre composée que de Raisonnemens & d'instructions. Je n'ay encore à respondre, si cela est, sinon que ie me suis laissé emporter à quelques restes qui me sont demeurez d'une violente ardeur d'escrire l'Histoire de ce temps, dont i'ay autrefois esté possédé? Et bien que i'aye quitté ce dessein, dont l'execution a esté commise à des personnes plus capables que moy; Je n'ay pû neantmoins m'empescher d'essayer mes forces sur vn sujet qui s'estoit présenté fort plausible, ny de m'éprou-

P R E F A C E

ner sur vne belle Carriere qui m'estoit ouuerte. Enfin comme ie consens de bon cœur, si i'ay quelquefois parlé raisonnablement en ce discours, d'un Mestier dont ie ne fais pas profession que les gens de guerre que ie reconnois pour mes legitimes Iuges, l'attribuent à la fortune, plutost qu'à moy; Le les conuie aussi si i'en ay parlé mal à propos, comme il me peut estre souuent arriué, de m'estre indulgens, au moins parce que ie preuiens l'accusation de mes fautes par vne Confession volontaire: Et de ne refuser pas de faire courtoisie à vn homme qui la leur demande.





T A B L E

DES LIVRES DE L'ABREGE

des guerres de Gaule.

P Remiere guerre contre les Suiffes.	l. 1. f. 1
2 Contre Ariouiftus,	l. 1. f. 7
3 Contre les Belges,	l. 2. f. 11
4 Contre le peuple de Vannes & leurs alliez,	l. 3. f. 16
5 Contre les Allemans de Francfort & d'Heffen,	l. 4. f. 24
6 Contre les Anglois,	l. 4. f. 27
7 Contre le mefme peuple,	l. 5. f. 32
8 Contre Ambiorix,	l. 6. f. 39
9 Contre Vercingetorix,	l. 7. f. 47
10 Contre Corbeus & Cormius.	l. 8. f. 59

Table feconde des guerres Civiles.

G Verre d'entre Pompee & Cefar, fiegé de	
Corfinium, de Brundufium, de Marfeille,	
l. 1. f. 65	
Continuation du fiegé de Marfeille, trenc violée,	
terreur panique, fecours de Iuba,	l. 2. f. 75

Siege de Salones, camp de Cesar, sa retraite, bataille de Pharfale, deſaite de Pompée,	l. 3. f. 80
De la guerre Alexandrine,	l. 4. f. 93
De la guerre d'Afrique,	l. 5. f. 100
De la guerre d'Eſpagne contre les enfans de Pompée,	l. 6. f. 106

Chapitres.

L' Ordre Militaire des Grecs,	f. 108
De la diſcipline Militaire des Romains, Chapitre 1.	f. 119
Du Compartiment d'une legion de 4000 hommes de pied & 300 chevaux, chap. 2.	f. 127
Du marcher, chap. 3.	f. 128
Logement du camp, chap. 4.	f. 132
Des Ordonnances & gardes du camp, chapitre 5.	f. 138
Des Peines & des Prix, chap. 6.	f. 142
De la Solde, chap. 7.	f. 145
Ordre de Bataille, chap. 8.	f. 147
Des Sieges, chap. 9.	f. 154
Remarques ſur quelques batailles des anciens, chapitre 10.	f. 156
Comparaiſon des armées & ordres Militaires des Romains avec celles des Grecs, chap. 11.	f. 159

Table des Chapitres du traité de la guerre.

D E l'Electiō des soldats, chap. 1.	f. 163
Des armes, chap. 2.	f. 168
De la discipline Militaire, chap. 3.	f. 174
De l'obeïssance des soldats, chap. 4.	f. 178
Du Marcher, chap. 5.	f. 181
Du Camper, chap. 6.	f. 186
Des Batailles, chap. 7.	f. 188
Des fortereſſes, chap. 8.	f. 194
De la deſenſe contre les ſurpriſes, chap. 9.	f. 148
Des attaques par ſurpriſe, chap. 10.	f. 202
De l'attaque par ſieges, chap. 11.	f. 221
De la deſenſe des places contre les ſieges, chapitre 12.	f. 226
De l'Artillerie, chap. 13.	f. 232
Du bagage, & des Pionniers, chap. 14.	f. 236
Des eſpions & des guides, chap. 15.	f. 240
Des viures, chap. 16.	f. 242
Des charges generales d'une armée, & de leurs fonctions, chap. 17.	f. 246
De l'attaque des Eſtats ſelon leurs forces & ſitua- tions, chap. 18.	f. 254
De la deſenſe des Eſtats ſelon leurs forces & ſitua- tions, chap. 19.	f. 257
Des moyens d'aſſeurer vne conquēſte, chapitre 20.	f. 267

Comme il faut proceder pour secourir son allié &
confederé, chap. 21. f. 271

Quel est le meilleur qu'un grand Prince fasse la
guerre en personne ou par Lieutenant, chapitre 22. f. 274

De la reputation, chap. 23. f. 279



ABRÉGÉ
DES GUERRES
DE GAULE
DES COMMENTAIRES
DE CESAR.



Avec quelques remarques sur icelles.

LIVRE PREMIER.



ESAR ayant eu le gouvernement des Gaules pour cinq ans, la premiere guerre qu'il y eut, fut contre les Suisses : l'ambition d'Orgentorix la causa. C'estoit vn homme riche, noble & puissant dans sa Nation; il persuada à ce peuple, hardy de sa nature, & exercé aux armes par les guerres qu'il auoit avec ses voisins, de s'élargir dans la Gaule, où le pais estoit plus grand & meilleur que le

A

leur. Pour cet effet la deliberation estant prise, ils prennent trois ans de terme pour faire leurs preparatifs, pendant lesquels ils se fournissent de chariots & cheuaux de charge; ordonnent de semer tous leurs pais de toutes sortes de grains, pour faire la prouision de leurs viures, & nomment pour leur Chef & conducteur Orgentorix, qui de sa part employe ce temps-là, à se fortifier de l'ayde de ses voisins, persuade à Casticus Bourguignon, de se faire Seigneur de son pais comme son pere l'auoit esté; attire à mesme dessein Dumnorix d'Autun (frere de Diuitiac) le plus puissant de sa ville, & luy baille sa fille en mariage. Mais les Suisses ialoux de tout temps de leur liberté, & s'apperceuaus qu'Orgentorix aspiroit à les assuiettir, se saisissent de sa personne, & sur les contestations de son procès, à cause qu'il auoit vne grande suite de parens & partisans, il meurt en prison; cela n'allentit point le dessein de ce peuple, lequel à iour nommé, ayant pris pour trois mois de viures, bruslé le reste de leurs grains, & toutes leurs villes en nombre de douze, & quatre cens villages, & ayant persuadé de faire le semblable à ceux de Basse, Distalingen &

de Clackij leurs voisins; ils partent & s'acheminent vers Geneue, pour là passer le Rhosne. Cesar ayant entendu cette nouvelle, va promptement à Geneue, assemble ce qu'il peut de gens de guerre; fait couper vn pont qui estoit sur le Rhosne, & entreprend vn fossé & vne muraille de dix-huit milles de long, depuis le Lac de Geneue iusques au mont Iura, pour empescher le passage du Rhosne. Ce qu'apprenant les Suisses, ils luy deputent pour luy demander le passage: il les amuse: & leur promet responce vne autre-fois. Cependant il se met en estat de les empescher, & eux depuis son refus ayant tenté en vain le passage, ils prennent le chemin de Bourgogne, que Dumnorix leur procura. Ce que voyant Cesar, laisse Labienus à Geneue, va leuer de nouvelles legions, les suit, & les ayant rencontrez au passage de la Saone, leur deffait la quatriesme partie de leurs troupes qui n'estoient encore passées: apres cela il fait vn pont sur la riuere; les poursuit; mais les viures commençans à luy manquer; & s'estant apperceu que Dumnorix empeschoit ceux d'Aulun de luy en donner, ce qu'ils luy auoient promis; il le dit à Diuitiac son grand Amy

& frere de Dumnorix, qui le luy confesse, intercede pour luy, & obtient son pardon. Puis ayant appris que les Suisses estoient campez au pied d'une montagne, il la fait reconnoistre, & ayant trouué qu'elle estoit de facile accès, il y enuoye toute la nuit Labienus pour en gagner le sommet, & au matin s'estant mis en bataille, il depesche Confidius pour reconnoistre les ennemis, lequel ayant pris l'alarme de Labienus, rapporte à Cesar que les ennemis s'estoient saisis de la montagne, ce qui l'arresta, & l'empescha ce iour là de deffaire les Suisses. Le lendemain il prend la route de Beaune, pour distribuer le bled à son armée, dont les Suisses s'apperceuant le suivirent. Cesar les voyant venir à luy se fait d'un costau, met son armée en bataille à la moitié de la pente, & tout au haut y loge deux legions nouvellement leuées & tout le bagage, met pied à terre, renuoye son cheual, & fait faire le semblable à tous les autres, pour monstrier qu'il falloit vaincre ou mourir. Les Suisses le viennent attaquer, il les defait, les poursuit viurement, deffend à ceux de Langres de les assister de viures, & enfin les contraint de se mettre à sa discretion. Il leur oste leurs armes,

prend des ostages , & les oblige de retourner habiter en leur païs , & de reſtablir leurs maiſons , & de trois cens ſoixante-huit mille perſonnes , dont il y en auoit nonante deux mille portant armes , il n'en retourna en tout que cent dix mille.

R E M A R Q U E S.

LA reſolution de ce peuple , qui ſemble barbare , & qui par ſon mauvais ſuccèz eſt condamnée vniuerſellement , a neantmoins les meſmes principes de tous Conquerans , à ſçauoir , le deſir de commander & ſ'accroître , & eſt remarquable en ſa preuoyance de trois ans pour ſ'ap-preſter , en ſa conſtance pour apres la mort du Chef ne deſiſter point du deſſein , & en l'exécution de ſon deſſein de bruſler leurs biens & leurs maiſons , afin de ne ſe laiſſer aucune eſperance de ſalut , ſinon au trenchant de leurs eſpées. Dont on peut recueillir qu'on ne doit entreprendre aucun grand deſſein en tremblant , ny regarder les moyens par où on peut eſchapper , mais pluſtoſt à ceux par où il faut neceſſairement vaincre. Car ſi dès le commencement d'un deſſein perilleux , vous faites conoiſtre comme vous pouuez vous ſauuer , l'impatience ou la timidité naturelle des hommes , en fait rechercher le moyen au moins

6 *Abregé des Guerres*

dre accident qui arriue : & si les Suisses n'eussent rencontré l'incomparable vertu de Cesar, qui par sa valeur, industrie, diligence & bonheur arresta leur fureur; ils eussent pû venir à bout de leurs entreprises.

En la conduitte de cette guerre, Cesar a monstré (comme en toutes les autres,) que ce qui l'a rendu heureux en ses exploits; a esté principalement son invariable ordre au camper seurement, se retrenchant tousiours, afin de n'estre iamais contraint de combattre que quand il voudroit, & de pouuoir prendre les occasions qui s'offriroient de deffaire ses ennemis : de pouuoir à ce que les viures ne luy manquassent point, & de tenir tousiours ses soldats en exercice & en halaine, pour pouuoir executer ses desseins avec promptitude & bon ordre.

Le pardon de Dumnorix est remarquable. Sa naturelle clemence l'y porta, se laissant vaincre aux prieres de son frere Diuitiac qu'il aimoit, neantmoins il fit prendre garde à ses deportemens, afin qu'à l'auenir il n'en arriuaſt de nouveaux inconueniens.

La faute de Conſidius fait voir combien il importe d'enuoyer des personnes experimentées pour reconnoistre vne armée.

Et le commandement qu'il fit aux Suisses de retourner habiter leurs pais, fut prudent, pour

empescher que les Allemans (Nation tres-puissante) ne les vinssent occuper, & s'approchassent par là de la Provence.

SECONDE GUERRE.

LE sujet de la seconde Guerre fut tel. La diuision des Auuergnats & Autunois, peuples puissans en Gaule; auoient appelle les Allemans, à l'ayde desquels les premiers auoient vaincu les autres. Neantmoins ils se trouuoient tous opprimez, & beaucoup plus les victorieux que les vaincus; car ceux-cy en furent quittes pour quelque tribut & desostages, & les Allemans osterent aux autres la plus part de leurs terres; si bien que se voyans tous assuiettis, ils tiennent vne assemblée d'Estats par la permission de Cesar, pour demander son assistance, laquelle il leur promet. Mais ayant pour cét effet enuoyé vers Ariouistus Chef des Allemans; il en reçoit des responcez si superbes, qu'enfin ils en viennent aux mains, où Cesar le deffait, le chasse des Gaules, & tous les Allemans,

Abregé des Guerres
 en leur faisant repasser le Rhin. Ces deux
 guerres furent finies en vn Esté.

REMARQUES.

Sur quoy faut remarquer combien sont dan-
 gereux tels secours auxiliaires, sur tout
 quand on les requiert de peuples plus puissants
 que soy. Cesar a bien chassé Arionistus, mais les
 Gaulois n'ont fait que changer de Maistre. Il
 s'embarque à ceste guerre pour deux raisons, la
 premiere, pource qu'il redoutoit que cette puissant
 te Nation prenant pied en Gaule, ne vinst fon-
 dre en Prouence, & ne s'approchast d'Italie; &
 l'autre, pource que par icelle il s'insinuoit insensé-
 blablement en la conquiste desdites Gaules, ce qu'il
 mesnagea si dextrement, en entretenant parmy
 eux leurs diuisions, qu'avec l'ayde des vns il vain-
 quit les autres, & enfin les assuiettit tous.

Faut encore remarquer sa diligence, (tant
 recommandée en toutes ses actions) pour se sai-
 sir de Besançon, ayant preuenu ses ennemis, &
 par ce moyen ayant pourueu à la nourriture de
 son armée. Ce fut là qu'une terreur panique sai-
 sit ses soldats, laquelle commença par les volon-
 taires, qui voulans se retirer décourageoient les
 autres, afin de couvrir leur honte par la generale
 de toute l'armée; ce qui est vne chose tres-dange-
 reuse,

reuse, & à quoy vn General d'armée doit prendre soigneusement garde, ne deuant iamaïs hazarder vne bataille, qu'il n'ait remis le cœur aux siens, ce que fit Cesar pour lors en les haranguant, en quoy il excelloit. Il se seruit aussi (comme plusieurs autres Capitaines, sur tout Marius) de se camper fortement deuant cette armée redoutable, & de faire connoistre à ses soldats par de petits combats, que leurs ennemis n'estoient pas inuincibles, ny plus vaillans qu'eux; leur faire conceuoir qu'adjoustant l'ordre & la discipline militaire à la prudence de leur Chef, ils leur estoient superieurs: car les Romains n'ont iamaïs vaincu les autres Nations par le grand nombre ny par la vaillance, mais par la science de la guerre qu'ils exergoient tousiours, par l'observation de leur ordre, & par le retranchement de leur camp. Sur quoy il faut considerer qu'Arionistus s'estant logé entre Cesar & le lieu d'où luy venoient les viures, & Cesar ne l'ayant pû attirer cinq iours durant à la bataille, apres auoir bien fortifié ledit camp, il va avec toute son armée en bataille en fortifier vn petit, en vn lieu aduantageux, esloigné du premier de deux milles, & qui luy fauorisoit le chemin de ses viures, faisant traualler le tiers de son armée, pendant que les autres deux tiers estoient en bataille, qui repousserent les troupes qu'Arionistus enuoya, pour

10 *Abregé des Guerres de Gaule.*

empescher ladite fortification. Laquelle estant faite y laisse deux legions, & ramene le reste de son armée dans son vieux camp. Le lendemain Cesar se met en bataille entre les deux camps: mais s'estant retiré, Ariouistus attaque le petit & en est repoussé. Cesar ayant ainsi raffermý le courage de ses soldats, sort toute son armée en bataille, & va jusques au retranchement d'Ariouistus, le prouoque au combat, lequel sort & est defait.





TROISIÈSME G V E R R E. L I V R E II.



A troisieme Guerre de Cesar fut contre les Belges, tierce partie de la Gaule, & ceux qui pour lors estoient les plus aguerris. Les principales causes en furent, que voyans le reste des Gaulois en paix avec les Romains; ils craignirent d'en estre attaquez : puis ils en furent sollicitez par quelques Gaulois, mescôtens ou ambitieux; les vns ne prenant plaisir de voir non plus les Romains que les Allemands dans leur pais, & les autres qui apprehendant de ne pouuoir durant leur sejour s'emparer de quelque Principauté ou Domination. Le denombrement de leurs forces montoit à deux cens quatre-vingts vn mil hommes de combat. Cesar ayant

Abregé des Guerres

appris ce grand preparatif, fait attaquer par Diuitiac, & les Autunois ceux de Beauuais, & s'estant assureé de ceux de Reims qui se declarent pour luy, il va planter son camp sur la riuieré d'Aisne pres de Soissons, puis il secourt Brenne, & les ennemis voulans passer ladite riuieré, ils'y oppose & en tué grand nombre. Apres cela les viures manquant à vne si grosse armée, & ceux de Beauuais apprenant que Diuitiac rauageoit leur territoire; ils resolurent de s'en retourner chacun chez soy, & se remettre ensemble pour secourir le premier des peuples qui seroit attaqué. Mais ils firent leur retraite si en desordre, que Cesar eut loisir de les ioindre, & les chargeât sur la queue les mit à vauderoute, où il en fit vn grand massacre, & en suite va assieger & prendre Noyon. Tous ces peuples font ioug, horsmis ceux de Tournay, estimez les plus vaillans de tous, qui ayant mis leurs vieillards, femmes & enfans en seureté, resolurent de se defendre. Cesar va à eux, ils l'attaquent si furieusement sur vn logement qu'ils le penserent defaire, & il confesse qu'en ce combat sa bonne fortune y eut autant de part que sa valeur & industrie; neantmoins il les défit, apres quoy

il ne trouua plus de résistance, & la renommée de ses victoires le rendit redoutable iusques dans l'Allemagne, & luy acquist toute la Normandie & la Bretagne, que P. Crassus vn de ses Lieutenans soumit au peuple Romain, avec vne seule legion.

R E M A R Q U E S.

F Aut noter icy le iugement de Cesar, qui par sa diligence s'assura de ceux de Reims, par son industrie & douceur les maintint fides, & par sa preuoyance prepara vne diuersion contre ceux de Beauuais, peuple tres-puissant, qui luy fut tres-vtile.

Après est à considerer qu'une armée de trente ou quarante mille hommes bien aguerris & disciplinez, peut avec patience, en se retranchant, & en se bien logeant, dissiper les plus nombreuses armées, lesquelles, faute de viures, se destruisent d'elles mesmes; & si elles combattent (pouruë qu'on eusse d'estre enuironné de toutes parts) les desordres & la confusion les dissipent. Les guerres des Romains en font foy, qui n'ont iamais défait leurs ennemis, qu'ils ne fussent en moindre nombre qu'eux, ny esté forcez de sortir de leur camp retranché, pour donner la bataille contre leur gré: & particulièrement la presente,

en laquelle Cesar a eu plus d'affaire contre vne seule Province des Belges, que contre tous les Belges ensemble, ayant décrit tres-particulièrement de la bataille qu'il eut contre ceux de Tournay, comme vne des plus dangereuses qu'il ait iamais donnée; où il y a plusieurs choses dignes d'estre considérées.

La premiere, que ceux de Tournay ayans esté aduertis que Cesar faisoit marcher apres chaque legion le bagage d'icelle; ils se resolurent de s'embusquer & de le combattre, iugeans bien que le bagage separant les legions en vn país plein de hayes, elles ne se pourroient secourir les vnes les autres, & qu'ainsi ils pourroient avec toutes leurs forces défaire chaque legion à part.

La seconde, qu'ils se trouuerent trompez en leur presupposition, pource qu'encore que Cesar fist ainsi marcher son armée en país amy pour la commodité d'icelle; neantmoins quand il fut en país suspect, il fit marcher six legions ensemble, puis tout le bagage, & derriere iceluy deux legions ensemble nouvellement leuées, & ce fut en tel ordre, & sur son logement qu'ils le chargerent.

La troisieme, la confession de Cesar, qui aduoüe franchement que son armée fut attaquée tellement à l'impourueu & si viuement, & en vn país si couuert; que ce ne fut ny son ordre ordinaire qui la sauua, (car il n'eut loisir de la met-

tre en bataille,) nyles exhortations, ny sa presence par tout,) pource qu'il luy fallut combattre où il se trouua:) mais attribué seulement le salut d'icelle, à la longue discipline de ses soldats, qui scauoient d'eux-mesmes se ranger où il falloit, & à ce qu'il falloit obseruer exactement à tous ses Officiers de demeurer en leur deuoir, tandis que le retranchement du camp se faisoit, si bien que par tout il se trouua des gens à commander, & d'autres à obeir: ce qui causa la resistance & empescha l'estonnement.

La quatriesme, qu'une resolution temeraire est souuent à craindre, & que pour l'éuiter il ne faut iamais relascher ce qui despend de la discipline militaire.

Et la cinquiesme, que sur la trahison que ceux de Bolduc, (qu'il auoit assiegez dans la meilleure de leurs forteresses,) luy voulurent faire apres s'estre rendus; on doit apprendre qu'il se faut toujours déffier de son ennemy, & se tenir d'autant plus sur ses gardes, qu'on est proche de le vaincre.



QVATRIESME

G V E R R E.

L I V R E III.



LE premier exploict d'armes fût contre Seruius Galba, vn des Lieutenans de Cesar, qui l'ayant enuoyé avec vne legion & quelque cauerie au païs d'Ælen, Valais & Sion, (qui s'estend depuis la Sauoye iusqu'au lac de Geneue) pour asséurer le traffic des Marchands, apres quelques combats heureux fit paix avec ces gens-là, receut leurs ostages, & ayant laissé deux compagnies au païs d'Ælen, il va loger avec le reste de la legion au bourg de Martanach, situé dans vne vallée, & separé en deux d'une petite riuere nommée la Branse; il retranche son camp d'un costé d'icelle, & de l'autre il y loge les Gaulois qu'il auoit avec luy. Le
petit

petit nombre des soldats qu'il auoit en son camp, (qui n'estoit encor bien en defence,) donna la hardiesse à ces peuples de se reuolter, esperans qu'à la premiere attaque ils l'emporteroient : car ils ne pouuoient supporter qu'il retinst leurs enfans en ostage, & apprehendoient que les Romains n'annexassent ces lieux-là à la Prouence qui en estoit voisine. Il se voit donc attaque de toutes parts, auant qu'il eust loisir de se reconnoistre, & ses affaires se trouuant en grande extremité, n'ayant viures pour subsister, ny gens pour resister longuement: le desespoir luy fit receuoir le conseil de P. Sextius Baculus premier Centenier de l'enseigne Rôuelle, & de G. Volusenus Colonel de mil hommes, qui fut de sortir de toutes parts sur leurs ennemis, ce qu'ils firent si brusquement que ceux qui ne se pouuoient defendre contr'eux dans vn retranchement, les deffirent à la campagne. Cela fait il prend le temps de leur estonnement, pour retirer sa legion en lieu de seureté.

Mais l'occasion de la quatriesme guerre fut telle, que P. Crassus l'un des Lieutenans de Cesar, ayant enuoyé plusieurs Tribuns pour faire la prouision des bleds, ne-

cessaire pour la nourriture de son armée aux païs du Perche, Cornoaille, & Vannes ; ils les retindrent contre la foy publique, en esperance de recouurer leurs ostages. A cét exemple leurs voisins firent le semblable, & tous manderent à Crassus qu'ils ne les deliureroient point qu'on ne leur rendist leurs ostages. Cesar ayant entendu cette coniuration, se prepare diligemment à la guerre ; iugeant que s'il la laissoit impunie, il ouvroit la porte à vne reuolte generale : car il connoissoit bien l'humeur des François prests à prendre les armes, ayman leur liberté, & abhorrans la seruitude. Il pouruoit premierement à empescher que la ligue ne s'augmente. Pour cét effet il enuoye Labienus au païs de Treues avec la caualerie, luy ordonnant de visiter ceux de Reims & les autres Belges : P. Crassus en Gascoigne avec douze enseignes de Legionnaires, & bon nombre de gens de cheual : Q. Titurius Sabinus avec trois Legions au Perche, Allençon & Lizieux ; donne l'Armée de mer à D. Brutus, & luy avec celle de terre, se resout d'aller attaquer le peuple de Vannes, comme le Chef de cette guerre. Leur païs est maritime, difficile à aborder & puissant en vaisseaux ; si bien que quand avec

beaucoup de trauail il auoit reduit vn lieu à estre forcé, les habitans se mettoient dans leurs vaisseaux avec tous leurs biens, & alloient en vn autre, & ainsi il n'auancoit rien iusqu'à ce que son armée de mer estant venuë, il leur donna la bataille & les défit. Apres cela ils se rendirent à Cesar, qui fit mourir tout le Senat & vendre le peuple. En cemesme temps les Lieutenans que Cesar auoit distribuez par les Gaules, ne furent pas sans affaires, Q. Titurius Sabinus fut attaqué par Viridonix Chef de diuers peuples, avec de grandes forces. Mais par sa patience & son astuce il l'attira à le venir attaquer dans son camp retranché, & le vainquit, ce qui r'assura tout ce pais là. P. Crassus du costé de la Guyenne défait les Sontiates, les assiege dans leur ville & la prend. Apres la capitulation, Adeantuan leur Chef sort avec six cens de ses plus affidez soldats, & tasche de faire effort sur le camp des Romains : mais estant repoussé Crassus ne laisse de luy tenir la premiere capitulation accordée. Durant ce siege les peuples d'Espagne & de Gascogne qui sont autour des Monts Pyrenées, se liguent ensemble, & eslisent pour Chefs, des Capitaines qui auoient fait la guerre sous Ser-

torius. Crassus les vint attaquer. Ils se retranchent & luy coupent les viures de telle forte; qu'il est contraint de les combattre dans leur retranchement, auquel de bonne fortune pour luy il trouua quelque manquement, par où il les força. Cette victoire soumit tous ces peuples là. Cesar ne voyant plus en armes que ceux de Teroüenne & Gueldres, quoy que l'Esté fust fort aduancé s'y achemine, où il trouue vne nouvelle maniere de faire de guerre. Ces gens-là se retenans dans de grandes forests; il les y va chercher, & estant sur le bord, ainsi qu'il fortifioit son camp, ils l'attaquent & sont repoussez; apres quoy Cesar s'aduance dans la forest, en fait couper les arbres; s'en sert comme d'un rempart, & avec vne peine & diligence incroyable, s'auance iusques où ils tenoient tout leur bestail & dernier bagage: mais le temps vint si rude & pluuieux; qu'il fut contraint de mener son armée en garnison & d'hyuerner.

REMARQUES.

Ainsi finit cette guerre, où nous remarquerons premierement l'vtilité des retranchements des camps, qui seruent aux pais entiers de

bride comme les Citadelles aux villes, les Romains n'ayant maintenu sous leur obéissance tant de Peuples conquis que par ce moyen là: car les armées qui sont en garnison en diuerses villes peuvent ainsi separées estre défaites en tout ou en partie par vne coniuration: puis les delices des villes corrompent toute discipline militaire, & auilissent tout courage genereux. En tout cas, s'il y a plus de forteresses qu'il n'en faut garder, il les faut démanteler, afin que rien ne puisse résister à l'armée, laquelle estant tousiours ensemble s'oppose à tout ralliement de coniuration; Estant très-certain, que non seulement pour empêcher les souleuemens d'une Prouince conquise, mais aussi pour conseruer son pais contre vne plus grande force que la sienne, (donnant ordre qu'on ne manque point de viures), on le peut faire en se retranchant fortement. Car quiconque se met tout à fait sur la deffensue en se renfermant dans les villes, il faut (sans vn secours estranger) qu'à la longue il perisse: pource que deux ou trois années de degats de la campagne reduisent les villes à la faim, & leur font connoistre que vostre foiblesse ne les peut sauuer. Si bien qu'ils aiment mieux se rendre à vostre ennemy que se perdre.

En second lieu, nous considererons combien Crassus fut embarassé; quand il eut affaire aux Capitaines qui auoient appris leur mestier sous

Sertorius, & qui selon la coustume des Romains se seruoient de l'aduantage des lieux, fortifioient leur camp & coupoient les viures. Car avec telle manière de faire la guerre, ils auoient reduit ledit Crassus à tel point, qu'il fut contraint d'attaquer leur camp, lequel encore qu'il le forçast, soit on pour auoir de meilleurs soldats, ou pour trouuer quelque endroit d'iceluy mal fortifié, il ne laissa d'entreprendre ce coup, plus par desespoir que par raison, & lors seulement qu'il se trouua dans la necessité de mourir de faim.

Nous remarquerons encor en ce qui arriva à Cesar en toute cette guerre, comme nulle diuersité dont on se seruit pour la luy faire, ne l'estonna, soit qu'on l'attaquast en campagne raze, ou dans son camp, ou qu'on le surprist, ou qu'on se retirast en lieux inaccessibles; ayant tousiours cherché ses ennemis par tout, & sans relascher vn seul point de la discipline militaire. Car encor que nos ennemis fassent quelquefois des actions qui tesmoignent de la peur, pour mieux nous surprendre: Il ne faut pourtant iamais les mespriser, estant vn mestier que le nostre, où vne faulx ne se repare point, & où vne heure fait perdre la reputation acquise en trente ans.

Pour clorre ce discours, i'adiousteray que la cruauté que Cesar fit à ceux de Vannes ne doit souiller sa clemence, qu'il a tesmoignée tout le

Abregé des Guerres de Gaule. 23

cours de sa vie ; mais considerer qu'il forsa plu-
toſt ſon naturel en cette action ſeuere , pour
chaſtier le violement du droit des gens , en ce qu'ils
auoient retenu priſonniers ceux qui ſous bonne
foy alloient negocier avec eux : Et auſſi pour don-
ner terreur à tous ces peuples ſi ſujets à la reuol-
te , en leur faiſant eſprouuer vn doux gouverne-
ment quand ils ſe maintenoient en obeïſſance , Et
en les traitant rigoureuſement quand ils en ſor-
toient.





CINQVIESME

G V E R R E

L I V R E IV.



Es Allemans de Francfort & de Hessen, en nombre de quatre cens mille Ames, se voyans persecutez par les Suetes, (le plus puissant & hardy peuple d'Allemagne) quittent leur pais, & apres auoir roulé par diuerses contrées abordent au Rhin, à l'endroit des Prouinces de Gueldres & Iuliers; d'où ils chassent les habitans, & s'emparent de leur terre d'un costé & d'autre de la riuieré. Cesar qui connoissoit l'humour des François, inquiet, & prompt à secoüer le ioug de la seruitude; se resolut de ne laisser affermir les Allemans deça le Rhin. Et encor qu'il s'apperçeust bien qu'ils auoient commencé de traiter avec eux; Il le dissimule, & anticipant le temps

temps qu'il auoit accoustumé de se mettre en campagne , va droit pour combattre lesdits Allemans , lesquels estonnez de cette diligence luy enuoyent des Ambassadeurs pour traiter de paix. Il les écoute paisiblement , leur donne de bonnes responses : mais il marche tousiours vers eux. En fin ils tombent d'accord des conditions pourueu que Cesar vueille s'arrester trois iours. Il leur en accorde vn , durant lequel sa cauallerie en nombre de cinq mille s'estant aduancée au fourage , elle fait rencontre de huit cens cheuaux Allemans qui les chargent brusquement , les mettent en route , & les menent battant iusques au camp des Romains. Mais le lendemain ayant enuoyé tous leurs principaux chefs vers Cesar , pour s'excuser de cette action , & luy remontrer qu'elle estoit suruenüe par accident ; il les retient prisonniers ; marche avec son armée vers les Allemans , les surprend & les taille tous en pieces ; apres quoy il fait vn pont sur le Rhin , passe en Allemagne , secourt la ville de Coloigne , accorde la paix à ceux qui veulent donner des ostages , brulle & rauage les autres , & au bout de dix-huit iours retourne en France , & rompt son pont.

REMARQUES.

EST à noter icy la conduite de Cesar, qui par sa prompte & inopinée venue, dissipa les menées qui se faisoient entre lès Allemands & les Gaulois: par sa dissimulation envers les Gaulois, feignant de ne sçavoir lesdites menées, & leur resmoignant de la confiance, les retient & les empesche de se precipiter dans vne ligue avec les Allemands: par son industrie les amuse entraités tandis qu'il s'avance tousiours vers eux, & quand l'occasion s'offre, il prend son avantage pour les prendre en desordre, & destituez de leurs chefs; leur faisant accroire qu'ils auoient les premiers rompu le traité.

Après faut considerer, qu'à la renommée de cette grande defaite, il voulut faire voir les Aigles Romaines delà le Rhin, pour donner de l'espouuante aux Allemands, afin de les contenir à l'aduenir. Qu'il ne voulut passer le Rhin sur des batteaux comme chose trop perilleuse; mais il fit vn pont qu'il fit fortifier & garder des deux costez de la riuere: qu'il ne demeura en ce pais là, que le temps necessaire à la reputation de ses armes, & qu'en retournant il coupa son pont, afin d'oster le moyen aux Allemands de s'en seruir.

L'adiouste encor que la defaite de cinq mille che-
 uaux Romains , par huit cens cheuaux Allemans,
 & le lendemain la defaite de quatre cens mille
 Allemans par trente ou quarante mille Romains;
 monstrent clairement que ce n'est pas la vaillance
 naturelle d'une Nation sur l'autre, ny le grand
 nombre sur le petit qui donne le gain des combats;
 mais l'observation exacte de la discipline mili-
 taire, & l'exercice continuel des armes, qui in-
 struit non seulement à bien combattre, mais aussi
 à bien prendre ses auantages, & à connoistre
 quand il faut combattre ou non.

SIXIESME G V E R R E.

LA fixiesme guerre de Cesar fut contre
 l'Angleterre, pource que ceux de ce-
 ste Isle là assistoient souuent les François
 contre luy. Pour cet effet, il s'enquiert des
 Marchands qui y traffiquoient quelles Na-
 tions y habitoient, comme ils faisoient la
 guerre, sous quelles loix ils viuoient, &
 quels estoient leurs meilleurs ports. Apres
 il enuoya reconnoistre la coste par C. Vo-
 lufenus, puis fit venir ses nauires, sur les-

quelles il auoit fait la guerre à ceux de Vannes, & prepara toutes choses necessaires à son dessein. Le bruit de ce preparatif donna sujet à plusieurs villes Angloises de luy enuoyer des Ambassadeurs, luy promettre obeïssance, & luy offrir des ostages, lesquels il renuoya avec bonnes paroles, & avec eux Cornio [qu'il auoit fait Roy d'Arras,] pour sous ce pretexte reconnoistre mieux le pais. Neantmoins Cornio n'osant se fier aux Anglois, demeura seulement cinq iours sur les costes, puis retourna faire son rapport de ce qu'il auoit pu connoistre. Cependant Cesar fait paix avec ceux de Teroüenne, afin de ne laisser aucune guerre derriere luy: prend deux legions & partie de sa caualerie: enuoye le reste de son armée au pais de Gueldres, sous la charge de Q. Titurius Sabinus & Arunculeius Cotta: donne la garde du port où il s'embarquoit à P. Sulpicius Ruffus, & fait voile. Il arriue heureusement à la coste d'Angleterre, (avec son infanterie seulement,) qu'il trouue toute en armes: il tente de faire là sa descente, où trouuant trop de difficulté, il la va faire à huit milles plus loing, encor fust-ce avec peril. Neantmoins il estonna tellement les Anglois, qu'ils luy

enuoyerent demander la paix. Mais vne tourmente estant arriuée qui luy fracassa plusieurs de ses vaisseaux, & reietta en terre ferme tous ceux qui portoient sa caualerie; leur donna courage, & au lieu de luy donner des ostages, armerent tout le païs contre luy, mal-menant vne de ses legions qui estoit allée au fourage, laquelle il secourt & la retire sauue. En ces extremitez Cesar pouruoit au radoubage de ses vaisseaux, à ses viures, à la seureté de son camp, & estant de nouveau attaqué par les habitans de l'Isle; il les combat & défait, ce qui les oblige derechef à demander la paix. Il la leur accorde, prend ostages de ceux qui en voulurent donner promptement, & r'amene en Gaule son armée saine & sauue. Il y eut seulement deux nauires avec trois cens soldats, qui estans descendus vn peu plus bas, furent chargez par ceux de Teruenné, ce que Cesar ayant entendu y court avec sa caualerie, les deliure, & défait ses ennemis.

REMARQUES.

EST à remarquer, que commencer vne guerre en Automne, sans vtilité apparente,

en vn pays point reconnu, n'y ayant aucune intelligence, & auoir à passer l'Océan; est vne entreprise, ce me semble, bien digne de l'inuincible courage de Cesar, mais non de sa prudence accoustumée. Neantmoins il faut condonner cette escapade à sa bonne fortune, laquelle il auoit assuiettie à sa volonté; car en ce dessein où il sembloit que les hommes & les Elements eussent conjuré contre luy, la Terre luy refusant le viure, la Mer fracassant ses vaisseaux, l'Air fournissant les tempestes, & le pays où il estoit abordé conjurant sa ruine; il résista constamment à tout cela, opposant à la faim sa preuoyance à nourrir son armée; au debris de la Mer, sa diligence pour le radoubage de ses vaisseaux; aux attaques de ses ennemis, ses armes pour les battre si bien, qu'il les contraignit de luy demander la paix, & ainsi il se retira glorieusement d'un mauvais pas, où tout autre deuoit succomber.

Considerons tousiours comme auant que de partir de la France, il pourueut à ce qui estoit necessaire pour la contenir en son deoir, & à la seureté de son retour.

Notons encor combien Cesar abondoit en inuentions, pour bien prendre son temps dans l'occasion mesme: car comme il s'apperceut que ses soldats pour n'estre accoustumez aux combats de Mer, s'embarassoient à la descente; Il changea

dans l'action mesme son premier ordre , & avec les vaisseaux à rame, approcha plus près de la coste, & malgré ses ennemis mit pied à terre ; & eux pour voir vne maniere de vaisseaux qu'ils ne connoissoient point , s'estonnerent & se mirent en fuite. Aussi faut-il admirer en Cesar deux parties qu'il auoit en perfection , lesquelles rendent vn Capitaine excellent ; à sçauoir qu'il pouuoit à toutes les choses qui pouuoient seruir ou nuire à son dessein auant que de l'entreprendre : & que dans l'execution il nemanquoit à prendre son temps quand il s'offroit , ou remedioit sur le champ aux accidens impreuens qui l'ay arriuoient. Enquoy il a esté inimitable.





SEPTIESME

G V E R R E.

L I V R E V.



Esar n'estant content de son premier voyage d'Angleterre; employe l'Hyuer à faire preparer l'équipage necessaire pour y passer vne seconde fois, & selon sa coustume il va en Lombardie, d'où auant que de retourner il passe en Esclauonie, pour y appaiser quelques seditions qui y estoient suruenues, apres il retourne en son armée, trouue tout en bon estat, louë vn chacun de la bonne diligence qu'ils ont apportée à apprester toutes choses. Mais auant que de partir il va à Treues, tres-puissant peuple, sur la diuision suruenue entre Indutiomar & Cingentorix les deux plus puissans de la ville. Le dernier va au deuant de luy, & luy promet toute
obcïf-

obeïſſance : l'autre ſe prepare à la guerre. Neantmoins craignant d'eſtre abandonné , il ſe rend. Ceſar le reçoit ; mais il diminuë ſon autorité , & augmente celle de Cingtorix , qu'il croyoit luy eſtre plus affectionné. Cela fait il continuë ſon deſſein , & mene à cette guerre les principaux de Gaule. Dumnorix d'Autun en fait difficulté , Ceſar l'en preſſe , il ſ'excuse ; il taſche de desbaucher les Gaulois : finalement il ſ'enfuit , il enuoye après , & ne voulant retourner il eſt tué. L'embarquement ſe fit à Calais , où Ceſar laiſſa Labienus avec trois legions & deux mille cheuaux : Il paſſe en Angleterre , il ne trouue nul empeschement à la deſcente ; il fortifie vn camp pour garder ſes vaiſſeaux , & y laiſſe Q. Atrius , paſſe outre , & force le camp des Anglois vn peu eſloigné de là. Le lendemain Atrius luy mande que la tourmente a fracassé la pluſpart de ſes vaiſſeaux. Il y retourne , employe dix iours entiers à les raccommo-der , les met en terre , fait bien fortifier ce camp là , mande à Labienus qu'il luy faiſſe faire de nouueaux vaiſſeaux , puis auance vers Caſſiuellanus déclaré chef des Anglois , contre luy , lequel ne l'oſe attaquer ſi ce n'eſt quand il ſort de ſon camp pour aller

au fourrage : ce qui l'oblige d'y aller fort & en bon ordre , & apres auoir esprooué en quelques escarmouches sa façon de combattre ; il le défait par C. Trebonius l'un de ses Lieutenans , qui y estoit allé avec trois legions & toute la cauallerie. Depuis cette défaite il ne parut plus d'ennemis en gros , & Cesar ayant abordé la Tamise au seul lieu qu'on la peut gayer , la passe en despit des Anglois qui s'efforcèrent de l'en empêcher. Cela estonna tellement Cassiuellanus , qu'il ne fit plus que se cacher dans les forests : & voyant que diuerses villes s'estoient renduës à Cesar , il enuoya aussi vers luy , lequel le reçut baillant des ostages , imposant vn certain tribut sur le païs ; puis voyant la saison auancée , & appréhendant quelques tumultes en France , il repassa la Mer , r'amenant son armée pleine de gloire : laquelle contre sa coustume , il fut cōtraint à cause de la sterilité de l'année , de la separer en diuerses garnisons pour la faire viure. Mais auant qu'il peust passer en Italie , Ambiorix & Catanuleus excités par Indutiomar prennent les armes , attaquent Sabinus & Cotta deux de ses Lieutenans , les deffont , & les tuent comme ils pensoient se retirer de leurs loge-

mens. De là ils vont attaquer Ciceron dans son camp, l'un de ses autres Lieutenans, qui se defend avec grande peine. Cesar le deliure & défait les Gaulois. Le bruit de la défaite de deux legions Romaines incite les autres Gaulois à se reuolter ; si bien que Labienus est attaqué dans son camp par Indutiomar. Il soustient son effort, puis apres le defeat & letuë. Comme la premiere défaite des legions Romaines auoit esmeu toutes les Gaules à se reuolter, aussi ces deux dernieres des Gaulois leur firent quitter les armes.

REMARQUES.

EN ce second voyage de Cesar en Angleterre, encore qu'il y soit allé plus fort & mieux preparé que la premiere fois, ayant remedié à toutes les choses qui luy auoient manqué ; neantmoins allant dans vn pays où il luy falloit aller par Mer, où il n'auoit aucune intelligence, & partant d'un autre nouvellement conquis, sujet aux reuoltes, & qui enduroit mal volontiers la sujection ; il consenta plustost en iceluy son ambition, qu'il ne fit grand profit aux Romains. Sur quoy nous remarquerons premiere-ment sa dexterité & prudence, en ce qu'il emme-

na volontairement avec luy tous les plus remuans des Gaules pour luy servir d'ostage. Mais il sem-
ble que sa clemence naturelle luy fit faire vne faute
en se contentant de diminuer l'autorité d'Indi-
tiomar, au lieu de le ruiner tout à fait, dont de-
puis il se pensa mal trouuer.

Secondement, comme il ne s'estonne iamais
aux accidens inopinez, & auxquels il pour-
uoit comme s'il les auoit preueus. Ce qu'il tesmoi-
gna bien à propos en cette grande tempeste, qui
luy fracassa tous ses vaisseaux, & qui eust mis
au desespoir tout auere que luy.

Tiercement, encor qu'il soit renommé pour le
Capitaine, qui a mieux sçeu se preualoir de ses
victoires, & qui les a poursuuies le plus chande-
ment; il ne l'a pas voulu faire en cette-cy, pource
qu'il estoit en vn país inconnu, & que son camp
n'estoit encor bien fortifié.

Considerons aussi, que combien que la di-
sette des bleds le contraignit contre sa coustume
de faire hyuerner son armée en diuers lieux, &
non tous ensemble, pour la faire viure plus fa-
cilement: Il le fit si iudicieusement, que les lieux
où il la logea n'estoient si esloignez les vns des au-
tres, qu'ils ne se peussent secourir ny si proches,
qu'ils ne continssent diuers peuples en deuoir.
Neantmoins le succez de ce logement nous mon-
stre euidentement, qu'il n'est rien si bon que de lo-

ger en corps, pource qu'on entreprend plus facilement sur vne petite troupe que sur vne grande, ce qui donna hardiesse aux Gaulois de se reuolter, & d'attaquer le camp de Sabinus & de Corta, où la harangue artificieuse d'Ambiorix qui parlémentant avec eux, & leur persuadant que la reuolte estoit si generale, qu'à mesme heure tous les autres camps estoient attaquez, & ne se pouuoient secourir les vns les autres; les mit en telle confusion d'aduis, que la peur leur fit choisir le pire, qui estoit d'abandonner leur camp, & de se retirer. D'où nous apprendrons qu'on ne se trouue jamais bien de suivre les conseils de son ennemy, & que la retraite en uenë d'ennemy est la plus dangereuse action qu'on puisse faire.

La resistance de Cicéron dans son camp, qui ne voulut recevoir le conseil de son ennemy, mais prit celuy de se defendre dans les retranchemens, luy reüssit à son salut & grande gloire, & donna loisir à Cesar de le secourir. En quoy il y a deux choses remarquables: la premiere, de Cesar qui ayant appris que les Gaulois venoient à luy pour le combattre; se voyant foible choisit vn lieu aduantageux, le fortifie, fait son camp fort petit, afin de le mieux defendre, & faire croire à ses ennemis qu'il estoit fort foible: lesquels apres l'auoir prouoqué au combat plusieurs fois, commencerent à le mespriser, dont s'engendra par-

my eux vne negligence de tout ordre, telle qu'ils ne l'attaquoient plus qu'en desordre : les ayant ainsi endormis vn iour, il les charge si brusquement qu'il les defeat sans resistance : & Labienus l'un de ses Lieutenans par vn semblable stratagemme defeat aussi facilement Indutiomarus. Et la seconde, des Gaulois qui ne pouuant forcer le camp de Ciceron qui contenoit dix milles de circuit, qui fut fait en trois heures, & par des personnes qui n'auoient pour remuer la terre que leurs espées, & pour la porter que leurs habillemens. Ce qui monstre le grand nombre de gens qu'ils estoient, & ce qu'on peut faire aux armées bien réglées & bien pourueues.






HVITIE S M E

G V E R R E.

L I V R E VI.

 E S A R voyant les affaires des Gaules se disposer à la guerre, se fortifie de trois legions Romaines, & de tout autant d'autres soldats qu'il peut trouuer. Ce qui luy vint bien à propos : car depuis la mort d'Indutiomar, les Treuois mirent leur gouuernement entre les mains de ses parens, qui se liguerent avec tous ceux qui se voulurent reuolter, & particulièrement avec Ambiorix. Dont Cesar ayant eu aduis, met dès l'Hyuer quatre legions ensemble, surprend les Tournaisins & les force de se rendre & luy bailler des ostages : puis le Printemps venu, fait l'assemblée des Gaules à Paris, d'où le propre iour qu'il la finit, il va attaquer ceux de Sens, puis ceux de Chartres,

qui se trouuans surpris se rendent. De là il se prepare à attaquer Ambiorix & les Treuois; mais auparauant il leur veut oster leurs alliez. Pour cét effet il se descharge de tout son bagage, qu'il enuoye à Labienus (qui estoit au pais des Treuois,) avec deux legions pour le fortifier, & luy avec cinq va attaquer les Gaulois. Pour cette execution il partagea son armée en trois: pource qu'il scauoit bien qu'ils n'estoient assez forts pour luy disputer la campagne: & brula & pillà tellement leur pais qu'il les contraignit de se rendre, de bailler leurs ostages, & d'abandonner Ambiorix: En ce mesme temps les Treuois attaquent Labienus, qui faisant semblant d'auoir peur, & se retirant comme s'il eust fuy, les attira en desordre en lieu desauantageux; où il les deffit, & prit la ville mesme de Treues. Cette expedition faite Cesar bastit vn pont sur le Rhin & le passe. Ceux de Cologne le fauorisent, il fortifie son camp, y fait prouision de viures, & tasche de contraindre les Sueues de venir au combat, Mais voyant qu'ils se retirent dans de grandes & profondes forests, il cesse de les poursuivre, repasse le Rhin, coupe du costé de l'Allemagne six vingts pieds seulement de son
son

son pont, fait vne bonne Tour sur le bout d'iceluy, & bastit vn Fort à l'autre bout du costé de la Gaule, laissant douze cohortes à la garde d'iceluy & dudit Pont, (en cét endroit Cesar fait vne description des mœurs & coustumes des Gaulois & Alle-mans.) Cela fait il va continuer la guerre contre Ambiorix, & pour le mieux surprendre il enuoye deuant L. Minutius Ba-filius avec toute la Cauallerie, luy defendant de faire aucun feu dans son camp, afin d'oster la connoissance de sa venuë. Et ainsi il pensa se saisir d'Ambiorix qui se sauua miraculeusement, & ne fit plus que fuir d'vn lieu à l'autre. Cesar pour mieux le poursuiure, met de nouueau son bagage en vn chasteau du Liege nommé Vatuca, à la garde duquel il laissa Q. Tullius Cice-ron avec vne legion, luy ordonnant pen-dant sept iours que dureroit son expedi-tion, de faire bonne garde, & de ne sortir de ses retranchemens. Puis il separa son armée en trois pour rauager tout ce pays, n'ayant obstacle d'aucune armée formée, si bien que son plus grand soin estoit d'empescher que ses soldats desireux du bu-tin ne s'escartassent trop, de peur qu'ils ne fussent assommez des ennemis cachez dans

les foreſts & dans les mareſſes. Le bruit vo-
 la ſoudain delà le Rhin que Céſar mettoit
 au pillage le païs de Gueldres: ce qui don-
 na ſujet aux Veſtfaliens de participer à
 ce butin. Ils aſſemblent promptement deux
 mille cheuaux, paſſent le Rhin, pillent
 ſans reſiſtance; & y prennent tel gouſt,
 qu'ils ſe reſoluent d'attaquer le camp des
 Romains, où par mal-heur ce iour là qui
 eſtoit le ſeptieſme du partement de Céſar,
 Ciceron qui auoit obſerué ſon comman-
 dement fort exactement, n'en ayant nul-
 les nouuelles ny de nuls ennemis, ſe laiſſa
 emporter à l'importunité de ſes ſoldats,
 auxquels il auoit permis d'aller au fourage:
 quand au meſme temps il ſe vit attaqué à
 l'impourueu des Veſtfaliens, contre leſ-
 quels il eut de la peine à ſe defendre; iuſ-
 qu'à ce que ſes ſoldats retournant du fou-
 rage, vne partie paſſa à trauers les ennemis
 & regagna le camp, mais le reſte fut taillé
 en pieces. Neantmoins le ſecours oſta aux
 ennemis l'eſperance de la forcer, & ainſi ils
 ſe retirerent en leur pays avec leur butin.
 Peu de temps apres arriua Céſar, lequel
 tança Ciceron d'auoir outrepaſſé ſon or-
 dre; puis ſe mit de nouveau à mettre à feu
 & à ſang le pays de Gueldres, & à pourſui-

ure Ambiorix, qui pourtant eschappa. Apres cela il met son armée en garnison, qu'il pouruoit de bled, puis passe en Italie.

REMARQUES.

EN cette guerre Cesar n'a pas eu de grandes resistances, tout le monde fuyant deuant luy, & ne faisant que bruler & rauager le pays. Neantmoins il y a de belles remarques à faire. Car si on n'y apprend à combattre, & à forcer les fortereſſes; vous y apprenez la maniere de venir à bout de ceux qui se defendent en fuyant, & en se retirant aux lieux inacceſſibles: à quoy beaucoup de Capitaines ont manqué pour n'y auoir obserué trois choses principales, comme a fait Cesar. A ſçauoir de les preuenir tellement par vne grande diligence, qu'on les ſurprenne auant qu'ils puissent retirer, ny eux ny leurs viures dans les forests; si bien que par cette voye on contraint les vns à se rendre & les autres à perir de faim. La ſeconde, de ſeparer son armée en autant de parties qu'on le peut faire ſeulement, afin qu'attaquant vn pays en diuers endroits tout à la fois, les habitans d'iceluyne ſçachent de quel coſté ſe pouuoir retirer; & la derniere, d'empeschier que ſes ſoldats ne ſe desbandent ſans ordre pour aller butiner, de peur qu'ils ne ſoient aſſommez par les en-

nemis ; duquel manquement est souvent arriué de grands inconueniens en des armées conquerantes. Ce quinous doit apprendre de ne relascher iamais de la seuerité de la discipline militaire ; quoy que nous croyons estre bien estoignez de nos ennemis, & en grande seureté. L'exemple que nous auons en ce liure de Q. Ciceron est excellent pour cela ; lequel receut vne grande perte, & pensa estre defait tout à plat ; pour s'estre laissé emporter à l'importunité de ses soldats, qui contre le commandement de Cesar voulurent sortir de leur retranchement pour aller au fourage.

Nous apprenons encor la difference des vieux soldats aux nouueaux, qui faute d'experiance ne sceurent choisir le party seur & honorable, se retirant sur vne colline où ils furent deffaits. Mais les autres voyans qu'il n'y auoit salut qu'en passant au camp, se firent voye avec leurs armes, & sauuerent & eux & leur camp. Et voyons combien la peur est ingenieuse à chercher des sujets qui l'augmentent. Car pour ce que ce lieu là estoit le mesme où Titurins & Cotta auoient esté deffaits l'année auparauant ; ils en auguroient mal.

Remarquons aussi comme Cesar, quand il vouloit faire vne expedition de sept ou huit iours, où la diligence fust requise ; il se deschargeoit de son bagage, qui à la verité est vne chose à la

campagne d'un merueilleux empeschement. C'est pourquoy il est impossible de bien conduire vne armée, si selon les occasions on ne retranche son camp, ou si on ne marche sans bagage.

Admirons encores combien Cesar estoit bien aduertypar ses Espions. Aussi est-ce vne chose de telle vtilité, qu'un Prince ou un Capitaine ne doit rien espargner pour cela, estant le plus puissant moyen qu'on puisse auoir, pour entreprendre de belles actions, ou pour éviter de grandes ruines.

Il ne faut non plus oublier sa dexterité à diuiser ceux qui se liguoiens contre luy, & à les attaquer séparément: & sa diligence coustumière à les surprendre, estant venu à bout de la pluspart de ses grands desseins par ces voyes là.

Nous concluons les remarques de ce liure par le stratageme de Labienus; qui voulant combattre les Treuois auant que les Allemans les ioignissent, s'aduisa de tesmoigner publiquement qu'il les apprehendoit, & qu'il vouloit se retirer: sçachant bien qu'il y auroit des Gaulois dans son armée qui les en aduertiroient; & cependant donna ordre secrettement qu'on se retireroit avec grand bruit, & comme ayant grande peur; dont les Treuois estant aduertis, sans attendre les Allemans, creurent ne deuoir perdre l'occasion qui s'offroit à eux, passent vne riuier e & vien-

nent en desordre , comme à vne victoire assurée.
Mais Labienus tourne à eux en bon ordre & les
deffait. Je ne conseilleray pourtant iamais de ten-
rer vn tel stratageme avec de nouueaux soldats ;
qui le plus souuent s'effrayent quand on vient à
eux en courant & sans ordre ; ce qui au contrai-
re assure ceux qui sont experimentez au com-
bat.





NEVFIESME

GVERRE.

LIVRE VIII.



LES affaires de Gaule estant paisibles, Cesar va en Italie selon sa coustume, où il entendit la mort de Pison, & les broüilleries de Rome, qui induisirent de nouveau les Gaulois à se reuolter. Chartres commença : les Auvergnats suivirent, & en suite plusieurs autres peuples. Vercingentorix Auvergnat, est esleu Chef de tous. Ces nouvelles entendues de Cesar, il part en plein Hyuer, passe les montagnes de Geuaudan couuertes de neiges, & se rend plustost en Auvergne qu'on ne scût son partement d'Italie; ce qui r'affermit plusieurs peuples à son party, & estonna ceux qui s'estoient reuoltez. Avec cette mesme diligence il pas-

se en Bourgogne & Champagne; y assemble son armée, vient en Berry, & assiege, & prend Vellaudunum (dont il prend six cens ostages,) puis force Gien, ou Orleans, où il y eut grand meurtre. Vercingetorix voyant les succez de son ennemy, & ne se iugeant auoir vne assez bonne armée pour le combattre en campagne; le veut vaincre en luy ostant tous moyens de subsister. A cet effet il brulle plus de vingt villes, ne conseruant que Bourges, (encore fut-ce contre son aduis.) Cesar l'assiegea où il pâtit beaucoup, & se trouua en de grandes difficultez & necessitez: En fin les ayant surmontez il la prit, y tua quarante mille hommes, & y rafraischit son armée. Durant ce siege il tasche de surprendre le camp de Vercingetorix, dont il est repoussé; lequel ne s'estonnant point de tant de mauvais succez, il continuë la guerre avec beaucoup de courage & de prudence; & pour empescher son ennemy de passer la riuière d'Alliers, il en couppetous les ponts. Neantmoins Cesar l'amusant d'un costé la passe en vn autre, & va assieger Clermont. Vercingetorix se campe de l'autre costé; il s'y fait plusieurs attaques & beaux combats. Trois

tesfois Cesar est contraint de leuer le siege; soit qu'il iugeast ne la pouuoir prendre; ou bien pour remedier à la reuolte des Autunois, procurée artificieusement par Litaucius, lequel s'estant fait eslire Chef d'un secours qu'ils enuoyoient à Cesar, n'estant plus qu'à dix lieuës de luy; feignit d'auoir nouuelles de l'armée; qu'il auoit fait massacrer tous les Autunois qui y estoient, ce qu'il manda aussi tost à Autun; si bien que là, & dans son camp il fit massacrer tous les Romains qui s'y trouuerent, pillà les biens, & sur tout le bled qu'ils portoient pour la nourriture de l'armée; dont Cesar aduertý par Eporedorix, prend sans consulter quatre legions, & toute sa cauallerie, marche iour & nuit, attrappe Litaucius avec ses forces, fait connoistre sa tromperie à ses soldats, & sans coup ferir les reduit à sa discretion. Puis dépesche soudain à ceux d'Autun, pour leur donner aduis de ces choses, & avec la mesme diligence retourne fort à propos à son camp, qu'il secourt le trouuant attaqué & fort pressé par Vercingetorix. Cela fait, il reprend son chemin vers la riuere d'Alliers, & la passe. Cependant Litaucius qui s'en estoit fuy vers Vercingento-

rix , procure la ligue des Autunois avec luy , & Eporedorix & Virдумar se faififent de Neuers , où Cefar auoit laiffé fes oftages , les bleds & deniers du public , la pillent & labrulent. Ce qui le met en de grandes neceffitez , à caufe que Vercingentorix le coftoyoit toufiours , & luy coupoit les viures. En fin il fe refolut de gagner à grandes iournées la riuiera de Loire , qu'il passa , pour pouuoir ioindre Labienus , auquel dés le commencement de cette guerre il auoit baillé quatre legions , pour aller vers Paris. Pendant que ces choses se passoient de la sorte , Labienus se trouue en grande peine dans l'embaras de toutes ces reuoltes. Neantmoins s'estant faifi de Melun , il donna ialoufie en diuers endroits à ses ennemis ; si bien qu'il passa par cette ruse la riuiera de Seine. Et auant que tous ces peuples reuoltez fussent ioints ensemble , il deffit les premiers qui s'opposèrent à luy , gagna Prouins , & de là ioignit Cefar. En mefme temps les menées & intelligences des Gaulois se renforcerent : ilstiennt vne afsemblée , où presque toutes les Gaules se trouuent , elifent de nouveau chef general Vercingentorix , qui fait prouifion de beaucoup de caualerie afin de

miner les Romains en leur retranchant les viures. De l'autre part Cesar fait ses prouisions, & soldoye la cauallerie Allemande; mais Vercingentorix se laissant emporter à la bonne opinion qu'il auoit de sa cauallerie, attaque vn combat contre celle de Cesar, où il est defait. Apresquoy il se retire à Alexie, où Cesar le suit & se resout de l'assiéger. Vercingentorix s'apperceuant de son dessein ramasse tous les viures de la ville, les fait distribuer par mesure, & iugeant qu'en les bien mesnageant il en pouuoit auoir pour prés de deux mois; se descharge de sa cauallerie, enuoye chacun en sa contrée pour procurer son secours à temps; & luy avec quatre-vingt mille hommes de combat s'enferme dans Alexie, laquelle Cesar enclost de doubles & triples tranchées. Puis fait vne seconde circonualation pour s'opposer aux secours de dehors, avec vn labeur & vne diligence incroyable, & fait prouision de viures suffisamment pour pouuoir faire consommer ceux des assiegez, lesquels souffrent de grande disette. En fin le secours vient sous la conduite de Cornio, en nombre de deux cens cinquante mille hommes, fait trois grands efforts en diuers temps, deux de iour & vn

denuit : est repoussé, & se retire : Ce qui contraint ceux de dedans à se rendre à la discretion de Cesar, qui retint les Autunois & Auernats, pour r'auoir les viures qui luy estoient necessaires, & distribué tous les autres à ses soldats. Apres cét exploit tout le reste fait ioug. Ainsi se passa cette guerre qui a esté la plus grande & perilleuse que Cesar ayeeu en Gaule.

REMARQUES.

Toutes les autres guerres de Cesar en Gaule, se sont faites à pieces détachées, s'estant seruy de la diuision des peuples pour les ruiner. Cette - cy a esté d'un consentement presque vniuersel de tous, qui esleurent vn Chef suprême, grand en prudence & courage, lequel s'apperceuant bien que la bonne discipline des Romains, & leur science au mestier de la guerre, les rendoit inuincibles aux batailles ; changea la maniere de la leur faire, & en la prolongeant sans hazarder vn combat general, se trouuant superieur en cavalerie en vn païs qui luy estoit favorable, & incommodant de viures leurs armées, pensa les ruiner ; Sur quoy nous auons de belles remarques à faire.

Premierement sur Vercingetorix, qui ayant

esté volontairement esleu Chef de diners peuples, qui auoient emulation les vns sur les autres, les a sçeu si bien gouverner, que quelque aduersité qu'il ait eu en ses affaires, il s'est tousiours maintenu parmy eux en grande autorité, & redoutable; n'esparnant la seuerité où le cas le requeroit: (car la crainte est le plus puissant moyen à retenir les hommes.) Les mauuais succez ne l'ayant iamais abatu, ny diminué sa creance: mesme s'estant veu accusé d'auoir intelligence avec les ennemis, il les a haranguez si hardiment, qu'il en est tousiours sorty plus authorisé qu'il n'estoit auparauant. Aussi est-ce vn efficaceux moyen à contenir des peuples, que de leur parler souuent sur les affaires qui se passent. Il a eu le pouuoir de faire mettre le feu à plus de vingt villes pour incommoder leurs ennemis: ce qui tesmoigne son bon sens. Car c'estoit le seul moyen de vaincre les Romains (plus forts qu'eux au combat) que de les combattre par la faim. Et en telles affaires tous les conseils mediocres, ou à demy executez sont ruineux; comme la prise de Bourges nous en sert d'vn exemple memorable, pource qu'en la voulant sauuer d'vn embrasement salutaire, elle fut conseruée pour l'vtilité des Romains, qui en sa prise trouuerent les commoditez qui leur manquoient. Son grand credit est remarquable; car à des pen-

ples libres , au commencement d'une guerre avant que d'en avoir esprouvé les mauvais succès , & dans l'esperance de pouvoir vaincre sans venir à des remedes si cuisans ; Il leur persuade de mettre le feu à leurs maisons , & à leurs biens , pour la conservation desquels se fait le plus souvent la guerre. C'est une entreprise bien difficile ; pource que la perte des choses certaines & presentes , qu'on voit & qu'on touche , est preferable parmy un peuple ignorant , aux choses dont les évenemens sont incertains , & les utilitez esloignées : & nul ne peut bien comprendre cette difficulté , qui ne l'a experimentée au gouvernement des peuples. Il a encore monstré sa constance iusques à la fin , n'ayant apprehendé (estant chef de tant de nations diuerfes ,) de s'enfermer dans une place , où il a fait tout ce qu'un prenoyant & braue Capitaine deuoit faire , & a surmonté la faim & les incommoditez d'un siege , ayant tenu bon iusques à ce que son secours ait esté reponssé & defait. Mais pource que les histoires ne se font que par les victorieux , nous ne voyons ordinairement d'estimez que les enfans de la fortune.

Examinons maintenant la conduite de Cesar en cette guerre , qui le surprend estant en Italie , au fort de l'Hyuer , son armée separée en diuerses contrées , esloignées les vnes des autres , & les peuples reuoltez , estant tellement sur son che-

min , qu'il luy estoit presque impossible d'aller joindre ses legions. A de si grandes difficultez il ne trouue autre moyen de les surmonter que par vn travail incomparable, par lequel il se fait voye dans les montagnes couuertes de six pieds de neige , & effroye plus ses ennemis de le voir au milieu d'eux (quand ils le croient encore en Italie , & hors de moyen de pouuoir passer ,) que par ses grandes forces. Il aida aussi par son industrie à cet effroy , en faisant faire en mesme temps diuerses courses à sa Cavalerie , pour monstrier qu'il estoit fort puissant.

Considerons encore comme Cesar voyant la maniere de la guerre changée , & qu'on éuitoit les batailles ; s'adonne aux sieges des Places , où il ne se monstra pas moins admirable qu'à ses autres actions de guerre. Car tout ce que les plus excellents Capitaines modernes pratiquent est puizé de ses actions , & tout ce que nous admirons d'Ostade , de Breda , de Bolduc & de plusieurs sieges du feu Prince Maurice , qui a surpassé tous les autres en cette matiere là , est infiniment au dessous des deux circonualations d'Alexie : où l'industrie , le travail & le peu de temps auquel elles ont esté acheuées , surpasse de bien loin tout ce qui s'est fait ailleurs. Je sçay que l'inuention de la poudre & de l'artillerie a changé la maniere

des fortifications, des attaques, & deffenses des places; mais non de telle sorte. que les principaux fondemens sur lesquels on les a establis, ne soient pris particulièrement de Cesar, qui en cette affaire a surpassé tous les Capitaines Romains.

Il est aussi admirable en ses inuentions & stratagemes, & en la hardiesse de ses entreprises. Quand il voulut donner vn assaut aux retranchemens qui estoient autour de Clermont, il leur donna du soupçon par vn gros qu'il fit, des valets, & bagages du camp, qu'il fit passer à leur veüe du costé qu'il ne vouloit point attaquer; mais non de si près qu'ils pussent discerner quelles gens c'estoient, & ayant fait embusquer la nuit vne legion, & fait couler vne eslite de soldats au petit camp, qui estoit plus proche de la place, il les attaque si à l'im-pourueu, qu'il leur enleue tous les retranchemens.

Quand il voulut passer la riuere d'Alliers à quoy s'opposoit Vercingentorix; il fait embusquer des legions proche d'un pont qui auoit esté rompu; & avec le reste de l'armée. qu'il faisoit paroistre, comme si elle eust esté entiere, il suit le long de la riuere, comme s'il eust cherché vn autre passage: amusant si bien l'armée ennemie, qu'il fait refaire le pont auant qu'on s'en fust appercen, & ainsi il passa sans empeschement.

Quand

Quand Vercingetorix durant le siege de Bourges sortit avec sa caualerie ; il partit de nuit, & vint attaquer son infanterie dans son camp, & peu s'en fallut qu'il ne l'emportast.

Quant au siege de Clermont, apprenant la reuolte de dix mille Autunois qui venoient à son secours, il prend quatre legions, marche iour & nuit pour les attraper : les prend tous, & retourne assez à temps pour deffendre son camp qui estoit attaqué par Vercingetorix. Par où nous remarquerons en passant l'utilité qu'il y a d'auoir toujours son camp bien fortifié, afin d'estre en estat d'entreprendre à toute heure sur son ennemy, selon les occasions qui s'en presentent.

Iene scaurois oublier sa grande modestie ; Cornio qu'il auoit fauorisé, accru en biens, & en honneurs, & auquel il s'estoit grandement fié ; il l'excuse en sa reuolte, plustost que de le blasmer ; alleguant qu'il se laissa emporter au consentement commun, de vouloir recouurer la liberte & la gloire de toute la Gaule.

Difons vn mot de Labienus l'vn de ses Lieutenans, qui se trouuant embarassé avec quatre legions de Cesar dans cette reuolte generale, entouré de toutes parts d'ennemis, ayant à passer la riuere de Seine sur des bateaux pour joindre Cesar, & s'y opposant de grandes forces qui grossissoient à toute heure. En cette extremite il employe le

courage & l'industrie, separe ses troupes en trois, fait de grandes demonstrations en deux endroits de passer où il ne vouloit point; & ainsi ayant separe leurs forces en diuerses troupes, qui ne sçauoient où se porter pour s'opposer à luy, passa la nuit avec trois legions où moins ils l'attendoient, & combattit & deffit les premieres qui vindrent à luy; si bien qu'ayant fait passer à son aise le reste de ses troupes, il ioignit sans empeschement Cesar. Surquoy ie feray cette remarque, à sçauoir que celuy qui n'est fort soigneux, diligent & preuoyant à garder le passage d'une riuiera, ou celuy d'une montagne, est presque tousiours preuenu, pource que celuy qui le garde, s'endort sur l'aduantage du lieu, & celuy qui veut passer, cherche tous expediens, (& en fin les trouue) pour surmonter tous obstacles.





DIXIESME

GVERRE.

LIVRE IX.



LES Gaulois desirans de faire encor vn effort pour secouer leioug de leur seruitude ; diuerses villes coniurerent ensemble leur reuolte. Dont Cesar estant aduertie les surprend si à l'impourueu , qu'il maintint en fidelité celles qui ne s'estoient pas reuoltées , & ramena les autres. Dix-huit iours apres estre reuenu dans ses logements d'Hyuer , ceux de Bourges luy donnerent aduis qu'ils estoient attaquez par ceux de Chartres. Il va à leur secours , & nonobstant les grandes pluyes les range à la raison. En suite ceux de Reims luy demandent assistance contre le peuple de Beauuais , le plus puissant & vaillant de la Gaule , & conduits par Corbeus & Co-

mius deux braues Chefs de guerre. Il y va, prend soin d'auoir de leurs nouuelles, se campe deuant eux, où les gens reçoient quelque eschec allans au fourrage. Mais apres que Corbeus eut changé de camp, & se fut logé plus fortement, il apprit qu'il auoit dressé vne embuscade aux siens qui alloient au fourrage, il y va si fort qu'il le défait, & le tue. Cette victoire obligea les Beauuoisins de se rendre; mais Cornius s'enfuit, ne se voulant fier aux Romains, pour ce qu' auparauant Labienus l'auoit voulu faire assassiner par Vollusenus au preiudice de la foy publique. Cette guerre ainsi finie, Cesar va faire le degast au païs d'Ambiorix, pour le faire haïr des siens, sous Fabius l'un de ses Lieutenians; il secourt Limoges attaqué par Dumnacus, lequel il poursuit, & ainsi qu'il se hastoit pour gagner la riuere de Loire afin de se mettre en seureté, il le défait. Puis subiugua les Chartrains, & la Bretagne avec vne grande promptitude & felicité. Sous Caninius il assiege Drapez & Luterie dans la ville de Cadenac: lesquels estans fortispour pouruoir la ville de bleds; Luterie est defait en voulant les y mettre, & en suite Drapez attaqué, & pris dans son camp. Apres quoy il forma tout à fait le

siège où Cesar vint en personne, qui trouua moyen de leur oster l'eau; si bien que ce pauvre peuple se rendit à sa discretion, qu'il traitta rudement, faisant couper les mains à ceux qui auoient porté les armes: dont Drapiez prisonnier eut tel déplaisir qu'il se laissa mourir de faim: & peu de iours apres Luterie fut pris & mené à Cesar. En mesme temps Labienus deffit les Treuois & Alle-mans, & prit tous leurs Chefs. Apres tant d'heureuses viétories de Cesar obtenues par luy ou par ses Lieutenans, il acheue l'Esté à se promener par les Gaules pour mieux assurer sa conqueste; sur tout en Gasco-gne, où il auoit peu esté, & départ son armée composée de dix legions aux lieux qu'il iuge les plus necessaires: Ce qui luy seruit d'un ferme appuy pour se maintenir dans les discordes ciuiles de sa patrie, où il va entrer.

REMARQUES.

A Vcuns attribuent les si frequentes reuoltes des Gaulois à leur humeur changeante & impatiente, & qui ne peut souffrir vne domination estrangere: & d'autres à la trop grande clemence

de Cesar. l'aduouë que la clemence qui ne ferme la porte au pardon, donne quelque hardiesse à la reuolte; pource qu'on oublie facilement tous bien-faictz qui ne reſtablissent entierement la liberte. Mais si la cruauté nous les rend moins frequentes, elle les fait plus dangereuses; pource que quand le deſeſpoir y contraint, & que l'eſperance de ſalut conſiſte en la ſeule victoire, les conjurez deuiennent tous vaillans, obſtinez, conſtans & fideles iuſqu'au bout, ce qui n'arriue iamais quand on eſpere en la clemence de ſon ennemy. Nous en auons icy de riches exemples. Cesar en la pluſpart des reuoltes des Gaules, a ſouuent trouué de grandes facilitez à les ramener, à cauſe de ſa clemence qui luy a eſté vn puiffant moyen à les diuiſer entr'eux, & à les empeſcher d'eſtre opiniſtres en leurs reuoltes. Et ſi par fois il luy eſt eſchappé de faire quelque ſeuerité, il l'a fondée ſur quelques actes ſales & indignes; comme quand ceux de Vannes ſous la foy publique arreſterent les Cheualiers Romains qui alloient parmy eux achepter des bleds pour la nourriture de l'armée, (mais ie ne puis excuſer celle de Cadenac;) Au contraire les cruantez du Roy d'Eſpagne executées, par le Duc d'Albe, ont ietté au deſeſpoir de pauures peſcheurs qui ont ſecoié ſon ioug inſupportable, & avec vne conſtance admirable ſe ſont maintenus,

accrus, & rendus si redoutables, qu'ils luy resistent sur la terre, & luy vont voler ses tresors dans les Indes.

Cesar nous monstre aussi par son soin & industrie à auoir des nouuelles des ennemis, soit en prenant des prisonniers en la campagne, ou à auoir de bons espions; l'auantage qu'on en tire. Car plusieurs de ses heureux desseins ont esté fondez là dessus, y ayant grand aduantage à les tenter, pource que celuy qui attaque a plus de courage que celuy qui est attaqué, lequel croit tousiours que l'attaquant est le plus fort, ne sçait par où il l'attaque, & apprehende quelque intelligence. Bref tout ce que peut faire en tel cas, vne armée bien aguerrie & bien disciplinée, est de se deffendre. Mais parmy de nouveaux soldats il y arriue de grands desordres. Et c'est pourquoy il prenoit tant de soin à rendre son camp bien fort; afin de le conseruer & tout son bagage avec peu de gens, & pouuoir faire sans peril de belles executions, estant tousiours assuré de sa retraite.

Voyons encor le siege de la ville de Cadenac, laquelle Cesar iugeant imprenable de force, & la sçachant bien munie de bleds, employe vn grand & perilleux traual pour leur couper l'eau d'vne fontaine qui estoit hors de la ville; & la seule qui les abreuuoit. Dont les assiegez s'apperce-

uans, & ayans mis le feu au travail, & par
vne sortie empeschant qu'on ne l'esteignist. Ce-
sar nepouuant les repousser à cause de l'auanta-
ge du lieu, s'aduiſe de faire donner vn assaut
à la ville, & par cette apprehension les fait
retirer.



ABRÉGÉ



65

ABREGE
DES GVERRES
CIVILES DES
COMMENTAIRES
DE CESAR.
LIVRE PREMIER.



A vraye cause de la guerre civile entre Pompée & Cesar, est que l'un ne vouloit point de compagnon, & l'autre ne pouuoit supporter de maistre. Mais celle qui apparut, fut le refus qu'on fit à Cesar de le recevoir à briguer le Consulat estant absent (quoy qu'on luy eust promis :) ou bien de vouloir que seul il desarmast, & que ceux qui s'estoient declarez ses ennemis demeurassent armez. Ce qui se resolut avec violence, & contre la volonté de la Commune ; si bien que les Tribuns du peuple fu-

1

rent contraints de quitter la ville, & d'aller trouuer Cefar, qui prenant l'occafion au poil, fait de fa caufe particuliere la publique, remonftrant à fes foldats qu'il n'eft en armes que pour remettre en liberté le peuple opprimé par le Senat : Et les ayant bien animez là deffus, il part de Rimini (qui eftoit encor de fon gouuernement) & s'empare de toute la Marche d'Ancone, ce qui apporta vn grand effroy à Rome. Pompée & les Confuls l'abandonnent, & n'ofent faire leur gros plus près que Capouë. Cependant Cefar continuant fon chemin, affiege Domitius Enobarbus dans Confinium, qui (auec tous les Senateurs qui l'accompagnoient) luy eft liuré par fes foldats mefmes, lesquels prennent fon party, il laiffa aller Domitius & les Senateurs où ils voulurent; leur faifant rendre tout ce qui leur appartenoit. Suiuant fa pointe il affiege Pompée dans Brundufium, qui ne voulant foute nir le fiege, paffe la Mer avec fon armée, ce qu'il ne peut faire qu'en deux fois, à caufe du manquement de vaiſſeaux. Encor vſa-t'il de grand artifice & precaution pour cacher à Cefar fa retraite, & pour empêcher que ceux de Brundufium ne donnaſſent moyen à fon ennemy de l'attraper. Cefar

ne le pouuant fuiure faute de vaisseaux, enuoye Valerius en l'Isle de Sardaigne, & Curion en celle de Sicile. Cotta abandonna l'une & Caton l'autre, se plaignant de Pompée qui les auoit embarquez mal à propos en cette guerre, & passerent en Afrique. Cependant il vint à Rome, iustifia ses actions, & offrit de se porter à une paix raisonnable. Mais voyant que ses ennemis tiroient la negociation en longueur, il passe en Gaule, & y fortifie son armée de Gaulois. Marseille luy refuse les portes, il l'assiege, & cependant enuoye C. Fabius se saisir des passages des monts Pyrenez; ce qu'il fait brauement. Puis s'approche de Petreius & Afranius qui auoient leur camp au dessous d'Ilerde, & luy se campe sur la Segre, où il fait deux ponts. Il ne se passa du commencement que de legeres escarmouches, iusques à ce que deux legions de Fabius estant allées au fourage, par le pont le plus esloigné du camp, il vint à rompre; dont les ennemis estant aduertis, vont avec quatre legions & toute la caualerie pour les combattre. Mais s'estant retiré sur une colline auantageuse, & Fabius qui s'en douta, estant venu à leur secours, il les deliura de ce peril. Sur ces entrefaites

Cesar ayant laissé C. Trebonius son Lieutenant general au siege de Marseille, & D. Brutus chef de son armée nauale, arriua en son camp. Y estant il voulut se loger entre Ilerde, & le camp des ennemis. Mais apres vn long combat, duquel chacun se donnoit l'auantage, ils se retirerent les vns & les autres dans leurs logemens. Aussi tost apres les pluyes continuelles emporterent ses deux ponts, & rendirent la riuere du tout ingayable. Ce qui le mit en des necessitez extremes, ne pouuant recouurer de viures, ny ioindre de nouuelles forces qui luy venoient de Gaule, ny refaire les ponts à cause de la rapidité de l'eau, & de l'empeschement que ses ennemis luy donnoient, qui estoient sur l'autre bord de la riuere. En fin il fait faire des bateaux, & tandis que les Pompeiens s'amusent à attraper quelques Gaulois qui venoient le ioindre, il porte dans des chariots les bateaux à vingt milles de son camp, les met sur la riuere, fait passer quelques soldats sur l'autre bord, & sans perdre temps y coule encor deux legions, à la faueur desquelles il fait son pont. Et par cecmoyen il reestablit le chemin, & la seureté de ses viures, & ioignit les troupes qui venoient à son secours. Ceste action

r'assurà son armée, estonna l'ennemy, & donna tant de reputation à ses affaires (avec la nouvelle qu'il eut en mesme temps que Brutus auoit deffait par mer les Mar- seillois.) que cinq bonnes villes se rendi- rent à luy, & diuerfes autres traitterent. Mais ne s'arrestant en si beau chemin, il fait diuerfes tranchées pour oster l'eau au camp des ennemis. Et pour rendre la Sei- gre gayable; Afranius & Petreius apprehendans que son dessein luy reüssist, re- solurent de gagner Octogese assise sur l'Ebre, où ils auoient par auance enuoyé faire vn pont. Pour cet effect, ils partent à minuiet. Cesar les fait suivre par sa ca- uallerie; qu'il fait passer à gué (pource que son pont estoit fort esloigné.) puis en suite ayant laissé son bagage dans son camp, passe avec l'infanterie, & les suit si promptement, qu'il rompt leur dessein, les empeschant d'aller où ils vouloient, & mesme de retourner d'où ils venoient; si bien qu'il les met en telle extremité de la faim & de la soif, que sans coup ferir, ils sont contrains de se rendre à sa mercy. Il les congedie tous, & les contente avec des courtoisies incroyables, & iamais ail- leurs exercées enuers des ennemis. Ainsi il

demeure maistre de l'Espagne, les ren-
uoyant comblez de honte & d'obligations,
pour publier à l'enuy sa clemence, & sa va-
leur.

REMARQUES.

C'Est vne chose tres-dangereuse à vn peuple,
à vn General d'armée, & à vne armée
mesme, quand ils sont surpris de la peur; car elle
est tousiours suiuite de fascheux & ruineux acci-
dents: & tous conducteurs de peuples, & chefs
d'armées la doiuent prenoir, & y pouruoir tres-
soigneusement. Il y a trois exemples notables en
celiure sur ce sujet. Le premier quand Cesar pas-
sa le Rubicon, car auant cela on le declare enne-
my de la chose publique. Pompée promet qu'en
donnant du pied contre terre, il fera sourdre des
armées pour le combattre: qu'à son approche ses
propres soldats le luy liureront: ne le iuge digne
qu'on face aucune consideration de luy: on chasse
de Rome ceux qui l'osent nommer; bref il est trai-
té comme vn criminel de peu d'estime. Neant-
moins dès qu'il eut fait le premier pas en auant
pour declarer la guerre, & encor qu'il fist le mes-
me à Pezaro qu'à Rimini, n'ayant pas le quart
de son armée; chacun s'estonne, Pompée & les
Consuls s'ensuyent, l'on quitte le soing des leuées
de gens de guerre, & l'on abandonne Rome. Les

causes de ce grand changement prouiennent, de ce que Pompée ne s'est iamais imaginé que Cesar eust ose entreprendre vn si haut dessein, se fondant sur la presumption que ses vertus & sa bonne fortune luy auoient données; ce qui le font plustost songer à maintenir son party dans la ville, qu'à pourvoir à la deffence d'icelle. Si bien que quand il vit les choses aller autrement qu'il ne les auoit publiées; il s'estonna. Ce ne fut pas lors grand merueille, si vn peuple ignorant qui prend son assurance, ou sacrainte, sur la bonne ou mauuaise contenance de celuy entre les bras duquel il s'est ietté, fit le semblable. Surquoy ie diray qu'àux affaires de telles importances, il faut à l'imitation de Cesar, auant que d'y entrer, considerer meurement tout ce qui en peut arriuer de pis, afin que les mauuaises rencontres ne vous surprennent point. Mais quand on y est embarqué, il faut se résoudre à tous euenemens, & auoir la constance d'aller iusques au bout.

Le second exemple, est quand Domitius Enobarbus se voyant hors d'esperance d'estre secouru de Pompée, prend resolution de se sauuer de Confinium où ilestoit assiégé; mais par son visage plus morne que de coustume, par ses paroles moins résolues que le temps ne portoit, & par le retranchement de son soin aux traux necessaires pour la defense commune; il déconurir à ses soldats ce qu'il

leur vouloit cacher, si bien que preuenant la fuite, ils le liurerent à Cesar. C'est vne belle leçon à vn Capitaine pour luy apprendre que c'est au plus grand peril qu'il doit faire la meilleure mine; car ses soldats s'assurent ou s'estonnent selon ce qu'ils remarquent dans son visage.

Le troisieme est, lors que Cesar reconnut l'effroy des soldats d'Affranius & de Petreius; parce, dit-il, qu'ils ne se secouroient point les vns les autres; qu'à peine auoient-ils receu le choc de la caualerie, qu'ils auoient mis toutes leurs enseignes en vn monceau; qu'ils ne maintenoient ny leurs rangs ny leurs distances, & qu'ils ne bougeoient d'un champ de bataille où ils ne pouuoient subsister faute d'eau. Et encore qu'on ne s'approche pas maintenant si près les vns des autres qu'en ce temps-là, à cause du canon; neantmoins les experimenter Capitaines se seruent vtilement de tels iugemens. L'ay vû Henry le Grand poursuuant huit cens cheuaux avec moins de deux cens, iuger qu'ils ne rendroient point de combat, pource qu'ils se confondoient, & n'obseruoient point leurs distances, ce qui arriva comme il l'auoit prédit.

Encore que se retirer d'une ville assiegée par vn port de mer ne semble pas vne chose fort difficile, neantmoins les precautions que Pompée apporta se retirant de Brundisium, fut ce qui le sauua.

ſauua. Car ayant affaire à vn peuple qu'on abandonne , & à vn ennemy vigilant ; il eſtoit perdu ſ'il n'eust muré les portes , & bouché toutes les auenuës de Brundisium , horſmis deux aſſez cachées , qui conduiſoient ſes gens au port ; pource que quand les derniers ſe retirèrent de deſſus les murailles , les habitans firent en meſme temps monter ceux de Ceſar.

C'eſt pourquoy à toute ſorte de retraite , vn Capitaine ne ſçauroit apporter trop de ſoing pour la rendre ſeure , & pour euitter le deſordre : & quand il l'a fait par ſon choix , il doit la faire de ſi bonne heure & ſi promptement qu'il ne ſoit point obligé de combattre. En cét endroit ie parleray d'vne diſpute entre *Afranius* & *Petreius* ; l'vn ſe voulant retirer de nuit , & l'autre de iour. Ceux qui vouloient partir de nuit , alleguoient qu'ils gagneroient les montagnes & les lieux aſſez auant qu'on ſ'en apperceuſt. Les autres ingeoient qu'ayans affaire à Ceſar , & fort en Cauallerie , ils ne pourroient ſe deſrober de luy ſans combattre ; & qu'en ce cas il valoit mieux que ce fuſt le iour que la nuit , qui apportoit toujours du deſordre aux retraittes. Et cette opinion preualut ; dont ils ne ſ'en trouuerent pas mieux. Pour moy ie tiens que l'autre opinion eſtoit meilleure ; car outre que c'eſt v

ne chose tres-dangereuse que de se retirer de iour en presence d'ennemy : vn aduisé Capitaine ne s'engage guerres à suiure vne armée de nuict, pource qu'il luy est difficile de s'empescher de tomber en quelque embuscade.



L I V R E II.

DVrant que ces choses se passoient en Espagne, Caius Trebonius continuë le siege de Marseille, au secours delaquelle Pompée enuoie de nouveau L. Nassidius, qui ioignant ses forces nauales avec celles des Marseillois; donna la bataille contre Brutus, où il fut battu. L'eschec tomba sur les Marseillois, pource qu'ils combattirent plus opiniastrement que les autres, comme plus interessez à la conseruation de leurs biens & liberté: ce qui les affligea le plus, fut qu'ils auoient conceu vne trop grande esperance de leur deliurance. Ils ne laisserent pourtant de continuer vne vigoureuse resistance. Neantmoins le trauail de Trebonius fut tel, qu'avec mantelets & autres machi-

chines, il approcha d'une tour, qu'il sappa, & en fit tomber une partie. Ce qui estonna les Marseillois, qui promirent de se rendre à la venue de Cesar, & demanderent treue iusques là. Trebonius la leur accorde, & ses soldats faisant mauuaise garde sur la confiance de la treue; un iour de grand vent ils sortent subitement, & brulent toutes les machines des Romains. Trebonius ne s'estonna pas pour cela; il les refait diligemment; ce qui oblige Domitius de se sauuer par mer auant l'arriuee de Cesar; lequel encor que les affaires d'Italie l'appellassent, ne voulut partir d'Espagne qu'elle ne fust toute à sa deuotion. Il y restoit M. Varro qui du commencement parloit avec grand respect de luy. Mais quand il pensa ses affaires n'estre en bons termes, il s'emancipa contre luy, & ceux de son party; si bien qu'apres la deffaitte d'Asfranius, & de Petreius il se trouua engagé à soustenir la guerre. Mais Cesar ayant fait une assemblée à Cordouë, tous l'y vindrent trouver & reconnoistre, & diuerfes villes chasserent les garnisons de Varro, qui se trouua abandonné iusques là, que de deux legions qu'il auoit, l'une le quitta. Tellement qu'il fut contraint d'auoir recours à la misericorde de

Cesar, aussi bien que les autres. Cela fait, il laisse L. Cassius Longinus en Espagne, & passe à Marseille, qui se rend à luy, puis va à Rome. En cemesme temps Curio passe de Sicile en Affrique, avec deux legions seulement & cinq cens cheuaux, se loge au camp Cornelien proche d'Vtique, où Petreius Accius Varus auoit son camp, contre lequel il eut vn combat de caualerie auantageux. Neantmoins sur quelques discours qu'un S. Quintilius Varus tint aux soldats de Curion, il s'engendra parmy eux vne terreur panique, laquelle guerrie par vne harangue qu'il fit à ses soldats, il alla presenter la bataille, où il battit encor Varus, & le contraignit de se retirer dans Vtique, où (avec la mauuaise volonté que les habitants d'icelle luy portoient,) il le pressoit fort, quand il entendit que le Roy Iuba venoit à son secours; ce qui fit retirer Curio dans son camp, & resoudre d'y attendre le reste de son armée, qu'il auoit en Sicile. Mais vn mauvais aduis qu'il eut que le Roy Iuba ne venoit en personne, & qu'il enuoyoit seulement vn foible secours sous la charge de Saburra; luy fit changer cette bonne resolution. Donc enflé de sa premiere victoire, & plus exercé à haranguer

le peuple Romain , qu'à commander des armées ; va iour & nuit au deuant de ce secours. Sa caualerie rencontre la nuit partie de celle des Numides , & la bat. Ce succès l'eschauffe encor dauantage ; si bien qu'il marche comme s'il eust poursuiuy vne victoire. Mais ainsi las , & en desordre, il rencontre vne armée complete & fraische qui le deffait ; ce qu'il sceut faire de mieux fut , qu'il voulut expier par sa mort sa temerité. Et ainsi mourut meilleur soldat, que bon Capitaine.

REMARQUES.

C'Est vne maxime tenuë de tous , & negligée de beaucoup ; que durant les trêues il faut faire meilleure garde que iamais. Nous en auons icy vne exemple notable. Trebonius avec vn merueilleux travail auoit reduit les Marceillois aux abois , quand durant vne trêve qu'il leur auoit accordée par pitié, ses soldats negligèrent tellement leurs gardes ; qu'ils les conuierent de la rompre , & il vit brusler en vne heure tout son travail de plusieurs mois. Ce qui nous doit apprendre de ne relascher iamais à la guerre de la seuerité de la discipline militaire. Quoy que les soldats s'en faschent , il faut plustost les

contenter par toute autre sorte de voye que par celle-là, & quand ils verront leurs Capitaines partager avec eux les perils & fatigues de la guerre, ils les supporteront gayement. Car il se lit bien que par l'observation exacte de la discipline militaire, plusieurs Capitaines ont surmonté de grandes difficultez, & ont acquis de glorieuses victoires : & que plusieurs autres pour l'auoir mesprisée, ont esté honteusement deffaits. Mais il ne s'est iamais leu que l'observation d'icelle ait esté cause de la perte d'une bataille, ou de la ruine d'une entreprise.

Vn grand courage sans experience est plus capable de faire vne grande faute à la guerre qu'un mediocre. Car le premier ordinairement est accompagné de presomption, & plus incapable de conseil que l'autre ; sur tout quand il a commencé ses premieres armes par quelque heureux succez. Curion en est vn bel exemple. De Tribun du peuple, il se voit General d'armée : aussi fit-il diuerses fautes, & remarquables. Car apres auoir eu ce bon-heur de battre ses ennemis, de les renfermer dans Vtique, & sur la nouuelle de la venue du Roy Iuba, auoir pris vne bonne resolution de se retirer dans son camp, qui estoit au bord de la mer, bien fortifié, & bien muny, pour y attendre le reste de son armée. Sur le premier aduis qu'on

luy porte que le secours est foible, & que Iuba n'y est en personne, sans en attendre la confirmation, ny vouloir le considerer, ny croire personne, il quitte sa premiere resolution, va pour le combattre, apres que sa caualerie eut rencontré quelque partie de celle de Iuba dont on luy mena des prisonniers, il demande qui les commandoit, & sur ce qu'ils luy respondirent que c'estoit Saburra; il presuppse que Iuba n'y estoit point. Par ainsi il se confirme en sa premiere erreur, & marche si viste & si loing qu'il se trouue à vingt-cinq milles de son camp, en vn païs qu'il ne connoissoit point, avec vne partie des siens (l'autre n'ayant pû suivre) fort harassé & en desordre, qui fut cause que Iuba en eut bon marché. Ce qui fait connoistre que ny le grand courage tout seul ne fait pas vn bon Capitaine (quoy qu'il y aide bien) ny la lecture des liures, ny le bien dire. Mais qu'il faut vne longue experience, & auoir veü des deroutes aussi bien que des victoires. Car quine s'y est trouué ne sçauroit s'imaginer ce que c'est; les plus braues soldats y faisans quelque fois les plus lasches actions; comme il arriua icy, où encor que le residu de cette armée se fust retiré dans vn camp bien fortifié & point attaqué; ils s'embarquent avec tant de confusion & de sordre, qu'il s'en noya vne bonne partie. C'est pourquoy ie conclus qu'il vaut

*mieux n'aller pas si viste, & sçauoir où l'on va;
que d'estre obligé de fuir honteusement, ou de
perir.*



L I V R E I I I.



ESAR estant esleu Dicta-
teur, pouruoit aux affaires
de la Ville de Rome: se fait
publier Consul avec P. Ser-
uilius: se desmet de la Dicta-
ture au bout de vnze iours, & apres va
s'embarquer à Brundisium, où il auoit en-
uoyé sept legions l'attendre. Mais il nes'y
trouua de vaisseaux pour la moitié de son
armée, si bien qu'il fut contraint de pas-
ser avec quinze mille hommes de pied, &
cinq cens cheuaux; laissant M. Antoine a-
uec le reste, auquel il promit de renuoyer les
vaisseaux. Pompée qui auoit eu toute l'an-
née à se preparer, auoit fait vn grand amas
d'hommes, de viures, & de vaisseaux; tel-
lement que Cesar passa avec peine & peril,
& r'enuoya aussi tost ses vaisseaux à An-
toine. Mais Bibulus Chef de toutes les ar-
mées

mées de mer de Pompée, en prit vne trentaine qu'il brûla, & fit mourir tous les Mariniers; afin d'oster aux autres le courage d'entreprendre ce passage, & s'opiniastra tellement, nonobstant l'Hyuer, qu'il empescha Antoine de passer. En mesme temps M. Octavius Lieutenant de Pompée assiege Salones en Dalmatie; qui se defend si courageusement, que sans assistance de personne, elle luy fait leuer le siege, & par vne sortie le chasse honteusement de là, d'où il se retira aupres de Pompée à Durazzo. D'autre part Cesar s'estant emparé de diuerses villes le long du riuage, l'empeschoit aussi de se rafraischir. En fin Bibulus meurt, & la mer n'estant pas si exactement gardée, Antoine la passe: où les vents fauorisent tellement la bonne fortune de Cesar, qu'ils changerent à point nommé pour mettre son armée en seureté, & faire perir celle qui la poursuiuoit. Cette nouuelle estant arriuée à luy & à Pompée en mesme temps, pource qu'ils estoient campez l'un deuant l'autre, l'un part pour aller ioindre Antoine, ce qu'il fit, & l'autre pour le combattre; ce que n'ayant pû faire, il retourne se camper à Asparagne, des appartenances de Durazzo, & mande à

Scipion qu'il le vienne ioindre avec son armée. Cesar voyant que la guerre alloit en longueur, enuoye partie de la sienne en Macedoine & en Thessalie pour faire amas de bleds; pource que la mer estant au pouuoir de Pompée, il ne pouuoit en recouurer du costé d'Italie. Mais le passage de Scipion se rencontrant fortuitement en mesme temps, il pensa tailler en pieces L. C. Longinus avec vne legion de Cesar; Ce qu'il eust fait, si M. Fauonius qu'il auoit laissé à la garde de son bagage avec huit cohortes, ne luy eust mandé que s'il ne le secouroit promptement, Domitius le venoit enlever. Parainfi il desista de son entreprise, & arriva fort à propos pour Fauonius. En mesme temps le ieune Pompée ayant sceu que Cesar renuoyant pour la troisiésme fois ses vaisseaux à Brundisium, en auoit laissé quelques vns à Oricum sous la charge de Caninius avec trois cohortes; il les vint attaquer, & les prit ou brula tous. Cela fait Cesar se va camper entre Durazzo, & le camp de Pompée, pour luy empescher la commodité de Durazzo. Mais Pompée se campa en vn lieu nommé la Pierre, sur le bord de la Mer, où il y a vn petit port; tellement que par le moyen de ses vaisseaux il

en retire les mêmes commoditez. Lors Cesar tasche de l'enclorre de tranchées, & Pompée par d'autres tranchées s'elargit tant qu'il peut, & se sentant le plus fort de gens attaque les retranchemens, & en deux combats eut de l'avantage, & le pensa de faire. Cesar ne pouvant plus demeurer là, se retire vers Apollonie & Oricum, où ayant fait faire monstre à son armée, & donné ordre à ces deux places, il passe en Thessalie pour joindre l'armée de Domitius. Pompée le suit, qui joignit aussi celle de Scipion. Les deux armées (d'où dépendoit la decision de tout l'Empire Romain) se camperent l'une deuant l'autre. Cesar cherchoit les combats, & Pompée les euitoit. En fin il se laissa vaincre premierement aux medifances des siens, & puis à la valeur de Cesar, qui le pourfuiuit si viuement apres la victoire de la bataille de Pharsale; qu'il ne luy donna loisir de faire aucun ralliement, arriuant en Égypte presque aussi tost que luy; où le Roy Ptolomée violant le droit d'hospitalité, & oubliant les bienfaits que son pere auoit receu de Pompée, le fit tuer: pensant par ce meschant acte acquerir grace enuers le vainqueur, qui le vangea, comme nous le verrons au liure

ſuiuant. En ce meſme temps, Caſſius Chef de l'armée de Surie, Phœnicie & Silicie, met le feu aux vaiſſeaux que Pomponius gardoit au port de Meſſine, & Lelio prit vne petite Iſle deuant le port de Bründuſium, comme Libo auoit fait vne autrefois. Mais la nouuelle de la deſſaite de Pompée rompit tous les deſſeins de ſes Licutenans.

REMARQUES.

Sur la clemence & liberalité de Ceſar eſt tant recommandee en tout le cours de ſa vie. Il ſemble qu'en ceſte guerre ciuile il ſe ſoit ſurmonté luy meſme. Ne vouloir deſſaite des armées toutes entieres en Eſpagne de viue force, & les ayant reduites à ſe remettre à ſa miſericorde, les laiſſer aller avec leurs Chefs, ſans les obliger à ne luy plus faire la guerre : payer la ſolde de ſes ennemis, tandis qu'il emprunte l'argent de ſes Capitaines pour payer les ſiens : rendre tout d'un coup à Domitius Enobarbus cent cinquante mille eſcus, que Pompée luy auoit baillé du treſor public pour luy faire la guerre : laſcher tous les priſonniers qu'il prenoit ſans rançon, & meſme leur faire rendre tout ce qui leur appartenoit, lors que

*Bibulus, Labienus, & autres luy faisoient mas-
sacrer tout autant de ses soldats qu'ils luy pre-
noient ; sont actions que ie remarque , plus pour
admirer , que pour pouuoir estre imitées : Sur
tout en vn siecle où la pratique est bien contrai-
re à cette generosité , & mesme à ce qu'il auoit
exercé en Gaule, où quelquefois il a vsé de gran-
des seueritez. Donc recherchant les raisons qui
l'ont mené à cette clemence auengle , & qui sem-
bloit estre cruelle aux siens ; ie iuge qu'il faut
distinguer les desseins. En Gaule il y estoit
conquerant , de façon que quand on abusoit de
sa premiere & naturelle clemence , il vsoit de
seuerité pour retenir par crainte ceux que sa don-
ceur n'auoit pû fleschir. Icy est vne guerre ci-
uile , en laquelle sous le pretexte de maintenir la
liberté du peuple , il veut assubiettir , & le peu-
ple & le Senat. Pour cet effect il dépose toutes
passions pour venir à bout de son dessein ; tant
plus ses ennemis sont cruels enuers luy , moins il
s'anime contr'eux : si bien que ceux qui luy font la
guerre ne le craignant qu'aux combats , & ne
desesperans point du pardon, ils se fléchissent plus
aisément au premier reuers de fortune qui leur
vient. Il n'en est pas de mesme d'une guerre
ciuile qu'on ne fait que pour la deffence de sa per-
sonne, ou de sa religion : car lors n'ayant point de
dessein de vous emparer de l'Estat , vous estes*

obligé de repousser la cruauté par la cruauté, autrement vous ne trouveriez aucun partisan : mais quand vous combattez pour la domination, il faut pour y parvenir vous montrer tel, qu'on n'apprehende en vous, ny la vengeance ny la cruauté, & qu'on y croye vne grande liberalité, & toutes autres sortes de vertus : car l'on ne souhaitte iamais vn changement de condition que pour ameliorer la sienne. Ainsi avec cette resolution liberale & clemence, ne retenant sa Dictature que quinze iours, ne faisant rien que par l'ordre ordinaire, comme le Protecteur de la Republique, iustificiant toujours ses actions, se montrant d'autant plus affectionné à la paix que Pompée s'en esloignoit, afin d'indigner ses citoyens & soldats contre luy, & faisant encor mieux la guerre, il est venu à bout du plus haut & glorieux dessein que iamais homme ait entrepris.

Cesar ayant ioint toutes ses forces, il tasche de combattre Pompée, & ne le pouuant attirer à la bataille, il entreprend vn haut dessein, à sçauoir de l'assiéger dans son camp, encor qu'il fust plus foible que luy. Ce fut proche de Durazzo, où il se met à l'enclorre de tranchées : se seruant de l'aduantage de petites colines de difficile accès (lesquelles à mon aduis l'induisirent à ce dessein.) Les raisons qu'il

allegue, sont, qu'estant foible de caualerie, & ayant faute de bleds, il ne pouuoit en recouurer; si celle de Pompée estoit libre, à laquelle encore il empeschoit la commodité du fourrage, & la rendoit inutile à toutes les factions de la guerre; plus, que c'estoit diminuer la reputation de Pompée par tous l'Empire, & accroistre la sienne, quand on diroit que Cesar le tenoit assiegé, & qu'il ne l'osoit combattre; ce qui estoit de grande utilité, pource qu'on se tourne d'ordinaire du costé du plus fort. D'autre part Pompée ne voulant quitter le bord de la mer, ny Durazzo où il auoit fait son Arsenal & Magasin, se resout d'y subsister; & voyant que sa caualerie pourroit trop pâtir si elle ne retournoit au fourrage, il fait de son costé vne enceinte de tranchées de quinze milles de tour: Ainsi les deux Capitaines n'oublierent rien pour faire reüssir leurs desseins. En fin Pompée receuant de l'incommodité de se voir ainsi resserre, attaque vn des bouts des retranchemens de Cesar, où il eut tel aduantage en deux combats qui se firent en vn mesme iour, que Cesar confessa, que s'il eust sçeu suiure sa victoire il le defaisoit. Cecy nous fait voir de quelle utilité sont les retranchemens, & comme quoy par le moyen d'iceux on se peut empescher de combattre contre vne armée qu'on apprehende, qu'on en

peut r'asseurer vne espouuancée, & qu'on en peut reduire à la faim vne plus puissante que la vostre : car la science de la guerre consiste principalement à ne combattre que quand on veut, & pour cét effect fait donner bon ordre aux viures, bien exercer ses soldats au maniment de leurs armes, & à l'observation de tous ordres, & sçauoir bien faire ses retranchemens ; & si Cesar eust eu à faire à vn autre homme que Pompée, qui dès le commencement se fust laissé resserrer, il eust ruiné son armée, ou il l'eust contraint de combattre.

Cesar iugeant bien ne pouuoir plus tenir Pompée à l'estroit, ny demeurer auprès de luy, sans vne grande incommodité pour ses viures ; il entreprend de faire vne longue retraite, & de plusieurs iours. Pour cét effect il fait partir dès le soir tout le bagage avec vne legion ; & sur la minuiet tout le reste de son armée horsmis deux legions, & sa caualerie avec quoy il part dès la pointe du iour. Pompée le suit en toute diligence ; le trouuant logé où il auoit d'autrefois campé, se loge aussi dans son vieux camp auprès de luy ; mais sur ce que Cesar fait semblant d'enuoyer sa Caualerie au fourrage (la faisant rentrer secrettement dans son camp) Pompée y enuoye la sienne tout de bon, & mesme la plusspart de ses soldats estans retournez chercher du bagage qu'ils auoient laissé en leurs

en leurs premiers logemens, il part subitement au mesme ordre du iour precedent. Si bien que Pompée ne le pouuant suivre pour lors, & l'autre marchant à grandes iournées tousiours au mesme ordre, il luy fut impossible de le ioindre; & au bout de quatre iours desista de le poursuiure. C'est icy vne belle leçon pour faire cognoistre combien sont dangereuses les retraittes d'armée à venë d'ennemy; & outre plus il faut euitier de combattre en se retirant, & sçauoir l'ordre qu'il faut donner pour n'estre embaraissé du bagage, & comme quoy vne retraite se fait mieux avec vne partie de l'armée qu'avec l'armée toute entiere. Car si Cesar a apprehendé de se retirer à la venë de Pompée avec vne armée si aguerrie, si accoustumée à vaincre, estant redoublée de Pompée mesme; que doiuent faire les Capitaines d'aniourd'huy qui commandent les armées nouvellement leuées sans ordre, sans obeyssance, pleines de bagages, dont les soldats ne sçauent manier leurs armes, ny mesme les Capitaines le leur monstrier? Et neantmoins penseroient blesser leur honneur s'ils se retiroient en cachette: certes la presumption, & l'ignorance sont deux mauuaises conseilleres à la guerre.

En la bataille de Pharsale, Pompée estoit au double plus fort que Cesar, sur tout en Caualerie, sur laquelle il fendoit principalement sa victoire: mais il n'auoit vne armée si aguerrie, ny si ac-

coustumée au combat que celle de Cesar, si bien qu'apprehendant qu'en allant à la charge ils ne se desordonnassent, il commanda qu'on attendist le choc de l'armée ennemie sans que personne bougeast de sa place. Cesar n'approuuant ces aduis, commanda aux siens d'attaquer le combat, alleguant que cela excite le courage des soldats à bien faire, lequel il faut plustost accroistre que diminuer, n'improuant l'usage antique, de commencer le combat avec un cry general: Et l'expérience nous apprend, qu'en toutes actions de guerre, celuy qui attaque redouble son courage, Et celuy qui est attaqué a de la crainte.

Quant à l'ordre de bataille de Pompée, ayant à sa droicte un ruisseau, met toute sa Caualerie à gauche. Se promettant, qu'après auoir renuersé celle de Cesar, elle enclorroit son armée, Cesar iugeant sa Caualerie n'estre assez forte pour resister à celle de Pompée, il la renforce de soldats dispos, qu'il mesle parmy elle; outre cela il prend de chacun de ses bataillons une trouppes, dont il en composa un pour la soutenir, qu'il met hors du rang des trois ordres de l'infanterie, Et leur commande de n'aller au combat que quand il leur dira. Tellement que quand la caualerie de Pompée eut poussé celle de Cesar, (ce qu'elle ne pouuoit faire sans se mettre en desordre) elle rencontre ce bataillon qui l'arreste tout court, puis luy fait

tourner le dos, & abandonner tout à fait l'aile gauche de l'armée de Pompée, par où Cesar pour-
suivant sa pointe, mit aisément tout le reste en
desordre. Surquoy nous observerons deux choses,
l'une, qu'il ne faut iamaïs hazarder toutes ses trou-
pes en vn seul choc, mais faire soustenir les vnes
par les autres: & l'autre, qu'il faut observer si bien
les distances tant à costé, qu'en arriere; que les
premieres troupes venant à estre renuersées, ne
puissent renuerser celles qui les doiuent soustenir,
leur laissant espace conuenable pour passer & pour
se rallier derriere.

Si Cesar a seu vaincre, il a encor mieux seu
poursuivre sa victoire, & s'en preualoir. Mais
iamaïs à l'égal de celle de Pharsale, où il ne s'est
pas contenté de forcer le Camp, ny d'assiéger en
vne montagne le reste de l'armée qui s'y estoit reti-
rée, ny de poursuivre la personne de Pompée quel-
ques iournées. Car avec trois ou quatre mille hom-
mes seulement, il a suivy sa piste par mer &
par terre, iusques à ce qu'il le trouua mort en
Egypte, où il arriva quasi aussi-tost que luy, ne
luy ayant iamaïs voulu donner loisir de se recon-
noistre, ny de faire aucun ralliement. C'est pour
nous apprendre de nous servir de l'occasion quand
elle s'offre favorable à nous, & de ne remettre à
vne autre fois, ce qu'on peut executer presente-
ment. Car les choses du monde sont subietes à de

grandes révolutions: Et les affaires qu'eut encor
 Cesar depuis la mort de Pompée font assez iuger,
 que si à l'imitation de plusieurs grands personnages,
 il eust voulu cueillir les fruits de sa victoire auant
 qu'ils fussent meurs, & goster le repos, a-
 uant qu'il fust assuré, il eust pu s'en repen-
 tir.





DE LA GVERRE ALEXANDRINE.

*ESCRITE PAR AVLVS
Hircius, ou Opins.*

LIVRE IV.



CESAR arriué qu'il fut en A-
lexandrie avec troismille deux
cens hommes de pied , huit
cens cheuaux , dix galeres
Rhodiennes , & quelques na-
uires d'Asie , il apprit la mort de Pompée :
& sur la mauuaise intelligence qu'il apper-
ceut entre ses soldats & le peuple de la Vil-
le , il enuoya chercher de nouuelles legions
en Asie. Cependant il voulut connoistre du
testament du feu Roy Ptolomée , qui en a-
uoit fait executeur le peuple Romain , &
pour cet effet ordonna que Ptolomée le fils

aisné, & Cleopatra la fille aisnée, licentieroient leur armée, & le viendroient trouver pour luy faire entendre leurs droits. Mais le Conseil de Ptolomée n'approuva ce moyen d'accommodement, & sous main fit venir ses troupes qui estoient à Pelusium, sous la conduite d'Achilas. Dequoy Cesar auerty, & que le Roy même estoit d'intelligence avec ledit Achilas, il le retient & se prepare à se defendre. Il les repousse d'abord, puis se cantonne dedans vne partie de la Ville, & les autres dans l'autre. Arsinoé seconde sœur du Roy fait tuer Achilas, met en sa place Gatimedes, qui s'empare de l'autorité, & continuant le premier dessein, met Cesar en de grandes extremités, & luy gaste les eaux douces, à quoy il remedia promptement faisant quantité de puits. Il fait aussi venir gens de guerre, nauires & armes de toutes parts; & sur la nouuelle qu'il eut que la trente-septiesme legion avec grandes provisions de viures & d'armes estoit arriüée es bords d'Afrique, mais qu'elle ne le pouuoit ioindre à cause du vent contraire; il se iette seul dans vn nauire, prend tous ses vaisseaux, avec les Mariniers seulement, & va au deuant. Les ennemis le sçachant sans

soldats l'attaquent. Il les bat , & sans autre secours ioint sa legion , & retourne en Alexandrie. Ce premier combat estonne les Alexandrins, neantmoins ils font leur armée nauale meilleure que iamais , laquelle Cesar deffait vne seconde fois , où Eufra-
nius Capitaine des Galeres Rhodiennes se signala fort. Il y a deuant le port d'Alexandrie vne Isle bastie & habitée, qui le cou-
ure , & est attaché à la ville par le Mole , qui a neuf cens pas de long , & soixante de large, sur lequel il y auoit deux Forts. Cesar iuge necessaire de prendre cette Isle , afin d'auoir la mer libre. Il la force, puis prend vn des Forts du Mole. Au second il y eut vn grand combat où il fut repoussé avec si grand desordre, que ne pouuant empêcher les soldats de se ietter dans vn vaisseau , il se sauua à la nage auant qu'il perist. Les Alexandrins estonnez de ces combats , recourent aux ruses , demandent à Cesar leur Roy, il leur rend , esperant que ce seroit le moyen de faciliter vn accord. Sur ces entre-faites Mytridates Pergamenien, grand de noblesse , bon homme de guerre, fort valeureux , & tres-fidelé à Cesar , arrive à son secours avec de belles forces, prend en passant Pelusium , & vient pour passer

le Nil en vn lieu qui s'appelle Delta. De quoy Ptolomée estant auerty, va en personne pour s'y opposer, & Cesar de son costé au secours de Mytridates, qui auant l'arri- uée de l'un & de l'autre auoit desia battu en vne rancontre les gens de Ptolomée. Et Cesar aussi auant ioindre Mytridates en deffait d'autres, apres quoy il va attaquer vn petit Fort entre son camp & celuy de Ptolomée, qu'il emporte, & le lendemain attaque le camp, qu'il force, & le Roy se voulant sauuer par eau, se noye: puis re- tournant victorieux en Alexandrie, tout luy fait ioug. Cependant les Prouinces de l'Empire ne demurerent pas en repos. Domitius Caluinus Lieutenant de Cesar fut deffait par Farnaces, qui s'empara du Royaume de Pont. En Ilyrie Gabinius Lieuten- ant de Cesar fut deffait, & mourut à Salone. Et Octauio du party de Pompée pen- sant s'emparer de cette Prouince, trouua Cornificius qui s'y opposa; comme aussi Vatinius, lequel se trouuant à Brundisium & apprenant ces nouuelles, se met en mer, rencontre Octauius, luy donne la bataille & le deffait. En Espagne Cassius Longi- nus, que Cesar y auoit laissé, se fait hayr par son auarice, tant de ceux du pais, que de

de son armée : on coniure contreluy, on le blesse, & croyant qu'il fust mort., chacun descouure sa ioye. Mais estant guery il chastie rigoureusement les coniurez : neantmoins cela n'empescha pas la reuolte dans son armée. Et comme il pensa y aller remedi- d'un costé, ils font le semblable de l'autre, & tous ensemble ellisent pour Chef Marcellus, qui vint se camper au dessous de Cordoüe, qui luy estoit fauorable. Longinus enuoye demander secours au Roy Bogude, lequel luy enuoye vn grand re- fort; neantmoins Marcellus se maintient sans combattre: Et Lepidus venant avec de nouuelles forces pour tascher à les accor- der, Longinus s'en deffie, & s'esloigne d'eux; mais sur l'approche de Trebonius son successeur au gouuernement, il s'em- barque pour aller en Afrique où Cesar l'a- uoit destiné, & se noyé à l'emboucheure du fleue Iberus. Reuenons à Cesar. Encor qu'il fust pressé d'aller à Rome, il veut pre- mierement vanger la deffaitte de Domitius. Il part d'Egypte avec la sixiesme legion seulement, laissant le reste de son armée à la garde du Royaume, & avec ce qu'il ramasse en Asie, il donne la bataille à Farna- ces, le deffait, luy oste ce qu'il auoit occu-

pé, & donne le Royaume de Bosphore à Mytridates Pergamenien, pour la recompense du bon service qu'il luy auoit rendu en la guerre Alexandrine : puis triomphant de tant de victoires retourne à Rome.

REMARQUES.

DE toutes les guerres que Cesar a faites, il n'en trouue point vne moins necessaire, plus dangereuse, & où il y ait apporté moins de preuoyance qu'en celle-cy. Car ayant appris en Alexandrie la mort de Pompée; s'y arrester avec trois ou quatre mille hommes; & en cét estat vouloir obliger vn ieune Roy de restituer vne partie de son Royaume en faueur de sa sœur Cleopatra; c'est bien se fier en sa bonne fortune, ou estre bien amoureux. Mais comme ce commencement n'est digne de sa prudence ordinaire: aussi les progresz & la fin surpassent toutes ses autres actions, & il semble qu'il n'ait icy fais des fautes, que pour illustrer dauantage sa vertu. Cecy a esté vne guerre sans regle; il luy a fallu deffendre les carrefours des ruës & s'y barricader; disputer vne moitié de ville contre l'autre, remedier aux accidens impreuens; rassurer ses gens, combattre vne armée navale sans soldats, & la vaincre: Et

comme s'il fust tombé dans vn autre monde, faire vne guerre à vne nouvelle mode. Ce qui monstre en luy, qu'il excelloit en trois choses principalement; à sçauoir, qu'il ne perdoit iamais l'esperance, qu'il auoit vne grande experience, & qu'il ne se confondoit point en ses commandemens. Cette guerre finie, il va contre Farnaces, où nous remarquerons seulement deux choses: la premiere, qu'encore qu'il cherchast de finir promptement cette guerre, pource qu'il auoit à faire ailleurs; il ne va l'attaquer à l'estourdie, mais il commence tousiours par se camper fortentent: puis ayant laissé son bagage en seureté, il va avec toute son armée pour faire vn autre camp proche de luy, laissant entre deux vne grande vallée, afin que s'il vouloit l'empescher de se fortifier là & l'attaquer, il ne peust venir à luy sans vn grand desauantage. L'autre est, pour monstre l'aduantage qu'à celuy qui attaque: Car Cesar remarque luy mesme, qu'encore que Farnaces le vinst attaquer temerairement, neantmoins que ses soldats en eurent de l'apprehension, & d'abord se mirent en quelque desordre. C'est pour confirmer, que celuy qui attaque a vn grand aduantage, & qu'il n'y a rien plus necessaire à la guerre que les retranchemens.



DE LA GVERRE D'AFRIQVE.

ESCRITE PAR AVLVVS

Hircius, ou Opins.

LIVRE V.



Le débris du party de Pompée s'estant r'allié en Afrique sous Scipion, Caton & le Roy Iuba; Cesar y va au mois de Decembre, & n'y arriue du commencement qu'avec trois mille hommes seulement, & quelque peu de caualerie; il se presente deuant Adrumette. Mais Confidius qui le voit si foible tient bon, & Cesar se retirant est attaqué par ceux qui sortent de la place, & par la caualerie venue au secours d'icelle, qu'il repousse; où il est remarqué que trente cheuaux François font reculer plus de deux mille Mores. La re-

nommée de sa venue luy ouurit les portes de plusieurs villes & chasteaux qui luy fournirent de viures. Il choisit l'asliette de Ruspine pour y assoir son camp , & y attendre le reste de son armée ; mais l'impatience le prend. Il va au port , s'embarque dans vn nauire pour l'aller chercher. Et comme il pensoit faire voile , il en arrive vne bonne partie. Apres cela il va avec trente cohortes chercher du bled ; il rencontre en son chemin Labienus , avec lequel il eut vn grand combat , où il eut auantage , & ainsi il se retira dans son camp, qu'il fortifia plus que iamais , à cause qu'il se sentoit foible : il tira deux trenchées de la ville au port pour s'en bien assurer ; puis il depescha en Sicile , Sardaigne & Italie, pour auoir renfort de gens & de bled. D'autre costé Scipion & Caton qui le vouloient combattre auant qu'il se fortifiast dauantage, hasterent Iuba de venir avec son armée ; mais s'y acheminant il est contraint de rebrousser chemin , sur ce que P. Silius Lieutenant de Cesar, & le Roy Bogud attaquent son Royaume. Cependant Labienus ioint Scipion ; ils se viennent camper proche de Cesar , chacun essaye de prendre ses auantages , & se passa diuers combats & escar-

mouches, sans que pourtant on hazardast la bataille. Les necessitez de Cesar croissoient de iour en iour; il les supporte avec grande constance, & ne s'oustit l'esperance des siens que par sa bonne mine. Il despêche de nouveau pour hastier ses troupes & ses viures. Quelques vns de ses nauires font naufrage, & ayant mesme appris qu'on poursuivoit de ses vaisseaux iusques dans le port de Leptis, il y court à bride abbatuë, se iette dans vn vaisseau, & avec ce qu'il peut ramasser là; va soustenir ses gens; chasse les ennemis; prend de leurs vaisseaux, & recouure des siens qui auoient esté pris. En fin ses troupes luy viennent de diuers endroits. Il commence par la purification qu'il fait dans son armée de quelques seditieux & libertins: puis se resout à vn combat diffinitif. Pour cet effet il va camper deuant Tapse, qu'il entoure de tranchées, se doutant bien que Scipion la viendrait secourir: lequel ayant fait reuenir le Roy Iuba, ils se viennent camper auprès de Cesar en trois Camps. Là se donna la bataille que Cesar gagna, ne perdant que cinquante soldats, & peu de blesez. Il y en eut de morts dix mille de l'autre costé, & les trois camps pris. Tapse au bruit de

cette victoire se rend à C. Rebilus. Ca-
ton voyant qu'on ne se vouloit refoudre à
se defendre se tuë. Vtique ouure ses portes
au Victorieux : Adrumet fait le semblable :
Zama ferme les siennes à son Roy vaincu ,
& y appelle Cesar. Tout le reste du Royau-
me de Iuba se reuolte , luy & Petreius s'en-
trent de desespoir. Silius ayant deffait &
tuë Sabura Lieutenant de Iuba , & venant
trouuer Cesar , rencontre Affranus & Fau-
stus Sylla , qui prenoient le chemin d'Es-
pagne : les deffait & prend , puis à vne ef-
meure tous deux sont tuez. Scipion & plu-
sieurs Senateurs s'estans embarquez pour
passer en Espagne ; la tempeste les iette dans
la flotte de Silius où tous perirent ou se tue-
rent. Voila la suite qu'eut cette bataille ,
où toutes choses conspirerent à l'enuy pour
applanir le chemin à l'entiere victoire de
Cesar , qui pardonna à tous ceux qui recou-
rurent à sa clemence ; puis s'en retourna à
Rome.

REMARQUES.

CESAR a fait trois actions en cette
guerre, qui approchent de la temerité. La
premiere , de passer en Afrique au cœur de
l'Hyuer avec peu de gens , n'ayant aucun port

assure. Et à cette cause ne pouuant donner nul
 rendez-vous à ses nauires ; ce qui mesme luy
 fut imputé à impreuoyance. Neantmoins apres
 son passage, sa façon de proceder est du tout ad-
 mirable. Il choisit de se camper deuant la ville
 de Ruspine qui estoit à demie lieuë du port, le-
 quel il conioint avec la ville & son camp, qu'il
 fortifia très-bien ; car de là il auoit vn pied
 en terre, & l'autre sur la mer, afin que selon
 les occasions il peust agir par mer ou par terre,
 & qu'en tout cas il ne se trouuast enfermé. C'est
 vne belle leçon à ceux qui entreprennent sur
 quelque païs, estans foibles du commencement :
 car en cette posture on peut soutenir de grands
 efforts, ou en toute extremité se retirer. La se-
 conde, de laisser son armée auprès de Ruspine,
 & sans en aduertir personne se ietter dans vn
 nauire pour aller chercher ses vaisseaux. Et la
 troisieme, ayant nouuelle de la déroute de sa
 flotte, quitta son camp ; s'en alla à bride abba-
 tuë à Leptis ; se ietta dans vn vaisseau ; en r'al-
 lia d'autres, & attaquâ les ennemis. Et encore
 qu'il ne soit pery en aucune d'icelles, on n'en
 peut dire autre chose, sinon qu'il se fioit tout à fait
 à sa bonne fortune, & qu'il ne s'est iamais lassé,
 ny rebuté des desseins hazardeux & penibles. Est
 remarquable que Cesar en toutes les guerres qu'il
 a fait, a esté tousiours inferieur en nombre à ses
 enne-

ennemis. C'est pourquoy il s'est tousiours seruy,
& plus que nul autre n'a iamais fait, des fortifi-
cations ; lesquelles il faisoit beaucoup meilleures,
quand il ne se sentoit en estat de donner bataille,
comme il fit long temps en Afrique ; tellement
que Scipion mesme s'estonnoit de cette froideur.
Neantmoins il entretenoit tousiours ses soldats en
exercice, & luy-mesme dressoit les nouueaux,
& raschoit de les mettre en curée par de petits
combats, où par son industrie il auoit le plus sou-
uent du meilleur, & tousiours entreprenoit sur
son ennemy, qui est vne maxime excellente pour
donner le cœur aux siens, & mesme pour se garen-
tir de surprise.



le Nil en vn lieu qui s'appelle Delta. De quoy Ptolomée estant auerty, va en personne pour s'y opposer, & Cesar de son costé au secours de Mytridates, qui auant l'arrivée de l'un & de l'autre auoit desia battu en vne rancontre les gens de Ptolomée. Et Cesar aussi auant ioindre Mytridates en deffait d'autres, apres quoy il va attaquer vn petit Fort entre son camp & celuy de Ptolomée, qu'il emporte, & le lendemain attaque le camp, qu'il force, & le Roy se voulant sauuer par eau, se noye: puis retournant victorieux en Alexandrie, tout luy fait ioug. Cependant les Prouinces de l'Empire ne demurerent pas en repos. Domitius Caluinus Lieutenant de Cesar fut deffait par Farnaces, qui s'empara du Royaume de Pont. En Ilyrie Gabinius Lieutenant de Cesar fut deffait, & mourut à Salone. Et Octauio du party de Pompée pensant s'emparer de cette Prouince, trouua Cornificius qui s'y opposa; comme aussi Vatinius, lequel se trouuant à Brundisium & apprenant ces nouuelles, se met en mer, rencontre Octauius, luy donne la bataille & le deffait. En Espagne Cassius Longinus, que Cesar y auoit laissé, se fait hayr par son auarice, tant de ceux du païs, que
de

de son armée : on coniure contre luy, on le blesse, & croyant qu'il fust mort, chacun descouure sa ioye. Mais estant guery il chastie rigoureusement les coniurez : neantmoins cela n'empescha pas la reuolte dans son armée. Et comme il pensa y aller remedier d'un costé, ils font le semblable de l'autre, & tous ensemble eslisent pour Chef Marcellus, qui vint se camper au dessous de Cordoue, qui luy estoit fauorable. Longinus enuoye demander secours au Roy Bogude, lequel luy enuoye un grand renfort; neantmoins Marcellus se maintient sans combattre : Et Lepidus venant avec de nouvelles forces pour tascher à les accorder, Longinus s'en deffie, & s'esloigne d'eux; mais sur l'approche de Trebonius son successeur au gouvernement, il s'embarque pour aller en Afrique où Cesar l'auoit destiné, & se noyé à l'emboucheure du fleuve Iberus. Reuenons à Cesar. Encor qu'il fust pressé d'aller à Rome, il veut premierement vanger la deffaite de Domitius. Il part d'Egypte avec la sixiesme legion seulement, laissant le reste de son armée à la garde du Royaume, & avec ce qu'il ramasse en Asie, il donne la bataille à Farnaces, le deffait, luy oste ce qu'il auoit occu-

pé, & donne le Royaume de Bosphore à Mytridates Pergamenien, pour la recompense du bon seruice qu'il luy auoit rendu en la guerre Alexandrine : puis triomphant de tant de victoires retourne à Rome.

REMARQUES.

DE toutes les guerres que Cesar a faites ie n'en trouue point vne moins necessaire, plus dangereuse, & où il y ait apporté moins de preuoyance qu'en celle-cy. Car ayant appris en Alexandrie la mort de Pompée; s'y arrester avec trois ou quatre mille hommes; & en cét estat vouloir obliger vn ieune Roy de restituer vne partie de son Royaume en faueur de sa sœur Cleopatra; c'est bien se fier en sa bonne fortune, ou estre bien amoureux. Mais comme ce commencement n'est digne de sa prudence ordinaire : aussi les progres & la fin surpassent toutes ses autres actions, & il semble qu'il n'ait icy fait des fauses, que pour illustrer dauantage sa vertu. Cecy a esté vne guerre sans regle; il luy a fallu deffendre les carrefours des rues & s'y barricader; disputer vne moitié de ville contre l'autre, remedier aux accidens impreuens; rassurer ses gens, combattre vne armée navale sans soldats, & la vaincre : Et

comme s'il fust tombé dans vn autre monde, faire vne guerre à vne nouuelle mode. Ce qui monstre en luy, qu'il excelloit en trois choses principalement ; à sçauoir, qu'il ne perdoit iamais l'esperance, qu'il auoit vne grande experience, & qu'il ne se confondoit point en ses commandemens. Cette guerre finie, il va contre Farnaces, où nous remarquerons seulement deux choses : la premiere, qu'encore qu'il cherchast de finir promptement cette guerre, pource qu'il auoit à faire ailleurs ; il ne va l'attaquer à l'estourdie, mais il commence tousiours par se camper fortement : puis ayant laissé son bagage en seureté, il va avec toute son armée pour faire vn autre camp proche de luy, laissant entre deux vne grande vallée, afin que s'il vouloit l'empescher de se fortifier là & l'attaquer, il ne peust venir à luy sans vn grand desauantage. L'autre est, pour monstrier l'aduantage qu'a celuy qui attaque : Car Cesar remarque luy mesme, qu'encore que Farnaces le vinst attaquer temerairement, neantmoins que ses soldats en eurent de l'apprehension, & d'abord se mirent en quelque desordre. C'est pour confirmer, que celuy qui attaque a vn grand aduantage, & qu'il n'y a rien plus necessaire à la guerre que les retranchemens.



DE LA GVERRE D'AFRIQVE.

ESCRITE PAR AVLVVS

Hircius, ou Opus.

LIVRE V.



Le débris du party de Pompée s'estant r'allié en Afrique, sous Scipion, Caton & le Roy Iuba; Cesar y va au mois de Decembre, & n'y arriue du commencement qu'avec trois mille hommes seulement; & quelque peu de caualerie; il se presente deuant Adrumette. Mais Confidius qui le voit si foible tient bon, & Cesar se retirant est attaqué par ceux qui sortent de la place, & par la caualerie venue au secours d'icelle, qu'il repousse: où il est remarqué que trente cheuaux François font reculer plus de deux mille Mores. La re-

nommée de sa venue luy ouurit les portes de plusieurs villes & chasteaux qui luy fournirent de viures. Il choisit l'afflictée de Ruspine pour y assoir son camp , & y attendre le reste de son armée ; mais l'impatience le prend. Il va au port , s'embarque dans vn nauire pour l'aller chercher. Et comme il pensoit faire voile , il en arrive vne bonne partie. Apres cela il va avec trente cohortes chercher du bled ; il rencontre en son chemin Labienus , avec lequel il eut vn grand combat , où il eut auantage , & ainsi il se retira dans son camp, qu'il fortifia plus que iamais , à cause qu'il se sentoit foible : il tira deux trenchées de la ville au port pour s'en bien asscurer ; puis il depescha en Sicile , Sardaigne & Italie, pour auoir renfort de gens & de bled. D'autre costé Scipion & Caton qui le vouloient combattre auant qu'il se fortifiast dauantage, hastent Iuba de venir avec son armée ; mais s'y acheminant il est contraint de rebrousser chemin , sur ce que P. Silius Lieutenant de Cesar, & le Roy Bogud attaquent son Royaume. Cependant Labienus ioint Scipion ; ils se viennent camper proche de Cesar , chacun essaye de prendre ses auantages , & se passa diuers combats & escar-

mouches, sans que pourtant on hazardast la bataille. Les necessitez de Cesar croissoient de iour en iour; il les supporte avec grande constance, & ne s'oustit l'esperance des siens que par sa bonne mine. Il despêche de nouveau pour hastier ses troupes & ses viures. Quelques vns de ses nauires font naufrage, & ayant mesme appris qu'on poursuiuoit de ses vaisseaux iulques dans le port de Lepris, il y court à bride abbatuë, se iette dans vn vaisseau, & avec ce qu'il peut ramasser là; va soustenir ses gens; chasse les ennemis; prend de leurs vaisseaux, & recouure des siens qui auoient esté pris. En fin ses troupes luy viennent de diuers endroits. Il commence par la purgation qu'il fait dans son armée de quelques seditieux & libertins: puis se resout à vn combat diffinitif. Pour cét effet il va camper deuant Tapse, qu'il entoure de tranchées, se doutant bien que Scipion la viendrait secourir: lequel ayant fait reuenir le Roy Iuba, ils se viennent camper auprès de Cesar en trois Camps. Là se donna la bataille que Cesar gagna, ne perdant que cinquante soldats, & peu de blessez. Il y en eut de morts dix mille de l'autre costé, & les trois camps pris. Tapse au bruit de

cette victoire se rend à C. Rebilius. Caton voyant qu'on ne se vouloit refoudre à se defendre se tuë. Vtique ouure ses portes au Victorieux : Adrumet fait le semblable : Zama ferme les siennes à son Roy vaincu, & y appelle Cesar. Tout le reste du Royaume de Iuba sereuolte, luy & Petreius s'entretient de desespoir. Silius ayant deffait & tué Sabura Lieutenant de Iuba, & venant trouuer Cesar, rencontre Affranus & Faustus Sylla, qui prenoient le chemin d'Espagne: les deffait & prend, puis à vne esmeute tous deux sont tuez. Scipion & plusieurs Senateurs s'estans embarquez pour passer en Espagne; la tempeste les iette dans la flotte de Silius où tous perirent ou se tuerent. Voila la suite qu'eut cette bataille, où toutes choses conspirerent à l'enuy pour applanir le chemin à l'entiere victoire de Cesar, qui pardonna à tous ceux qui recoururent à la clemence; puis s'en retourna à Rome.

REMARKES.

CESAR a fait trois actions en cette guerre, qui approchent de la temerité. La premiere, de passer en Afrique au cœur de l'Huyver avec peu de gens, n'ayant aucun port

asseuré. Et à cette cause ne pouuant donner nul rendez-vous à ses nauires; ce qui mesme luy fut imputé à impreuoyance. Neantmoins apres son passage, sa façon de proceder est du tout admirable. Il choisit de se camper deuant la ville de Ruspine qui estoit à demie lieuë du port, lequel il conioint avec la ville & son camp, qu'il fortifia très-bien; car de là il auoit vn pied en terre, & l'autre sur la mer, afin que selon les occasions il peust agir par mer ou par terre, & qu'en tout cas il ne se trouuast enfermé. C'est vne belle leçon à ceux qui entreprennent sur quelque païs, estans foibles du commencement: car en cette posture on peut soutenir de grands efforts, ou en toute extremité se retirer. La seconde, de laisser son armée auprès de Ruspine, & sans en aduertir personne se ietter dans vn nauire pour aller chercher ses vaisseaux. Et la troisieme, ayant nouuelle de la déroute de sa flotte, quitta son camp; s'en alla à bride abbatue à Leptis; se ietta dans vn vaisseau; en rallia d'autres, & attaqua les ennemis. Et encore qu'il ne soit pery en aucune d'icelles, on n'en peut dire autre chose, sinon qu'il se fioit tout à fait à sa bonne fortune, & qu'il ne s'est iamais lassé, ny rebuté des desseins hazardeux & penibles. Est remarquable que Cesar en toutes les guerres qu'il a fait, a esté tousiours inferieur en nombre à ses enne-

ennemis. C'est pourquoy il s'est tousiours seruy, & plus quenul autre n'a iamais fait, des fortifications ; lesquelles il faisoit beaucoup meilleures, quand il ne se sentoit en estat de donner bataille, comme il fit long temps en Afrique ; tellement que Scipion mesme s'estonnoit de cette froideur. Neantmoins il entretenoit tousiours ses soldats en exercice, & luy-mesme dressoit les nouueaux, & taschoit de les mettre en curée par de petits combats, où par son industrie il auoit le plus souuent du meilleur, & tousiours entreprenoit sur son ennemy, qui est vne maxime excellente pour donner le cœur aux siens, & mesme pour se garentir de surprise.





DE LA GVERRE D'ESPAGNE.

CONTRE LES ENFANS
de Pompée.

LIVRE VI.




ES reliques des troupes d'A-
frique, se r'assemblerent encor en
Espagne sous Cneus & Sextus en-
fans de Pompée. Cesar y va, il trouue l'un
qui assiege Vlla, & l'autre qui estoit dans
Cordouë; iette du secours dans la premie-
re, & se va camper deuant l'autre. Ce qui
oblige Cneus de leuer le siege pour secourir
son frere. Il se passe entre les deux armées
quelques escarmouches: Mais Cesar ne pou-
uant attirer son ennemy en bataille, va as-
sieger Attequa, & apres vne bonne resi-
stance la prend à la veuë de Cneus. Depuis
les deux armées s'entrecostoyerent, & fi-

rent diuers combats de peu d'utilité. En fin ils se campent en vne campagne proche de Munde , en resolution l'un & l'autre de ne refuser la bataille. Néantmoins Cneus prend vn champ de bataille releué & aduantageux, où Cesar faisant difficulté de l'attaquer, la fureur de ses soldats l'emporta. Le combat fut grand & douteux , selon sa confession même ; & à toute peine il gagna la bataille qui fut sanglante. Trente mille hommes de la part de Pompée y demurerent morts, & mille de celle de Cesar. Ceux qui se sauuerent dans Munde furent contraints de se rendre. Sextus Pompée abandonne Cordoüe , Cneus est viuement pouruiuy , atteint & tué. Toutes les villes se rendent au victorieux. Ce fut la dernière bataille que donna Cesar , & le coup mortel du party de Pompée.



O R D R E M I L I T A I R E D E S G R E C S.

*ET PARTICVLIÈREMENT
de leur Phalange.*

 'O R D R E des Grecs se trouue assez obscurement dans les Auteurs, pource que la plupart des liures qu'ils en ont escript font perdus, & ne nous en reste que des morceaux : si bien qu'il est difficile de le pouuoir recueillir bien exactement. Voicy comme se formoit la Phalange.

P H A L A N G E D E S G R E C S.

G logo signifie deux hommes de front, & plusieurs ioints ensemble font vn

rang , & le mot de Giogo se prend souuent pour vn rang.

Verſo ſignifie deux hommes , l'vn derriere l'autre ; & pluſieurs les vns derriere les autres font la file.

- Locho , ſignifie la file , laquelle les Grecs ont fait de diuerſes hauteurs , mais n'ont iamais paſſé le nombre de ſeize , comme celuy qui eſtoit ſuffiſant à ſouſtenir tous grands effort , eſtimans que donner plus de profondeur à leur Phalange , eſtoit employer des hommes inutilement , & qu'il valoit mieux eſtendre la bataille en longueur pour ſ'empêcher d'eſtre attaquez par les flancs , ou bien pour y attaquer les ennemis ; que de donner tant de profondeur à leur Phalange.

La Phalange n'eſtoit compoſée que de Oplites, c'eſt à dire peſamment armez , avec les Sarifſes (ou longues picques) & leurs boucliers ; car les Archers, tireurs de fondes , & autres à lancer armes, auoient leur ordonnance à part.

A vn Locho , ou vne file de ſeize ſoldats , il y enauoit cinq de commandement ; à ſçauoir le premier , le cinquième , le neuſième , le treizième , & le ſeizième , com-

menotus verrons par cette figure suiuite & leurs noms.

P R E M I E R E F I G U R E .

- Locago*..... 0 *Chef de file.*
 1. *Eno marche*..... 0
 2. *Eno marche*..... 0 *Chef de demie-file.*
 3. *Eno marche*..... 0
Vrago..... 0 *Serre-file.*

Ils mettoient le plus vaillant pour estre Chef de file , & le plus prudent pour estre serre-file.

Or pour commencer l'Ordonnance , ils ioignoient deux files l'une contre l'autre , qui faisoient trente-deux soldats ; & les deux files ensemble se nommoient Dilochie , & le Chef des deux files se nommoit Dilochite.

Après on doubloit les deux files qui faisoient quatre files , & soixante-quatre soldats , & cette troupe s'appelloit Tetrarchie , laquelle auoit vn Chef qui se nommoit Tetrarque.


Après on doubloit les quatre files qui faisoient huit , & cent vingt-huit soldats ; &

ce corps s'appelloit Taxiarchie, & son Chef Taxiarque.


Après on doubloit ces huit files qui faisoient seize; & ce corps s'appelloit Sintagme ou Senagie, & le Chef de ce corps s'appelloit Sintagmarche ou Senago.

A ce corps on adioustoit cinq officiers generaux; vn port'enseigne; vn pour guider la queue, qui faisoit à peu près la charge de nos Sergens d'aujourd'huy; vn Trompette (car ils n'auoient point de Tambour) vn pour prononcer les Ordres, & vn Ministre.

Le Port'enseigne se mettoit au milieu du premier rang, comme tout se verra par la figure cy-dessous.



SECONDE FIGURE.

*Syntagmarque.**Taxiarque.**Tetrarque.**Diloquie.*

La

La Phalange estoit composée de seize Corps pareils à la precedente figure.

Puis on doubloit ce Corps de seize files, qui faisoient trente-deux files, & s'appelloit Pentacosiarchie, & son Chef Pentacosiarche.

Puis on doubloit ces trente-deux files, qui faisoient soixante-quatre, & ce Corps s'appelloit Chilarchie, & son Chef Chilarche.


Puis on doubloit ces cent vingt-huit files, qui faisoient deux cens cinquante-six files, & ce corps s'appelloit Merarchie, & son Chef Merarche ou Telarche.

Puis on doubloit ces cent vingt-huit files, qui faisoient deux cens cinquante-six files, & ce corps s'appelloit Phalange, ou Phalangargie, ou Strategie, & le Chef Phalangarche ou Stratego, ou General. Si bien que la Phalange se trouue composée de quatre mille nonante-six soldats, d'un Phalangarche qui commande à tous, de deux Melarches, de quatre Chiliargès, & huit Pentacosiarches, & de cent vingt-huit Dilochites, comme il se verra par la figure cy-dessous.

TROISIÈSME FIGURE.

<i>Rangs.</i>		16	32	64	128	356
<i>Files.</i>	16					

Or selon la puissance des Republiques on augmentoit cette armée, doublant la Phalange qui se nommoit Diphalangarchie, & le Chef Diphalangarche; ou doublant la Diphalangarchie, & en ce cas on la nommoit Tetraphalangarchie, & le Chef Tetraphalangarche, lequel lors estoit Chef Souuerain. C'est ce qu'il stenoient pour vne armée complete, & que depuis on a appelée vne Phalange. Neantmoins elle estoit tousiours diuisée en quatre Corps comme quatre Phalanges, & estoit composée de seize mille trois cens octante & quatre soldats.


 QUATRIESME FIGVRE.


Voilà l'ordre de la Phalange des Grecs pour les pesamment armez, nommez Oplites; à sçauoir de Picques & boucliers, lequel occupoit de terrain donnant six pieds pour soldat, & sans y comprendre les trois interualles, six mille cent quarente-quatre pieds de longueur, & nonante-six pieds de hauteur.

A cette armée on y ioignoit la moitié moins de soldats armez à la legere, nommez *Files*, qui combattoient de loin avec armes à lancer & ietter, & se mettoient en bataille derriere la Phalange en front égal. Mais n'estant les files que de huit de hauteur, avec le mesme ordre & les mesmes officiers, & quand il falloit commencer la bataille ils sortoient par les interualles, & alloient attaquer l'ennemy. Puis quand les armées estoient prestes à choquer, ils se retiroient par les mesmes interualles, en leurs places derriere leurs gens armez, & par dessus leurs

testes faisoient pleuuoir sur leurs ennemis vne gresle de traits , de pierres & de dards ; & fortifioient l'espaisseur de leur Phalange, qui pour soustenir le grand choc se trouuoit lors auoir vingt-quatre hommes de hauteur.

CINQVIESME FIGVRE



Quant à la caualerie ils la mettoient toujours aux ailles ; & soit pour la Caualerie, ou pour l'Infanterie, ils changeoient la forme de leur ordre selon l'assiette des lieux, ou le nombre d'ennemis à qui ils auoient à faire : ou selon l'ordre auquel ils estoient rangez en bataille, amoindrissant le front, & doublant la hauteur ; ou doublant le front en amoindrissant la hauteur, & la coupant par la moitié, comme fit Cyrus en la bataille qu'il eut contre Crefus. Car craignant d'estre enueloppé, ses files estant de vingt-quatre de hauteur, il ne les fit que de douze ; & par ainsi il augmenta le front de son armée de la moitié.

Ils se seruoient encor de diuers ordres selon les occasions ; comme en rond , & les legerement armez au milieu pour soustenir vn grand choc de tous costez : ou en triangle pour mieux entrer en vn bataillon : ou en demie Lune , pour enclorre ; & d'autres qui ne sont maintenant de grand ylage.

Et afin de ne se confondre point en tels ordres dans l'occasion , ils auoient des Ecoles publiques , où toute la ieunesse alloit s'exercer , qu'on appelloit *Gymnasia* : & des maistres pour monstrer de manientement des armes & les ordres , nommez *Tactici*. Or pour faire toutes les évolutions , & changemens d'ordre , on donnoit à chaque soldat six pieds en quarté , & pour combattre trois pieds , & mesmes pour soustenir vn grand effort , on se serroit iusques à ne contenir qu'un pied seulement.

C'est par ce moyen que tant de petites Republiques de Grecs ont maintenu si long temps leur liberté , & ont fait de si grandes actions , ayans repoussé de si belles armées avec de si petites , & mesmes estant allez planter leurs trophées dans l'Asie , & ailleurs. Iusques à ce que leurs diuisions les perdirent , dequoy Philippes se seruans dextremement , les assubjettit : & depuis Ale-

xandre son fils, avec eux & leur ordre, conquiert vne grande partie du monde.

Il est bien vray que la constitution de ces Republiques estoit plus propre pour maintenir heureusement leur liberté, que pour s'accroistre. Car encore qu'ils s'adonnassent tous aux armes, & que nuls n'en fussent exempts; la pauureté & le petit nombre de soldats de chaque Republique à part, les empeschoit de faire de grands progres: comme aussi leurs diuisions, estant difficile que tant de Republiques souveraines ne se peussent accorder; sinon pour vne nécessité commune de se deffendre, comme ils firent diuerfes fois contre les Perses; mais non pour vne conqueste où on ne se peut accorder, ny des commandemens, ny des partages des choses conquises.

Quant à leur Camp retranché, qu'ils nommoient *Aplecto*; ils choisissoient plustost des assiettes fortes, qu'ils ne les fortifioient avec industrie, & n'auoient nulle forme certaine, comme les Romains. Mais selon l'aduantage des lieux fortifioient vn costé plus quel'autre, & ne s'en trouue rien de certain par escrit dans les Autheurs anciens.



DISCIPLINE MILITAIRE DES ROMAINS.

ESLECTION DES GENS DE
guerre, & leurs armes.

CHAITRE PREMIER.



OMVLVS ayant basti la
Ville de Rome, la diuisa en
Centuries & ordres militai-
taires; chaque corps contenoit
trois mille hommes de pied,
& trois cens cheuaux. Or parce qu'on choi-
fissoit les plus vaillans; on le nomma *Le-
gion*, qui vaut autant à dire comme *Elite*.
La ville ayant esté accreue par le peuple
des Sabins, on double les *Legions*; qui se
trouuerent lors de six mille hommes de pied

& six cens chevaux. Neantmoins depuis ce temps-là, elles ont esté de beaucoup moindre en nombre.

Tullus Hostilius troisieme Roy des Romains establit l'exercice Militaire, & distingua tout le peuple en cinq classes. Celle des plus riches estoit obligée de se monter & armer, pour servir à la cavalerie. Les trois autres classes d'en apres furent employées à l'Infanterie, & selon leurs moyens il se estoient Hastaires, ou Princes, ou Triaires, & obligez de s'armer selon que leur ordre le requeroit. La cinquieme & derniere classe comme trop pauvre estoit exempté d'aller à la guerre.

Neantmoins depuis que les Romains firent armées de mer, qui fut quatre cens octante neuf ans apres la fondation de la Ville, ils prirent de cette derniere classe les moins pauvres pour les faire soldats sur la mer, & encores obligerent-ils en cas de necessité de servir vingt ans sur terre.

Nul ne pouvoit obtenir l'office de Magistrat Civil à Rome qui n'eust seruy dix ans à la guerre : ny par ce moyen en posseder aucun, s'il n'auoit vingt-sept ans; pour ce que l'on commençoit le seruice de la guerre à dix-sept ans, il finissoit aussi à quarante-cinq, & on

& on estoit obligé durant ces vingt-huit ans d'en seruir quinze ; & quand ils auoient accomply leur seruice , ils n'estoient plus obligez de prendre les armes, que pour la garde & deffence de la ville.

Depuis que les Rois furent chassez de Rome, on eussent tous les ans en leur place deux Consuls : puis les Consuls estoient les vingt-quatre Tribuns Militaires. Mais depuis le peuple les voulut eslire. Il falloit que quatorze d'eux eussent desia seruy à la guerre cinq ans, & les autres dix, qui est vn plus long temps ; à sçauoir dans l'Infanterie onze ans, & dans la Caualerie quinze ans. Ce qui monstre l'estime qu'on faisoit de l'Infanterie par dessus la Caualerie.

Les Consuls appelloient tous les ans de toutes les Tribus ceux qui estoient depuis dix-sept ans iusques à quarante-cinq, au Capitole ou au Champ de Mars ; & ceux qui manquoient de s'y trouuer estoient chastiez rigoureusement. Ce qui se sçauoit facilement ; car par les Ordonnances de Tullus Hostilius, on tenoit registre de tous ceux qui naissoient ; & mouroient. Or au nombre des habitans, estoient aussi

bien compris ceux du Territoire, que ceux de la ville.

On eslisoit tousiours quatre Legions, deux pour chaque Consul. Il s'en est leué quelquefois dauantage : mais rarement & selon la necessité des affaires ; & mesme du temps d'Annibal, il s'est trouué vingt-trois Legions sur pied. Et toutefois chaque Consul n'en auoit que deux ; les autres estans commandées par Preteurs, Proconsuls , & autres Chefs : mais depuis la Republique croissant en puissance , & les Loix s'affoiblissans ; il s'en est trouué sous Cesar aux guerres de Gaule iusques à dix Legions.

Auant que proceder à l'eslection des soldats , on partageoit les vingt-quatre Tribuns aux quatre Legions ; à sçauoir des quatorze plus ieunes, on en donnoit quatre à la premiere Legion , trois à la seconde , quatre à la troisieme , & trois à la quatrieme. Et des dix plus vieux on en donnoit deux à la premiere , trois à la seconde , deux à la troisieme , & trois à la quatrieme. Par ainsi il y auoit six Tribuns Militaires pour chaque Legion , & par tout des vieux & des ieunes.

Les Tribuns ainsi départis & separez en

quatre bandes, on tiroit les Tribus au sort, & de la premiere on choisissoit quatre hommes les plus pareils qu'on pouuoit. De ces quatre, les six Tribus de la premiere Legion en choisissoient vn: les six de la seconde choisissoient le second: les six de la troisieme choisissoient le troisieme, & les six de la quatrieme auoient le quatrieme. Apres on en amenoit quatre autres, desquels les Tribus de la seconde commençoient à choisir le premier: puis ceux de la troisieme le second: puis ceux de la quatrieme le troisieme, & ceux de la premiere prenoient la quatrieme qui restoit. Et ainsi consecutiuelement chacun commençoit à choisir, & de toutes les Tribus on en faisoit de mesme. Si bien qu'en ce choix de soldats, la premiere Legion n'auoit nul aduantage sur la derniere, & se formoient toutes égales.

Après ce choix ainsi fait del'Infanterie, le Censeur esliuoit la Caualerie.

Quant au nombre des soldats de chaque Legion il a esté diuers en diuers temps. Il s'est trouué pour l'Infanterie de trois mille, de trois mille deux cens, de quatre mille, de quatre mille deux cens, de cinq mille, de cinq mille deux cens, de six mille, de six

mille deux cens : tousiours suiuant cette proportion de nombre pour la commodité qui serent contre à partager, & former leurs manipules, centuries & cohortes. Aussi de mesme en la Caualerie; elle s'est trouuée en diuers temps de deux cens, de deux cens vingt, de deux cens cinquante, de trois cens, de trois cens vingt, de trois cens trente, de trois cens cinquante, iusques à quatre cens.

L'election ainsi faite, les Tribuns de chaque Legion faisoient iurer, vn par vn, la main droite leuée, & de la main droite le pouce en haut; d'obeyr & faire tout ce qui leur seroit commandé par leurs superieurs.

Au mesme temps les Consuls commandoient aux Magistrats d'Italie, d'eslire en la mesme sorte les allies des Romains, dont on leuoit pareil nombre d'Infanterie, & le double de Caualerie. Si bien qu'en vne armée Consulaire il deuoit auoir quatre Legions, deux Romaines, & deux des allies.

Cela fait on les licentioit apres leur auoir donné vn iour prefix pour se retrouver en vn certain lieu sans armes; où les Tribuns choisissoient les plus ieunes, & les plus pau-

ures, pour estre Velites : les autres d'apres pour estre Hastaires, les plus vigoureux pour estre Princes, & les plus aagez pour estre Triaires.

Après on les armoit. On trouue aussi du changement aux armes. Mais les plus ordinaires des Velites estoient vn morion, vne petite rondache, des dards, & l'espée. Les Archers & ietteurs de fonde se nommoient extraordinaires, & estoient auxiliaires.

Les Hastaires portoient des targes hautes de quatre pieds, la Salade, le garde cœur qui est vne espee de petit plastron. Et les plus riches portoient la cuirasse entiere, l'espée au costé droict, courte, large, avec vne bonne pointe, & taillant des deux costez, & deux dards à lancer.

Les Princes & les Triaires portoient de pareilles armes, sinon que les Triaires au lieu de dards auoient des jaelots.

Pour la Caualerie elle estoit du commencement fort mal armée, & elle apprit des Grecs à s'armer de cuirasse, d'un escu, & d'un jaelot à lancer.

Les allies tant la Caualerie, comme l'Infanterie, estoient armez & disciplinez comme les Romains.

Outre les quatre Corps de Velites, Ha-

staires, Princes & Triaires; il est parlé dans les Auteurs anciens, de Tirons, Roraires & Accenses, lesquels tous estoient ieunes soldats, ou Romains, ou Auxiliaires, & ne combattoient à mon aduis que d'armes de ject. Et en effet il n'y auoit pour corps d'Infanterie parmy les Romains que ces trois ordres, Hastaires, Princes, ou Triaires : car mesme les Velites ne tenoient point de corps à part, estans dans l'ordre des batailles, & dans celuy des logemens confondus dans les trois autres ordres, & ils ne commencerent à estre employez par les Romains qu'au siege de Capouë.

L'eslection faite, les soldats armez, & les ordres formez; les Tribuns separoient chaque ordre par Centurie, ou Cohortes: puis faisoient deux eslections de dix hommes chacune, ceux de la premiere plus honorable, qui assistoient au Conseil de guerre, & estoient comme les Capitaines d'aujourd'huy : ceux de la seconde representoient les Lieutenans. Tous se nommoient Centurions; mais ceux de la premiere eslection s'appelloient Centurions premiers, & les autres Centurions seconds. Apres cela les Centurions eslisoient les Vexillaires qui sont nos Enseignes d'aujour-

d'huy, & y en auoit deux en chaque Cohorte. Puis ils eslisoient vingt Tergiducteurs, qui estoient Chefs pour conduire la queue de la troupe. Si bien qu'il y auoit à chaque Cohorte deux Chefs à la teste, & deux à la queue.



*Compartiment d'une Legion de quatre
mille deux cens hommes de pied,
& trois cens chevaux.*

CHAPITRE II.



NE Legion est tousiours diuisée en cinq corps, à sçauoir l'Infanterie en quatre corps, nommez, Velites, Hastaires, Princes & Triaires, & la Caualerie en vn. Chaque corps est diuisé en dix troupes, qui dans l'Infanterie se nomment Cohortes ou Manipules, & dans la Caualerie Turmes.

Aux trois premiers ordres de l'Infanterie, il y a en chacun mille deux cens soldats,

desquels chacun fait dix troupes de six vingts soldats; & au quatriefme, à ſçauoir les Triaires, il y a ſeulement fix cens soldats, qui font dix troupes de ſoixante soldats.

Le corps de Caualerie eſt de trois cens, qui font dix troupes de trente soldats.

Parmy les Autheurs il y a de la diuerſité entre les noms de Cohorte, Centurie, & Manipule, leſquels icy ſignifient vnemeſme choſe. Mais en quelque endroit de Tite-Liue on y void la diſtinction de la Legion à la Cohorte; de la Cohorte à la Centurie; de la Centurie au Manipule. Ce que ie crois eſtre prouenu de ce que les Legions eſtant augmentées iuſques à ſix mille, & ſept mille hommes; on a fait des ſubdiuiſions.



Du Marcher.

CHAPITRE III.



VAND il falloir marcher; au premier ſon de Trompette on deſſaiſoit les Pauillons, & on plioit le bagage: au
ſecond

second on le chargeoit , & au troisiéme on fortoit du logement. Mais nul ne deuoit commencer à descendre son Pauillon que ceux du Consul & des Tribuns ne le fussent.

Les extraordinaires marchaient les premiers. Puis l'aisle droite des alliez & leur bagage à la queue ; puis la premiere Legion & son bagage apres ; puis la seconde Legion & son bagage apres ; puis l'aisle gauche des alliez , & en suite son bagage ; & la Caualerie estoit à la teste & à la queue , & quelquefois aux costez selon le soupçon qu'on auoit des ennemis.

Chaque Legion Romaine avec vne aisle des alliez marchoit deuant tour à tour , afin que chacun eust la commodité d'arriuer le premier au Camp.

Si en marchant l'on auoit plus de soupçon de la queue que de la teste , ou bien des costez ; ils le fortifioient. Voila l'ordre ordinaire du marcher. Mais ie trouue dans Cesar que quand il marchoit en terre d'ennemis , & particulièrement en pais serré de hayes & de bois ; il faisoit marcher en corps toutes les Legions , puis tout le bagage ensemble , laissant seulement à la queue quelques troupes nouvelles pour la garde d'iceluy.

Quand l'armée marchoit en trois corps æquidistants ; à sçauoir tous les Hastaires tant Romains qu'alliez ensemble , ayans leur bagage deuant eux ; puis les Princes & les Triaires en mesme ordre : les extraordinaires & la Caualerie deuoient estre aux flancs & à la teste , pour asseurer le bagage ; ou bien aux endroits qu'on apprehendoit le plus. Et ainsi ordonnez , quand il suruenoit l'occasion de combattre de quelque costé que ce fust , soudain toutes les troupes sortoient facilement de l'embaras du bagage pour aller affronter l'ennemy.

Quand l'armée approchoit du logement, les Tribuns & les Centurions ordonnez à cela , s'auançoient pour considerer l'assiette du Camp , laquelle estant choisie ; on marquoit premierement le lieu du logement du Consul , ou du Capitaine general avec vne Banderole blanche : puis on distinguoit son logement d'avec les autres avec vne Banderole rouge : puis avec vne seconde Banderole rouge on marquoit les logements des Tribuns : puis avec vne troisième Banderole rouge on separoit & distinguoit les logements des Legions d'avec les precedens. Apres cela on donnoit à chacun sa portion de terre , laquelle se marquoit avec

des Banderoles d'autre couleur : puis avec le cordeau on auoit bien tost comparty tous les logements : pource qu'on ne changeoit iamais les mesures ny la forme du Camp, & qu'on y estoit fort accoustumé à cause que l'on ne logeoit point autrement.

Quand l'armée arriuoit, chaque troupe reconnoissoit son logement par les marques & Banderoles. Si bien que tous y alloient facilement sans confusion & sans se tromper.

*Logement du Camp.*

CHAPITRE IV.



N logeoit les quatre corps des Velites, Hastaires, Princes & Triaires, sous le nom seulement des trois derniers corps ; & on diuisoit & confondoit les Velites dans les trois autres corps, comme on verra cy-dessous.

<i>Hastaires</i>	1200
<i>Velites ioints aux Hastaires</i>	480
	<hr/> 1680
<i>Princes</i>	1200
<i>Velites ioints aux Princes</i>	480
	<hr/> 1680
<i>Triaires</i>	600
<i>Velites ioints aux Triaires</i>	240
	<hr/> 840

Les Romains donnoient dix pieds de terre en quarré pour loger deux soldats; si bien que donnant de Terrain cent pieds de large, & mille de long, il y auoit dequoy loger deux mille soldats, & par ainsi dix Cohortes de Hastaires qui ne faisoient que mil six cens octante soldats, estoient logez au large, & leur restoit encore de la place pour leur bagage.

Le mesme espace de terre se donnoit aux Princes, pource qu'ils estoient pareil nombre.

La moitié moins de Terrain se donnoit aux Triaires, pource qu'ils estoient la moitié moins en nombre.

A la Caualerie on donnoit pour trente cheuaux cent pieds de terre en quarré, &

pour les cent Turmes cent pieds de large, & mille pieds de long.

Aux Alliez on donnoit pour les gens de pied pareil espace à celuy des Legions Romaines. Mais pource que le Consul prenoit la cinquiesme partie des Legions des Alliez, on retranchoit aussi en cét endroit la cinquiesme partie du Terrain qu'on leur fournissoit ailleurs.

Quant à la Cavalerie des Alliez, elle estoit tousiours double à celle des Romains. Mais le Consul en prenant le tiers pour loger autour de luy, il n'en restoit dans les logemens ordinaires qu'un quart de plus de celle des Romains : & pource que l'espace de Terrain estoit plus que suffisant, on ne leur augmentoit point, & l'auoient de cent pieds de large, & mil pieds de long comme les Romains.

Ce logement estoit separé de cinq rues de cinquante pieds de large chacune, & coupé par la moitié, par vne rue nommée Quintaine de mesme largeur que les autres.


A la teste du logement il y auoit vne grande rue de cent pids de large ; apres quoy logeoient les douze Tribuns vis à vis des deux Legions Romaines, & les douze

Prefects vis à vis des deux Legions des Al-
liez. On donnoit à chacun de ces logis cin-
quante pieds en quarré. Apres estoir le lo-
gis du Consul nommé le Pretoire, qui con-
tenoit deux cens pieds en quarré, & estoit
posé au milieu de la largeur du camp. A
gauche & à droite du logis du Consul, il
y autoit deux places, l'une celle du marché,
& l'autre celle du Questeur. Autour de tout
cela estoient logez les quatre cens cheuaux,
& seize cens trente hommes de pied, que
le Consul tiroit des deux Legions des Al-
liez, comme encore les volontaires; & ou-
tre cela estoient reseruez quelques loge-
mens pour les extraordinaires qui pou-
uoient venir, tant de Caualerie que d'In-
fanterie, & avec cela se faisoit vn quarré
parfait.

Apres tout le logement on laissoit vn es-
pace autour d'iceluy de deux cens pieds.
Puis on faisoit le retranchement dont le
fossé estoit plus ou moins large ou pro-
fond, & le rempart bas ou haut, selon l'ap-
prehension, grande ou petite, qu'on auoit
de l'ennemy.

Est à remarquer que l'Infanterie est tou-
jours logée le plus près des retranchemens,
comme celle qui les doit deffendre, & qui


2016 $\frac{2}{3}$
Porte du Prétoire extraordinaire



Porte Decumene.

2016-2

Fol. 135.



Capitaine.

135

couvre la Caualerie qui est posée au milieu du logement. L'exemple qui suit fera mieux comprendre ce que dessus.

A Pretoire.

B Pavillons des Tribuns.

C Grande rue entre les Pavillons des Tribuns, & le logement des Legions.

D Logement de la Caualerie Romaine.

E Logement des Triaires.

F Logement des Princes.

G Logement des Hastaires.

H Logement de la Caualerie des Alliez.

I Logement de l'Infanterie des Alliez.

L Rue de l'Infanterie des Alliez.

M Ruës entre les Princes & les Triaires.

N Ruës entre les Hastaires, & Alliez.

O Espace entre les logements & le retranchement.

P Rue Quintaine.

Q Place du Marché.

R Place du Questeur.

S Logement des Volontaires.

- T Logement de la Cavalerie, que le Consul a tirée des legions des Alliez pour estre près de sa personne.
- V Logement de l'Infanterie que le Consul a tiré des Alliez pour estre près de sa personne.
- X Logement de la Cavalerie extraordinaire qui peut suruenir.
- Y Logement de l'Infanterie extraordinaire qui peut suruenir.
- Z Pavillons des Prefects & Alliez.
- &c Logement des Armes.
- § Logement des Machines.
- ¶ Logement des Viures.
- A Logement des Habitz.

Quand l'armée du Consul est composée de plus de quatre Legions, on les loge en mesme ordre, à costé les vns des autres. Tellement qu'en ce cas le Camp se trouue quarre long; ou bien quand les deux armées des Consuls se ioignent, & ne font qu'un Camp, il occupe la place de deux quarez.

Quelque-fois les deux Camps sont proche l'un de l'autre, mais separés.

Icy Polybe a obmis le nombre des portes du Camp, & leurs noms, & où elles estoient posées:

posées : comme quoy estoit faite la closture du camp , les logemens des deux Lieutenans du Consul (vn pour chaque Legion ;) du Questeur (qui est le Thresorier ;) du Prefect du camp , (qui est l'Intendant de la Iustice ;) des douze Prefects des al- liez ; des viures ; des armes ; des Machines de guerre ; des vestemens , & de quoy estoient faites les Tentes de guerre. Surquoy avec l'aide de quelques Autheurs & selon l'apparence nous y suppléons. Premiere- ment l'on trouue en diuerses Histoires, que le camp auoit quatre portes , posées & nommées comme elles sont en l'exemple cy-deuant.

Quant à la closture du Camp ; on lit aussi qu'on faisoit le rempart de la terre qu'on tiroit du fossé , & pour faire tenir la terre on plantoit deux ou trois rangées de paux , autour desquels on entrelassoit des fascines en guise de clayes.

Pour les logemens des Lieutenans du Consul , il y a apparence qu'ils estoient logez autour du Pretoire.

Et pour celuy du Questeur , lequel outre l'argent , auoit la charge des armes , des Machines de guerre , des viures & des habillemens ; ie iuge que la place qui luy a esté

donnée grande & spacieuse, est pour loger tout cela.

Quant aux Tentes, on trouue que iusques au temps de Cesar elles estoient de peaux de bestes.



*Des Ordonnances & Gardes
du Camp.*

CHAPITRE V.



QUANT au Serment qu'on exigeoit des soldats après leur election, on leur en faisoit faire vn autre dans le camp; à sçauoir de n'y desrober point, & s'il se trouuoit quelques choses, de les porter aux Tribuns. Polybe r'apporte qu'il se faisoit ainsi entre les mains des Tribuns: & Ciceron qu'il se faisoit dès le commencement de l'election des soldats entre les mains du Consul.

Cela fait on compartissoit les Cohortes des Princes & des Hastaires comme s'ensuit. Deux à auoir soin de tenir nette la grande

ruë qui est entre les Tribuns & le reste des soldats ; iusques à l'arrouser en Esté pour oster l'incommodité de la poussière ; car c'estoit le lieu où tout le iour vne grande partie de l'armée se tenoit. Les dix-huit autres estoient départies pour seruir les Tribuns ; à sçauoir trois pour chaque Tribun ; desquels se prenoient tous les iours huit soldats pour la garde de leur logement. Les Cohortes des Triaires faisoient la garde à la Caualerie, & vne Cohorte chaque iour en troit en garde deuant le logis du Consul.

Les fossez & les remparts se faisoient, deux costez par les Romains, & deux costez par les Alliez. Les Centurions faisoient trauailler les soldats. Et deux Tribuns auoient la charge de voir si la besogne estoit bien faite.

L'autorité des Tribuns dans le camp estoit grande, & deux à la fois l'exerçoient sur leur Legion deux mois, les vns après les autres.

Pour le mot, il falloit qu'un soldat de la derniere Cohorte pour l'Infanterie, ou de la derniere Turme pour la Caualerie, vinst au logis du Tribun, le prendre sur vne tablette, où estoit aussi escrit le nom du soldat

qui la prenoit , & de son logement , & la rendoit en presence detesmoings au Chef de sa troupe. Le Chef la bailloit au Chef de sa voisine , & ainsi de main en main la tablette alloit à la premiere Cohorte proche de la Tente du Tribun , auquel elle estoit rapportée auant la nuit ; si bien que par ce moyen il estoit assuré que toute l'armée auoit le mot. Et si quelque tablette manquoit à estre rendue ; il estoit facile de trouuer où elle estoit demeurée. Est à noter qu'icy ne se parle que d'un Tribun , qui me fait croire que les deux Tribuns qui auoient durant deux mois l'autorité , s'estoient accordez de commander durant iceux chacun leur iour.

Quant à la garde elle se faisoit iour & nuit , & les vingt-quatre heures se diuisoient en huit gardes.

Premierement , le Consul estoit gardé par la Cohorte ordinaire : puis chaque corps posoit la garde autour de son logement : en outre on posoit trois gardes , l'une au logis du Questeur , & les deux autres aux logis des deux Lieutenans du Consul.

Les Tergiducteurs , ou Chefs de la queue conduisoient les gardes , lesquelles

tiroient au sort à qui commenceroit. Les premiers à qui estoit escheu de commencer, estoient conduits au Tribun qui estoit en exercice, lequel bailloit l'ordre de la garde, & outre cela vne petite tablette avec vne marque, & toutes les gardes se posoient de mesme façon.

Les rondes se faisoient par la caualerie, dont le Chef en commandoit quatre pour le iour, & quatre pour la nuit. Les premieres alloient prendre l'ordre du Tribun, qui leur ordonnoit par escrit quelles gardes ils deuoient visiter.

Le changement & visite des gardes se faisoit huiët fois en vingt-quatre heures au son de la trompette, & c'estoit le premier Centurion des Triaires qui auoit charge de les faire marcher quand il falloit.

Quand la trompette les aduertissoit, les quatre mentionnez tiroient au sort; & à qui il escheoit de commencer, prenoit avec soy de ses amis, & si en faisant la ronde il trouuoit les Gardes en bon estat, il retiroit seulement la marque que le Tribun auoit baillée, & la luy rapportoit le matin. Mais s'il trouuoit la garde abandonnée, ou quelques sentinelles endormies, ou

autre desordre; il en faisoit son rapport au Tribun avec ses tesmoins, & aussi tost on assembloit le Conseil pour verifier la faure, & chastier le coupable selon qu'il le meritoit.

Les Velites faisoient la garde autour du retranchement par le dehors, & par le dedans, & aux portes: les Alliez auoient le mesme ordre.

L'on ne trouue point parescrit le nombre de leurs Corps de garde: comme quoy ils posoient leurs sentinelles autour du camp, & combien on auoit de iournées franches de la garde.



Des Peines, & des Prix.

CHAPITRE VI.



L n'y auoit que le Consul qui pouuoit condamner à mort, & auoit cette autorité aussi bien sur les Principaux Chefs de l'armée, comme sur les moindres soldats d'icelle.

Les Tribuns faisoient la Iustice militaire, laquelle estoit exercée rigoureusement. La forme du supplice ordinaire se faisoit ainsi.

Soudain que le Tribun auoit touché d'un baston ou d'un foüet, celuy qui estoit condamné ; chaque soldat le chargeoit à coups de baston, ou de pierre, & souuent auant que de pouuoir sortir du Camp il estoit assommé. Mais encore qu'il en eschapast, il n'estoit plus receu en sa Patrie, & aucun de ses parens ne l'eust osé retirer. Celuy qui commandoit aux ordres commandez pour la garde, ou pour les rondes, ou autre seruice concernant la seureté de l'armée, ou bien qui s'attribuoit fausement d'auoir fait quelque acte signalé, ou qui auoit abandonné le lieu où l'on l'auoit mis, ou qui dans le combat auoit perdu ses armes, ou qui auoit desrobé dans le camp, ou seruy de faux tésnoin, ou bien abandonné son corps, estoit puny de cette façon : comme aussi celuy qui estoit tombé trois fois en de plus moindres fautes.

S'il arriuoit que plusieurs Legions, ou vne Legion, ou vne grosse troupe eust fuy, on le chastioit en deux manieres, &

la plus rigoureuse estoit de les faire tirer tous au fort & d'en punir la dixiesme partie, ou plus ou moins selon l'exigence du cas. Par ainsi tous auoient la peur, & la plus petite partie estoit punie. La plus douce estoit de les faire coucher dehors du camp, & de leur donner de l'orge au lieu de froment, qui estoit vnemarkue d'ignominie que plusieurs troupes ont effacées, faisant des actes valeureux & memorables.

Quant aux reconnoissances d'honneur; ils y excitoient les soldats en loüant publiquement deuant tous les autres, ceux qui auoient fait quelque action valeureuse & extraordinaire. Outre cela on donnoit à celuy qui auoit blessé vn ennemy dans les escarmouches & petits combats, & qui volontairement l'estoit allé attaquer, vn dard: à celuy qui l'auoit tué & despoüillé: s'il estoit homme de pied, vn bouclier: s'il estoit Cavalier vn harnois de cheual: à celuy qui à l'assaut d'vne place estoit le premier monté sur la muraille, vne couronne Murale, & à celuy qui auoit sauué vn Citoyen Romain, la couronne Ciuique, qui luy estoit posée sur la teste par celuy qui auoit esté sauué, lequel toute sa vie le respectoit & honoroit comme son pere.

Les

Les Chefs auoient aussi leurs parts des honneurs, par les diuers triumphes qu'ils obtenoient, selon la grandeur de leurs actions, & la felicité de leurs victoires.



De la Solde.

CHAPITRE VII.



OVR la solde, elle ne com-
mença que trois cens quarante
huit ans apres la fondation de
Rome. Auant cela chaque sol-
dat s'armoit, se nourrissoit &
entretenoit de ses propres despens; ce qui
n'estoit pas difficile en ce temps-là, pource
que leur guerre n'estoit pas encor esloignée
de Rome. Mais quand ils commencerent à
sortir d'Italie; il fut necessaire de donner la
paye, laquelle du commencement estoit
fort petite: puis elle creut avec la grandeur
de l'Empire Romain. Et ie ne m'amuseray
d'en faire l'eualuation à nostre monnoye;
cela n'estant de nulle vtilité. Seulement

ie diray qu'il faut tellement proportionner la paye , que le soldat s'y puisse bien entretenir. Je remarqueray encore icy , que les Romains se chargeoient de fournir le pain , les vestemens , les armes & les Tentés à tous leurs soldats : & outre cela l'orge pour les cheuaux des Caualliers (rabatans les choses sur leur solde.) Ce que ie trouue estre vn bon ordre & du tout necessaire pour faire subsister vne armée. Car outre qu'il y a tousiours la plus grand part des soldats. mauvais mesnagers , & qui , si on n'y pouruoit , se trouueront tousiours mal nourris & mal vestus ; c'est vne chose impossible que le soldat trouue par tout du pain à acheter , & qu'il puisse porter tout ce qui luy est nécessaire.

*Ordre de bataille.*

CHAPITRE VIII.



L y a diuersité d'opinions sur
 l'ordre de bataille des Ro-
 mains, les vns veulent que
 quand les Hastaires ne peu-
 uent soustenir le choc des
 ennemis, qu'en se retirant ils entrent par
 files dans l'ordre des Princes: & les deux
 dans celuy des Triaires, & ainsi renouuel-
 lent le combat trois fois. Les autres veu-
 lent que ce soit par troupes, à quoy ie iu-
 ge beaucoup plus d'apparence, tenant la
 premiere non seulement impossible à exe-
 cuter, mais aussi très-dommageable, &
 l'autre fort faisable, & très-vtile. Car pour
 entrer par files ainsi les vns dans les autres,
 il faut que les Hastaires combattent si lar-
 ge à large, qu'entre deux files il s'y en
 puisse tousiours loger deux autres. Ce qui
 monstre la debilité de ce premier ordre,

T ij


lequel ainsi mis en bataille , ne peut ny renuerfer ny soustenir vn bataillon : & mesme les files ainsi esloignées les vnes des autres , ne scauroient en combattant se maintenir droites , ny conseruer leur distance. Mais à l'autre ordre il s'y trouue plusieurs vtilitez. Premièrement plusieurs corps de cent vingt hommes chacun (ou enuiron) attaquant vn bataillon , le peuvent fort bien deffaire. En tout cas ils se peuvent retirer sans se desordonner ny perdre leurs distances. Et le second ordre qui est derriere le premier en bataille vis à vis des distances , les peut facilement remplir : comme aussi en cas de besoin le troisieme corps ; celles qui luy sont reseruées , renouellant le combat par trois fois. Et ce qui me confirme le plus en cette opinion , est , premierement que la raison le veut ainsi : puis la description de la bataille de Zama , que Scipion donna contre Hannibal , où il est dit que Scipion , pour empêcher que les Elephans d'Hannibal ne les renuerfassent , fit mettre les Cohortes des Princes qui estoient vis à vis des intervalles des Hastaires , derriere eux ; afin de laisser des rües pour le passage des Elephans. Ce qui monstre clairement quel or-

dre de la bataille estoit disposé par Cohortes, & non par files.

Ie ne parle point en cét ordre de bataille, des Velites : ny de tous autres soldats armez à la legere, pource qu'ils ne combattoient qu'avec armes à lancer, & de loin, & quand les armées s'approchoient pour choquer, ils se retiroient derriere ceux qui estoient pesamment armez.


Pour donc former ledit ordre, ie diray que la file estoit tousiours de dix hommes de hauteur : que la Cohorte ou Manipule d'une legion de quatre mille deux cens hommes, estoit tousiours de cent vingt hommes, & par consequent la Cohorte faisoit dix rangs & douze files ; contenant à six pieds de terre en quarré pour soldat, soixante & douze pieds de long & soixante pieds de hauteur : & à trois pieds, la moitié moins.

PREMIERE FIGURE
d'une Cohorte.




En chacun des trois ordres, quoy que les Legions fussent plus ou moins fortes, il y auoit tousiours dix Cohortes ou Manipules. Mais les Cohortes croissoient ou diminuoient à proportion des Legions.

SECONDE FIGURE des dix Cohortes.



Les deux premiers ordres sont d'égal nombre, & le dernier de la moitié moins: par cet exemple d'une Legion, on verra comme toutes les troupes entrent les unes dans les autres.



Je croy qu'entre les Legions il y auoit vne distance beaucoup plus grande qu'entre les Cohortes, afin d'empescher la confusion entr'elles. Ce que ie iuge si necessaire que sans l'observation d'icelles, il est du tout impossible de conseruer aucun bon ordre.

Quant à la Caualerie, puis qu'elle estoit separée en pareil nombre de troupes, que l'Infanterie; il faut croire qu'elle combattoit en pareil ordre: mais la moitié estoit à l'aile droite, & l'autre à la gauche. Par ainsi nostre armée sera composée de six grands corps; à sçauoir, quatre corps de l'Infanterie, & deux corps de la Caualerie, & chaque corps diuisé en petites troupes, comme a esté dit cy-dessus.


EXEMPLE



E X E M P L E
DE L'ORDRE DE
BATAILLE DVNE

ARMÉE COMPLÈTE.

QUATRIÈME FIGURE.





Des Sieges.


CHAPITRE IX.



LE Capitaine Romain n'a fait de plus beaux Sieges que Cesar, ny ne les a descrits plus parfaitement. Il y a des exemples pour l'attaque de toutes sortes d'assiettes, & pour maintenir son siege contre toutes sortes de secours. A Brundisium, qui est sur la mer, il contraignit Pompée de l'abandonner; pource qu'il luy bouchoit le port par où elle pouuoit recevoir son secours. A Cadenac, qui estoit vne assiette inexpugnable; il la contraignit de se rendre, en luy ostant l'eau. A Alexie où il y auoit dedans quatre-vingt mille hommes de guerre, & qui en attendoit deux ou trois fois autant; Il se fortifia deuant de telle sorte, & contre la ville & contre ceux de dehors, qu'il l'affama. Et à Bourges & à Marseille, il prit la premiere par assaut, & contraignit l'autre de se rendre sur le point

estreforcée. Je ne particulariseray icy les machines dont on se seruoit alors pour forer les places, pource que le canon en a osté l'usage. Bien diray-je seulement qu'on s'approchoit de la muraille pied à pied le plus à uert qu'on pouuoit ; & puis on talchoit l'abbatre avec des Machines ; ou par des mines pour la forcer par assaut ; ou auoies pour se loger sur la brèche. Ce qui est dit pour monstrier qu'encore qu'on ait changé la maniere des fortifications, pour eux resister contre nos nouuelles Machines foudroyantes ; neantmoins les anciennes maximes d'attaquer les places, sont les mesmes, dont on se sert auiourd'huy. Quant au siege d'Alexie, c'est le modele sur lequel le Prince de Parme, le Prince d'Orange, le Marquis de Spinola se sont formez pour faire les leurs. Et tout ces grands travaux & circonuallations que nous admirons, & avec l'ayde desquelles il ont pris plusieurs grandes villes à la veüe de plus puissantes armées que les leurs, qui ne les ont pû secourir ; ne sont rien en comparaison de celles que Cesar a faites à ce siege d'Alexie. Bref ceux qui s'approchent le plus de la maniere de guerre des anciens Romains, aussi bien aux sieges qu'à la cam-

pagne; ce sont ceux qui se rendent les plus excellents Capitaines.



*Remarques sur quelques batailles
des Anciens.*

CHAPITRE X.



PRES auoit fait voir l'ancien ordre militaire des Grecs, & des Romains, par le moyen duquel ils ont acquis tant de belles victoires; il en faut encore remarquer deux causes principales, que leurs plus excellents Capitaines ont heureusement obseruées pour vaincre en bataille, à sçauoir de tâcher à enclore son ennemy, & de ne faire iamais combattre toute son armée à la fois. Cyrus pour se garantir d'estre enclos en la bataille qu'il eut contre Crésus; il augmenta le front de son armée du double, en ne faisant les files de son Infanterie que de douze, qui estoient auparauant de vingt quatre: & pour enclore son enne-

ly, logea ses meilleurs hommes aux aïles ,
 lesquels ayants deffait les aïles de l'armée
 contraire, vindrent attaquer le corps de ba-
 taille par les flancs & par le detrière. A la ba-
 taille de Cannes , Hannibal mit aux aïles
 tous ses bons soldats , & les moindres au mi-
 eu , afin que les Romains y trouuant peu
 de resistance s'y enfonçassent insensible-
 ment , & par ce moyen se trouuassent enclos
 par les deux costez. A la bataille de Pharsa-
 le , Cesar couvrit vn des flancs de son armée
 d'une petite riuiera , & fortifia sa caualerie
 qui estoit à l'autre flanc d'un corps d'Infan-
 terie , pour resister à la caualerie de Pompée ,
 qui estoit beaucoup plus grande que la sien-
 ne. Si bien que par ce moyen l'ayant deffai-
 t ; il attaqua l'armée par le flanc , & la
 deffit facilement. A la bataille de Zama ;
 Hannibal fit vn corps de toutes ses vieilles
 bandes d'Italie, lesquelles il separa de toute
 son armée , afin que quand tout le reste
 tant d'une part que d'autre , seroit las de
 combattre, ce corps tout frais peust emporter
 la victoire. Tellement que Scipion apres a-
 uoir deffait tout ce qui estoit deuant luy , se
 trouua estoñné de voir vne seconde armée à
 combattre de nouveau.

Icy se peut faire vne obiection , que les

armées pourroient estre si inégales en nombre; que toutes ces maximes se trouueroient inutiles. A quoy ie responds, que quand vne armée passe vn certain nombre de quarante, ou cinquante mille hommes, le surplus ne sert qu'à la faire mourir de faim. Car il est facile en se retranchant d'éuiter le combat. Et quand bien on voudroit donner la bataille, si on veut se seruir des ordres mentionnez; il n'y a plainesi vaste où l'on ne puisse trouuer dequoy couvrir vn des flancs de l'armée, soit d'vne riuere, ou d'vn bois, ou d'vne montagne, ou d'vn fossé: & l'autre avec des chariots: n'y rien qui puisse empescher qu'on n'ait quelque corps de reserve, qui ne combatte pas dès le commencement, ny qu'on ne mette aux ailles les troupes qu'on estime le plus. Lesquelles choses si on les obserue exactement comme il faut, elles peuuent grandement ayder à obtenir la victoire.



*Comparaison des Armes , & Ordres
militaires des Romains , avec
les Armes & Ordres
des Grecs.*

CHAPITRE XI.



Les armes des Grecs estoient, le bouclier , la picque , & l'espée. Leur ordre estoit de grands corps de bataillons de seize de hauteur des pesamment armez , & encore renforcez de huit de hauteur des legerement armez ; de façon que les bataillons venoient à estre le vingt - quatre de hauteur , & combattoient tous à la fois , estans tous de front.

Les armes des Romains estoient la Targe , & l'espée. Leur ordre estoit de faire de petit corps de cent cinquante ou deux cens soldats au plus , qui n'auoient que dix de hauteur seulement , & de faire trois fois l'un pres l'autre.

Quant aux armes des Grecs, il sembloit que leurs longues picques eussent vn grand auantage sur les Targes Romaines; pource qu'elles ataignoient de loing. Et encor au iourd'huy ne trouuons nous arme pareille à la picque contre l'effort de la cavalerie; & pour l'ordre ces grands corps ne trouuoient rien deuant eux qui leur peust resister.

Del'autre part ces grandes Targes Romaines les couuroient si bien, que les picques ne leur pouuoient faire mal, & si vne fois ils venoient au joindre, ils faisoient vn grand carnage avec leurs espées, courtes & larges, car lors la picque estoit inutile. Aussi leurs petites troupes leur donnoient cét auantage; qu'ils combattoient plus de gens à la fois. Quant à la disposition des trois ordres l'vn derriere l'autre, afin de s'entre secourir l'vn l'autre, & de pouoir recommencer le combat par trois fois; ils en tiroient cét auantage; que tous ne se lassoient & desordonnoient à la fois. Si bien que souvent ils ont emporté la victoire après la défaite de leurs deux premiers ordres; pource que le troisieme ordre, estant frais, & ayant rallié tout le reste, faisoit vn dernier effort contre vne armée lassée, & en desordre,

ordre, & comme cela gaignoient la bataille.

Il se trouue encore deux incommoditez à ces grands Corps; à sçauoir qu'il faut u'ils ayent tousiours vn champ de bataille fort vny; autrement ils ne peuuent conferuer leur Ordre: & qu'ils ne peuuent agir à gauche & à droite, ains seulement combattre deuant eux. Mais les petites troupes se tiennent de tous costez, & entretiennent leur Ordre en tous lieux. Il est vray que les Romains se mettoient quelquefois tous ensemble, ne faisans de toute leur armée qu'un corps en rond. Mais ce n'estoit que pour se garantir en vne retraite, & non pour attaquer. Car comme ces grands Corps sont comme immobiles, & de peu d'usage aux attaques; aussi quand ils ne veulent que se deffendre, ils sont difficiles à rompre. Et encor ne se seruoient-ils de ce dernier Ordre, que quand ils estoient persecutez de fleches par vne grande Caualerie, comme elles des Parthes. Car ne pouuans venir aux mains avec eux, ils estoient contraincts de se mettre en cet ordre, & se couvrir de leurs Targes. Si bien que ie conclus, que ces armes & Ordres des Romains, sont meilleurs que ceux des Grecs; pource que

les petites troupes s'accommodent mieux à toutes assiettes que les grandes: que combatans à diuerſes fois, on opiniaſtre plus les batailles, que quand tout combat à la fois, & qu'il eſt plus facile de faire promptement & ſans deſordre, de pluſieurs petites troupes vne groſſe, que d'une groſſe en faire pluſieurs petites.



TRAITE' DE LA G V E R R E.



IE n'entrepris pas icy de traiter toutes les fonctions de la guerre en particulier, pource que tant de personnes en ont eſcrit, que ce ſeroit vne choſe ſuperflüë. Je me contente de faire des remarques generales ſur toutes les choſes qui en dépendent, & qui ſe peuuent mettre aujourdhuy en pratique, ne voulant toucher que ce que l'experience me peut auoir enſigné, & ſur tout eſtre

bref, que ie ne puisse ennuyer long-
temps le Lecteur.



De l'Election des Soldats.

CHAPITRE I.

L'Election des gens de guerre
s'est faite par les Anciens, &
se fait encor par les Modernes
diuersement. Les Grecs & les
Romains ne se sont pas con-
entez de soldoyer les soldats qui de leur
on gré ont voulu aller à la guerre; mais
ont elleu parmy eux ceux qu'ils ont iugé les
plus propres pour la faire. C'est pourquoy
ils ont eu de si bons soldats. Les Carthagi-
nois ont soldoyé pour la plus-part des É-
trangers; & pour cette cause n'ont point
eu de pires soldats que ceux de leurs pays.
Les Turcs choisissent leurs soldats & les
ressent. Les Suisses se seruent de leurs gens
propres. Les Venitiens & Hollandois se
seruent, à l'imitation des Carthaginois, de

soldats auxiliaires. Les François & les Alle-
mans abondent en bons hommes , & se
passent facilement d'auxiliaires ; mais ils ne
choisissent point leurs soldats , ils se seruent
seulement de ceux qui volontairement veu-
lent aller à la guerre. L'Angleterre seule de
tous les Estats de nostre temps , les peut
choisir & prendre tels qu'elle veut. Sur
quoy il faut considerer la constitution de
ces Estats : sur quelles maximes ils sont fon-
dez , & ce que chacun peut faire de meilleur
pour auoir de bons soldats. La plus-part
des Estats d'aujourd'huy sont plus fondez
sur la police que sur la guerre , & taschent
plustost de se conseruer , que de s'accroistre.
Ce qui nous y fait voir les lettres fleurir , &
les armes s'abastardir ; si bien que les Estats
qui ont pourfondement la guerre , gour-
mandent les autres.

L'exemple du Turc à la honte des Chre-
tiens , & celuy du Roy d'Espagne au pre-
iudice de l'Allemagne , & de l'Italie , en
sont deux preuues manifestes. Ce qui cau-
se ce mal , est que les gens de lettres ont
occupé presque par tout le gouuernement
des Estats , lesquels à cause qu'ils haïssent
les gens de guerre , les font tousiours mal
traitter , & mesmes conseillent de se seruir

Ilustost d'auxiliaires que de leurs subiects naturels, qui est vne maxime tres-pernicieuse. Mais n'estant icy le lieu d'en traiter, nous parlerons seulement de l'eslection des soldats.

L'Angleterre qui a droit par les loix du Royaume de choisir ses gens de guerre, peut obseruer la forme de l'eslection des Romains qui est tres-bonne. Les autres Royaumes qui n'ont ce droit là, doiuent inciter les gens d'honneur & d'ambition de se faire enroller, tant pour l'esperance d'estre auantez aux autres honneurs, en embrassant le mestier de la guerre, que par le dessein d'y paruenir par autre voye, que par celle-là; comme de ne bailler aucun office du Royaume, ny de la maison du Roy, ny aucune charge parmy les gens de guerre, si l'on n'a seruy de soldat vn certain nombre d'années parmy les bandes, ny faire aucun Mestre de Camp qui n'aye esté Capitaine: aucun Capitaine de Caualerie, sans auoir esté Officier dans la Caualerie: aucun Marechal de Camp, qui n'ait exercé honorablement de moindres charges, ny aucun General d'armée, qui n'aye esté digne Marechal de Camp. Bref que nul ne se

puisse auancer en aucune charge, qui ne passe par les degrez de la guerre. Et comme l'esperance de s'accroistre est vn fort aiguillon pour encourager vn chacun à exercer le mestier de la guerre; aussi l'apprehension de se trouuer pauvre & estropié apres auoir longuement seruy, est vn rude mors pour les retenir. C'est pourquoy ie voudrois y pouruoir en establisant vn fond pour ces gens-là, afin de faire viure le reste de leurs iours commodément & avec honneur. Les Estats qui à cause de la forme de leur gouvernement craignent d'armer leurs peuples (comme Venise.) où dont la subsistance depend du traffic, comme les Pays-bas; & qui pour ces raisons sont contraincts de se servir en leurs guerres; d'Auxiliaires; doiuent premierement estre soigneux de choisir de bons Chefs, puis auoir tousiours vn certain corps de soldats bien exercez & disciplinez, suffisant tant pour les empescher d'vne surprise; que pour leur donner temps d'assembler de plus grandes forces. Car vne armée formée & disciplinée de longuemain, quoy que petite, est plus capable de se defendre, & mesme d'acquies, que ces armées qui ne s'asseurent que sur leur grand nombre. Et les grandes conquestes se sont

resque tousiours faites par les armées me-
iocrates; comme les grands Empires se sont
tousiours perdus avec leurs peuples innom-
rables. Pource que ceux qui auoient à
combattre ces armées si nombreuses, ont
voulu leur opposer vne exacte discipline &
en bon ordre; & les autres ayans negligé
oute bonne discipline & ordre, ont voulu
ecompenfer ce deffaut par le grand nom-
bre d'hommes, qui leur a causé toute con-
fusion, & n'a seruy qu'à les faire perdre
plus honteusement. Dont ie conclus que le
meilleur moyen d'auoir de bons soldats, est
le choisir ceux qui sont plus propres à la
guerre. Le second d'inciter les gens d'am-
bition & de vertu de s'enroller librement,
en fermant la porte à toute autre voye de
s'auancer: & le dernier d'entretenir vn corps
l'armée, qu'on soit soigneux (aussi bien
en paix comme en guerre,) de tenir sous
vne exacte discipline sans iamais la relas-
cher. De l'vne desquelles trois voyes tous
es sortes d'Estats se peuuent seruir.

*Des Armes.*

CHAPITRE II.



Es armes plus ordinaires de l'Infanterie du temps present , sont pour la defensiva, le pot , la cuirasse , & les tassettes : & pour l'offensiva l'espée, la pique & le mousquet, qui sont plustost les armes des Grecs , que des Romains. Surquoy il faut remarquer , que nos mousquets nous seruent comme faisoient les armes de ject aux Anciens ; si bien que le corps de la bataille consiste aux piques , qui est vne arme tres-propre pour resister à la Caualerie , pource que plusieurs iointes ensemble font vn corps foible , & tres-difficile à rompre par la teste , à cause de leur longueur , desquelles il s'en trouue quatre ou cinq rangs, dont les fers outrepassent le front des soldats , & tiennent tousiours les escadrons de Caualerie esloignez d'eux de douze ou quinze

quinze pieds. Maurice Prince d'Orange a eu grande enuie de se seruir de la Targe, & en ayant fait faire diuerfes esprouues, a trouué qu'elle a non seulement résisté à la picque, mais que la moitié moins de Targes, a tousiours entré dans les rangs de deux fois autant de piques & les a rompuës. Neantmoins n'estant que Chef des armées d'un Estat, & non Prince souuerain & absolu; il n'a osé faire vn si grand changement: soit qu'il craignist la Caualerie qui se trouue aujourd'huy tres-bien armée: ou bien le reproche de quelque mauuais succès; n'ignorant pas que les peuples iugent plustost des actions de ceux qui les seruent par l'euenement, que par la raison. Pour moy ie voudrois aiouster ceste sorte d'armes à nostre discipline, faisant tousiours le principal corps de mon Infanterie de piques, & auoir à chaque bataillon vn petit corps separé de cent ou six vingt Targes, pour charger par le flanc, ce qui feroit vn merueilleux effet vn iour de bataille, & seroit la vraye place des volontaires, & de force brave Noblesse, de laquelle bien souuent on est bien empesché en vne armée. Quant aux armes offensiuës de la Caualerie nous en auons de cinq sortes; à sçauoir la lance, le

pistolet, l'espée, la carabine, & l'arquebuse à mèche. Les deux premières sont données à la Cavalerie pesamment armée, laquelle doit avoir pour armes défensives cuirasse, salade, brassals, tassettes, genouillères & gardes reins. Encor y a-t'il peu de temps que les chevaux estoient armez de bardes. Des deux autres ceux qui portent les carabines ont le pot & la cuirasse, & pource qu'ils combattent à cheval ils doivent estre bien montez. Mais ceux qui portent les arquebuses à mèche, n'ont nulles armes défensives. De ces cinq sortes d'armes offensives, il n'y en a plus que trois bien en usage, à sçavoir le pistolet, l'espée & la carabine. Les Espagnols seuls ont encor retenu quelques compagnies de lances, qu'ils conservent plustost par gravité que par raison. Car la lance ne fait effet que par la roideur de la course du cheval, & encor il n'y a qu'un rang qui s'en puisse servir; tellement que leur ordre doit estre de combattre en haye, ce qui ne peut résister aux escadrons, & si elles combattoient en escadrons elles feroient plus d'embaras que de service. Et pour l'arquebuse à mèche, on l'a aussi comme délaissée, pource que dans les guerres civiles elle ruinoit l'Infanterie; chacun voulant avoir un bidet pour pouvoir mieux

voler. Neantmoins quelques troupes bien
reglées de cette espece dans vne armée, sont
de tres-grand service; ou à faire des execu-
tions, ou à gagner de mauvais passages; ou
à garder le logement de la Cavalerie; ou
mesme vn iour de combat à faire mettre
pied à terre comme enfans perdus deuant les
escadrons de Cavalerie.

Maintenant faut proportionner la Caualerie avec l'Infanterie, laquelle peut auoir ses distinctions selon la situation du pais où vous faites la guerre ; ou bien des ennemis contre lesquels vous auez à combattre. Car si vous estes en vn lieu de campagne plein de fourage, & que vous ayez à faire la guerre contre vne grande Caualerie comme celle du Turc ; il faut en ce cas vous fortifier de plus grand nombre de Caualerie. Que si la guerre se fait en vn pais ferré ou de montagnes, ou de forests, ou de marais, ou de hayes & fossez ; & qui ait force places fortifiées, pource que la guerre se reduit plustost en sieges, qu'en batailles & combats de campagne ; alors il faut fortifier son Infanterie : & ces deux corps sont si necessaires l'vn à l'autre, qu'une armée ne se peut estimer bonne, ny subsister s'ils ne sont également bien entretenus.

Neantmoins si ie n'estois induit par quelque raison extraordinaire, ie ferois la proportion de mon armée pour le pais ouvert d'un quart de Cavalerie, sur trois quarts d'Infanterie; comme sur vingt-quatre mille hommes de pied, huit mille chevaux. En un pais serré, d'une sixiesme partie de Cavalerie sur cinq parts d'Infanterie, comme sur vingt mille hommes de pied, quatre mille chevaux. Reste de donner à ces deux corps les armes dont nous avons parlé avec la proportion la plus utile. Les Suisses ont beaucoup plus de piques que de mousquets; & pour cét effet se sont faits redouter en campagne. Car un jour de bataille où on vient aux mains, le nombre des piques a beaucoup d'avantage sur celuy des mousquets. Les autres Nations partagent également les piques & les mousquets; & mesme pource que la guerre se reduit aujourd'huy plus en sieges qu'en batailles, on aime mieux avoir plus grand nombre de mousquets que de piques. Pour moy qui y adiouste les Targes, ie serois d'avis de faire les Regimens de mille quatre cens quarante soldats; à sçavoir de six cens mousquets, & deux cens quarante Targes. Pour la Cavalerie, ie la proportionnerois en cette sorte. Le com-

poserois les Regimens de cinq cens che-
uaux , dont i'en armerois quatre cens en
gens d'armes , cinquante en Carabins , &
cinquante en Arquebusiers à cheual. Mais
ce n'est pas tout d'auoir bien armé vos sol-
dats, si vous ne les obligez de porter leurs
armes, estant vne honte insupportable de
voir aujourd'huy leur delicatesse, & le mé-
pris qu'ils en font. Et pour couvrir cette
faute , ils publient que c'est manque de
courage d'aller armé, & qu'ils iront en
pourpoint aux lieux les plus perilleux, aus-
si bien que les armez. Il ne suffit pas d'al-
ler en vn lieu pour s'y faire assommer, il
faut y aller pour vaincre , & non pour
estre battu. Il en arriue encore cét inconue-
nient , que si vous ne vous accoustumez à
porter vos armes , quand vous estes con-
traints de les prendre pour vous en seruir;
vous y estes tellement empestre que vous
nepouuez combattre. Au contraire si vous
vous y accoustumez, elles ne vous sont plus
incommodes , & vous y trouuez aussi libres
que si vous estiez en pourpoint. Mais le
pus grand mal qui en prouient est , que la
ruine de la discipline militaire s'en ensuit,
laquelle vn bon Capitaine doit faire obser-
uer exactement en toutes ses parties. Car s'il

la relasche en vne, ou en faueur de certain-
 nes personnes, les consequences petit à pe-
 tit s'en ensuiuent telles qu'elle se corrompt
 tout à fait. Et lors il se trouue sans obeis-
 sance, & sans respect, ce qui ne s'acquer-
 ra iamais, sans encourir la haine de ceux
 qu'il a trop espargné, estant tres-verita-
 ble qu'il est plus facile de preuenir vn mal,
 que de le corriger quand il est venu.



De la Discipline militaire.

CHAPITRE III.



Vtre ce qui s'est dit pour in-
 citer vn chacun de prendre
 plustost le mestier des armes,
 que tout autre : il faut fai-
 re d'autres obseruations, afin
 qu'on s'en rendedigne, lesquelles consistent
 en trois choses ; à sçauoir en la recompense
 des belles actions, au chastiment des mau-
 uaises, & en l'exercice continuel & exact
 de la discipline militaire. Car le mestier du

monde qui a plus besoin de telles aides , est celuy de la guerre , où par la simple solde (avec quoy à peine peut-on viure , & dont le moindre artisan ne se contenteroit pas ,) le soldat s'abandonne à toutes sortes de perils & fatigues. Or nul n'y est poussé si ce n'est ou par emulation d'honneur, ou par la licence de mal faire : Et comme le premier but est vertueux , aussi tire-t'on de bons seruices de ceux qui y entrent pour ce sujet. Mais des autres on n'en reçoit que de la honte. Car au lieu d'une bonne armée bien obéissante, on ne se trouue auoir qu'une troupe de brigands , qui sans ordre & obéissance vous abandonnent , ou après vn bon pillage , ou dans vn peril eminent. C'est pourquoy l'eslection des soldats est vne meilleure maniere de former vne armée , que de receuoir seulement les volontaires , dans lesquels tous les vagabonds & mal-viuans , & qui ne peuuent viure que de volerie , se font enroller. Donc pour inciter le vertueux à faire bien , & destourner le vitieux de faire mal , les recompenses & les chastimens sont du tout necessaires. Les Romains se sont seruis de ces deux moyens fort vtilement , & si nous ne faisons comme eux , nous n'aurons

iamais de bons soldats , ny bien disciplinez. Et n'importe pas que nous nous seruiôs de leurs remunerations , ou de leurs mesmes supplices, il suffit qu'elles les equipolent afin d'en receuoir la mesme vtilité : & ces choses se font diuersement selon le temps & la coustume. Le principal est d'estre exact obseruateur de telles choses , afin que la remuneration excite les braues gens aux belles actions , & la rigueur du supplice retienne les timides de faire laschement. La maniere de decimer les soldats qu'auoient les Romains est tenuë cruelle. Neantmoins il se commet quelquefois des actions si infames , qu'on est contraint d'vser de grande seuerité pour donner de la terreur à tout le monde , trouuant tres-bon de faire peur à tous ceux qui ont fuy par le moyen du fort , & d'en faire mourir peu. Car il faut par ce moyen imprimer cette creance aux soldats , que pour fuir laschement ils n'eurent point la mort ; mais changent seulement vne mort glorieuse qu'ils eussent acquis en combattant vaillamment, à vne infame. Apres auoir releué le soldat par l'honneur d'estre estimé vaillant , & luy auoir fait haïr d'estre estimé poltron ; il faut mettre en pareil degre d'hon-

d'honneur de ſçauoir bien obeïr chacun à ſon ſuperieur , depuis le ſimple ſoldat iuſques au Lieutenant General d'armée. Car de cette obeïſſance toutes les fonctions d'une armée dependent , & ſans icelles on ne peut regler aucune choſe , ny faire rien de bien. Il la faut imprimer au cœur des ſoldats comme vne des principales vertus requiſes en eux. D'elle naiſt l'ordre : par elle s'entretient l'exercice militaire : bref par elle s'executent les beaux deſſeins , & ſans elle tout va en conſuſion & perdition. Je ne m'amuſeray icy à dire le particulier des exercices militaires qu'on fait faire au ſoldat , pource que les liures en ſont pleins , & que l'vſage y change touſiours quelque choſe. Je diray ſeulement qu'il n'y a rien ſi vtile , que d'exercer chaque ſoldat à bien porter les armes , à s'en bien ſeruir , à bien tenir ſon rang , & à bien executer en iceluy tous les changemens qui luy ſont ordonnez. Voilà pour les gens de guerre. Mais pour la recompenſe des Generaux d'armée , ie diray le meſme que pour ſes ſoldats ; à ſçauoir que ſelon le temps , ou la conſtitution des Royaumes ou Republiques , on en doit verſer de telle ſorte , que l'honneur de ceux qui ont fait de belles actions , & rendu de

grands seruices, ne soit diminué ou mesprisé. Pource que les ames les plus genereuses qui excuseront facilement tout manquement d'autre recompense de leurs seruices, ne supporteront iamais qu'on les frustre de l'honneur deu à leurs belles actions ; & se dépitent pluost de ce desny d'honneur, que de toute autre chose, dont souuent en est arriué de grands maux.



De l'Obeïssance des Soldats.

CHAPITRE IIII.



R comme le General d'Armée veut auoir des foldats l'obeïssance qui luy est deuë ; aussi faut-il qu'il ait soin d'en leur donner aucun sujet legitime de s'en exempter. Pour cet effet il doit les occuper tousiours, à cause que l'oïsiueté engendre la corruption aux mœurs, & à la discipline ; d'où naissent le luxe, la negligence aux exercices & aux gar-

des, & la desobeïssance aux superieurs. C'est dans le repos de Capouë que l'armée d'Hannibal s'est perduë, & dans les delices de Babylone qu'Alexandre luy mesme se corrompit, & dût il retira son armée pour en empêcher la totale ruine: n'ayant moyen plus efficace pour la maintenir en deuoir, & en destourner les seditions, que de l'employer à la guerre. C'est donc vne maxime qu'il faut observer exactement, de ne laisser iamaïs en aucun lieu les soldats oysifs, sur tout quand l'armée est en corps. Car si vous ne l'employez à bien, elle s'employera à mal. Ce qu'il faut faire aussi bien au plus fort de la paix, qu'en pleine guerre, particulièrement les exercer à se bien seruir de leurs armes, & à tenir bon ordre; & encores que ce soit sans besoin, à faire des retranchements de camp, & à se hutter; afin qu'ils soient tellement accoustumez à remuer la terre, que quand la necessité le requerra, ils n'y ayent nulle peine. Je voudrois encores les employer à faire des fortifications, & autres œuures de cette espee, pource que l'exercice les maintient sains: qu'ils gagnent outre leur paye de quoy se mieux entretenir, & qu'ils se rendent familiers vne chose, qui en temps de guerre leur est aussi vtile que de

se bien battre; n'y ayant rien d'impossible à vingt ou trente mille hommes qui voudroient trauailler à la terre; car en huit iours ils feront des forteresses imprenables. Et Cesar s'est rendu aussi redoutable & admirable par les grands trauaux qu'il a fait faire à ses soldats, que par les grands combats. Le General doit encore auoir soin qu'ils soient bien vestus, & bien nourris. Sur tout qu'il leur fasse fournir sur leurs payes des habits, & des souliers; autrement vous trouuerez souuent vostre armée se destruire, & la maladie s'y fourrer par ce deffaut. Il faut aussi estre fort soigneux des malades & blesez, & n'espargner rien à cela; afin que les soldats ne s'excusent point d'aller au peril, ou de souffrir la fatigue, sur ce qu'on les abandonne quand ils sont malades ou blesez. Le General doit encore monstrier vn soin particulier de leur soulagement; & ne les obliger, sans grand besoin, à faire des coruées extraordinaires. Mais quand la necessité le requiert, il doit estre le premier à supporter la peine; car l'exemple du Chef rend toutes choses faciles au soldat. Les exemples non seulement des plus grands Capitaines anciens, mais mesme des plus grâds Monarques & Empereurs, deuroient faire

honte à nos delicats Capitaines d'aujour-
d'huy, qui craignent de gaster leur beau
teint au Soleil, & leur rotonde à la pluye,
& qui croiroient estre des-honorez, s'ils
marchoient à pied à la teste de leurs compa-
gnies; & ces grands hommes n'ont point
desdaigné de marcher à la teste de leurs ar-
mées; ont refusé à leur extraordinaire soif
de l'estancher, pource qu'il n'y auoit point
d'eau pour faire boire tout le monde. Et
ainsi se faisans compagnons des perils &
trauaux de leurs moindres soldats; ils se sont
rendus maistres de la plus grande part du
Monde, & se sont acquis vn los immor-
tel.

*Du Marcher.*

CHAPITRE V.



L fait faire diuerfes considera-
tions sur le voyage d'vne armée,
laquelle peut estre attaquée le iour;
ou au déloger: ou bien la nuit quand elle

est logée; si elle n'est point campée, & qu'elle loge dans les villages. Il faut pour la faire marcher en Corps, luy donner rendez-vous sur le chemin qu'elle veut tenir, lequel si l'ennemy l'apprend assez à temps pour s'y trouver le premier, ou que par hazard il s'y rencontre; il fait courir grande fortune à vne armée qui vient à son rendez-vous à diuers temps, & par diuers chemins. Les meilleurs moyens pour se garantir d'un tel accident, sont de tenir son rendez-vous fort secret, d'auoir de bons espions parmy les ennemis, & d'enuoyer force coureurs aux nouuelles. Quand on campe on n'est point sujet à ce peril là, pource que l'armée est tousiours ensemble. Pour le marcher, il faut considerer le país où vous estes, & le nombre de gens de guerre que vous auez. Si vous marchez dans de grandes plaines, on peut aller presque tousiours en bataille, ou au moins tous les bataillons & escadrons formez. Alors il est bien facile de se mettre promptement en estat de bien combattre; pource qu'on ne fait pas vne trop longue file. Mais quand vous marchez par vn país estroit, où on ne peut aller que peu de frôt; alors il faut adiouster l'incommodité du chemin, & le temps que vous auez à le fai-

re, avec le nombre des soldats dont vostre armée est composée. Car dix mille hommes de pied, marchant dix à dix, & mille chevaux, filant cinq à cinq, avec le plus léger bagage qu'ils puissent auoir, & dix canons avec l'équipage dequoy tirer chaque piece cent coups; occupent de chemin enuiron vingt-huit mille pieds de longueur. Qu'on iuge là dessus combien de files doit faire trente mille hommes de pied & six mille chevaux. Quand donc ces grandes armées se trouuent en vn chemin si fascheux; il faut de nécessité faire diuers Corps, qui viennent les vns apres les autres, & logent séparément: ou bien les faire venir par diuers chemins, elloignez de quelques lieuës les vns des autres: ou en tout cas faire des chemins à trauers champs pour faire marcher les gens de guerre, laissant le grand chemin ordinaire au canon & au bagage. S'il y a vne riuere à passer, où on ne puisse faire qu'un pont, ou quelque pas de montagne, ou marais, ou forets, où on ne puisse faire diuers chemins; alors il faut passer les vns apres les autres, & en diuers iours. Je n'em'amusé pas à dire comme tels mauuais pas se doivent passer en veüe d'ennemy, pource que force personnes en ont escrit. Et quand

ce vient à l'exécution peu s'en démeffent bien s'ils font bien attaquez. Mais seulement ie diray que le meilleur moyen est de prendre si bien ses mesures qu'on euite cette rencontre. Quant au marcher, ie trouue comme impossible que deux armées se puissent rencontrer, si l'un des deux Capitaines veut l'euter; sur tout en pais serré. Mais en tout euenement le meilleur ordre est, que le bagage soit entierement separé des gens de guerre, laissant seulement à sa queue quelque peu de troupes, pour empescher qu'il ne se debande. Car si à vne allarme chaque Corps a son bagage derriere soy, il y apporte vne grande confusion, & empesche que les gens de guerre ne se puissent rallier, ny s'entre-secourir les vns les autres. Le temps du logement est encore vne heure dangereuse d'estre attaqué; pource qu'on trouue l'armée harassée, & chacun ayant enuie de se loger, s'auance au quartier en desordre, qui est vne chose difficile à euter; si auant que d'entrer dans le logement on ne fait mettre l'armée en bataille, & si on ne la fait loger troupe à troupe, sans permettre qu'aucun aille se loger que par commandement, faisant faire cependant la descouuerture de tous costez.

Reste

Reste l'attaque d'un quartier, qui est ce qu'on tente le plus souuent, sur tout quand l'armée ne campe point, pource qu'estant logée en diuers quartiers, on peut tenter d'en enleuer quelque'un sans hazarder un combat general. A quoy ie ne trouue pas la seule garde ordinaire quelque exacte qu'on la face, suffisante de remedier à un tel accident; pource qu'elle ne peut donner l'alarme que de trop près, & que souuent on n'a pas le loisir de se mettre en estat de combattre. C'est pourquoy il faut estre soigneux de faire battre l'estrade toutes les nuits par plusieurs petites troupes, lesquelles si elles font bien leur deuoir, ne permettront pas que vous soyez surpris. Car vne armée ou vne grosse troupe capable d'enleuer un quartier d'armée, ne peut passer si secrettement qu'on ne s'en apperçoie. Et quand on a affaire à un ennemy esueillé, & qu'on craint telles attaques de nuit; il n'y a rien si bon que de le preuenir; si ce n'est tout de bon, au moins luy donner toutes les nuits des alarmes, afin qu'il soit plus empesché à se tenir sur ses gardes, qu'à vous attaquer. Si c'est dans un camp retranché où toute l'armée

A a

soit en corps ; c'est vne haute entreprise que de l'attaquer. Et ce Chapitre seul fait voir la seureté d'un camp retranché, lequel ie finiray par cette conclusion, que toutes les choses susdites, pour assurer son logement ne se doiuent iamais obmettre, qu'oy qu'on croye estre fort esloigné des ennemis ; pour ce qu'outre le profit que vous en tirez d'accoustumer vostre armée à faire son deuoir, il vous arriuera vne telle occasion que ce sera le salut d'icelle, de vostre vie, & de vostre reputation.



Du Camper.

CHAPITRE VI.



E ne descriray point icy la forme des camps retranchez, mais seulement leur vtilité : ne pouuant assez m'esmerveiller de ce qu'ils auoient esté du tout delaissez. Il n'y a peuple qui s'en soit seruy si exactement que les Romains ; & de

nostre temps Maurice Prince d'Orange les a remis en vſage, ou pour le moins leur a donné vne grande perfection. Le retranchement du camp aſſeure vne armée, en ce qu'elle n'eſt iamais diſperſée par les villages, où touſiours quelque quartier eſt en danger d'eſtre enleué. Mais loge tout en corps, & en façon qu'eſtant attaquée, elle peult combattre avec grand aduantage. Le retranchement la ſoulage d'une grande fatigue, pource qu'il y faut faire beaucoup moins de gardes, & moins penibles, ſur tout à la Cavalerie, laquelle quand elle loge dans les villages ouuerts, elle eſt contrainte d'eſtre à cheual preſque toute la nuit. Le retranchement contient voſtre armée comme dans vne ville cloſe, d'où vous pouuez partir ſecretement avec telles troupes qu'il vous plaiſt, pour executer toutes ſortes de beaux deſſeins, en laiſſant voſtre bagage en ſeureté. Le retranchement empeſche l'ennemy de vous contraindre à combattre que quand il vous plaiſt. Le retranchement vous fait eſtre ſans peril à la teſte des armées les plus redoutables. Le retranchement vous fait prendre de plus puiffantes villes à la barbe de plus puiffantes armées que la voſtre.

Bref le retranchement s'infecte moins que les villages où on loge; pource qu'on choisit vne assiette saine, & aux villages la faut prendre comme elle se rencontre: pource aussi qu'il est aéré: que les logemens y sont mieux compartis: qu'on en esloigne plus facilement les choses qui peuvent engendrer le mauvais air; & qu'en effet vne armée campée & retranchée, subsistera plustost trois mois saine dans vn camp, que quinze iours dans les meilleurs villages. D'où ie conclus qu'vne des parties des plus necessaires à la guerre, est de sçauoir bien camper & se retrancher.



Des Batailles.

CHAPITRE VII.



E toutes les actions de la guerre la plus glorieuse & la plus importante, est de donner bataille. Le gain d'vne ou de deux acquiert ou bouleuerse les Empires entiers. Anciennement

toutes guerres se decidoient par les batailles, ce qui cauſoit les conqueſtes ſi promptes. Maintenant on fait la guerre plus en Renard, qu'en Lion; & elle eſt pluſtoſt fondée ſur les ſieges, que ſur les combats. Neantmoins il y a encor aujour d'huy diuerſes Nations qui decident la plus part de leurs guerres par batailles; comme les Turcs & les Perſes; & meſme parmy les Chreſtiens nous auons veu depuis peu donner diuerſes batailles en Allemagne; dont vne ſeule auoit comme aſſeruy tous les Princes Proteſtans. Et vne armée bien diſciplinée, & qui ne craint point la bataille; a vn merueilleux auantage en tous ſes deſſeins contre celle qui la craint. C'eſt pourquoy encor que la maniere de guerre d'aujourd'huy ne ſoit point ſi frequente à hazarder les batailles, que par le paſſé; il ne faut pas pourtant en négliger la ſcience. Et vn General d'armée ne ſe peut dire bon Capitaine, qu'il ne ſçache tous les auantages qu'en vn iour de bataille on peut prendre; & tous les deſauantages qu'on doit euitier; afin de ſ'en bien démeſſer. Je ne parleray de la pouſſiere, du Soleil ny de la pluye; dont on remarque que pluſieurs Capitaines ſe ſont ſeruis, la mettant au nez de leurs en-

nemis en prenant le dessus du vent ; pource que ce sont choses casuelles qui peuvent changer en vn moment , & qui par consequent viennent plustost par hazard que par dessein, mais de choses plus solides.

Donc celuy qui veut donner bataille doit regarder à sept choses principales. La premiere, de ne se laisser iamais forcer au combat contre sa volonté. La seconde, de choisir vn champ de bataille propre pour la qualité & le nombre des gens de guerre qu'il aura. Car s'il craint d'estre enclos par le grand nombre, il doit couvrir ses flancs, ou pour le moins l'un d'iceux de la nature du lieu ; comme d'une riuere , d'un bois , & autre chose equipolente : & s'il est foible de Caualerie , il doit fuir les plaines , comme les lieux estroits , s'il y est le plus fort. La troisieme de ranger son armée en bataille, en sorte que selon la qualité des soldats , elle soit dans son auantage , couurant sa Caualerie par son Infanterie s'il en est plus foible ; & si c'est le contraire , son Infanterie par sa Caualerie : disposer tous les gens de guerre en tel ordre, qu'ils puissent combattre diuerses fois auant qu'estre entierement deffaits. Car si nous obseruons bien aux petites troupes de

gens de guerre, de ne les faire combattre tout à la fois ; & si nous croyons que cent chevaux en deux troupes , en doiuent battre deux cens, tous en vne ; & si nous auons remarqué en nos iours , que diuerses batailles se sont gagnées par celuy, qui auoit fait vne troupe de reserve, qui n'alloit au combat qu'apres que toutes les autres auoient combattu ; Combien plus grand effet fera vn second ordre de bataille , qui viendra à la charge apres que toute l'armée ennemie aura combattu contre le premier ordre , & encore plus vne troisieme à l'imitation des Romains , si les deux premiers sont deffaits ? C'est vne maxime que toute troupe , quelque grosse qu'elle soit, si elle a combatu, elle est en tel desordre, que la moindre qui suruiuent est capable de la deffaire absolument. Tellement que le Chef d'armée qui peut conseruer le dernier quelques troupes sans auoir combatu , doit avec icelle emporter la victoire : estant vne chose longue & difficile, de vouloir remettre en bon ordre vne armée qui a combatu , pour combattre denouveau ; les vns s'amusans au pillage, les autres se faschans de retourner au peril , & tous ensemble estans tellement esmeuz , qu'ils n'entendent ou ne veulent

entendre nul commandement. Au contraire ceux qui n'ont pas encore combattu, sont dans l'obeïssance, & prests à faire tout ce que leur Chef leur commande. C'est pourquoy la science du General d'armée n'est tant à r'allier des troupes en desordre & esperduës ; (qui n'est proprement qu'une action de courage,) comme à faire combattre ses troupes bien à propos ; les vnes apres les autres, & non toutes à la fois. Car il doit considerer qu'il ne peut estre bien obey de ses gens, que iusques à l'heure qu'il les enuoye au combat. Apres cela toutes les harangues du monde ne les arrestent pas, quand ils fuyent ; mais si fait bien une troupe en bon ordre. La quatriesme, d'auoir plusieurs bon Chefs, estant impossible qu'un Chef general puisse suffire par tout. Apres auoir bien choisi son champ de bataille, & mis en bon ordre son armée, il luy est du tout impossible quand on vient au combat, de pouuoir donner ordre que du costé où il est. Tellement que s'il n'est bien assisté par tout, tant dans la Cautérie que dans l'Infanterie, quand il feroit des merueilles où il se trouue ; il ne peut respondre de l'ignorance des Chefs qui commandent les autres endroits de son armée. Il faut

faut donc au moins cinq principaux Chefs pour bien faire combattre vne armée; à sçauoir trois pour les trois corps d'Infanterie, distinguez par auant-garde, bataille, & arriere-garde; & deux pour la Caualerie qui est aux deux ailles. La cinquiesme, d'observer en vostre ordre de bataille si bien vos distances, que les premieres troupes estans renuersées, ne se iettent pas sur celles qui les doiuent soustenir, ny les secondes sur les troisiemes. La sixiesme, de mettre les plus vaillants soldats aux ailles de l'armée, & commencer la bataille par le costé où vous vous sentez le plus fort. Car si vne fois vous rompez vne des ailles des ennemis, vous le prenez en flanc & en queue, & est impossible qu'il vous puisse resister. La septiesme & derniere est de ne permettre la poursuite ny le pillage, iusques à ce que l'ennemy soit rompu de tous costez; & encor qu'il soit bon de poursuiure chaudement, il faut pourtant auoir tousiours des troupes en ordre qui ne se débloquent point, afin d'euitier tous inconueniens. Je ne parleray point des auantages qui se peuuent rencontrer dans vn champ de bataille, desquels vn bon Capitaine se sert bien souuent avec grande vtilité; pource qu'il ne s'en peut

donner aucune regle certaine , à cause que la diuersité des situations est telle , qu'il ne s'en trouuera iamais deux toutes semblables.



Des Fortereſſes.

CHAPITRE VIII.



R pource que le gain & la perte des batailles traifne apres ſoy de telles conſequences , qu'elle donne ou oſte les Empires tous entiers ; on ſ'eſt reſolu d'oppoſer des places fortes aux Conquerans , pour arreſter avec peu de gens leur premiere furie , & ruiner leurs armées. Mais l'inuention du canon eſtant venue , il a fallu changer la maniere des fortifications ; & meſme à cauſe de l'inuention des petards , on a eſté contraint d'aſſeurer les portes des villes par herſes , palliſſades , ponts-leuis , & autres artifices ; pource qu'il n'y auoit place , tant forte

fust-elle ; qui ne courust fortune d'estre prise par cette nouuelle inuention. Donc les meilleures forteresses contre le canon, sont celles qui se font de terre ; pource que quand elles ont l'espaisseur necessaire pour y resister, elles ne sont sujettes à endommager les assiegez, comme sont les fortifications faites de murailles, dont les esclats les desesperent. Neantmoins quand vn Prince peut faire la despence de les reuestir iusques au cordon, laissant dessus le parapet de terre à preuue de canon, la besogne en est de plus de durée.

L'on doit obseruer aux forteresses quatre choses principales ; à sçauoir, que la ligne de deffense ne soit que de la portée du mousquet : que l'angle flanqué ne soit ouuert de plus de nonante degrez, ny serré de plus de soixante : que la gorge du bastion ne soit trop estroite, & que le flanc soit le plus grand qu'on pourra. Et ces quatre maximes generales doiuent estre tellement proportionnées entr'elles, que pour en faire vne tres-bonne, on ne destruisse les autres. Il faut aussi éuiter au corps principal de la fortification les renailles ; si ce n'est que l'affiette soit si petite, qu'elle ne vous permette de pouuoir faire de

bons flancs : Car l'angle r'entrant d'une fortification esleuée comme elle doit estre, ne peut estre deffendu par aucun flanc, & on s'y peut loger au pied sans estre offensé que de coups de pierres. C'est pourquoy on ne se sert des remises qu'aux contr'escarpes. Les fossez se proportionnent d'ordinaire selon le terrain nécessaire pour faire les fortifications, & ceux qui sont pleins d'eau, sont meilleurs pour empêcher une surprise; mais les secs se deffendent mieux contre une attaque. Leur largeur doit estre proportionnée; car quand elle est trop grande, elle esloigne trop les ouvrages de dehors, de la deffense de la principale fortification; mais la profondeur ne gasta jamais fossez. Les fausses-brayes s'attachent au corps de la fortification. C'est une nouvelle inuention & excellente, pour empêcher qu'on n'aborde les bastions avec des galeries. La contr'escarpe, demy-lunes, ravelins, & cornes sont au delà du grand fossé. Tous les ouvrages de dehors doiuent, s'il est possible, estre dominez par le corps de la fortification. Voila en gros les principales observations qui se font aux fortifications, en un lieu plein & abordable. Le reste de-

pend du iugement de l'Ingenieur, qui se doit seruir vtilement de la situation du lieu qu'il fortifie : ou en prenant ce qui luy est aduantageux, ou en esquiuant ce qui luy est nuisible. I'adiouste encore, qu'il y a des assiettes si fauorables, que la nature les deffend d'elle mesme, & les rend plus inexpugnables que tout l'art du monde; comme vne roche inaccessible, vn marretz ou vn lac. Mais chaque chose a son incommodité. Rarement telles assiettes se rencontrent aux lieux de frontiere : ou sur quelque passage important : ou capables de contenir vne garnison assez forte pour donner ialousie à l'ennemy qui veut entrer dans vn païs : ou bien se trouuent si faciles à bloquer, que cinq cens hommes dehors, en assiegeront cinq cens dedans. Ceux qui voudront sçauoir le détail des fortifications, le trouueront dedans vne infinité de liures où elles sont descrites, & encor mieux dans l'exercice de la guerre, où tous les iours l'experience y fait aiouster quelque chose.



De la Deffense contre les Surprises.

CHAPITRE IX.



PRES avoir parlé des forteresses, il faut venir à la maniere de les garder, & de ne les laisser surprendre. C'est vne chose certaine qu'on taschera tousiours de les prendre plustost par surprises, que par viue force; pource qu'on y gagne la despense & le temps. Mais à cause que les surprises sont fondées sur les deffauts qui se trouuent en la place ou en la garde d'icelle; ie commenceray à ce qu'il faut observer pour se deffendre contre de telles surprises.

Le Capitaine qui aura vne place à garder, doit pouruoir à six choses principales, & dont toutes les autres dependent; à sçauoir de mettre les murailles hors d'escalade, les portes hors de petard, le chemin des rondes facile à faire, les sentinelles bien posées,

la garde bien exacte, & empescher l'intelligence & trahison. Pour les cinq premieres, le chemin y est battu, les liures en sont pleins d'enseignemens, & y en a aujourdhuy tant d'ordonnances de Princes par escrit & en vſage; qu'il faut eſtre bien negligent, ſi on n'y pouruoit bien. Mais pour la derniere, les regles ne s'en peuuent donner ſi facilement. La trahison ſe commet par les bourgeois ou par les ſoldats: le meſlange des vns & des autres, ſoit aux gardes, ſoit aux rondes, ou bien aux patrouilles, peut y apporter vn grand empeschement: comme auſſi de tirer au ſort toutes les fonctions de la garde, d'en faire vne par le dehors de la place, & d'auoir des eſpions parmy les ennemis. Faut redoubler la garde aux iours de foire & de marche durant la recolte, & ſur tout en vandange, pource qu'on eſpie volontiers ces temps-là pour former vn deſſein. Faut obſeruer d'eſtre en armes quand on ouure & ferme les portes, & en quelque temps de paix que ce puiſſe eſtre, ne faut iamais relacher la garde en aucune de ſes parties. Il y a encor vn moyen d'euitier les intelligences; à ſçauoir, de former ſoy meſme les entrepriſes doubles, feignant de meconter vn Officier, ou vn ſimple ſoldat, ou vn habi-

tant, qui s'allant rendre à l'ennemy luy
fasse entreprendre vn dessein vray-sembla-
blement facile. Car outre le profit qu'on re-
tire d'y attraper les plus hardis, vous en ti-
rez encor cet auantage, que vostre ennemy
ne songe à aucun autre tandis qu'il espere en
cettuy-là; pource qu'on entreprend tou-
jours ce qu'on croit deuoir reüssir plus as-
sürément. Ce qui fait voir combien sont
douteuses les entreprises qui se font par in-
telligence, soit à cause qu'elles peuuent es-
tre doubles, ou bien par le deffaut des trai-
stres, qui sur le point de l'exécution per-
dront courage, & descouriront tout, ou
par leurs indiscretions, en ne tenant leurs
negociations secretes. C'est pourquoy aux
entreprises par intelligence, il faut que tant
le deffendant, que l'attaquant, soient tres-
suspçonneux, & fort diligens à remarquer
les paroles, actions & gestes de ceux qui
promettent de vous seruir, en trahissant leur
party, & n'obinettre aucunes precautions
pour vous assurer de leurs personnes; afin
qu'ils ne puissent vous attraper: les ostages
des femmes & enfans n'estans tousiours suf-
fisans, (ainsi que remarque Mont-luc à
l'entreprise sur Barges,) pource qu'il se
trouue des traistres si resolus, qu'ils hazar-
dent

dent tout pour venir à bout de leurs desseins, & croient retirer leurs gages par les prisonniers qu'ils presupposent de faire.

Reste à dire vn mot des alarmes. On en peut vser en deux manieres. La premiere & plus ordinaire, est de se ranger à la place d'armes où se doit trouuer le Gouverneur, pour de là aller où la necessité le requerra. La seconde, que chaque compagnie se range à son drapeau, & de là aille trouuer son escoüade qui est en garde. Si la garnison est foible, l'escalade facile, & le lieu grand; cette derniere façon de se porter à l'alarme est la meilleure, pource qu'on va plus promptement à la deffense des murailles. Mais en ce cas il ne faut auoir aucune deffiance des Habitans.



Des Attaques par Surprises.

CHAPITRE X.



Es entreprises de places se font en diuerſes manieres, ou par petards, ou par eſcalades, ou par des trous aux murailles, ou par ſauciſſes, ou par telles autres inuentions, qu'on cherche tous les iours d'augmenter, à meſure que l'on remedie à celles qui ſont trouuées. Mais pour les faire bien reüſſir, l'on doit eſtre tres-ſoigneux de trois choſes; à ſçauoir de la reconnoiſſance, de la conduite, & de l'exécution. Car par le manquement de l'une d'icelles, nous voyons toutes les entreprises ſe faillir; ſoit pour eſtre préuenü par le iour, ou bien pour eſtre decouuert de trop bonne heure, ou pour manquer de quelque petard ou eſchelle, ou en l'exécution pour ſ'y engendrer du deſordre. Pour la premiere qui eſt la reconnoiſ-

sance, faut que ceux qui y sont employez s'informent exactement de la forme de la garnison, & du nombre des bourgeois, & de leurs affections; qu'ils remarquent aux portes, si pour y aller, il y a pont dormant; s'il est de pierre ou de bois, & en cas qu'il soit de bois, prendre garde si on n'en oste point la nuit les planches; si ce pont dormant n'a point de garde-fous. Faut remarquer si le fossé est profond & large, & si en descendant commodément dans le fossé on pourroit éuiter les pont-leuis, que l'on fait ordinairement sur les ponts dormans; ou si par le bénéfice du fossé on pourroit petarder la porte ou le pont-leuis de la place, sans fleches, ou pont roulant. Faut bien reconnoistre tous les empeschemens qui peuuent estre deuant le pont dormant; soit portes, barrieres, pallissades, ou bacules, y ayant d'ordinaire vn ravelin. Et si on fait corps de garde la nuit au dehors ou dessus le pont dormant; faut prendre garde combien de portes, ponts, barrieres, palissades, bacules, trebuchets, grilles, herfes, orgues, chaisnes & autres empeschemens il y a depuis la campagne iusques dans la ville, & comme toutes ces choses se ferment. Faut remarquer combien de pas

de distance il peut y auoir d'une piece à l'autre, & à peu près la longueur, largeur & espaisseur de toutes ces choses, & en quels endroits elles se trouuent : s'il y a des machecoulis sur la porte, ou des trous dans la vou-
te : combien il y a de corps de garde, & en quels lieux ils sont, & comme quoy situez : si l'entrée est droite, ou en destour : recon-
noistre le lieu des flancs, s'ils sont à costé, ou par deuant, ou par derriere, ou en haut ou en bas : s'ils y tiennent du canon, & combien, & s'ils ne sont que pour des mousquetaires ; quel nombre il s'y en peut loger, & en quelle distance ils flanquent la porte. Reconnoistre le chemin qu'on veut tenir depuis la ville d'où on part, jusques à celle qu'on attaque. Remar-
quer vn lieu propre à demie lieuë d'icelle pour mettre pied à terre, distribuer les petards, & autres instrumens. Faut enco-
re reconnoistre les places & ruës dans la ville qu'on doit saisir, tous les Corps de garde qu'il faudra forcer, & bien conside-
rer l'estat des gens, & des choses necessai-
res pour surmonter tous les obstacles que l'on trouuera. Si c'est pour donner l'escalade, il faut bien reconnoistre les auenuës, la contr'escarpe, & le fossé ; pour sça-

voir si on y peut arriuer à couuert , entrer & sortir facilement du fossé , sur tout à l'endroit du lieu où on veut poser l'escalade , ou proche de là. Car si apres estre entré dans le fossé , il faut aller long temps autour de la place , l'entreprise s'en rend beaucoup plus perilleuse & difficile. Il faut sçauoir si le fossé est sec , ou gelé , ou avec eau peu profonde, sans bouë , & facile à passer : si la muraille est basse , ou foible, qu'on la puisse aisément escheler ou trouier, ou s'il y a quelque trou ou égoust , ou autres entrées ou sorties d'eau mal gardées, & foibles. Faut iuger de la hauteur que doiuent auoir les eschelles , & prendre garde comme elles peuuent asseoir le pied , & s'il y a escarpe ou non : si le lieu où on veut donner , est esloigné de gardes ou de sentinelles : si le lieu de l'escalade est capable d'y dresser beaucoup d'eschelles , & entrer force gens à la fois ; comme aussi estant fort estroit , faut voir si les premiers estans entrez , ils peuuent s'accommoder sur le rempart , pour subsister tandis queles autres monteront. Faut encore reconnoistre les distances de la muraille pour entrer dans la ville , & pour aller attaquer le Corps de garde.

eus , & aux Chefs de chaque cinquaine on donnoit vn memoire , lequel contenoit le lieu où ils deuoient aller , & les iournées qu'ils deuoient faire , afin que les brigades ne se rencontraissent point. Le premier rendez vousestoit à vne Cassine ou Metairie sur les confins du Milannois, où Ludo- uic Birague s'estoit rendu quelques iours au- parauant fort secrettement & en habit des- guisé , pour donner l'ordre necessaire à la conduite de ce dessein. La maniere de se rendre à la Metairie estoit, qu'au sortir de la vallée Camonica ou Bergamasque ; la premiere cinquaine ou brigade, & demain en main toutes les autres , trouuoit vn Paï- san avec vn chapeau de paille avec deux plumes de faisan , & auquel celuy qui commandoit deuoit demander , *ò buon com- pagno, voi tû vendermy quella capelina*, à quoy il deuoit respondre , *Messer no , ne ho bi- sogno per mè*. C'estoit le mot du guet , le- quel ainsi reconnu , le Chef sans plus dire mot suiuoit le Païsan , qui le conduisoit a- uec sa brigade à la Metairie où estoit Lu- douic Birague. De cette façon passerent les six vingts soldats du Marechal de Brissac fort secrettement iusques là. De cette Me- tairie , il falloit gagner la maison d'yn Sien-

nois proche de Milan (qui estoit celuy qui auoit formé le dessein.) Pour cét effet ils passoient comme dessus , cinq à cinq : & apres auoir passé la riuere d'Adde au port de Vaure , ils auoient mesuré le temps d'arriuer vers la nuit au pont de Nauilio de Milan , proche du Monastere des Anges , sur lequel pont estans arriuez ; le Chef de la brigade branloit vne sonnette , au son de laquelle luy estoit respondu par vne semblable , & aussi-tost sortoit de dessous le pont, le Siennois autheur de ce dessein qui conduisoit la brigade chez luy , & continua toutes les nuits de cette façon , iusques à ce que la troupe entiere eust passé ; qui est vne chose remarquable d'auoir fait couler de Piedmont six vingts soldats iusques aux portes de Milá sans estre descouverts , & sans que iusques là nuls, hormis Saluaïson , & Pierre Marie de Recuperat sceussent où on alloit, ny où on estoit. Quant à la conduite en gros , qui est la plus ordinaire , il faut mesurer la longueur du chemin , iusques au lieu sur lequel on a dessein , avec le temps qu'il faut employer pour arriuer à point nommé à l'exécution ; à quoy on se trompe souuent , pource qu'il arriue d'ordinaire des cas impreueus qui allongent le temps. De façon
que

que quelques mesures que vous preniez sans vne grande experience en tels voyages, vous trouuez ordinairement le temps trop court, sur tout si vous auez à conduire vne grosse troupe. Car pour faire filer la nuit deux mille hommes, les haltes qu'il conuient faire à la teste pour attendre la queue, & ceux qu'un chemin estroit ou fangeux, ou couppe d'un ruisseau vous obligent de faire, sont tels, & vous font perdre tant de temps, que si vous n'estes fort diligens à faire marcher, & que vous n'ayez fait reconnoistre le chemin, & pourueu à toutes ces choses, vous trouuez que vous n'avez pas du temps à demy. Je n'y adiouste point les grandes pluyes & gelées, qui sont par fois si inopinées, & extraordinaires, que quelque preuoyance que vous ayez apporté au reste, il est impossible de les surmonter. Apres auoir adiouste le temps aucc le chemin, il faut se pouruoir de bons guides, & en auoir le plus qu'on pourra: puis former vostre ordre auant le partement, comme il doit estre à l'exécution, & bailler par escrit à chacun le commandement de ce qu'il doit faire, & en tenir registre. Car si vous le remettez à faire au lieu où on met pied à

terre, & où on accommode tout l'équipage (qui est d'ordinaire à demy lieuë de la place) la nuit incommode en telles choses, le lieu qui peut - estre ne sera spacieux ny commode pour faire l'ordre, les contentions qui peuuent suruenir, sur la ialousie d'honneur entre les gens de guerre, & diuers autres accidens impreueus qui naissent, sont capables de faire faillir le dessein. Ces choses estant resoluës dès le partir, & n'y ayant plus rien à changer à l'ordre; il est tout certain que c'est le moyen d'éuiter tels obstacles. L'adiouste que si c'est d'une ville d'où l'on parte, faut tenir les portes fermées long temps deuant, & apres, & faire sortir les troupes de iour, afin qu'on empesche que peronnene sorte, que ceux del'entreprise. Et vaudroit mieux puis apres faire faire alte aux troupes au delà de la porte, ou en quelque lieu proche à couuert. Quant à l'ordre, il faut faire passer quelque Caualerie toute la premiere, dont les coureurs ayent charge de s'auancer assez loin, & d'arrester toutes sortes de personnes en quelque part qu'elles aillent, afin d'empescher qu'on ne donne aduis à la ville qu'on veut attaquer. Sur tout s'il y a quelque pont ou passage par où ineuitablement il

faillie passer, il faut le gagner. Apres doiuent suiure cinquante mousquetaires, puis l'attirail, les petards ou eschelles, & en suite les gens qui sont choisis pour les porter, lesquels doiuent estre triples pour se soulager les vns les autres, & pour se substituer les vns aux autres en cas de blesseure, ou de mort. Et faut que ce soient gens d'execution, & les plus hardis & entreprenans de la troupe. Car de ces premiers dépend d'ordinaire le bon ou mauuais succez. Faut aussi porter double équipage de petards, pource que tous ne font l'effet qu'on se propose, & souuent faute d'un petard se font de belles entreprises faillies à faire: il en est de mesme des eschelles, lesquelles souuent sont rompuës par les ennemis, ou se rompent pour estre trop chargées. En suite il ne faut faire aucune troupe de plus de cinquante soldats; à sçauoir, cinquante mousquetaires, puis cinquante piquiers, & ainsi consecutiuement. Car il faut considerer que les premiers combats sont dans les ruës estroites, & la nuit. De façon que les grosses troupes n'apportent que du desordre. Et si l'on trouue des lieux plus larges que l'ordre qu'on a formé, faudra ioindre deux



Des Attaques par Surprises.

CHAPITRE X.



Les entreprises de places se font en diuerſes manieres, ou par petards, ou par eſcalades, ou par des trous aux murailles, ou par ſauciſſes, ou par telles autres inuentions, qu'on cherche tous les iours d'augmenter, à meſure que l'on remedie à celles qui ſont trouuées. Mais pour les faire bien reüſſir, l'on doit eſtre tres-ſoigneux de trois choſes; à ſçauoir de la reconnoiſſance, de la conduite, & de l'exécution. Car par le manquement de l'une d'icelles, nous voyons toutes les entreprises ſe faillir; ſoit pour eſtre préuenü par le iour, ou bien pour eſtre decouuert de trop bonne heure, ou pour manquer de quelque petard ou eſchelle, ou en l'exécution pour s'y engendrer du deſordre. Pour la premiere qui eſt la reconnoiſ-

sance, faut que ceux qui y sont employez s'informent exactement de la forme de la garnison, & du nombre des bourgeois, & de leurs affections : qu'ils remarquent aux portes, si pour y aller, il y a pont dormant; s'il est de pierre ou de bois, & en cas qu'il soit de bois, prendre garde si on n'en oste point la nuit les planches : si ce pont dormant n'a point de garde-fous. Faut remarquer si le fossé est profond & large, & si en descendant commodément dans le fossé on pourroit éuiter les pont-leuis, que l'on fait ordinairement sur les ponts dormans; ou si par le bénéfice du fossé on pourroit petarder la porte ou le pont-leuis de la place, sans fleches, ou pont roulant. Faut bien reconnoistre tous les empeschemens qui peuuent estre deuant le pont dormant; soit portes, barrières, pallissades, ou bacules, y ayant d'ordinaire vn ravelin. Et si on fait corps de garde la nuit au dehors ou dessus le pont dormant; faut prendre garde combien de portes, ponts, barrières, pallissades, bacules, tresbuchets, grilles, herfes, orgues, chaisnes & autres empeschemens il y a depuis la campagne iusques dans la ville, & comme toutes ces choses se ferment. Faut remarquer combien de pas

de distance il peut y auoir d'une piece à l'autre, & à peu près la longueur, largeur & espaisseur de toutes ces choses, & en quels endroits elles se trouuent : s'il y a des machecoulis sur la porte, ou des trous dans la vouute : combien il y a de corps de garde, & en quels lieux ils sont, & comme quoy situez : si l'entrée, est droite, ou en destour : reconnoistre le lieu des flancs, s'ils sont à costé, ou par deuant, ou par derriere, ou en haut ou en bas : s'ils y tiennent du canon, & combien, & s'ils ne sont que pour des mousquetaires ; quel nombre il s'y en peut loger, & en quelle distance ils flanquent la porte. Reconnoistre le chemin qu'on veut tenir depuis la ville d'où on part, jusques à celle qu'on attaque. Remarquer un lieu propre à demie lieuë d'icelle pour mettre pied à terre, distribuer les petards, & autres instrumens. Faut encore reconnoistre les places & rues dans la ville qu'on doit saisir, tous les Corps de garde qu'il faudra forcer, & bien considerer l'estat des gens, & des choses necessaires pour surmonter tous les obstacles que l'on trouuera. Si c'est pour donner l'escalade, il faut bien reconnoistre les auenuës, la contr'escarpe, & le fossé ; pour sça-

voir si on y peut arriuer à couuert , entrer & sortir facilement du fossé , sur tout à l'endroit du lieu où on veut poser l'escalade , ou proche de là. Car si apres estre entré dans le fossé , il faut aller long temps autour de la place , l'entreprise s'en rend beaucoup plus perilleuse & difficile. Il faut sçauoir si le fossé est sec , ou gelé , ou avec eau peu profonde , sans boüe , & facile à passer : si la muraille est basse , ou foible , qu'on la puisse aisément escheler ou troüer , ou s'il y a quelque trou ou égoust , ou autres entrées ou sorties d'eau mal gardées , & foibles. Faut iuger de la hauteur que doiuent auoir les eschelles , & prendre garde comme elles peuuent asseoir le pied , & s'il y a escarpe ou non : si le lieu où on veut donner , est esloigné de gardes ou de sentinelles : si le lieu de l'escalade est capable d'y dresser beaucoup d'eschelles , & entrer force gens à la fois ; comme aussi estant fort estroit , faut voir si les premiers estans entrez , ils peuuent s'accommoder sur le rempart , pour subsister tandis queles autres monteront. Faut encore reconnoistre les distances de la muraille pour entrer dans la ville , & pour aller attaquer le Corps de garde.

eus , & aux Chefs de chaque cinquaine on donnoit vn memoire , lequel contenoit le lieu où ils deuoient aller , & les iournées qu'ils deuoient faire , afin que les brigades ne se rencontraissent point. Le premier rendez vousestoit à vne Cassine ou Metairie sur les confins du Milannois , où Ludo-
uic Birague s'estoit rendu quelques iours auparavant fort secrettement & en habit desguisé ; pour donner l'ordre necessaire à la conduite de ce dessein. La maniere de se rendre à la Metairie estoit , qu'au sortir de la vallée Camonica ou Bergamasque ; la premiere cinquaine ou brigade , & de main en main toutes les autres , trouuoit vn Paï-
san avec vn chapeau de paille avec deux plumes de faisan , & auquel celuy qui commandoit deuoit demander , *ò buon compagno, voi tù vendermy quella capelina* , à quoy il deuoit respondre , *Messer no , ne ho bisogno per mè*. C'estoit le mot du guet , lequel ainsi reconnu , le Chef sans plus dire mot sui-uoit le Païsan , qui le conduisoit avec sa brigade à la Metairie où estoit Ludo-
uic Birague. De cette façon passerent les six vingts soldats du Marechal de Bris-
sac fort secrettement iusques là. De cette Metairie , il falloit gagner la maison d'yn Sien-

nois proche de Milan (qui estoit celuy qui auoit formé le dessein.) Pour cét effet ils passoient comme dessus , cinq à cinq : & apres auoir passé la riuere d'Addé au port de Vaure , ils auoient mesuré le temps d'arriuer vers la nuit au pont de Nauilio de Milan , proche du Monastere des Anges , sur lequel pont estans arriuez ; le Chef de la brigade branloit vne sonnette , au son de laquelle luy estoit respondu par vne semblable , & aussi-tost sortoit de dessous le pont, le Siennois auteur de ce dessein qui conduisoit la brigade chez luy , & continua toutes les nuits de cette façon , iusques à ce que la troupe entiere eust passé ; qui est vne chose remarquable d'auoir fait couler de Piedmont six vingts soldats iusques aux portes de Milá sans estre descouverts , & sans que iusques là nuls, hormis Saluaïson , & Pierre Marie de Recuperat sceussent où on alloit, ny où on estoit. Quant à la conduite en gros , qui est la plus ordinaire , il faut mesurer la longueur du chemin , iusques au lieu sur lequel on a dessein , avec le temps qu'il faut employer pour arriuer à point nommé à l'exécution ; à quoy on se trompe souuent , pource qu'il arriue d'ordinaire des cas impreueus qui allongent le temps. De façon
que

que quelques mesures que vous preniez sans vne grande experience en tels voyages, vous trouuez ordinairement le temps trop court, sur tout si vous auez à conduire vne grosse troupe. Car pour faire filer la nuit deux mille hommes, les haltes qu'il conuient faire à la teste pour attendre la queue, & ceux qu'un chemin estroit ou fangeux, ou couppe d'un ruisseau vous obligent de faire, sont tels, & vous font perdre tant de temps, que si vous n'estes fort diligens à faire marcher, & que vous n'ayez fait reconnoistre le chemin, & pourueu à toutes ces choses, vous trouuerez que vous n'auyez pas du temps à demy. Je n'y adiouste point les grandes pluies, & gelées, qui sont par fois si inopinées, & extraordinaires, que quelque preuoyance que vous ayez apporté au reste, il est impossible de les surmonter. Apres auoir adiouste le temps avec le chemin, il faut se pouruoir de bons guides, & en auoir le plus qu'on pourra: puis former vostre ordre auant le partement, comme il doit estre à l'exécution, & bailler par escrit à chacun le commandement de ce qu'il doit faire, & en tenir registre. Car si vous le remettez à faire au lieu où on met pied à

terre, & où on accommode tout l'équipage (qui est d'ordinaire à demy lieuë de la place) la nuit incommode en telles choses, le lieu qui peut - estre ne sera spacieux ny commode pour faire l'ordre, les contentions qui peuuent suruenir, sur la ialousie d'honneur entre les gens de guerre, & diuers autres accidens impreueus qui naissent, sont capables de faire faillir le dessein. Ces choses estant resoluës dès le partir, & n'y ayant plus rien à changer à l'ordre; il est tout certain que c'est le moyen d'éuiter tels obstacles. L'adiouste que si c'est d'une ville d'où l'on parte, faut tenir les portes fermées long temps deuant, & apres, & faire sortir les troupes de iour, afin qu'on empesche que personne ne sorte, que ceux del'entreprise. Et vaudroit mieux puis apres faire faire alte aux troupes au delà de la porte, ou en quelque lieu proche à couuert. Quant à l'ordre, il faut faire passer quelque Caualerie toute la premiere, dont les coureurs ayent charge de s'auancer assez loin, & d'arrester toutes sortes de personnes en quelque part qu'elles aillent, afin d'empescher qu'on ne donne aduis à la ville qu'on veut attaquer. Sur tout s'il y a quelque pont ou passage par où inéuitablement il

faillie passer, il faut le gagner. Apres doiuent suiure cinquante mousquetaires, puis l'attirail, les petards ou eschelles, & en suite les gens qui sont choisis pour les porter, lesquels doiuent estre triples pour se soulager les vns les autres, & pour se substituer les vns aux autres en cas de blesseure, ou de mort. Et faut que ce soient gens d'execution, & les plus hardis & entreprenans de la troupe. Car de ces premiers dépend d'ordinaire le bon ou mauuais succez. Faut aussi porter double équipage de petards, pource que tous ne font l'effet qu'on se propose, & souuent faute d'un petard se font de belles entreprises faillies à faire: il en est de mesme des eschelles, lesquelles souuent sont rompuës par les ennemis, ou se rompent pour estre trop chargées. En suite il ne faut faire aucune troupe de plus de cinquante soldats; à sçauoir, cinquante mousquetaires, puis cinquante piquiers, & ainsi consecutiue-ment. Car il faut considerer que les premiers combats sont dans les ruës estroites, & la nuit. De façon que les grosses troupes n'apportent que du desordre. Et si l'on trouue des lieux plus larges que l'ordre qu'on a formé, faudra ioindre deux

troupes ensemble, afin d'occuper toute la largeur de la rue. Faut que chaque troupe ait des Officiers deuant & derriere, & les Sergens aux costez pour les tenir en deuoir, & les empescher de s'écarter, ou se ietter au pillage. Faut encores remarquer en l'ordre qu'on fait partant du logis; que si l'on fait diuerses attaques, il faut que les Chefs, les soldats, & l'équipage soient distingués en autant de troupes qu'on fera d'attaques, & qu'elles marchent selon l'ordre qu'elles doiuent attaquer. A toutes entreprises, sur tout à celles où la retraite est dangereuse & longue, il faut faire plus d'estat des bons hommes, que de la quantité. Car vne petite troupe peut partir de plus loin: marcher plus secrettement, & se retirer avec moins de peril & de confusion qu'une grosse troupe. De plus, vne petite troupe avec force gens de commandement, est en l'exécution plus obeissante, & engendre moins de desordre qu'une grosse troupe. J'ajouste qu'aux entreprises de nuit, avec vne petite troupe, vous effrayez autant les ennemis qu'avec vne grosse. Car c'est vne maxime, que ceux qui sont surpris & attaquez combattent en crainte, presupposant tousiours qu'on les attaque avec for-

ces suffisantes. Bref si vous vainquez avec vne petite troupe, vous en auez plus de gloire qu'avec vne grosse, qui bien souvent vous embarasse, & au combat, & au marcher, & à la retraite : & si vous estes battu vous en auez moins de honte.

Quant à la troisieme qui est l'execution, tout l'ordre s'en doit donner par escrit, afin que nul de ceux qui ont quelque commandement à l'entreprise, ne se puisse excuser d'auoir mal entendu. Si c'est par escalade, il faut deux hommes pour porter chaque piece d'eschelle; & pource qu'il est comme impossible d'executer vn lieu, où il faille plus de cinq pieces d'eschelles de hauteur; il suffit de dix hommes pour chaque eschelle, & vn homme pour les commander. Les hommes de chaque eschelle doiuent estre marquez dans vn rolle par leurs noms, surnoms, & de quelle compagnie ils sont: leur faut commander sur peine de la vie de rapporter leurs eschelles, si on ne peut prendre la place. Car voyant le peril & la peine de les rapporter, ils aymeront mieux faire leur effort d'y entrer. Plus, faut commander dix autres hommes, pour entrer apres les dix premiers qui auront vn Chef à la teste, & l'autre à la queue, pour prendre

garde qu'on monte sans perdre temps, & sans trop se haster. Car autrement on charge tant les eschelles qu'elles rompent : puis en faut encores mettre d'autres dixaines commandées & separées comme les premiers. Et chaque dixaine doit sçauoir par quelle eschelle elle doit monter, & en quel rang, afin que tout se fasse sans confusion. La premiere dixaine qui suit son eschelle, en doit porter vne autre, encor qu'elle n'ait pas l'ordre de la dresser ; afin que si quelque piece de la premiere rompoit, on en puisse remettre vne autre. Si c'est par petard, le petardier appellera celui qui doit apporter le Madrier : apres on appellera trois pour le petard, deux pour le porter, & le troisieme pour les assister en cas de besoin, & si le Madrier est attaché au petard, les quatre se soulageront de deux en deux. Et les deux qui ne porteront le petard avec son Madrier, auront chacun vn grand marteau de Marechal. Apres ces quatre, le Petardier en appellera deux, portans chacun vne grande hache : puis vn autre qui portera vn pied de cheure : puis vn autre qui portera vne lanterne sourde : puis vn autre avec trois ou quatre bouts de mesche allumée : outre lesquels il faut ce-

luy qui leur commande, lequel portera vn tire-fonds ou de bons clouds & vne masse. De façon que pour bien seruir chaque petard il faut dix hommes. Cette file de dix pour le premier petard, sera conduite par quelque braue Sergent, qui aura par escrit le nom de chacun de sa file, & sçaura aussi ce que chacun d'eux portera. Les hommes doiuent connoistre le mulet qui porte leur équipage, & dès qu'on sera au lieu où l'on doit descharger, se doiuent ranger autour du mulet; afin de receuoir chacun ce qu'il portera. Si le second petard doit s'appuyer à vne porte ou à vne barriere, ceux qui le porteront seront en mesme ordre que ceux du premier petard; mais si c'est pour vn pont-leuis, le pont volant ou fleche marche le premier; avec sept ou huit hommes qui sont employez, tant pour le porter que pour le pousser. Apres quoy sera porté le Madrier & petard par le mesme ordre que les premiers: puis suiuront à la file, & bien serrez, ceux qui porteront les échelles plancheyées, pour ietter sur la brèche que le petard aura faite au pont-leuis: puis suiuront ceux qui porteront marteaux, haches, tenailles, instrumens pour arracher verrouils, & couper chaînes: puis quel-

ques vns avec piques à feu, & grenades, & quelques lanternes sourdes. L'Officier qui aura la conduite de cela, prendra garde que personne ne perde son rang, & les diuisera en files, & aura soin de faire prendre à ceux qui resteront, les portions de l'équipage que portoient ceux qui seront blesez, ou tuez; lesquels il fera mettre seulement hors du chemin, sans permettre que ceux qui sont employez au seruice du petard, s'amusent à enporter aucun mort ou blessé. A toutes les portes & ponts, faut disposer les gens en mesme ordre. Mais qu'on va aux grilles, ou orgues, faut faire marcher les premiers ceux qui portent les cheualets ou treteaux : en suite marche le madrier & le petard : apres quoy suivent les marteaux, haches, pied de cheure, & autres instruments qu'on a iugé pouoir seruir. Ne faut oublier de porter balles à feu, grenades ou piques, si on a reconnu qu'on s'en puisse seruir. Et tous porteront des haches à la ceinture, & faut auoir plustost grand nombre d'instruments, que manquer d'un. Ayant ainsi mis le tout par ordre, & des Officiers aux ailles, & à la teste de chaque file; on aura encor des petards, madriers & autres instruments de reserue

feruë ; que l'on fera marcher en mesme ordre que les autres. Car il faut tousiours auoir vn double équipage. Lors qu'on est près du lieu où l'exécution se doit faire, on distribue à chacun ce qu'il doit porter : le Sergent les met en file, & leur commande de bien suiure chacun son homme: puis il les fait marcher en auant, pour faire place à ceux du second petard ; & ainsi consequemment de tous les autres, y ayant vn guide à la premiere file pour monstrier le chemin. Et afin de ne s'embarasser point, on fait quelquefois marcher dix hommes d'armes deuant à pied, pour reconnoistre si l'ennemy n'est point sur les auenuës: après suiuent trois hommes portans de bonnes rondaches, pour couvrir entr'autres le petardier: puis marchent ceux qui portent les petards, & autres attirails en l'ordre qui a esté dit, lesquels seront suiuis de cinquante mousquetaires, conduits par vn Capitaine, pour tirer aux deffences s'il est besoin avec de grosses dragées. Il prendra garde qu'en marchant personne demeure en chemin. Quand l'ennemy demande qui valà, il faut haster le pas, & lors le Petardier prend le premier petard avec luy, & faut que les autres suiuent de fort près, afin que

quand le premier aura joué , le second soit prest à mettre entre ses mains. Les dix Cavaliers qui auront marché devant tout l'équipage iusques là , n'avanceront pas plus que la portée du pistolet de la premiere barriere: puis ils se retireront avec le Capitaine qui mene les cinquante Mousquetaires. Le premier petard ayant joué; l'Officier fera mettre leurs gens & à droite & à gauche, pour donner passage au second petard: puis celui là en fera de mesme pour donner passage au troisieme: puis celui là au pont volant , & ceux là aux petards & autres instrumens, & consequemment tout le reste. Et faut que ceux qui sont deschargez assistent les autres sans mener bruit. Et si le Petardier demande quelque chose, faut que celui qui la porte soit prest à la luy donner; n'estant permis à aucun sur peine de la vie, de quitter le rang où on aura esté mis, que pour porter au Petardier ce qu'il luy demandera, ou pour se substituer à la place de celui, qui luy portant quelque chose auroit esté blessé ou tué. Les Officiers doiuent avoir soin, que le Petardier soit incontinent seruy, & que tout se fasse sans bruit & confusion. L'ouverture estant faite, il faut que ceux qui seront commandez pour la

premiere pointe, soyent prests à entrer & forcer ce qui leur fera resistance : ceux qui doiuent les suivre semblablement, & consequemment tous ceux qui ont à exploiter quelque chose. Et quand on est dedans, il ne faut pas que les premiers entrez s'escartent auant dans la ville, (tandis qu'ils seront encor foibles) soit en suivant les ennemis, ou mesme en ne les trouuant point : mais faut faire deux gros, l'un pour agir, l'autre qui se doit seulement mettre en bataille pour soustenir. Et cela fait, faut marcher en bon ordre, les vns à forcer ce à quoy ils sont ordonnez : les autres à s'aller mettre en bataille aux ruës & places, qu'on a resolu deuoir estre saisies sur le plan & dessein de la ville, sur lequel toute l'attaque doit auoir esté desseignée. Car bien que quelquefois il ait reüssi, de suivre promptement les ennemis pour peu de gens que l'on soit dedans ; ce n'est pas pourtant la plus seure voye, parce qu'ils peuuent estre repoussez par peu de gens, ce qui a fait faillir souuent de belles entreprises. Faut aussi auoir vn troisieme corps, qui demeure en bataille dehors pendant l'execution, afin que si ceux qui sont entrez dedans estoient repoussez, ils les soustiennent : ou bien pour reme-

dier aux accidents qui pourroient survenir de quelques troupes ennemies, qui par hazard arriueront en ce lieu là. Si on est entièrement repoussé, cette troupe de dehors fera la retraite, & demeurera ferme en bataille, iusqu'à ce qu'on ait recueilly & remis en ordre les troupes repoussées. Mais si ceux qui sont entrez se rendent maistres de la place, ledit bataillon de dehors se separera aux entrées d'icelle pour les garder. Cela fait faut desarmer les habitans auant que quitter les armes. Et s'estant bien assuré de tous les Corps de gardes & places commodés, faut départir les logis, afin que chacun ait sa part du butin; n'estant permis de butiner par autre ordre, & faut punir seuerement ceux qui commenceront le pillage. Par ce moyen on peut départir les meilleurs logis à ceux qui l'ont le mieux mérité, & faire le reste par le sort, auquel personne n'a à se plaindre que de son malheur. S'il est besoin aux lieux qui s'attaquent par eschelles, on disposera des troupes de Mousquetaires, qui tireront perpetuellement aux flancs, & on y appliquera, si l'on peut, lances à feu: & ceux qui tireront au dessus de l'eschelle doiuent cesser lors que leurs gens commencent à monter.

J'ay esté plus particulier en ce Chapitre,
qu'aucun autre; mais on manque d'entre-
prises pour l'observation de la moindre
de ces choses; que j'ay mieux aimé en
détendre estre vn peu long, que de les
obmettre.



De l'Attaque par Sieges.

CHAPITRE XI.



Vix deux Chapitres de sur-
prises, n'ay commencé par
traiter des moyens de se def-
fendre; pource qu'on n'en-
treprend jamais de vouloir
surprendre vne place, que sur des deffauts
qui s'y trouvent. Si bien que celuy qui ne
sçait par où; ny en quelle maniere on le doit
attaquer; doit estre préparé à toutes sortes
d'accidents. En ces deux poins com-
menceray à traiter de l'attaque des places par
Sieges; pource qu'il faut voir par où; &

en quelle maniere on vous attaque, pour y opposer vne bonne deffense.

On entreprend les Sieges ou par blocs pour affamer les places, ou de viue force. Pour l'vn & pour l'autre, il faut estre le plus fort en campagne, & auoir deux armées, l'une pour empescher l'ennemy de rien entreprendre, & l'autre pour former vostre siege: ou en tout cas estre le premier en campagne; afin de vous fortifier tellement deuant la ville assiegée, que vous puissiez vous y maintenir malgré les efforts de vos ennemis. Pour auoir bon marché de la ville qu'on veut assieger, on tache de la surprendre despourueüe de gens de guerre. Pour cét effet on vse de toute sorte d'artifice pour oster la connoissance qu'on la vueille attaquer, puis tout d'un coup on la va bloquer. Mais si nonobstant tous ces stratagemmes, on ne la peut surprendre despourueüe, ou qu'on apprehende trop la despense, il vaut mieux faire vn autre siege de moindre importance. Car vne place bien opiniastree, est la ruine d'une armée: & si on ne la prend, elle diminuë souuent la reputation du Capitaine qui l'attaque. C'est pourquoy auant que l'entreprendre, il faut bien y penser, & se pouruoir abondamment de

toutes les choses nécessaires pour le faire. Quand on forme le siège, il faut poser les quartiers autant qu'il le peut en lieu sain, & estre soigneux de les faire spacieux, & de les tenir nets. Car c'est au séjour qu'il faut apprehender que les maladies ne dessa- cent vne armée. Il faut poser les quartiers de l'armée le plus près qu'on peut de la ville assiégée, sans néanmoins qu'ils puissent estre incommodés de leur artillerie. Que si l'assiette est pleine, & qu'elle descouvre tout autour, ils doivent estre posez hors la portée du canon. On fait autant de quartiers qu'on veut faire d'attaques, ou bien que la grandeur de la ville assiégée, ou la situation d'icelle le requiert. Néanmoins ie voudrois que le quartier du General fust capable de recevoir en cas de besoin toutes les troupes des autres quartiers. Si on fait vn Siège avec vne petite armée, & que la garnison soit forte, il faut fortifier les quartiers l'un après l'autre, avec tout le corps de l'armée: Et en ce cas en faut faire moins, & moins d'attaques. Mais si on se sent assez fort, on abregé bien la besogne de les faire tous à la fois. Outre cela il faut faire vne circonualation avec forts & redoutes hors la portée du Canon des assiégés: qui

joigne tous les quartiers les vns aux autres; derriere laquelle vostre armée se puisse représenter en bataille. Et elle doit estre conduite de telle sorte, qu'elle occupe toutes les dominations, & mesme la garnison de la ville assiegée est si forte, qu'on redoute d'estre attaqué des deux costez; il faut faire vne seconde circonvallation autour de la place, le plus près qu'on peut; afin qu'il faille moins de gens pour la garder. Car estant faite pour s'opposer à la ville, on n'apprehende plus de la faire hors la portée du Canon. Pour l'ouverture des tranchées, on y apporte plus ou moins de ceremonies, selon que la garnison est forte ou foible. Si elle est forte, on commence par vn bon fort, & on continué de bonnes redoutes le long des tranchées, ne laissant dans icelles que des sentinelles. Car c'est vne erreur ancienne de penser deffendre des tranchées. Si la garnison est foible, on n'y fait pas tant de ceremonies, afin d'abreger le temps. Les batteries doiuent estre bien fermées par de bons fossez, & flanquées de bons Corps de garde, pour les conseruer contre les sorties des assiegez. S'il y a quelques ouurages de dehors qui ne soient pas encor en bonne deffense, & qu'on les puisse emporter de force;

force ; il faut le tenter , sinon il faut y venir pied à pied. Car c'est là que se fait la plus gaillarde deffense , à cause qu'à ce commencement les sorties sont plus faciles à faire. Quand les dehors sont emportez, que le Canon est logé sur la contr'escarpe , qu'on fait les descentes dans le fossé , & qu'on se prepare à passer les galleries pour s'attacher aux bastions ; c'est lors qu'il faut faire des logemens de Mousquetaires tout le long de la contr'escarpe , afin qu'à la faueur d'iceux & de vostre Canon , on puisse passer les galleries. Si les fossés sont secs, on vous les dispute ; mais en fin le fort emporte le foible : s'ils sont pleins d'eau dormante, elle n'empesche point de faire la chaussée sur laquelle on pose la gallerie : s'ils sont pleins d'eau courante, il se faut servir de ponts flottans pour passer vos mineurs. Quand on est attaché aux bastions, on se sert de mines grandes ou petites, pour gagner pied à pied le terrain , & les retranchemens qu'on peut faire derriere. Je n'en amuse icy à dire comme quoy doiuent estre faits les quartiers, les forts, les circonualations, les tranchées, afin qu'elles ne soient point enfilées : les batteries pour estre seures : les descentes dans le fossé. Comme quoy on attaque les fausse-

brayes : comme quoy se font les galleries, les mines , & les logements qu'on fait apres qu'elles ont joué. Pource que ce qui se peut escrire là dessus est escrit, & qu'il faut que l'experience apprenne le reste , où tous les iours on change , ou on adioust quelque chose de nouveau.



*De la deffence des places contre
les Sieges.*

CHAPITRE XII.



O ÿ R bien soustenir vn Sie-
ge , il faut que la place soit
bien fortifiée : qu'elle ait le
nombre de gens de guerre suf-
fisant pour la deffendre: qu'el-
le abonde en viures, & qu'elle ait quan-
tité d'armes & munitions de guerre. Et ces
quatre choses sont si necessaires, que quand
trois d'icelles seroient en abondance, si l'y-
ne manque le reste ne sert de rien. Car de-
quoy sert vne place bien forte , s'il n'y a des

soldats pour la deffendre, ny des soldats s'ils n'ont ny armes, ny munitions de guerre pour combattre, ny des armes & munitions, s'ils n'ont pas du pain pour viure? A quoy i'adiouste les instrumens de remuer la terre, sans quoy il est impossible de faire vne grande resistance. Mais ce n'est pas tout d'auoir ce qui est necessaire pour resister; il faut en estre bon œconome; autrement tout se dissipera par ceux qui veulent sortir promptement du peril, & faire naistre vn pretexte de se rendre, qui ne soit point honteux, le nombre desquels est tousiours plus grand, que de ceux qui veulent resister opiniastrement. Faut departir le trauail & le repos aux soldats, & aux habitans, afin que ceux qui sont de bonne volonte ne succumbent pas, & que les autres ne croupissent dans l'oysiuete. Faut distinguer par compagnies les Pionniers, Mineurs, Charpentiers, forgerons, & tous artisans vtiles à vn Siege, leur donnant à chacun leur Chef. Faut faire inuentaire dans la ville de tout le fer, le bois, la toile, les instrumens à remuer la terre, les drogues propres à faire feux d'artifice, & autres telles choses necessaires à vn Siege; Et que d'icelles il y en ait tousiours dans les magazins, pour s'en seruir à la ne-

cessité presente, & pour éviter le desordre à la distribution de toutes ces choses. Faut vn Conseil qui en ait la surintendance, & qui les face deliurer & retirer selon l'ordre du Gouverneur & Conseil de guerre. Apres auoir ainsi ordonné les affaires, faut songer à la deffense, laquelle se fait principalement en deux manieres, tenant l'ennemy esloigné par retranchemens, & l'incommodant quand il s'approche par sorties.

Pour la premiere elle est approuuée & pratiquée de tous, & celuy qui remue mieux la terre, & qui de plus loin commence à la disputer; c'est celuy qui resiste le plus long temps. Car le moindre retranchement de dehors accomodé de palissades, est difficile à forcer. Mais s'il est miné, & qu'il y en ait vn autre fait par derriere, c'est vne chose dangereuse à aborder, & on contraint l'ennemy d'y venir pied à pied, & avec les mesmes ceremonies qu'on fait pour aborder les bastions & le grand fossé. Si bien que par diuers retranchemens, on tient long temps l'ennemy éloigné auant qu'il puisse aborder la contr'escarpe. Lequel ne peut nous enleuer tels ouurages de dehors que par mines, à quoy il y a beaucoup de longueur. Le fossé aussi se def-

fend quand il est sec par casamates portatiues (que nous appellons coffres,) entournees de petits fossés ou pallissades pour en empêcher l'abord ; qu'on met en diuers endroits du grand fossé pour le deffendre , & n'estre point veû du Canon de l'assaillant. Les bastions se deffendent encores par retranchemens qu'on fait , ou à la pointe , ou au milieu , ou à la gorge , selon qu'ils en sont capables , & que les Mines des assiegeans entrent auant dedans les bastions. Et quand tout cela est forcé, la derniere defense est vn retranchement de la ville entiere , se reduisant à en garder vne partie seulement.

La seconde maniere de se deffendre , qui est la quantité des sorties , ie la voy reprobuée de la plus part qui se contentent de faire faire de fausses sorties ; pour destourner ceux qui trauaillent aux approches , & en font seulement quelque vne tout de bon à la grande necessité ; alleguans que les assiegez y perdent tousiours des hommes & des meilleurs , lesquels ils doiuent conseruer pour vn grand effort : & que souuent ceux qui veulent auoir vn pretexte honorable de se rendre , font estropier leurs soldats en continuelles sorties , pour monstrier qu'ils

ne se rendent que par nécessité. Pour moy qui approuue la quantité des sorties, & qui par icelles ay veü tousiours retarder les ouvrages des attaquans, plus en vne heure qu'en huit iours avec les autres deffenses; ie responds que ces raisons auoient apparence, quand on attaquoit les places par assaut. Car ne se prenant en ce temps-là, que par cette voye, il falloit conseruer les soldats pour les soustenir. Mais maintenant qu'on gagne le terrain pied à pied, si vous ne le deffendez que par retranchement, il faut en fin le perdre; à quoy la quantité de soldats ne vous sert de rien. Si bien que le soin que vous auez eu de les conseruer, n'allonge pas vostre prise d'un iour. Mais si par vos braues sorties vous ruinez des batteries, enleuez des tranchées, forcez les redoutes qui les deffendent, & quand ils sont dans le fossé, bruslez leurs galeries; il faut qu'ils recommencent leur besongne tout autant de fois que vous la leur ruinez. Si bien que l'assiégeant se voyant ainsi receu; il s'aproche avec beaucoup plus de ceremonie, & en fin ses soldats se rebutent. Tellement que pour mon opinion, i'estime fort que les assiegez fassent souuent des sorties; mais il faut qu'elles se fassent à diuerses heures, afin de mieux

surprendre l'ennemy avec peu de gens : (mais resolu pour éviter le desordre à la retraite , & ne faire autre chose que ce qui est commandé. Car encore qu'on ne trouve pas d'abord de résistance , comme c'est l'ordinaire , si vous tardez mal à propos, vous courez fortune d'estre mal mené sur la retraite. Les autres particularitez de la deffense , dependent de celles de l'attaque , qui apprend par necessité aux assiegeans ce qu'il faut qu'ils fassent , à quoy il n'y a que la pratique & l'experience qui puisse bien guider.





De l'Artillerie.

CHAPITRE XIII.



L est à propos de parler de l'Artillerie apres les sieges, puisque c'est principalement avec elle que les places se prennent, & que depuis qu'elle est en vſage, il ne s'en trouue plus d'imprenables, ſi elles ne ſont inacceſſibles. Elle a changé toute la forme & la matiere des fortifications. Car au lieu des tours & des murailles anciennes qui ne luy ont pû reſiſter; on fait des baſtions & autres ouurages de terre. On peut meſme dire qu'elle a en quelque façon changé la maniere de faire la guerre. Anciennement on commençoit les approches des villes, par où maintenant on les finit. Car du premier iour on ſe logeoit ſur le bord du foſſé; & à cette heure, il faut faire vn grand chemin auant que d'y venir. Alors on faiſoit la circonualation
hors

hors de la portée des flèches seulement ; maintenant il faut qu'elle se fasse hors de la portée du Canon. Il n'importoit alors que les forteresses ou camps d'armées fussent dominez , pourueu qu'ils eussent leurs autres commoditez ; auioird'huy il faut prendre garde que sur toutes choses , ils ne le soient point. En ce temps-là on menoit paisiblement deux armées en bataille à deux ou trois cens pas l'une de l'autre , & y demeuroient des iours entiers sans en pouuoir estre deslogées, que par le hazard d'un combat general ; maintenant on ne peut estre l'un deuant l'autre que hors la portée du Canon. Autrement celuy qui en a le plus , ou qui l'a le mieux logé , chasse l'autre sans combattre. En ce temps-là un General d'armée pouuoit connoistre de près l'ordre de son ennemy , former le sien selon iceluy , chercher ses auantages sur les deffauts d'autrui , & le tout sans peril. Maintenant ces choses ne se peuuent plus remarquer que de si loin , qu'il vaut mieux s'asseurer sur son bon ordre , que sur le deffaut de celuy de son ennemy. En ce temps là une armée en pouuoit attaquer une autre sans perdre son ordre ; pource qu'elle n'auoit que deux ou trois cens pas à faire ; en cettuy-cy il est im-

possible de le maintenir à la veüe de l'en-
mydemy lieuë durant, & de trouuer vne
plaine qui soit vnüe & sans aucun empef-
chement. A quoy i'adiouste que sans vn
grand exercice à marcher en bataille, on
ne sçauroit faire mille pas sans perdre tou-
tes les distances des bataillons & escadrons,
& par consequent sans estre en confusion.
Puis donc que le Canon est de si grand vsa-
ge à la guerre, & à tant de part à la victoi-
re, il est necessaire de s'en sçauoir bien ser-
uir. C'est vne machine que tous nepeuent
pas bien employer, car elle est de grande
despense, & n'appartient qu'aux grands &
puissants Estats, d'en vser ordinairement.
Elle oblige à vn grand attirail, estant be-
soin de cent cheuaux d'Artillerie pour trai-
ner par tout pais vn Canon de batterie, &
pour pouuoir tirer seulement cent coups.
Par là on peut iuger selon le nombre qu'on
en veut mener, quelle file elle occùpe.
Pour bien equiper vne piece de batterie, il
faut dix-huit hommes. Outre cela com-
bien de Forgeurs, Charrons, Mareschaux,
& autres ouuriers faut-il à la suite, pour ra-
doubler les afusts ? combien de Charpen-
tiers pour faire des ponts ? combien de
Pionniers pour r'accommoder les chemins ?

Bref vne armée qui traine Canon ne peut marcher que pesamment, & celle qui n'en a point ne peut faire grand effet. C'est pourquoy aujourd'huy l'Artillerie est vne chose essentielle à vne armée. Mais aussi si le General se laisse trop approcher, sans se retrancher, il est impossible de pouuoir se demesler sans combattre, ou la perdre, ce qui ne peut arriuer sans perdre beaucoup de sa reputation. Pour cet effet, il doit s'instruire tres-particulierement de tout ce qui depend de l'Artillerie, & afin de n'estre point trompé, en sçauoir le menu iusques aux moindres choses; à sçauoir del'alliage, de la fonte, de la proportion, de son calibre, de son affust, de quel bois il doit estre: comme quoy on doit la conduire selon les diuers chemins, fangeux ou montueux: comme quoy passer les riuieres: comme quoy asscurer les batteries, tant contre le Canon de l'ennemy, que contre ses sorties: quelle place il faut à son Canon pour son recul, quelle distance entr'eux: comme quoy la platte forme doit estre faite, de quelle distance les batteries sont bornées, & autres choses dont ie ne specifice point icy le particulier, pource que d'autres l'ont escrit. Il me suffit de faire voir l'vsage

de l'Artillerie, sa despenſe, ſon embaras, & à quoy elle vous engage; afin d'inciter les Generaux de ne ſe rapporter ſur autrui, & d'en ſçauoir ſi bien l'vtilité & l'incommodité; qu'ils ſe ſeruent de l'vn à leur auantage, & éuitent l'autre par leur preuoyance.



Du Bagage & des Pionniers.

CHAPITRE XIV.



PRES le grand embaras de l'Artillerie, ie diray vn mot de celuy du bagage. C'eſt vne grande honte de le perdre; mais c'eſt auſſi vne grande peine de le conſeruer quand il eſt exceſſif, n'y ayant rien qui apporte tant de deſordre à vne armée. C'eſt pourquoy il importe entierement de le retrancher au plus petit pied qu'on puiſſe, & d'en faire vne reueüe tous les mois; car il croiſt à veuë d'œil. Nous

sommes aujourdhuy si delicats ; qu'à peine voulons nous porter nos armes ; tant s'en faut que nous voulions porter sur nous pour huit iours de viures. Tandis qu'on permettra vn tel abus dans vne armée , elle se rendra incapable de faire rien de bon. Car comme en vne bataille celuy qui peut le dernier conferuer des troupes qui n'ayent point combattu ; emporte la victoire ; aussi celuy qui le dernier maintient son armée saine , complete , & accoustumée à la fatigue , fait le semblable. Ce qu'il ne peut faire si les soldats sont si delicats qu'ils ne puissent porter leur bagage. Outre que la maladie , & la famine ne naissent dans vne armée , que par cette canaille de goujats : Et cette chose qui semble de rien , est de telle importance , qu'elle est le plus souuent la dissipation des plus florissantes , & mesme i'ose dire des plus victorieuses armées. C'est principalement durant la prosperité qu'on se relasche , & qu'on se donne du bon temps ; & c'est en ce temps-là qu'il faut moins le faire , si à l'exemple des delices de Capouë , où l'armée d'Hannibal s'auilit , on ne veut faire de semblable. Puisque nous sommes sur le retranchement des choses inutiles d'une

armée ; ie diray vn mot des Pionniers. Il y a des Capitaines de nostre temps qui en veulent auoir vn nombre effrené , & disent qu'il vaudroit mieux retrancher des Regimens de gens de guerre , & en faire des Pionniers , lesquels sont necessaires à faire la closture d'un camp , les tranchées d'un Siege , l'accommodement des chemins ; bref oster toutes fonctions aux soldats de trauailler à la terre , pource que ceux d'auiond'huy ne peuuent estre assujettis à tels trauaux , comme les anciens Romains. Alleguant encor , que le soldat quand il arrive au quartier , est assez harassé , sans l'employer de nouveau à remuer la terre. Opinion dont ie ne me puis assez émerveiller , & qui me fortifie en celle que j'ay , que nous gastons nos soldats en les espargnant trop. Il faut auoir soin de leur viure , de leur vestir , de leurs malades , & de leurs blesez. Mais il faut les endurcir à la peine , & que leur General & autres Chefs leur seruent d'exemple. Car si vous les voulez reduire à se contenter de peu , tandis que vous vous creuerez de viande , & à trauailler , tandis que vous ferez gloire de demeurer dans l'oisiueté ;

ie confesse qu'ils murmureront. Mais pour reuenir aux Pionniers, il est necessaire d'en auoir pour r'accommoder les chemins, à cause de l'Artillerie principalement, à quoy cinq cens peuuent seruir pour vn grand équipage. Quant à la closture du camp, le soldat est obligé à la faire; pource que ce trauail luy acquiert le pouuoir de se reposer, & dormir en seureté. A quoy l'adiouste que c'est vn ouurage qui se doit faire en trois ou quatre heures: Pour cét effet toute l'armée y travaille; ou au moins la moitié quand l'ennemy est proche. Si bien que s'il falloit le faire faire à des Pionniers, il en faudroit dans vne armée autant que de soldats, qui feroit le moyen d'affamer tout vn pais, & d'augmenter l'embaras que nous voulons diminuer. Quant aux tranchées, ie n'y vis iamais reussir les Pionniers; & lors que le danger croist les plus vaillans soldats n'y sont pas trop bons: encor faut-il les inciter à ce trauail par le gain. Ce qui leur sert de les asseurer d'autant plus dans le peril, & à leur donner moyen d'espagner quelque chose pour s'habiller; & nul argent dans

vne armée n'est si bien employé que ce-
luy-là.



Des Espions & des Guides.


CHAPITRE XV.



Il y a encor deux especes de gens, dont au rebours des Pionniers, on ne scauroit trop auoir, dans vne armée, qui sont des Espions, & des Guides. Les premiers vous auertissent des deportemens de l'ennemy, sur le rapport desquels, ou vous entreprenez sur eux, ou vous vous gardez de leurs desseins. Les seconds vous donnent connoissance du pais, des chemins & passages, où il vous faut passer: ou bien par où vostre ennemy peut venir à vous. Il faut que les vns & les autres soient fidelles, pource, que vous auertissant faussement; ils peuuent vous faire tomber en de grands perils. Il faut auoir
quantité

quantité de Guides, pource que, sur tout si on marche la nuit, chaque grosse troupe a besoin du sien, ou au moins chaque corps; & auant que partir, ils doiuent estre tous d'accord du chemin qu'ils veulent tenir. Il faut vn Capitaine des Guides, homme d'esprit, & vigilant, & qui ait soin d'en recouurer de lieu en lieu. Pour les Espions il faut y obseruer quelque chose de plus, & en estre tousiours en défiance; pource que comme c'est vn mestier dange-reux pour celuy qui le fait, aussi l'est-il pour celuy qui s'en sert. A cet effet il faut que personne ne les connoisse que celuy qui les employe, & qu'entr'eux ils ne s'entreconnoissent pas; afin qu'ils ne s'accordent à donner de faux auis. Car par ce moyen les examinans les vns à part des autres; par la concordance ou discordance de leurs auis, on peut iuger s'ils sont bons; & par la verification de ceux qui disent vray ou faux, vous reconnoissez qui vous trahit, ou qui vous sert bien; & quand bien vous en reconnoistriez de traistres; ie dis qu'on s'en peut encor seruir vtilement, en feignant de les croire fidelles, & leur donnant des commissions qui fassent connoistre a l'ennemy, que vous auez quelque dessein tout contraire à celuy que vous voulezz executer; afin que se preparant d'un costé, vous puissiez entreprendre sur luy

d'un autre.. Mais ce n'est pas tout de se garder de ses propres Espions, il faut aussi se garder de ceux de l'ennemy, lequel il faut presupposer en auoir dans vostre camp, comme vous dans le sien. C'est pourquoy outre le secret qu'il faut garder en toutes entreprises, il est encor bon de donner le change, en publiant sourdement que vous auez tout autre dessein, que celuy que vous voulez executer; afin que les Espions le rapportent ainsi à l'ennemy. Mais le plus essentiel moyen d'estre bien seruy de cette espee de gens; c'est de leur estre fort liberal: car ils sont fideles à qui plus leur donne.



Des Viures.

CHAPITRE XVI



OR pource qu'il ne sert de rien d'auoir vne armée composée de bons chefs & de vaillans soldats, bien disciplinée & obeissante, bien artillée & munitionnée, si elle n'a dequoy manger? Le di-

stingueray ce chapitre en cinq points. Le premier, de faire des achapts de bleds, le second de pourvoir à la voicture: le troisieme, à l'escorte: le quatriesme, à faire le pain bon; & le cinquiesme à le distribuer. Pour cet effet le Commissaire general des viures, doit estre vn homme d'autorité, fidelle, vigilant & actif. Et cette charge ne doit estre mesprisée comme aujourdhuy, ny donnée à gens de peu. Car elle est de telle importance, que selon qu'elle est ou bien ou mal faite elle fait subsister ou ruiner vne armée. Et les Romains la commettoient tousiours à quelque signalé personnage. Pour venir au particulier, ie diray que la prouision des bleds se doit faire de bonne heure, suffisante, en lieu commode pour le transport, & choisir de bon bled. Car il ne faut points'amuser sur l'esperance qu'on a d'en trouuer à la campagne, ny aux lieux où on veut aller pour ce que vostre ennemy les peut serrer ou bruler, & ainsi sur cette esperance, vous trouuerez en ce seul point tous vos desseins accrochés. En second lieu, il faut faire vos Magazins en diuers lieux; afin de ne les pouuoir perdre tout à la fois; & aux villes & Chasteaux les plus proches & commodes pour le transport des bleds dans vostre armée: & selon la situation du pays, faire vostre prouision de chariettes ou

mulets pour les porter au camp, où il doit auoir tousiours vn Magazin pour quinze iours, auquel on ne touche qu'à l'extremité, ou pour quelque entreprise extraordinaire. En troisieme lieu, la voiture ne se doit faire qu'avec bonne escorte, & iamais à iour prefix, pour empêcher qu'on ne se prepare à l'enleuer sur le chemin. En quatrieme lieu, empêcher les abus qu'on fait ordinairement, & j'ose dire tousiours si on n'y regarde de bien pres, sur le pain; car pour y gagner on y melle de mauuais grain, mesme de la terre & autres vilainies, d'où prouiennent le plus souuent les maladies dans vne armée, qui est vne meschâceté qu'on ne sçauoit punir trop seuerement. Et en dernier lieu, qu'il soit distribué, & non dissipé; pource que si on en croit les Sergents, ils en prennent tousiours pour deux fois autant de soldats qu'ils en ont dans leurs compagnies. Pour cet effet il est necessaire que de huit en huit iours, le Commissaire General des viures ait le roole exact de ceux qui se trouuent dans l'armée, signé du General; afin de regler la distribution du pain sur cela. Outre plus, faut punir rigoureusement ceux qui destroussent les viuandiers, & autres personnes qui apportent des viures au camp, dont il faut regler le prix, afin que les soldats ne soient point ran-

connez. Quand on est à vn siege bien retransché, où l'esperance de vous le faire leuer ne consiste plus qu'à vous couper les viures; il faut auoir cette preuoyance d'en faire venir autant dans vostre camp, que vous iugez necessaire pour vous nourrir le temps que vous croyez demeurer pour prendre la place assiegée, comme fist Césâr deuant Alexie. Il y a sur cette matiere force reglemens à faire, pour empescher les abus qui s'y peuuent commetre, lesquels i'obmets pour éuiter la longueur: puis ce sont petits ordres qui se changent selon les lieux, & les occasions; lesquels tous ne doiuent tendre, qu'à faire abonder des viures dans l'armée, & en oster la trop grande cherté.





DES CHARGES

GENERALES D'VNE
ARMEE ET DE
Leurs Fonctions.

CHAPITRE XVII.



IL n'y a rien plus necessaire dans vne armée, que d'y voir les charges bien réglées, & que chacun sçache à qui il doit commander & à qui obeyr. Et neantmoins en nulle ie ne voy cela absolument décidé: c'est pourquoy j'ay voulu faire icy vn proiet, comme quoy les choses s'y doivent establir.

Le Capitaine General doit auoir vn absolu pouuoir quine soit partagé avec personne. Car en la guerre plus qu'en tout autre mestier, le commandement doit estre vnique; & c'est vne tres-mauuaise introduction que de mettre des Generaux qui commandent vne armée par iour ou par semaine, ou par mois. Toutes

les fois que les Romains l'ont fait, ils s'en sont mal trouuez.

Après il faut vn Lieutenant General, ou Marechal de camp General, lequel doit auoir le soin de faire executer tous les commandemens du General aussi absolument que luy mesme, afin de le soulager; estant bien difficile que le General puisse faire tout quand on marche, pource que de toute necessité, il faut à la teste d'une armée vn homme d'éminente autorité, & que tous les autres Chefs reconnoissent. Quelques-fois on remplit les deux places de Lieutenant General, & de Marechal de camp General. Neantmoins ces deux charges possédées par deux hommes dans vne armée, apportent bien souuent de la confusion, & y font naistre ce que nous voulons éviter. Car en la fonction d'icelles, ils ne s'accordent iamais, pource que le Marechal de camp General faisant sa charge, doit distribuer les commandemens du General à tous les autres Chefs, marcher à l'auantgarde, faire les logemens & campemens. Si bien que ie ne sçay quelle fonction aura le Lieutenant General, s'il n'empieté sur l'autre, ou bien qu'il ne serue que de Sarbatane pour dire au Marechal de Camp General les commandemens du General. C'est pourquoy ie conclus qu'il

ne faut que l'une des deux charges.

Cela fait, ie diuise toutes les fonctions de l'armée en quatre parties principales, à sçauoir la Caualerie, l'Infanterie, l'Artillerie, & les viures; & traiteray de chacune partie l'une apres l'autre.

La Caualerie est vn corps qui souuent loge separément de celuy del'armée, & requiert vn principal Chef auquel tous les autres obeïssent qui soit de grande autorité & qualité eminente, ou de telle experience & vertu, que tous les autres Chefs luy obeïssent volontiers. Car c'est dans la Caualerie où se rencontrent plus de personnes riches & de bonne maison; & par consequent plus difficiles à faire obeyr, c'est pourquoy cette autorité ne se doit point diuiser. Et pource qu'au marcher la Caualerie est ordinairement à la teste & à la queue, & qu'au loger on est contraint de faire souuent deux testes, & qu'à vn iour de bataille elle est au moins aux deux aisles; il est necessaire qu'il y ait vn Lieutenant General homme aussi de grande autorité. Il faut encore vn troisieme Chef, que la plus-part nomme Commissaire General, lequel distribuë les ordres, tient la liste des gardes, des conuoys & autres fonctions, & doit aller prendre les ordres du Marechal de Camp General, pour les porter à son

son General de la Cavalerie, puis les distribue aux Marechaux des logis des compagnies, qui de chaque quartier le viennent chercher.

Toute la Cavalerie doit estre divisee en compagnies, desquelles on forme des regiments non à la façon de l'Infanterie sous la charge de Maistre de camp; mais seulement pour maintenir l'ordre des logemens, & du combatre. Pour former les Regiments on met quatre ou cinq compagnies ensemble avec vne de Carabins, & le plus ancien Capitaine commande à ce corps; & ainsi se départ toute la cavalerie. Ce qui fait voir clairement, comme vn Chef General des Carabins est vne charge du tout inutile. Car les Carabins ne peuvent faire corps; pource que leur maniere de combatre ne le permet pas; aussi n'ont ils esté instituez que pour servir la cavalerie: soit au logement, ou bien à faire la descouverte: ou à prendre langue: ou en vn combat pour faire vne descharge en flanc: ou en vne retraite pour harceler celuy qu'on poursuit: ou pour s'empescher del'estre quand on est suivy. En effet de bons Carabins mellez parmy la cavalerie font de très-bon service; mais seuls sont inutiles.

Sil on fait plus de quartiers qu'il n'y a d'Officiers Generaux, le plus ancien Capitaine

commande au quartier, & dans iceluy prend le plus ancien Marechal des logis de son quartier, Si bien que le General de la caualerie donnant les ordres au Commissaire General, au Marechal des logis general, & iceluy aux autres quartiers (où pareil ordre est obserué): les comandemens sont portez sans confusion, passant par les mains de peu de personnes, & quand il s'y trouue du manquement, il est aisé à verifier d'où il procede.

L'Infanterie est le corps le plus solide d'une armée: celuy de l'Artillerie & les viures logent tousiours avec elle. Il n'y a point de diuersité entre les compagnies comme à la caualerie. Elles sont toutes de mesme façon, composées moitié picquiers, & moitié mousquetaires. Plusieurs compagnies font vn Regiment qui a son chef, & plusieurs Regiments font vn corps, qu'on nomme brigade d'armée. On diuise ordinairement l'armée en trois corps, auant garde, bataille, & arriere garde. Chaque brigade a son chef: & outre iceluy doit auoir vn Sergent major de brigade, & vn Marechal des logis de brigade. Le premier pour aller prendre les ordres du Marechal de camp General, pour les porter au Chef de la brigade: puis il donne le mot aux Sergents Majors des Regiments. Et l'autre pour bailler à cha-

que Mareſchal des logis d'un Regiment ou ſon logement, ou l'eſpace de terre qui luy eſt neceſſaire pour camper: & iceluy le de part aux Fourriers de chaque compagnie, qui apres les loge. S'il y a vn Colonel general de toute l'Infanterie, il peut auoir ſoin en general de tout le gouvernement d'icelle. Mais dans vnearmée il ne doit commander qu'vne brigade; autrement nous ne pourrions eſtablir d'ordre que nous auons propoſé. Auſſi a-t'il diuerſes nations, qui ne iugent pas neceſſaire vn Colonel General de l'Infanterie, mais ſe contentent des Colonels particuliers de chaque Regiment, leſquels ne reconnoiſſent que les commandements du General, ou de ſon Mareſchal de camp General.

L'Artillerie doit auoir vn General, vn Lieutenant du General, vn Mareſchal des logis, puis ſes autres officiers. Et pour ce que tous Pionniers, Mineurs, Ingenieurs, Conducteurs d'ouvrages, Forgerons, Charpentiers, Charrons, & autres ouuiers dependent de luy, ie voudrois eſtablir ſur chaque eſpeece de ces gens là vn chef; ſoit que ie le priſſe des Commiſſaires de l'Artillerie, ou d'autres perſonnes à part, pour m'adreſſer à eux quand i'aurois à faire de ſolles gens. Le Mareſchal des logis doit tous les ſoirs aller recevoir l'ordre du Mareſchal de camp General.

La charge des viures doit estre possedee par vn General: Il doit auoir son Lieutenant, son Marechal des logis & ses autres Officiers: Son Marechal des logis doit tous les fois aller prendre l'ordre du Marechal de camp General.

Donc voycy comme les commandemens se distribuent: Le Marechal de camp general les reçoit du General, puis va à son logis. Là le Commissaire de la cavalerie les vient recevoir pour la cavalerie: le Sergent de bataille pour l'Infanterie, laquelle depart aux Sergents-majors de brigade: pour l'Artillerie son Marechal des logis, & pour les viures le sien. Bref le Marechal de camp General parlant à ces quatre personnes, donne l'ordre à toute l'armée. Tout ordre & commandement se doit donner par escrit.

Dans le quartier du General doivent tousiours loger le Marechal de camp General, le General de l'Artillerie, l'Intendant de la Justice, l'Intendant des finances, le General des viures, le Marechal des logis general, le Sergent de bataille, & le Preuost General.

Sil'armée campe toute en corps, le Marechal des logis General donne à chacun de ces corps l'espace de terre qui luy conuient; ce qui est puis apres distribué en chaque corps par les officiers distinez à cela.

Vniour de bataille; le Marechal de camp General assigne à chaque corps sa place, puis le Sergent de bataille met l'Infanterie en bataille.

Le Marechal de Camp General doit auoir trois ou quatre aydes de camp, pour porter les ordres extraordinaires; mais ils ne doiuent pas pretendre de commander à aucun Chef, si auparavant ils n'ont esté ou Colonels, ou Capitaines de caualerie.

Le Sergent de bataille doit commander aux Colonels; mais afin qu'ils luy obeissent plus facilement, il doit estre pris des Colonels, & n'en faire iamais aucun qui ne l'ait esté. Comme aussi les Sergents Maiors de brigade, doiuent estre pris des Sergents Maiors des Regiments. Les choses ainsi réglées & establies, on verra vne grande facilité aux commandemens; & nul ne pourra excuser sa faute sur autrui; pource qu'aussi-tost on verifie d'où elle prouient. Ce qui oblige vn chacun d'estre soigneux de faire exactement ce qui luy est ordonné.



L'ATTAQUE DES
ESTATS SELON
LEURS FORCES ET
SITUATIONS.
CHAPITRE XVIII.



PREs auoir formé vne armée, il faut l'employer ou à la conquiste d'un pays nouveau ou à la defense du sien. Nous commencerons par le premier. Le Prince qui se met sur l'offensiu doit estre le plus fort, ou voir de la broüillerie dans l'Estat qu'il attaque, & qu'il y soit appelle par vn party. Autrement ce seroit vne entrepryse temeraire. Si le pays qu'il attaque est large & ouuert, il doit rechercher dés le commencement de hazarder la bataille, ou quelque grand combat; afin que par la reputation de ses armes il espouuante ses ennemis. Si c'est vn pays ferré de montagnes, ou coupé de riuieres &

fossez, ou couuerte de forests, ou plein de forteresses; il est difficile de forcer l'ennemy à bataille. Et en ce cas il faut venir aux sieges, & faire vostre acquisition pied à pied. Or celuy qui par cette voye veut faire progrès, doit auoir pour le moins deux corps d'armées, afin qu'avec l'une il tienne en eschech son ennemy, & qu'avec l'autre il puisse agir sans en estre empesché. Car il est tres-difficile de faire le dessein d'un siege, tandis que vous avez vne bonne armée campée auprès de vous, qui vous coupera les viures. Si c'est vn pays d'où l'entrée soit difficile, & qu'il y ait peu de passages pour y entrer; il faut en forcer vn, auant que passer outre, s'y fortifier, & y assurer si bien le chemin de ses viures, que vous ne patissiez point, quand l'ennemy auroit ou brulé ou retiré dans les forteresses ceux de son pays. Si vous estes appelé par vne faction, ce vous est vn tres-grand auantage: pource que vous estes instruits de la situation du pays, & des défauts qui se rencontrent aux places qui y sont fortifiées, & que vous ne manquez d'espions, ny d'estre ponctuellement auerty de ce qui se passe parmy les ennemis. Il faut estre fort soigneux de bien traiter cette faction, & de l'engager petit à petit à des actions, qui l'ayent irreconciliable avec son Prince. Mais quand

vous voyez qu'elle fait la guerre avec respect, qu'elle ne veut offécer qu'à demi celui cōtre qui elle est reuoltée; il en faut auoir grand soupçon, & marcher avec elle bride en main. Car soit ou que la crainte d'une ruine sans ressource, ou l'esperance d'une reconciliation, l'empesche de se porter tout à fait aux extremités; l'un & l'autre est également dangereux. Et enfin on doit craindre qu'elle ne se r'accommode à vostre preiudice. C'est pourquoy si dès le commencement elle ne se veut engager à faire des actions extraordinaires & irremissibles; il ne faut se ioindre avec elle que sous bons gages. Faut encor traiter avec toute humanité, clemence & liberalité, ceux qui volontairement se rendent à vous, & fort seuerement ceux qui vous resistent. Car la beneficence aux vns, & la seuerité aux autres, sont les deux principaux moyens qui vous donnent l'obeyssance, Vne ville prise de force, & mal traitée: ou vne qui se rend de son bon gré, & qui est fauorisée; ouure la porte à vne douzaine d'autres. Comme au contraire vne ville prise de force & esparignée: ou qui s'estant rendue volontairement est mal traitée, la ferme à plusieurs. D'où ie conclus qu'un Conquerant doit faire valoir sa parole, telle qu'il l'a promise, soit en clemence, soit en seuerité.



DE LA
 DEFFENSE DES
 ESTATS SELON
 LEVRS FORCES
 ET SITUATIONS.
 CHAPITRE XIX.

POUR bien traiter cette matiere, il la faut distinguer en trois; à sçauoir aux petits Estats, aux mediocres, & aux puissans. Les petits sont de telle nature, qu'ils ne subsistent que par la jalouſie qu'ont leurs voisins les vns sur les autres; pource que si les vns veulent attaquer vn foible Estat, les autres le deffendront. Neantmoins c'est vne condition bien tremblante & mal assuree: car si l'vn se trouue en estat de l'attaquer, l'autre ne se trouuera en estat de le deffendre. Les Cōseils des Princes & Estats ne se gouvernent pas tousiours si également, que le plus souuent l'vn ne preuale sur l'autre. Outre cēt

K k

inconuenient, il y en a vn autre, que quelque-
fois on s'accorde à partager la proye; tellement
que telle nature de petits Estats qui n'ont la
force en eux mesmes de se deffendre, est tou-
siours en peril, & leur faut vne grande soup-
plesse, pour oster tout pretexte à leurs voisins
d'entreprendre sur eux. Le seul moyen qui
leur reste est d'auoir vne place ou deux tres-
bien fortifiées, des armes, & de l'argent suf-
fisamment pour les bien deffendre, afin de
donner loisir à ceux qui ne voudront permet-
tre l'accroissement de celuy qui vous attaquera
de vous secourir. Car si vous n'avez aucun
moyen de resister, vostre pays sera pris auant
qu'on ait eue le temps de vous secourir: & outre
que la facilité qu'on iuge à vous conquerir
donne l'enuie de vous attaquer; vous trou-
uerez bien plus de personnes disposées à
vous secourir, qu'à reconquerir vostre pays;
pource que l'vn est facile avec égale for-
ce, & l'autre sans de plus grandes forces est
tres-difficile. A quoy i'aiouste, qu'il ya sou-
uent autant de peril que celuy qui reconquiert
vostre pays, comme vostre amy ne le retien-
ne, aussi bien que celui quil'auroit pris comme
vostre ennemy: ou s'il vous le red c'est avec des
conditions si dures qu'on ne possède plus que
l'ombre d'vne souueraineté. Et bien heureux

sont ceux qui rencontrent des Princes si bons & si genereux, qui les reſtaſſent dans leurs Eſtats perdus, avec la meſme authorité & liberté, qu'ils les poſſedoient auparavant; car les exemples en ſont fort rares. Pour les mediocres, ie poſe icy vn Prince, ou vne Republique, qui pour ſa deſſenſe peut entretenir vne armée de vingt mille hommes de pied & trois mille cheuaux, avec tout l'équipage neceſſaire. Si ſon païs eſt de difficile accès, & qu'on n'y puiſſe entrer que par certains paſſages & montaignes gardées, & fortifiées, il a vn grand auantage. Mais ceux qui ſ'y ſont trop hiez & endormis, & ont negligé les autres deſſenſes, ſe ſont trompés & ſe ſont perdus, par où ils croyoient eſtre les plus aſſezez. S'il eſt entourné de la mer, c'eſt vn beau poſſe; neantmoins le plus puiſſant trouuera moyen de faire ſa deſcente dans l'Iſle. S'il eſt entourné de marſt & riuieres, on trouue encor moyen de les paſſer, ſur tout à ceſte heure qu'on a del'Artillerie, pour fauoriſer tels paſſages. Tellement que le plus ſeur eſt de ſe fonder ſur ſes propres forces, à ſçauoir ſur vne bonne armée, & de bonnes fortereffes. Ie diſ les deux ioints enſemble; pource que l'armée ſans fortereffes eſtant foible, & n'oſant rien hazarder, laiſſe à l'ennemy les viures de la campagne, & le moyen de

subsister à vos despens, & enfin de vous ruiner.
Et les forteresses sans vne armée, ne peuuent
vous conseruer, qu'autant de temps que vous
aurez fait magazins de viures dans icelles. Mais
ces choses estans 'proportionnées avec iuge-
ment, on peut faire vne grande resistance. Icy
il ne faut se laisser aller à la fantaisie des peuples
qui sans considerer les affietes de leurs villes,
ny le bien public, quand ils voyent leurs voi-
sins se fortifier, veulent tous les imiter; chose
également perilleuse, d'auoir plus de forteref-
ses qu'on n'en peut garder, ou de n'en auoir
point du tout. Encor aymeroif-je mieux le
dernier que le premier; pource qu'au moins
hazardant vne bataille, vous faites la moitié
de la peur à vostre ennemy: mais par l'autre
voye, il faut perir asseurement sans pouuoir
esperer autre chose que d'allonger sa perte.
Car la ialousie que vous auez de conseruer tou-
tes vos forteresses, en y laissant de grosses gar-
nisons, vous oste le moyen de tenir vne armée
à la campagne: & lors le degast de deux ou
trois recoltes vous contraint de vous rendre la
corde au col. Ie sçay qu'il y en a qui se fondent
sur cette raison, que quand toutes les principa-
les places d'un Estat sont fortifiées, qu'on y re-
tire tous les viures de la campagne, en laquelle
vne armée venant si elle y seiourne, elle y meurt.

de faim: & si elle n'y fait que passer, ellen'y fait pas grand mal; de façon qu'il luy est comme impossible d'y pouuoir faire vn grand siege. A quoy ie responds, que les forteresses sont principalement inuentées pour le plus foible, afin que peu de gens resistent contre beaucoup: & si vous auez vn si grand nombre de forteresses, & de grande garde comme sont les grandes villes fortifiées; il vous faut plus grand nombre de soldats, que n'en aura celuy qui vient pour vous attaquer. Autrement vous ne scauriez les pouruoir toutes de garnisons suffisantes pour les conseruer d'vn siege. Et si vous estes le plus fort sans aucune place, vous conseruerez vostre pais en tenât la campagne. Il y a encor vn autre inconuenient à fortifier les grandes villes; c'est que vous les rendez si superbes, qu'elles ne veulent reconnoistre leur souuerain que de bonne force: & à la moindre incommodité qu'elles reçoient en vne guerre, les habitans aiment mieux changer de maistre, que de voir ruiner leur bien. Si bien que ie conclus qu'il faut auoir si peu de forteresses qu'elles ne vous empeschent pas de tenir la campagne: & celles que vous auez, les si bien fortifier & munir, qu'elles puissent faire vne grande resistance, & les si bien placer, qu'elles tiennent en bride les grandes villes & qu'el-

les assurent les frontieres; afin que l'ennemy fasse difficulte de laisser derriere luy vne place qui puisse incommoder les viures; & que par intelligence ou autrement, il ne puisse se saisir d'vne principale ville, qui luy serue de siege pour entretenir la guerre dans le pais. Ces choses ainsi disposees, il faut regarder quel ennemy vous attaque. Si c'est vne puissance de confederez vnice ensemble, elle est plus aisée à desvuir, que quand elle dépend d'un seul: & en ce cas il est tres bon de faire naistre la defiance parmy eux; en feignant de l'intelligence avec quelqu'un des confederez, auquel monstrant plus de respect, & moins d'animosité, vous en donniez jalousie aux autres: comme aussi en procurant vne diuersion sur le pays d'un des autres, estant fort difficile que plusieurs puissances souveraines soient long-temps liguées ensemble; sans y naistre des dégousts, mes-intelligences, enuies & mesme des inimitiez, à cause de la diuersité de leur humeur & interests. Tellement que la puissance qui ne dépend que d'un seul Estat, est beaucoup plus à redouter: Et pource que vous pouuez estre attaqué plus ou moins viuement, il faut en dire vn mot. Si c'est par des forces qui ne soient pas trop disproportionnées aux vostres, vous pouuez sans desserter vostre pais le conseruer,

& avec vostre armée & vos forteresses consumer l'ennemy, en luy incommodant ses viures, & se retranchant tousiours si proche deluy, que vous luy empeschiez de faire aucun siege d'importance. Car si vn Conquerant n'auance, il recule, & luy est impossible de subsister dans vn pais qu'il veut conquerir, si d'abord il n'y prend pied, & ne s'y affermit par quelque prise considerable. Si aussi vous estes attaquez par vne puissance du tout disproportionnée à vos forces; en ce cas il faut deserter la campagne, & bruler tous les viures que vous ne pouuez contenir dans vos forteresses, & mesme toutes les villes & villages que vous ne pouuez garder. Car il vaut mieux se conseruer en vn pays ruiné, que de le conseruer pour son ennemy. Et c'est en cela qu'un Prince pour aquerir ce luy semble le nom de pitoyable enuers son peuple, (qui en telles occasions luy tourne le dos) deuiet cruel à soy-mesme. Mais c'est plustost vice d'irresolution, & de foiblesse de courage qui nous tient qu'une vraye compassion que nous ayons du mal d'autrui: comme celle de l'Empereur Othon, qui à la premiere disgrâce qui luy arriva, ses forces estans encor entieres n'osa tenter denouveau le hazard d'une bataille. Et celuy qui n'auoit peu auoir pitié de l'Empereur Gal-

ba en aage decrepit, de son successeur designé à l'Empire, & qui auoit fait toutes sortes de meschancetez pour y paruenir; veut persuader à la posterité, que la pitié de voir resplandre le sang Romain, l'auoit fait resoudre à l'espar-gner en se donnant la mort. C'est ainsi que souuent nous voulons couvrir nos vices de la vertu la plus proche. Mais comme c'est vne maxime, que nul bien public ne peut estre sans quelque preiudice aux particuliers; aussi vn Prince ne se peut démesler d'une perilleuse entre-prise, s'il veut complaire à tous. Et les plus grandes & ordinaires fautes que nous faisons en matiere d'Estat. & de guerre, prouiennent de se laisser emporter à cette complaisance, dont le repentir nous vient quand on n'y peut plus remedier. Mais pour eüiter tels orages, on doit tenir pour loy fondamentale de sa conseruation, de ne laisser croistre celuy de ses voisins qui se fait le plus puissant. Car il vaut mieux l'offenser pour l'empescher de se mettre en estat de vous perdre, que de le laisser accroistre de peur de l'offenser. Estant vne chose veritable, qu'on ne conserue sa liberté contre vn Conquerant par complimens, mais par la seule force.

Reste à parler des puissants Estats qui sans l'ayde d'autrui ont armes, & de quoy entrete-nir

nir tousiours la guerre. De cette taille il y en a peu, & n'ont à se garder que d'eux mesmes. Pource qu'un seul ennemy n'est assez puissant pour les attaquer, & qu'il est difficile que les ligues de diuers Princes se puissent toutes accorder à vn tel dessein, ny longuement y subsister ensemble. Neantmoins i'en diray vn mot. Les grands Estats sont tous ramassez ensemble, ou espandus en diuers lieux. Les premiers qui ont leurs forces toutes vnies peuuent attaquer, & deffendre plus puissamment, que ceux qui sont ainsi separez; pource qu'ils portent toutes leurs forces où le besoin le requiert, avec plus de diligence, de facilité, & moins de despense. Les autres mettent en allarme & ialousie plus de monde; pource qu'ils font frontiere à plus grand nombre d'Estats. Neantmoins si les vns & les autres sont attaquez, ils doiuent se seruir des deffenses proposées cy dessus. Seulement diray-ie qu'ils ne doiuent auoir de forteresses que bonnes, & en petit nombre, & seulement sur les frontieres, & nulles dans le cœur de l'Estat; pource qu'ayans plus à craindre les guerres ciuiles, que les estrangeres, & sàs lesquelles on n'attaqueroit iamais vn grand Empire; c'est leur oster la principale racine qui les fait entreprendre & subsister. Outre cela il ne faut perpetuer les gouuerne-

mens, ny aux familles, ny mesmes à vie. Mais le principal, & le plus puissant remede contre la guerre ciuile, est d'entretenir la guerre estrange; laquelle chasse l'oisiueté, occupe tout le monde, & particulièrement satisfait aux esprits ambitieux & remuans: elle bannit le luxe: elle aguerrit vostre peuple, & vous maintient en telle reputation parmy vos voisins, que vous estes l'arbitre de tous leurs differens. Il est bien vray que cette maxime n'est bonne à obseruer qu'aux Estats de cette derniere espee. Car comme elle leur est necessaire, ie la trouue dommageable aux petits Estats, qui doiuent apprehender toutes sortes de guerre; pource que n'estans assez forts pour en profiter, ils courent fortune d'estre la proye des plus puissants.





DES MOYENS

D'ASSEVRER VNE
CONQUESTE.

CHAPITRE XX.



LE Prince Souuerain est plus capable de faire de grandes & promptes conquestes, qu'une Republique; pource que se trouuant secret en son conseil, hardy en sa resolution, prompt en son execution, & ne craindre point d'estre contredit de personne; il fait plus de conquestes en dix années de sa vie qu'une Republique qui est moins secreta; qui est longue à se resoudre, qui bride l'autorité de ses Capitaines, & qui à toute heure contredit ses actions, ne scautoit faire en cent ans. Aussi une Republique qui va tousiours selon ses maximes qui n'est sujete au deffaut d'une personne, & dont le gouvernement ne reçoit alteration pour la mort d'aucuns d'eux, conserue bien mieux, & plus long-

temps ce qu'elle a conquis; qu'un Prince, qui souuent & presque tousiours, a un successeur aussi faineant qu'il a esté vertueux. Néanmoins ie veu icy estabir autant pour les vns que pour les autres, les vrayes maximes pour bié assseurer vne conqueste, lesquelles consistent en deux; à sçauoir d'oster la volonté à ceux que vous auez cōquis de se reuolter, & le moyen de le pouuoir faire. Pour la premiere, c'est vne chose certaine que si vous conquerez des gens libres, vous ne osterrez (pour le moins du viuant de ceux qui leur ont vescu tels) le desir de se remettre en liberté. S'ils sont sujets d'un Prince & d'un Estar, & qu'ils n'ayent fait que changer de Maistre, ils aymeront mieux demeurer sous l'autorité de celuy qui les traitera plus humainemēt. Pourtant il faut tousiours commencer par la voye douce, & establiir vne conditiō à ceux que vous auez cōquis qui soit seure, & pour la vie & pour le bien. Car si mesme parmy vos propres sujets on ne trouue cette seureté, il est à craindre qu'ils ne se reuolent: cōbien plus ceux de nouvelle conqueste? Estant vne loy de nature empreinte en toute creature, que le moindre petit animal a soin de sa conseruation: à quoy l'homme doué de raison, ajoustela conseruation de son honneur & de son bien, lequel il prefere souuent à sa propre vie. Donc vn Prince doit faire regner la iustice exacte, soustenir l'oppres-

se en son bondroit, s'abstenir luy mesme de route violence, soit pour l'honneur des fêmes, soit pour le bien. Car sans cela il est impossible d'appriuoiser des gens conquis. Il faut aussi les maintenir le plus qu'on peut, dans la forme de leur gouuernement, & n'exclure aucun d'iceux d'iceux de pouuoir paruenir aux charges, dignitez, & honneurs qu'ils peuuent posseder, sans preiudicier à la seureté. Et si c'est vn Prince qui fasse cette conquete, le moyen des'en bien asseurer est, d'y establir son sejour le plus qu'il pourra; pource que sa presence empesche beaucoup de desordres, que la splendeur de sa Cour imprime vne certaine veneration dans l'esprit des peuples, & qu'elle fait gagner les artisans & bourgeois où elle demeure.

Si c'est vne Republique qui ne peut changer le siege de son Empire: il faut pourtant que ceux qu'elle y enuoyera pour gouuerneurs, y soiet avec splendeur. Car les peuples s'attachent quelques fois plus à l'apparence, qu'à la realité. Ce sont les moyens qui insinuent insensiblement l'obeissance aux peuples nouuellement conquis. Mais pource que cela ne suffit pas, & que souuent la facilite de se reuolter impunement, en fait venir l'enuie; il est necessaire de se precautioner, des seuretez requises, lesquelles consistent, à auoir les armes & les forteresses entre les mains. Je n'entend pas

desarmer tout à fait les peuples; car si l'on peut, il n'en faut pas venir là; mais s'asseurer des grosses Communautés par de bonnes forteresses; auoir les Arsenaux en diuers endroits, & non tout en vn lieu, & ne laisser aucune ville ny chasteau, hors vos forteresses de garnison, qui puisse endurer cent coups de canon. Il y a vn dernier moyen dont les Anciens se seruoient vtilement, & maintenant du tout delaisé, que j'approuue merueilleusement; qui est d'establi des Colonies, & transporter des peuples d'un país à l'autre. Car outre que c'est vne grande bride, pour tenir en deuoir vn país conquis; vous recompensez par ce moyen là plusieurs soldats qui vous ont bien seruy. Et ie ne trouue pas vallable la raison qu'on allegue, qu'il y a de la cruauté de faire cette permutation & que cela est contre la charité. Au contraire ie trouue bien plus cruels les remedes dont on se sert ordinairement, de tenir si bas les peuples, qu'ils n'ayent que la vie, & ne puissent esperer aucun honneur dans leurs país. Pour moy i'auoüe franchement, que j'aymeroie mieux estre chassé de mon país dans vn autre, où l'esperance me resteroit, & aux miens de pouoir paruenir à quelque chose de plus que ie ne suis; que de demeurer dans le mien priué de cette esperance; ne trouuant rien de si dur, que

d'oster à l'homme l'esperance, qui est celle qui en ce monde, & pour les biens du monde, luy fait entreprendre toutes choses, & qui pour les biens de l'autre vie, luy fournit de constance pour souffrir toutes choses. Aussi n'y a-il rien qui distingue tant l'homme de la beste, ny mesme l'homme regeneré, de l'homme sensuel, que l'esperance. Ce qui me fait conclure, qu'il ne faut iamais oster à l'homme l'esperance de pouuoir obtenir vne condition meilleure que celle qu'il possède, afin de ne le ietter dans le desespoir.



COMME IL FAUT

PROCEDER POUR

SECOVRIR SON ALLIE

& Confederé?

CHAPITRE XXI.



NE des plus honorables actions que face vn Prince, & qui luy apporte plus de reputation; est de secourir les Alliez en leurs necessitez. Mais c'est vne

chose qui souuent est bien difficile. Quand on choisit ses auantages, & on prend son temps & ses mesures, selon ce qu'on peut & veut faire. Il n'en est pas de mesme au secours de son Allié, qu'il faut secourir avec les difficultez & incommoditez qui s'y rencontrent. Si son païs est ioint au vostre, & que rien ne vous empesche de l'assister avec toutes vos forces vnies, vous ne pouuez auoir autre excuse de le faire, sinon que vous redoutez son ennemy, & ne le voulez offenser; qui est vne raison lasche, & non iudicieuse. Car par cette excuse, vous n'éuitez pas le peril que la perte de vostre voisin vous attirera; estant beaucoup meilleur de resister ensemble, que de vous laisser deffaire les vns apres les autres. Mais si c'est vn Allié separé de vous par d'autres Princes & Estats, (ce qui arriue souuent) & qu'il se rencontre de grandes difficultez pour penetrer iusques dans son païs; il faut lors bien penser de quelle façon vous le secourerez. Car si les Estats qui sont entre deux vous refusent le passage, & qu'il vous faille les combattre auant que pouuoir assister vostre Allié; il est à craindre que vous ne le pourrez secourir à temps. Si aussi vostre voisin, ou pour crainte de vous, ou de celui qui attaque vostre Allié, vous offre le passage; vous ne pouuez l'accepter seurement, qu'il

qu'ils ne vous mette entre les mains les lieux nécessaires pour assurer vostre retour; ce qui vous estant refusé, vous ne devez passer outre. Mais si l'ennemy de vostre Allié a des Estats proche de vous; & que vous puissiez attaquer facilement; il faut le faire vertement, & le secours qui se peut donner par diuersion est à mon gré le plus seur, & celuy qui reussit les mieux; pource que vous le faites avec toutes vos forces & commoditez, & que d'ordinaire ce que vous attaquez n'est bien pourueu; à cause que celuy qui attaque vn autre Estat, emmene avec luy les meilleurs Capitaines & soldats qu'il ait. Mais si tous ces moyens vous manquent, il ne reste plus que celuy de l'argent dont on le peut assister, lequel souuent n'est suffisant de le sauuer.



QUEL EST LE

MEILLEUR QV'VN

GRAND-PRINCE FACE

la guerre en personne ou par

Lieutenant.

CHAPITRE XXII.



Est à propos de traiter en cet endroit, si le Prince doit conduire ses guerres en personne, ou par Lieutenans: pource que la pratique en estant diuerse, chacun apporte ses raisons pour soustenir son opinion. Ceux qui improuuent qu'il la fasse en personne alleguent, que sortant de son Estat, il ouure la porte à la broüillerie, & s'oste le moyen d'y pouruoir: qu'il luy est plus necessaire de conseruer en paix le dedans, que de faire la guerre au dehors: à quoy rien ne peut tant seruir que sa presence qui tient en bride les plus remuans: que tenant le dedans en obeissance, il peut donner meilleur ordre aux affaires de dehors: qu'il arriue de plus grands inconue-

niens & plus irremediabiles, quand le Prince est engagé en personne hors de son Estat, que quand il est dedans. S'il reçoit vn eschec en personne, esloigné de son pais : les remuans sont plus hardis à faire vne nouueauté : chacun s'emancipe & sort de son obeissance. S'il y est tué, ses suiets s'en estonnent, & son ennemy s'enhardist & en retire de grands auantages : s'il y est pris, c'est encor pis. car nul ne se pouuât declarer Prince, & les principaux voulans profiter de sa calamité, mettent les affaires en telle confusion, que rien ne se fait plus en l'Estat avec autorité ; pource que ceux qui se saisissent du gouuernement, tyrannisent les autres Grands qui y pourroient pretendre, lesquels souuent ayment mieux appeller l'ennemy commun, que d'obeir à leurs compagnons. A quoy ils aioustent que le Prince ne peut se libérer, sans faire de grands atantages à son ennemy, qui luy tournent & à son Estat, à vn notable & irremediable preiudice. Tellement que toutes choses balancées, ils concluent que les inconueniens sont beaucoup plus. grands de hazarder la personne du Prince dās les guerres, que de les faire conduire par ses Lieutenans. Cette opinion est principalement maintenüe par les gens de robbe longue, ennemis naturellement des gens de guerre, & qui con-

seruans mieux leur autorité dans la paix, que dans la guerre, ne déconseillent pas seulement d'aller en personne à la guerre; mais mesme conseillent de souffrir toute sorte d'ignominie, plustost que de le faire. A quoy se ioignent les flateurs, les maquereaux, & toutes les pestes des Princes, qui dans la paix les entretiennent à vne oyssuete qui les porte à toute sorte de luxe leur faisant croire que leurs Estats ne sôt faits que pour eux, & non eux pour leurs Estats: que débaucher vne femme est plus honorable, que conquérir vne Prouince: qu'il y a plus d'industrie & de gloire à bien arranger vn festin, qu'à vne bataille: que la peine n'est faite que pour les faquins; & que les grands Roys doiuent faire agir toutes choses sans se mouuoir qui est le chemin ordinaire de la perte des Royaumes & des Empires.

Ceux qui conseillent au Prince de faire la guerre en personne, alleguent que le commandement d'une armée est vn morceau si friand, qu'il ne le doit départir à autrui sans grande necessité: pource que pour bien s'acquiter d'une telle charge, il faut estre fort absolu, & souuent les Generaux d'armée ne se contentent dans leur deuoir, sur tout quand le Prince ne fait le sien. Car en ce cas, il est naturellement ennemy de la gloire d'autrui, & ne peut supor-

ter les bonnes actions de son Lieutenant, encores qu'elles reussissent à son profit. En laquelle humeur l'entretiennent ceux qui gouvernent les affaires, lesquels apprehendent qu'une vertu eminente ne les suplante; & c'est d'où prouient l'infelicité de la pluspart des beaux desseins, quoy que bien entrepris: lesquels on fait perir ou par faute d'argent, ou de viures; ou en restraignant l'autorité du General; ou en luy baillant des Chefs qui le contrequarrent, & qui luy seruent plustost d'entraues que d'aydes. Et lors que les affaires n'ont succédé comme on s'estoit imaginé; on en reiette la faute sur l'innocent: & le coupable en triomphe. Que c'est ainsi que les grands Princes qui feront les guerres par Lieutenans seront seruis: que la reputation est tout autre d'un Prince bon Capitaine, que d'un Prince quia de bons Capitaines: que le premier est redouté de par luy mesme, & l'autre de par autrui seulement: que le premier ne se peut trahir luy mesme, & on peut corrompre à l'autre des Capitaines: que le premier sçait faire le choix de ceux qui sont propres à la guerre, & que l'autre ne les a bons que par hazard: que l'autorité du premier n'est si enuiée ny contrequarrée, puis qu'il est maistre, & qu'il n'a à rendre compte de ses actions à personne; mais que celle du

Chef de l'armée de l'autre, est soumis à vne perpetuelle ialousie, & bien-heureux qui en eschappe: que le moyen d'empescher les guerres ciuiles, estrangeres, où ils trouuent dequoy satisfaire à leur ambition: comme aussi d'estre tousiours armé; pourceque cela refroidit les plus eschauffez: & que le Prince soit à la teste de son armée, afin que nul ne se puisse preualoir d'icelle contre luy. Ils alleguent encor que iamais Prince n'a fondé vn grand Empire, qu'en faisant la guerre en personne, ny ne l'a perdu, que quand il a fait la guerre par ses Lieutenans. C'est maintenant au Prince à choisir ce qu'il a à faire sur ces deux auis. Si c'est vn faincant qui se contente d'estre admiré de ses valets, qui ne se plaist qu'à la volupté, & qui laisse de faire le mestier de Roy, pour ce luy de maraut; il ne prendra iamais le conseil de commander luy mesme ses armées. Si c'est vn Prince sage, qui ayme le repos pour conduire son peuple en iustice; il ne l'airra pourtant d'estre préparé à la guerre, & de s'y instruire, afin qu'en vn besoin, il ne cōmette le commandement de ses armées à autrui. Mais si c'est vn Prince genereux qui se picque de la gloire, & vueille imiter ces grâds homes qui viuēt encor deux mille ans apres leur mort, & dōt les noms venerables honorent auourd'huy ceux qui les

proferent; il choisira sans doute pour son principal mestier celuy de la guerre, auquel il taschera de se rendre expert, afin de ne dependre d'autrui en la conduite de ses armées, & en fera ses delices. Aussi est-ce la vraye volupté que celle qui contente l'esprit, laquelle est particuliere à l'homme, & commune aux grands hommes. Car la volupté corporelle tient plus de la beste que de l'homme. Ainsi celuy qui s'y addonne tout à fait est pire qu'une beste brute.



DE LA
REPUTATION.
CHAPITRE XXIII.



EST vne chose qui ne se peut comprendre, combien la reputation d'un Chef d'armée sert, & combien elle est difficile à conseruer. Car si apres auoir acquis l'estime d'estre un homme sage & de grande conduite, vous la voulez conseruer par prudente; on dit que vous deuenez poltron: & si en hazardant quelque

combat vous receuez vn eschecc, vous estes tenu pour temeraire. Tellement qu'il n'y a fonction au monde plus suiète au blafme, que celle d'un General d'armée. Et bien-heureux est le Capitaine, qui maintient entiere sa reputation iusques à la fin. Neantmoins tandis qu'elle dure elle fait de merueilleux effets. Car quand il a acquis le nom d'heureux en guerre, ses soldats croyent qu'il ne peut estre batu, & vont sur sa parole si assurement au combat, qu'ils ne reconnoissent plus le peril; se persuadans qu'il ne commande iamais de combattre qu'il ne soit assure de la victoire. Ce qui les encourage tellement, qu'ils en combattent avec beaucoup plus de resolution. De plus les ennemis à la rencontre d'un tel homme, ne combattent qu'en crainte, comme assurez d'estre batuz. Il y a mille exemples antiques & modernes de cette verité. Quand l'armée d'Alcibiades (encor qu'il en fust absent) estoit batue, les Atheniens croyoient que ce fust de son consentement: La seule renommée de l'arriuee de Cesar & d'Alexandre, quoy qu'avec peu de forces, a fait diuerfes fois rendre des Prouinces & fuir des armées. La seule reputation du Roy HENRY quatriesme, qui fut reconnu dans le combat de Fontaine François, où il estoit arriué le iour auparauant. comme

me en poste, fit abandonner aux Espagnols la Bourgongne. l'ay veu les Dauphinois auoir cette creance, que le Connestable del'Idiguieres ne pouuoit estre batu. Mais comme cette opinion est d'une grande vtilité à vn Chef d'armée quand ill'a acquise; aussi celle d'estre malheureux en guerre, luy est vn grand malheur. Car il est impossible de se pouuoir rassurer sur des soldats, qui ont cette creance de leur Chef. C'est pourquoy vn General d'armée doit auoir pour principal but de bien commencer: puis n'obmettre aucune chose pour conseruer l'acquis; se reseruant plustost de mourir glorieusement en quelque grande action que de trainer vne vie honteuse apres en auoir commis vne lasche. Car comme le mestier de la guerre est celuy de tous qui apporte le plus d'honneur à vn homme qui s'en acquitte bien; aussi acquiert il le plus d'infamie, s'il s'en acquitte mal.

F. I N.**Nn**

dialement seruir; les Capitaines à sagement commander, glorieusement vaincre, ou mourir; les vainqueurs à iouir modestement de leurs victoires; & les souuerains à conseruer les frui&ts de leurs conquestes avec ialousie, clemence, foy, & iustice; Voilà chere Patrie, & sincere Lecteur, vn sommaire du precieux liure que ma deuotion t'a offert il ne peut qu'il ne profite grandement; il est admirable en toutes choses en doctrine, en iugement, en son ordre, en sa composition; le Stil en est masle, & vigoureux, n'a rien de celuy du siecle qui est fort enflé, mais semblable aux Hydriques; l'ay fait vers toy mon deuoir, qu'il t'agrée ou non; si diray-ie hardiment que cét œuure est autant au dessus de toute enuie qu'il est inimitable.

DAN: PERREAUX. Parisien;
Aduocat en Parlement.

DE L'INTEREST
DES PRINCES
ET ESTATS DE LA
CHRESTIENTE'.

Par Monsieur le Duc de Rohan.




A PARIS.

Chez Augustin Courbé, Libraire & Im,
Monsieur frere du Roy, dans la petite
du Palais, à la Palme.

M. DC. XXXX.

Avec Privilege du Roy.





A MONSIEVR LE
CARDINAL
 DE RICHELIEV.



MONSIEVR,

Il n'y a rien si difficile que de sçauoir regner, & ceux qui ont esté les plus entendus en ce mestier, ont confessé en mourant qu'ils y estoient apprentifs. La raison vient, de ce qu'on ne peut establir vne reigle immuable dans le gouuernement des Estats. Ce qui cause la Reuolution des affaires de ce monde, cause aussi le changement des maximes fondamentales pour bien regner. C'est pourquoy ceux qui en ces matieres se guident plus par les exemples du passé, que par les raisons presentes, sont par nécessité des manquemens notables. Aussi n'appartient il pas à tous de iuger le vray interest d'un Etat, & le sçauoir suiure. Il faut des lumieres plus que naturelles, pour observer les mutations d'une chose si difficile à comprendre. Quant à moy, MONSIEVR, qui pour n'estre oisif dans l'oisiueté mesme, me suis meslé d'escrire icy de l'interest des Princes de la Chrestienté: Je croy que vous ne iugez pas que j'aye entrepris ce discours, pour vouloir passer pour un Censeur d'Estat. Je confesse bien

que voyant tous les iours tant de Reuolutions Eſtrangeres deuant mes yeux, ie n'ay pû me tenir d'en faire quelque conſideration pour mon contentement particulier. Or, MONSIEVR, ie ne veux pas ſeulement vous rendre compte de tout ce que i'ay fait, Mais meſme de ce que i'ay fait, quand ie ne faiſois rien. Je vous apporte donc icy ce qui m'eſt venu en penſee ſur vn ſi beau ſuiet. Le ſeul tiltre vous incitera de paſſer plus auans. Vous iugerez bien qu'on ne peut parler de l'intereſt des Princes de ce temps, ſans faire vn viſ portrait de ce que vous auez fait iuſques à preſent pour la grandeur de cette Couronne. Vous vous verrez donc dans peu de lignes repreſenté tout entier : en tout ce traité il ne ſera parlé que de vous, bien qu'il n'en ſoit iamais parlé. Voſtre modeſtie & ma franchise ne me permettent pas de m'exprimer en autre façon, tenant, que les louanges ordinaires ſont tort à ceux de ſquels les actions parlent ſi clair. Ce n'eſt pas auſſi par là que ie me veux rendre digne de vos bonnes graces, Mais bien par des ſeruices proportionnez aux obligations que vous auez acquiſes ſur moy, que ſeray toute ma vie.

MONSIEVR,

Votre tres-humble tres-affectonné &
obligé ſeruiteur.

H. DE ROHAN.



DE L'INTEREST DES PRINCES ET ESTATS DE LA CHRESTIENTE.

LES Princes commandent aux peuples, & l'interest commande aux Princes. La connoissance de cét interest, est d'autant plus releuée par dessus celle des actions des Princes, qu'eux-mesmes le sont par dessus les peuples. Le Prince se peut tromper, son conseil peut estre corrompu; mais l'interest seul ne peut iamais manquer; selon qu'il est bien ou mal entendu, il fait viure ou mourir les Estats: Et comme il a tousiours pour but l'accroissement, ou pour le moins la conseruation; Aussi pour y paruenir faut-il, qu'il se change selon le temps. Desorte que pour bien considerer l'interest des Princes d'aujourd'huy, il n'est point besoin de remonter fort haut; Mais seulement de le prendre sur le pied des affaires presentes. Pour cét effet il faut passer pour fondement, qu'il y a deux Puissances dans la Chrestienté; qui sont

A

comme les deux Poles, deſquels deſcendent les influéces de paix & de guerre ſur les autres Eſtats: à ſçauoir les Maisſons de France & d'Eſpagne. Celle d'Eſpagne ſe trouuant accreüe tout d'un coup, n'a pû cacher le deſſein qu'elle auoit de ſe rendre maiſtreſſe, & de faire leuer en Occident le Soleil d'une nouuelle Monarchie. Celle de France s'eſt incontinent portée à faire le contre-poids. Les autres Princes ſe ſont attachez à l'un, ou à l'autre ſelon leur intereſt. Mais d'autant que ſur ce qu'il a eſté bien ou mal ſuiuy, il a cauſé la ruine des vns ou la grandeur des autres; l'ay reſolu de faire voir en ce preſent Traité; Premièrement quel eſtoit le vray intereſt de ces deux grandes Puifſances, & des autres qui ſemblent en quelque façon dependre de leur protection: Apres cela, ie montreray combien on s'eſt eſloigné de ce vray intereſt, ou pour n'auoir pas eſté bien entendu par le Prince, ou pour luy auoir eſté déguifé par la corruption de ſes Miniſtres.





DE L'INTEREST D'ESPAGNE.



Espagne est à la teste del'Europe, où l'Océan luy sert de bornes sur le fueil de la mer Mediterranée, qui la separe de l'Afrique; Ayant les Pyrenées pour barrieres contre la France. De cette grande Province si bien située dependent plusieurs Estats, esparpillez en diuerses parties du monde. Philippines qui auoit entrepris d'estendre cette vaste puissance au sommet de toute grandeur, se reconnoissant moins propre à la guerre qu'aux pratiques, iugea que les Monarchies acquises comme en poste, par la valeur des Princes grands Capitaines, ne sont de pareille durée, que celles qui s'obtiennent par l'establissement d'un bon Conseil, & qui sont fondées sur des bonnes maximes. Pour ce que ces grands Conquerans, qui ne songent qu'à vaincre & à estendre leur domination, & non à fonder les Loix de leur subsistence, n'estans pas ordinairement suivis de leurs semblables: & les vaincus n'ayans pas encore perdu la

4 *De L'intereſt des Princes*

memoire de leur liberté, ou de leurs anciens Seigneurs, ſe portent facilement à quelque mutation ſe voyas affranchis de la crainte de celuy qui les auoit aſſujettis. Cela fit reſoudre ce ſage Prince à ſuivre ſon Génie, & a choiſir la voye la plus conforme, a ſçauoir de pourſuiure ſes deſſeins ſous vne profonde diſſimulation.

Pour cet effet il eſtablit le ſiege de ſa domination en Eſpagne, pour de là enuoyer la chaleur aux membres détachés de ce corps, & pour auoir plus de loiſir en la conſervant en paix par ſa preſence, de tenir en trouble tout le reſte de l'Europe par ſes artifices. Mais le temps luy ayant manqué pour l'eſtabliſſement d'un ſi haut deſſein, il l'a laiſſé ſi auancé; qu'il a eſté facile à ſes ſucceſſeurs de le pourſuiure. En voicy les maximes obſervées encores auourd'huy comme Oracles, qui ſont proprement le vray intereſt d'Eſpagne.

La premiere eſt fondée ſur la Religion, comme celle qui par conſcience fait entreprendre toutes choſes aux peuples. Il faut teſmoigner un grand zele à la foy Catholique, afin de ſe ſeruir d'elle en ſes deſſeins; faire comprendre au Pape, que ſauoriſer la grandeur d'Eſpagne en ruinant les Proteſtans, eſt le ſouſtien de ſon autorité, & l'augmentation de ſa puiſſance. Il faut perſuader aux autres Princes d'Italie, que de la protection d'Eſpagne depend le ſouſtien de l'Egliſe contre

toute autre puissance : Qu'elle empeschera l'entrée en Italie aux Estrangers , pour garantir la Religion , qui ne pourroit estre que souillée par vn tel commerce. En France, où il y a des Protestans , & où les Catholiques sont les Maistres, Il faut inciter le Roy à exterminer ceux là, sollicitier le Pape de faire la mesme instâce, & sous main donner courage & assistance ausdits Protestans pour y esmouuoir vne guerre ciuile, qui affoiblisse de tant plus le Royaume. Si le Roy s'apperçoit de l'artifice de ce conseil, & n'y veut entendre, faut alors esmouuoir les Catholiques mesmes contre luy , comme contre vn fauteur d'heretiques, les assister puissamment & y engager le Pape s'il se peut ; car en quelque façon que ce soit , il faut que Royaume se ruine de soy-mesme, comme celuy qui se rencontre en tous lieux en empeschement au dessein de la Monarchie Espagnole.

En Angleterre, où les Protestans sont les maistres, il faut faire la paix en toute maniere avec ce Royaume, afin que par la puissance qu'il a sur la mer, il ne l'incommode aux Indes: où sont ses principaux thresors , & que sous cette apparente amitié, il puisse plus facilement se rendre Protecteur des Catholiques d'Angleterre. Pour cela il faut se seruir des Colleges establis exprés en Flandres & en Espagne, pour instruire

la ieuneſſe Angloiſe en la Religion Catholique; l'inciter d'y venir par la liberalité qui y eſt exercée, d'y faire leurs eſtudes ſans rien payer, où la Theologie qu'ils apprennent eſt d'acquérir le martyre, & meriter le Paradis, en ſervant la grandeur d'Eſpagne, aux deſpens de leur Roy & de leur patrie.

En Alemagne, où encore quel'Empereur ſoit Catholique, les Proteſtans y partagent ſi bien l'autorité, il faut maintenir l'Empire dans la maiſon d'Auſtriche, qui eſt celle d'Eſpagne, comme le ſeul boulevart contre les Proteſtans, & l'accroître de leurs deſpoiüilles, ſous pretexte de la Religion, & de vouloir par là deſſendre la Chreſtienté contre le Turc.

En Suiſſe, où l'autorité eſt partagée entre les deux Religions, faut animer les vns contre les autres; dans eſperance aux Catholiques de la deſpoiüille des Proteſtans, & les tenir en haleine pour les faire rompre ſelon l'occaſion.

Aux Pays-bas, où les Catholiques n'ont aucun pouuoir, & où de ſi longues & ſi ſanglantes guerres n'ont pû reduire ces peuples ſous le ioug d'Eſpagne, faut procurer de leur faire tomber les armes des mains par vne longue trêve, & dans cecorepoſy fomenteur vn chiſme qui les diuiſe entr'eux.

Pour meſnager ces choſes, il faut venir au

deuxiesme point, qui est la maniere de fomen-
ter des intelligences necessaires en tous les autres
Estats; ce qu'il faut faire par la voye des Ambas-
sadeurs, comme personnes auxquelles on porte
tout respect; par les Moines & Predicateurs, qui
ont grand pouuoir dans leurs chaires, & mes-
me dans les familles particulieres; par l'argent,
auec lequel s'acquierent les confidens, à quoy il
ne faut l'espargner: Sur tout il faut s'attacher à
gagner les principaux Ministres des Princes,
pour destourner les desseins dangereux, qu'on
pourroit auoir contre l'Espagne, ou rendre
odieux ceux qu'on trouuera trop fideles, & en
toute maniere les perdre.

Le troisieme poinct touche les negociations
& Traitez, auxquels il faut employer des person-
nes secrettes & patientes, montrer tousiours vn
desir de paix pour endormir les autres, & cepen-
dant se preparer à la guerre pour les surprendre
au despourueu. S'il arriue dispute entre deux pe-
tits Princes, faut s'entremettre de leur accom-
modement, ou comme Iuge ou comme Arbi-
tre, & en l'vne & l'autre qualite, auoir s'il se peut
en depost ce qui est en debat entr'eux, les aigrir
s'il se peut au lieu de les adoucir, s'accommoder
auec l'vn pour partager les depouilles de l'autre,
& sur le partage deposseder tous les deux. Ne per-
dre aucune occasion des'entremettre des affaires

8 *De l'intérêt des Princes*

de ses voisins, mais exclure les autres des siennes; Sur tout les François de celles d'Italie, les empêchant d'y auoir aucune entrée, pource que ce sont les seuls, qui peuvent rompre les desseins d'Espagne en cette Prouince-là.

Le quatriesme point, consiste à estre tousiours puissamment armé, c'est vn moyen assuré pour tenir en deuoir ses sujets; & en respect ses voisins pour preuenir les desseins de ses ennemis, pour les surprendre s'ils s'endorment, & pour se preualoir des occasions inopinées.

Le cinquiesme point, est la reputation; & bien qu'il dépende des quatre précédens, neantmoins estant purement considéré, il establit vne cinquiesme maxime, de laquelle l'Espagne se sert aussi vtilement que d'aucune des autres. Car l'opinion qu'on a de son grand zele pour le maintien de la Religion Catholique, couure du manteau de pieté tous ses desseins, & tient le peuple en vne merueilleuse veneration. La peur qu'on a de ses profondes intelligences par tout, fait bien penser les autres Princes à ne s'engager pas facilement, contre elle. L'assurance confirmée dans les esprits des hommes, par tant d'expériences de sa prudente dextérité, à se sçauoir auantager dans les Traitez, inuite ceux qui luy sont interieurs, à entrer plus hardiment en ligue avec elle, & à se mettre sous son ombre. L'estat de ses
armes

armes toujours sur pied consume ceux qui en prennent ialousie, & aisseure les autres qui dependent de sa protection.

De toutes ces choses resulte la reputation d'Espagne, son interet est de bien menager cette pieté. C'est vne chose vaine en apparence, mais qui produit de solides effets: & bien que tous les Princes tiennent pour maxime generale de conseruer soigneusement leur credit, l'Espagne en doit estre d'autant plus ialouse, que ses desseins sont plus grands que ceux des autres Estats.

Cette grande machine composée de tant de parties & comme enpeschée de son propre poids s'emue par ces seerets ressorts, qui perdent leur force à mesure qu'ils sont decouuerts.

Le Roy d'Espagne a esté le premier à se faire
connoître par ses armes, & par ses victoires.
Il a esté le premier à se faire connoître par ses
lois, & par ses ordonnances. Il a esté le premier
à se faire connoître par ses ambassadeurs, & par
ses ministres. Il a esté le premier à se faire
connoître par ses lettres, & par ses ordres.
Il a esté le premier à se faire connoître par
ses armées, & par ses victoires. Il a esté le
premier à se faire connoître par ses lois, & par
ses ordonnances. Il a esté le premier à se faire
connoître par ses ambassadeurs, & par ses
ministres. Il a esté le premier à se faire connoître
par ses lettres, & par ses ordres. Il a esté le
premier à se faire connoître par ses armées, &
par ses victoires. Il a esté le premier à se faire
connoître par ses lois, & par ses ordonnances.
Il a esté le premier à se faire connoître par ses
ambassadeurs, & par ses ministres. Il a esté le
premier à se faire connoître par ses lettres, & par
ses ordres. Il a esté le premier à se faire connoître
par ses armées, & par ses victoires. Il a esté le
premier à se faire connoître par ses lois, & par
ses ordonnances. Il a esté le premier à se faire
connoître par ses ambassadeurs, & par ses
ministres. Il a esté le premier à se faire connoître
par ses lettres, & par ses ordres. Il a esté le
premier à se faire connoître par ses armées, &
par ses victoires. Il a esté le premier à se faire
connoître par ses lois, & par ses ordonnances.



DE L'INTEREST DE LA FRANCE.



A France, posée entre les Alpes & les Pyrenées, & flanquée de deux mers, semble estre invitée par la nature à s'opposer aux progrès de cette Puissance voisine. Car elle se trouue comme vne Digue contre ce Torrent, & l'opportunité de sa situation est telle qu'elle peut empêcher la distribution de la teste aux membres de la Monarchie qui luy est contraire. Mais cela ne suffisant pas pour trauerser les progrès d'Espagne, l'intereſt de la France est, de prendre tout le contrepied des maximes que nous venons de vous deduire.

Henry quatriesme, comme celuy sur lequel la souplesse de tous ces artifices a esté exercée iusques au dernier point, les ayant mieux reconnus qu'aucun autre deuant luy, pour les auoir plus esprouez, a le premier estably pour le vray intereſt de la France, de contrepointer celuy d'Espagne en tous ses poincts.

De sorte que si la premiere maxime de l'intereſt

d'Espagne, est de persecuter les Protestans pour s'accroître de leurs dépouilles, la premiere de celui de France est, de faire comprendre aux Catholiques le venin caché la dessous : Sur tout de faire voir à la Cour de Rome, que ses esperances qu'elle luy donne d'augmenter les thresors par la ruine des Protestans, n'est que pour auancer son dessein à la Monarchie, où elle ne peut paruenir que le Pape ne deuienne son valet, l'autorité duquel n'éclaire point dauantage que quand la puissance des Princes & Estats Chrestiens est balancée: Et aux Princes & Estats Protestans, qu'encores qu'elle soit de diuersse Religion à la leur, elle aymeroit plustost leur conuersion que leur distribution; les assurant, que cela n'empeschera point qu'elle ne contribué du sien pour leur cōseruation, & ne les assiste franchement contre tous ceux qui voudrōt troubler ou changer quelque chose en leurs Estats, & en leurs libertez.

Et comme la seconde maxime de l'interest d'Espagne, est de se seruir vtilement à son dessein des intelligences; La seconde de celle de France, est, de ne s'endormir pas aux siennes. N'espargner l'argent en espions & pensionnaires, afin de scauoir ce qui se passe chez les voisins, & que selon les occasiōs elle fortifie les foibles, assure les craintifs, empesche l'engagement de ceux qui sont esbranlez, retire ceux qui sont engagez, & qu'elle trauese par tout & en toute maniere les intelligences d'Espagne.

A la troisiéme maxime, qui regarde la négociation, il ne faut souffrir que l'Espagne se mêle d'aucun Traité que la France n'y interviene de son costé: sur tout en Italie, où elle veut estre seuleinge & arbitre; Ce qu'elle seroit, si la France ne s'estoit assurée d'une porte pour y entrer; laquelle elle doit conserver autant de temps qu'elle voudra s'opposer à sa grandeur, & estre considérée comme le boulevard de la liberté Chrestienne. Il faut aussi choisir pour traiter avec l'Espagne des personnes flegmatiques, & qui n'ont rien de l'humeur impatiente dont on accuse la nation Françoisse, afin de leur ôter l'esperance de profiter par les longueurs; dont l'Espagne a accoustumé d'ennuyer tout le monde.

A la quatrième maxime, faut opposer la force à la force. Car ny les persuasions, ny la justice des armes, ne fera la løy à celuy qui sera armé: tellement que la France doit se retrancher de toute autre dépense moins utile, & estre toujours puissamment armée, ayant suffisamment pour ce faire, sans emprunter d'ailleurs les soldats, les munitions, & l'argent.

Moyennant que les susdites maximes soient bien observées; la reputation d'Espagne dont elle se preuaut si avantageusement demeurera affoiblie, celle de la France releuée, & les autres Princes & Estats Chrestiens voyans un tel contrepois aux as-

faïres reprendront courage, & sans apprehension de souccomber à l'auenir, embrasseront volontiers la cause de leur conseruation.



DE L'INTEREST DES PRINCES D'ITALIE.

L'Italie qui est entourée des Alpes, & de la mer Mediterrannée, apres le deluge de ces nations Barbares qui l'ont affligée si long temps, sembloit ne deuoit plus penser qu'à se preualoir del'opportunité de la situation, pour se tenir close & couuerte, & autant separée par l'interest des Prouinces qu'elle s'en trouue diuisée par son assiette. Et veritablement c'estoit lors la maxime qu'elle deuoit tenir; car ces petits Princes pouuoient viure paisiblement sous l'ombre des plus grands, qui ayans entr'eux mesmes leur iuste contrepoids ne pouuoient rien tenter sur leurs inferieurs, les principales Puissances partageans ensemble la domination d'une telle Prouince, auoient raison d'exclure leurs voisins de la connoissance de leurs affaires.

Mais depuis que le Roy d'Espagne a mis le pied

dans l'Italie, & que se trouuant maistre des deux bouts, il a fait pancher la balance de son costé ; le vray interest en general de tous les Princes Italiens a esté, de tenir tousiours pour le moins vne porte ouverte pour se garder de l'opression, qu'une si formidable Puissance leur doit faire apprehender.

Et bien que pour cet effet ils doiuent entretenir des pratiques avec d'autres Princes, il leur importe pour trois raisons, que ce soit principalement avec le Roy de France. Premièrement, pour le voisinage, & l'opportunité de pouuoir les secourir, ou par mer ou par terre. En second lieu, pour les grandes forces que ce grand Royaume peut promptement mettre sur pied. Et finalement pour tenir, par cette bride l'Espagnol en deuoir, qui sans cela se comporteroit enuers eux avec moins de moderation.


L'autre maxime que l'Italie doit obseruer, est de se maintenir en paix : Premièrement, parce qu'il n'y pourroit auoir guerre que les Roys de France & d'Espagne n'y voulussent prendre part, ou comme fauorisans l'un des partis, ou comme arbitres. Apres cela, il faut considerer, que la guerre ne pourroit s'allumer en cette Prouince, sans grand peril de reueillir plusieurs humeurs qui dorment à present.

Voila les deux points dans lesquels gist l'interest d'Italie en general : Et bien que chaque Prince doiu e auoir la mesme mire, il y a cependant quel-

ques interests particuliers en chaque Estat. La République de Venise à l'esgard de l'estenduë de sa domination & par mer & par terre, de la fermeté de son establissement par douze siecles entiers, & de la prudente conduite d'un si sage gouvernement, est sans controuerse la premiere Puissance d'Italie apres celle du Roy d'Espagne. Et comme telle elle a esté la premiere aussi qui a estably les regles de sa conseruation, & qui les a plus ponctuellement suiuiés en prenant pour son interest particulier celuy de l'Italie en general.

Outre cela pour des respects particuliers elle tient pour maxime, d'entretenir vne estroite pratique avec le Turc, pour laquelle elle n'espargne aucune despence. Elle croit aussi que son interest est d'entretenir la guerre au dehors, & de fomenter par argent, ce que les autres Princes d'Italie deueroient faire aussi bien que les Venitiens, s'ils auoient le pouuoir & la hardiesse de l'entreprendre.

Elle ne pert point de temps pour empescher que le Roy d'Espagne & le Pape ne s'agrandissent; & bien que ce soit vne maxime commune à tous les Princes, des'opposer à l'accroissement de leurs voisins; La République se montre extraordinairement jalouse de ces deux Potentats. Pour les autres Princes d'Italie, elle leur hausse le menton selon son vtilité.



DE L'INTEREST

DV SIEGE DE ROME.



L'Intérest du siege de Rome, est premierement de procurer par toutes sortes de moyens la diminution de la grandeur d'Espagne : car les terres de l'Eglise sont tant à sa bien teance, que si vne fois le Roy d'Espagne venoit à quitter le pretexte specieux qu'il a pris de protéger le S. Siege, certainement il s'approprieroit aisément tout ce beau domaine, pour conioindre les deux extremités qui sont desia à luy

La puissance des Venitiens & du Grand Duc affoiblit de beaucoup celle du siege de Rome, qui sans ces obstacles domineroit les deux Golfes. Ainsi elle doit desirer que ces deux Princes demeurent pour le moins comme ils sont.

Mais tout cela ne sont que maximes generales; Il y en a trois particulieres du siege de Rome: La premiere est, de maintenir son credit par tout, par le moyen des Ecclesiastiques, qu'il doit protéger contre les Puissances seculieres, comme les nerfs de sa grand.ur.

La

La deuxiesme est, de faire apprehender aux Princes le foudre des excommunications; Mais de ne s'en servir pas si souuent de peur qu'ils ne viennent à le mépriser.

La troisieme est, de brider les Papes le plus qu'il se pourra, pour les empêcher d'agrandir leurs maisons aux despens de l'Eglise, ou de faire quelque extrauagance par leurs passions, préiudiciable au bien public de l'Estat Ecclesiastique. Il ne seruiroit de rien de toucher l'intérest de autres Princes d'Italie; parce que, ou ils sont si peu considerables qu'ils ne peuvent rien d'eux mesmes; ou si afferuis, qu'ils n'oseroient montrer auoir autre intérest que celui de ceux desquels ils dependent.

Il reste seulement pour la fin de parler du Duc de Sauoye. L'Estat de ce Prince est tellement situé, que de quelque costé qu'il se tourne, il peut apporter vn grand poids au party qu'il embrasse. Charles Emanuel, qui a le premier voulu faire comprendre qu'un Duc de Sauoye pouuoit donner la paix & la guerre en Italie, a creü, que l'intérest de son Estat estoit de s'attacher tantost avec la France, tantost avec l'Espagne selon les occurences & le bien de ses affaires; qui estoit le seul but de ses desseins, sans se soucier des Traitez faits ou avec l'un ou avec l'autre. Mais ce Prince plein de vastes pensées, & qui ne pouuoit borner son ambition par les barrières que la nature a mises à ses Estats, estoit bien

conseruer. Car veritablement si le nom de l'Empire a apporté de la splendeur & de la reputation en Allemagne, il luy a bien donné en recompence de la ialousie & de la deffiance. Elle a incontinent apprehendé ses Empereurs & tasché de limiter leur puissance, de peur que de Chefs de cette Prouince ils n'en vinssent les Maistres. La domination estant vn morceau si friand, que les plus moderez ne s'en peuuent abstenir. Nonobstant cela, par la suite de quelques successions, l'Empire se trouuant confirmé dans la Maison d'Austriche, celle d'Espagne qui en est la principale branche, a sceu si d'extremement manier ce commencement d'establissement qu'aujourd'hui il se trouue comme hereditaire en cette Maison. La maxime d'Allemagne estoit d'empescher les progres de cette usurpation; Et aujourd'hui son interest est, de remettre les choses en leur premier estat; distribuant cet honneur alternatiuement aux principales Maisons, & bridant la puissance des Empereurs, le conseil desquels doit estre les Diettes generales, pour coniointement pourvoir aux moyens de conseruer la liberte commune, & de s'opposer au Turc, qui est la seule Puissance que l'Allemagne doit apprehender.

La diuersité de Religion ne doit apporter aucune diuersité de sentiment es choses qui regardent le bien public. L'Interest de tous les Princes en general, & d'vn chacun d'eux en particulier, est, de de-

fendre mutuellement, & d'empescher coniointement que l'Empereur n'attente sur la liberté d'aucuns sous quelque pretexte que ce soit. Ils doiuent aussi prendre garde que les plus forts d'entr'eux n'oppriment les plus foibles ; Aquoy l'Empereur prestera tousiours la main , pour profiter de la ruine des vns & des autres.

Les Princes Catholiques, desormais se doiuent desabufer , & tenir pour assuré, que sous le manteau de la Religion ils seruent au dessein de la Maison d'Autriche , & forgent peu à peu les fets de leur seruitude, ne pouuans esperer pour tout auantage que d'estre ruinez les derniers.)

Les Protestans, puis qu'ils ne peuuent seuls resister à des si grandes forces , doiuent auoir pour maxime , apres s'estre bien vnis , d'entretenir au dehors les intelligences necessaires, pour contrepeser la ligue Catholique: Ils doiuent auoir pour principale mire de demeurer ensemble estroitement conioints , & de croire leur ruine assurée dans leur division.

Tous les auantages qu'on leur propose en particulier pour les destacher les vns des autres, doiuent estre les liens de leur concorde & bonne intelligence.

C'est le vray intérêt des Princes d'Allemagne, & des villes Imperiales, qui ne s'en doiuent iamais departir: Car sans cet appuy elles seront la proye du

premier occupant ; & leurs grands magazins & magnifiques Arcenaux seruiront de leurre pour attirer ceux qui son Maistres de la campagne.

Il y a quatre Royaumes qui dépendent en quelque façon d'Alemagne, & qui sont obligez de suivre la fortune de cette Prouince.

La Pologne & la Hongrie pour diuers interests demeurent attachez à la Maison d'Austriche.

Le Dannemarc & la Suede embrassent le party qui soustient la liberté d'Alemagne, craignant qu'apres que celle là sera opprimée, la leur ne soit en danger.

Il importe à l'Alemagne de demeurer estroitement coniointe avec l'un & l'autre de ces Royaumes : Mais du dernier elle ne peut iamais se separer sans vne tache eternelle d'ingratitude : ayant receu de la ce qu'elle n'osoit plus esperer, se trouuant desfia engloutie dans l'abyfme d'une si dure seruitude, quand ce Roy, montré seulement au monde au trauers de tant de nuages, fit paroistre à cette Prouince desolée le Soleil de sa deliurance.



DE L'INTEREST

DES SVISSES ET DES

Prouinces vnies des Pays-bas.

X




Es deux costez de l'Allemagne à l'entrée de ceste vaste Prouince, se sont formées deux Republiques formidables entre les autres Puissances de la Chrestienté, & pour la forme de leur situation: De sorte qu'à bon droit on les pourroit appeller les deux brás d'Alemagne.

Le droit est la Suisse, le gauche est le Pays-bas X
vny: l'un est entre les rochers & les precipices; l'autre est entre les mers & les marest: L'un domine les Alpes; & l'autre l'Ocean. Le naturel des peuples de l'un & de l'autre est si conforme à la nature du pays qu'ils habitent, que les Suisses semblent faits pour la montagne, & les montagnes pour les Suisses; La mer pour les Hollandois & les Hollandois pour la mer: En Suisse chaque Canton, es Pays-bas chaque Prouince est vne Republique. Les Suisses vendent la liberté de leurs corps aux autres, & gardent pour eux celle du pays. Les Hollandois gardent leur liberté toute entière. La longue paix a

enrichi ceux-là : Ceux cy fleurissent par la continuation de la guerre : L'interest des Suisses est la paix ; & les Hollandois doiuent auoir pour maxime assuree d'estre tousiours en armes. Ces deux Republiques ne peuuent pour leur subsistance s'allier mieux qu'avec la France ; qui pour contrecarrer l'Espagne enrichit les Suisses par son argent , & soustient les Hollandois par son conseil , & par ses armes. Ces deux Puissances ne se doiuent iamaïs desynir entre elles, ny par ialousie ny par Religion : Ce sont les seules maladies qui leur peuuent causer la mort.



DE L'INTEREST D'ANGLETERRE.

 Angleterre qui est comme vn petit monde à part, n'auoit rien à demesler avec les autres Princes, sinon entant que la necessité du commerce l'y obligeroit, qui estoit lors son vray interest. Car par là luy venoit l'opulence, laquelle coniointe à sa situation la rendoit assez considerable. Mais depuis que sous l'ombre de ce mistereux mariage entre Philippe & Marie, les pratiques d'Espagne s'y sont insensiblement

X glissées, l'Angleterre, qui auparavant auoit des maximes conformes à soy-mesme, s'est accommodée peu à peu, tantost à l'intérêt de France, & tantost à celuy d'Espagne.

La Reyne Elizabeth, qui a esgalé par son prudent gouvernement les plus grands Roys de la Chrestienté, reconnoissant la disposition de son Estat, creut que le vray intérêt d'iceluy consistoit, premierement à le tenir bien vny en soy, acheuant d'étouffer les reliques des precedentes factions; iugeant, comme il est tres veritable, que l'Angleterre est vn grand animal, qui ne peut iamais mourir s'il ne se tuë luy-mesme

Elle establit pour maxime fondamentale d'en banir l'exercice de la Religion Catholique, comme le seul moyen de rompre toutes les menées des Espagnols, qui sous ce pretexte y fomentoient la Rebellion. Et bien qu'elle se sentist & professast tres estroittement obligée à Philippes, de la personne duquel elle a tousiours fait vn cas particulier; neantmoins l'intérêt de son Estat luy fut en telle recommandation, qu'elle creut ne deuoir iamais faire de paix avec luy, pour trois raisons toutes euidentes. La premiere pour affoiblir dans les Indes la puissance qui luy estoit suspecte; La seconde pour enrichir son Royaume par le moyen des depreceations; La troisiéme pour acquerir par là ses fuiets, & les tenir en perpetuel exercice pour la guerre maritime, qui

qui est la conseruation de son Royaume.

Elle creut quel interest de son Estat estoit d'aider la France & se releuer, pour ne laisser pas agrandir par sa cheute ceux desquels elle auoit suiet de se garder.

Par la mesme maxime elle donna appuy à la naissante liberté des Prouinces vnies, la protection desquelles contre la Puissance d'Espagne, est vndes principaux points de l'interest d'Angleterre, tant à cause qu'elle affoiblit par là vn trop puissant voisin, que parce que la protection sert quelquefois d'eschelon à quelque chose de plus. ✕

Elle a entretenu de tres-estroites pratiques avec les Protestans de France, pour des raisons toutes particulieres à l'Angleterre.

Elle a fait le mesme, bien que pour d'autres respects, avec les Protestans d'Allemagne.

Par toutes ces maximes cette sage Princeesse a bien fait comprendre à ses successeurs, que outre l'interest quel Angleterre a commun avec tous les Princes, elle en a vn particulier, qui doit estre de procurer partout l'auancement de la Religion protestante, avec le mesme zele que le Roy d'Espagne se montre protecteur de la Catholique.

Pour cet effet l'Angleterre deuroit entretenir des intelligences par tout où il est à propos prendre part en tous les Traitez qui se font avec les Princes Protestans. Estre tousiours armé, pour se rendre par là considerable.

D

Voila le vray intereſt d'Angleterre, qui eſtanc bien ſuiuy, eſtablira dans la Chreſtienté vnetroiſième Puiffance.



SECONDE PARTIE.

DE L'INTEREST

DES PRINCES DE LA CHRESTIENTE



Presauoir eſtably le vray intereſt de chaque Prince & Eſtat, il faut faire voir par le recit des principales affaires agitées dans la Chreſtienté depuis cinquante ans, comme les mauuais ſucces qui en ſont enſuiuis, ne ſont prouenus que pour l'auoir delaiffé; afin d'apprendre qu'en matiere d'Eſtat on ne doit ſe laiſſer conduire aux deſirs déreglez qui nous emportent ſouuent à entreprendre des choſes au delà de nos forces, ny aux paſſions violentes qui nous agitent diuerſement ſelon qu'elles nous poſſèdent; ny aux opinions ſuperſtitieuſes qui nous donnent des ſcrupules mal conceus; Mais à noſtre propre intereſt, guidé par la ſeule raiſon, qui doit eſtre la regle de

nos actions , afin que par tels exemples , nous voyons comme dans vn miroir les fautes d'autrui, pour en faire nostre profit.



PREMIER DISCOVRS
SVR L'AFFAIRE
DE LA LIGVE.



Ovs les regnes de François deuxiesme & de Charles neuuiesme, la France fut fort trauaillée de guerres ciuiles ; la ieunesse de ces deux Princes en fut la cause principale : chacun voulut auoir le maniment des affaires. La contestation fut entre la Reyne Catherine leur mere , & les Princes du Sang ; & sous eux les Maisons qui setrouuerent les plus autorisées, furent celles de Guise & de Montmorency , qui auoient gouuerné paisiblement Henry deuxiesme leur pere. François de Lorraine Duc de Guise portoit le parti de Catherine ; Anne Duc de Montmorency Connestable de France , celuy des Princes du Sang. La diuersité de Religion s'y mella. Les Guerres des Religions furent grandes & sanglan-

tes, & durerent iuſques à la mort de Charles neuuième, & Henry troiſieſme ſon frere luy ſucceda. Il eſt en âge capable de gouuerner, auoit de belles qualitez, & faiſoit eſperer vn heureux Regne. A ſon auenement à la Couronne Henry teſmoigna de vouloir mener vne vie paiſible : Mais ce fut pluſtoſt pour ſe plonger dans l'oïſiueté & les delices, que pour bien regner. Henry Duc de Guiſe, fils de François, Prince doiüé de grandes qualitez, & plein de hautes penſées, voyant le Roy & ſon frere ſans enfans, & les premiers Princes du ſang faire profeſſion de la Religion Proteſtante, oïe aspirer à la Royauté ; & pour y paruenir ſe rend protecteur des Catholiques, & le perſecuteur des Proteſtans, contre leſquels il eſmeut diuerſes guerres. Henry de Bourbon, Roy de Nauarre, premier Prince du ſang, Chef du party Proteſtant & Prince orné d'une vertu heroïque, ſouſtient heureuſement diuerſes guerres en faueur des Proteſtans.

Voilà trois Henrys, Chefs de trois partys en France, qui ont chacun leur intereſt ; Le Roy de maintenir ſon autorité légitime ; Le Guiſart d'occuper ſa place ; & le Nauarrois d'empêcher la ruine du Roy, qui eſtoit la ſienne & de ſon party qui le faiſoit ſubſiſter en reputation. Le premier par foibleſſe ſe laiſſe induire à faire la guerre au Nauarrois. Le ſecond ſe rend Chef du party Catholique. Le troiſieſme ſe trouue protecteur des Proteſtans.

Tellement que celuy qui deuoit commander aux autres, est bien heureux d'auoir seulement place dans le party du Guisart; qui en vient si auant avec luy, que quand il fut tué l'an mil cinq cens ostantehuit, il estoit sur le poinct de le faire declarer aux Estats du Royaume, incapable de regner, & les Princes du sang de luy succeder.

Philippe qui auoit tousiours l'œil ouuert à son grand dessein, fomenta cette affaire, fauorise le Guisart à Rome, l'assiste d'argent en France, ne le laisse manquer de rien, & mesme apres sa mort continuë son assistance à Charles Duc du Mayne son frere.

Le Roy se voyant abandonné de toutes les grandes Villes de son Royaume, & de la plus part de sa Noblesse, se jette entre les bras du Nauarrois lequel par son assistance le retire presque des mains de ses ennemis, qui le tenoient assiege dans Tours, le mene comme triomphant, deuant sa ville capitale de Paris, où vn coup de couteau luy fit perdre la vie, & laisser le Royaume au Roy de Nauarre, l'an mil cinq cens ostante neuf.

Ce Prince se voyant esleué en vne si haute dignité, fut inuite par le changement de sa condition à changer d'interest: & quittant celuy qu'il auoit tenu iusques alors il embassa celuy de France. Il eut de grandes trauerses, causees par Philippe, tant par les pratiques à Rome, que par son assistan-

ce aux Liges de France, toujours ſous pret exte de grand zelateur de la foy Catholique. Tandis que Henry eſt Proteſtant Philippes maintient qu'il ne peut regner, le fait excommunier; diſpenſer ſes ſujets du ſerment de fidelité; mettre ſon Royaume en proye, pour l'auoir par cette voye auſſi facilement que Ferdinand eut celuy de Nauarre ſur ſon predeceſſeur. Quand il donne eſperance de ſe faire Catholique, il publie que c'eſt vn hypocrite, & qu'ayant eſté Relaps il ne peut iamais regner legitiment; ſecourt ſes ennemis d'argent & d'armes ſuffiſantes pour aſſoiblir les deux partis, mais non pour ruiner de telle ſortel'un, que l'autre ſe peult paſſer de luy. Voulant laiſſer ceux qu'il maintenoit, afin qu'ils fuſſent contraincts de ſe donner à luy.

Henry de ſa part remontre à Elizabeth, aux Eſtats vnis, aux Proteſtans d'Allemagne, & aux Suiſſes, quel intereſt ils ont tous à la cauſe; il en reçoit grande aſſiſtance, meſme ſecrettement de Ferdinand grand Duc de Toſcane, Prince de grand ſens, & qui iugeoit que l'acquiſition de la France au Roy d'Eſpagne, eſtoit aſſeruir tous les autres Princes. Mais la Republique de Veniſe fut la ſeule de tous les Eſtats Catholiques, qui ſans marchander le reconnut Roy de France, apres la mort de ſon predeceſſeur: Si bien qu'avec toutes les aydes & la valeur, il reſiſta du commencement;

puis ayant obtenu diuerſes victoires, & ſes affaires commençans à proſperer, il fut conſideré comme vn grand Prince. De là en auant les peuples laſſez de leurs miſeres commencerent à ſe deſabuſer, & ne donner plus telle croyance qu'ils faiſoient à leurs Predicateurs: la Nobleſſe à conſiderer le party proſperant: les Gouverneurs des Villes à aſſeurer leurs affaires avec le plus fort; & les principaux du party, à ſe conſeruer quelque dignité releuée. Tous ces esbranlemens donnerent ſujet aux Liguez de faire vne aſſemblée d'Eſtats. Philippes prend l'occaſion de telle extremité, pour leur perſuader que le ſeul remede de reſtablir leurs affaires eſtoit d'eſlire vn Roy, offre ſa fille à celuy qu'ils eſſiroient. Ce fut la pôme de diſcorde. Le Duc du Mayne, Chef principal; ne la pouuoit pretendre eſtant marié, ny permettre qu'autre l'eult, afin de ne deuenir de Monſieur, Valet. Le Duc de Guiſe ſon nepueu eſtoit aleché de ce friand morceau. Le Duc de Nemours ſon oncle, auoit auſſi bon appetit que luy. Le Duc de Mercœur pretendoit le Duché de Bretagne luy appartenir de par ſa femme. Le fils aiſné du Duc de Lorraine, comme chef de la Maiſon, fut encor mis ſur les rangs; tellement que Philippes par ce diſcord penſoit les attirer à ſe faire eſlire. Sur ces entrefaites Henry ſe fait Catholique. Ce changement fait déclarer quelques-vnes des principales Villes & Gouverneurs de ſon party, & les

autres commencerent à traiter, en Cour de Rome. Philippe n'oublie rien, non plus que les principaux Liguez, pour empêcher que Henry ne ſoit reconnu bon Catholique, & s'oppose vn fort long-temps que son Ambassadeur n'y ſoit receu.

Enfin Clement VIII. (lors Pape) reconnoiſſant qu'il s'eſtabliſſoit ſans luy, ſe reſolut d'auoir légré de ce qu'il ne pouuoit empêcher, & de la reconnoiſtre; eſtant vne maxime de Rome de ſe gouverner ſelon les euenemens, afin de ne perdre ce reſpect & cette reuerence qu'elle tâche de conſeruer par tout, & ſans quoy ſon autorité ſeroit peu de choſe.

Philippe décheu d'vne telle eſperance, ne laiſſe de continuer à aſſiſter le reſidu de Liguez; ſuſcite meſme Emanuel Duc de Sauoye, lors ſon gendre, d'attaquer la Prouence, afin de le deſtourner de pourſuiure ſes pretentions ſur le Duché de Milan, à cauſe du dot de ſa femme. Henry voyant cette obſtination leue le maſque, & declare la guerre à Philippe. Les ſuccéz en furent diuers. Neantmoins apres la reprise d'Amiens par Henry, Philippe ſe voyant ſur le bord de ſa ſoſſe, ſon fils ieune, Henry en la vigueur de ſon âge, ſe reſolut à la paix, qui fut conclüe à Veruins, l'an mil cinq cens nonante-ſept, en laquelle il rendit tout ce qu'il tenoit de la France, puis mourut.

Il faut conſiderer maintenant les intereſts des
Princes

Princes enuolopez en cette affaire, quelles fautes ils y commirent, & quels en furent les eueneiments.

Henry troisieme, dont l'interest consistoit à ne souffrir diuerses factions dans son Royaume, à conseruer les Princes de son sang puis qu'il n'auoit point d'enfans, & à tenir bas ceux qui s'esleuoient au preiudice de son autorité Royale, fit tout le contraire. Car il fomenta lescdites factions au lieu de les esteindre, & mesme se ioignit à l'vne pour destruire l'autre; fit perpetuelle guerre aux Princes du sang, à la persuation de ceux qui en vouloient voir l'extinction, pour s'esleuer en leurs places, & autorisa du commandement de ses armes, ceux qui aspiroient à l'vsurpation de son Royaume: Il fit encor pis; car quand il commença à s'en apperceuoir, il voulut y pouruoir par vn remede qui acheua de le perdre; à sçauoir de se ietter dans vne deuotion affectée & extraordinaire, ne bougeant des Cloistres des Moynes; pensant par ce moyen ôster au Duc de Guise le credit qu'il s'estoit acquis parmy les Catholiques, qui le tenoient pour leur Chef; Mais il en arriua le contraire, car il se rendit méprisable à ses peuples, qui le chasserent de sa Ville capitale; reuolterent contre luy toutes les grandes Villes de son Royaume; & le reduisirent en si piteux termes, qu'enfin vn Moine eut la hardiesse de le tuer, qui fut le fruit de sa negligence & de sa mauuaise conduite.

Henry Duc de Guiſe ſuccedant à vn pere & à vn Oncle grand perſonnages, & qui auoient eus regnes precedents grande part au commandement des armées, en la conduite des affaires, & ne ſe ſentant leur inferieur, ny en courage, ny en vertu, ſe met en l'eſprit le deſſein le plus releué, qu'un homme né ſuiet d'un Prince puiſſe entreprendre; à ſçauoir d'vſurper la place de ſon Roy. L'occaſion luy ſemble tres-fauorable. Il a deſia cet auantage de profiter du labeur de ſon pere: eſtant choſe tres-difficile que la vie d'un homme puiſſe faire vne telle mutation. Il rencontre vn Roy ſans enfans, & de l'humeur de ceux ſous leſquels ſe peuuent entreprendre tels changemens: il trouue vn Royaume déchiré de factions, & attaqué de la plus dange-reuſe de toutes les guerres ciuiles, qui eſtoit pour la diuerſité des Religions. Il void les premiers Princes du ſang dans la faction la plus foible; Vn Roy d'Eſpagne preſt d'aſſiſter tous ceux qui broüillerot la France; Et les Papes intereſſez de pourſuiure par toutes voyes les Proteſtans. Ces choſes ainſi diſpoſées, plein d'eſperances il n'oublie rien pour ache-miner ſon deſſein. Il eſtoit bel homme, adroit, courtois, liberal, vaillant, Il employe tous ces dons de nature, à s'inſinuer parmy les Grands, la Nobleſſe & les Peuples. Il ſe monſtre zelateur de la Religion Catholique, non hantant les Cloiſtres, & ſe promenant parmy les rues & proceſſions;

mais en persecutant les Protestans, & se montrant leur capital ennemy Il maintient ses intelligences à Rome & en Espagne, tousiours sous le pretexte de la Religion. Il employe les Prescheurs pour le mettre en veneration parmy les peuples; & pour faire declarer le Roy vn fauteur d'Heretiques, vn hypocrite, vn vitieux, & vn faineant. Tellement que par tels moyens il auoit esleué son dessein iusques au dernier eschelon, quand sur le point de l'execution il manqua lourdement à son interest, & à luy-mesme; qui fut en ce qu'apres auoir chassé son Roy de sa Ville capitale, auoir leué les armes contre luy, en auoir fait des manifestes publics, s'estre accordé comme avec son égal, il luy fia sa vie lors qu'il le vouloit faire deposer; son affaire n'estant pas de celles, qu'il soit permis de faillir deux fois.

Henry quatriesme eut deux personages à iouïr; Car tandis qu'il fut seulement Roy de Nauarre, premier Prince du sang, & protecteur des Protestans de France, son interest fut d'employer toute son industrie & croyance dedans & dehors le Royaume à conseruer lesdits Protestans, afin qu'ils le conseruassent; à quoy il ne s'espargna pas à empescher que le Duc de Guise ne s'emparast du Royaume auquel il auoit interest comme heritier presomptif de la Couronne; & à se faire connoistre à Henry troisieme non seulement en qualité

de Chef des Proteſtans, mais auſſi comme premier Prince du ſang & de qu'il intereſt de la cōſeruation de ſa perſonne & de ſon Eſtat luy eſtoit auſſi precieuſe qu'à luy meſme, afin qu'à ſa neceſſité il ne fit aucune difficulté d'auoir recours à luy. Ce qui luy reüſſit ſi bien, qu'après la mort du Duc de Guiſe, & la reuolte de ſon Royaume, il n'eut vn plus confident appuy que de ſe jeter entre ſes bras.

Quand il fut Roy de France, il ſalut vne grande dexterité à ſe meſnager avec les Catholiques & les Proteſtans animez de ſi longues & ſanglantes guerre ciuiles les vns contre les autres. Ceux-cy ſe glorifioient d'auoir vn Roy de leur Religion: ceux-là ne le pouuoient endurer, & le menaçoient de l'abandonner, ſ'il ne ſe faiſoit de la leur. Il auoit à maintenir ſes anciens amis, & ne perdre les nouveaux. Il promet à ceux-cy de ne reietter vne inſtruction, & continuë d'exercer ſa Religion avec ceux-là: Cependant il ſe ſert des vns & des autres à combattre ſes ennemis. Dans les longueurs de cette guerre chacun ſ'ennuyoit: pluſieurs des liguez n'approuent vn Roy Eſpagnol: mais ne veulent vn Roy Proteſtant: Les Catholiques qui ſeruoient Henry, ſ'impatientans de le voir continuer en cette Religion, le preſſent d'embraffer la leur: & meſme en viennent iuſques là, de former vn tiers party contre luy.

Ces conſiderations le font enfin reſoudre de franchir le ſaut: Et par ce moyen il conſerua les

Catholiques qui le suiuoient , en acquit de nouveaux du party des liguez , & ne perdit les Protestans , qu'il sçauoit bien ne pouuoir iamais estre receus de ses ennemis, sans destruire le pretexte de la Religion qui seul les maintenoit. Si bien que ce Prince s'accommodant au temps , & preferant toute autre consideration à son interest , sçeut prendre ses auantages si à propos , que ses affaires luy succederent heureusement.

Philippe qui auoit conçu le dessein de la Monarchie Chrestienne, & qui iugeoit que le principal obstacle qu'il y rencontreroit, seroit la puissance de France, embrasse l'occasion qui s'offre à luy pour la ruiner; se sert dextrement du mauvais gouvernement du Roy , & de l'ambition du Duc de Guise; incite le premier à exterminer les Protestans de son Royaume par quelque voye que ce soit, luy baille son exemple , luy offre son assistance, fait éclater son grand zele à Rome, exhorte le Pape de se ioindre à luy en telle poursuite: De l'autre part, il excite secretement le second à continuer courageusement son dessein, l'assiste d'argent & de conseil: Et par tels artifices il se fait estimer en France le principal apuy de leurs Religions; Diuise le Roy d'avec les Protestans de l'Europe, anthorise le Duc de Guise parmy les Catholiques de France, aigrit les peuples contre les Princes du sang, & esloigne tant qu'il peut du gouvernement du Royaume les

enſans de la maiſon pour y introduire les eſtrangers. Nulle autre conſideration ne le diuertit de ſon profond deſſein; il le tient touſiours caché ſous le voile de Pieté, & de ſon grand zele à la Religion Catholique: Il y traueille pied à pied ſans s'impacienter par la longueur ny ſe precipiter par aucun accident. Apres la mort du Duc de Guiſe au lieu de ſe relachſer il ſe roidit. Il aſſiſte d'autant plus vigoureuſement ſon frere & tout le party, qu'il creut en auoir plus beſoin: & meſme iugea qu'il luy ſeroit plus facile d'en profiter auantageuſemēt que durant la vie dudit Duc, parce que tout le party ayant plus affaire de luy, il le reduiroit plus aiſement à ſa volonté, Si bien qu'il pouſſa les affaires ſi auant, que le Royaume de France ne s'eſt eſchapé de ſes mains que par miracle. Et ſ'il ſe fuſt voulu contenter de le diſſiper au lieu de ſe l'acquérir tout entier, il en fuſt venu à bout. Et c'eſt la ſeule faute qu'il a commiſe contre ſon intereſt en cette affaire. Car ſ'il euſt conſideré l'affection que cette nation porte à ſes Roys, l'horreur qu'elle a de la domination Eſpagnele, & ſa legereté naturelle, comme auſſi la reputation de la clemence de Henry III. il ne ſe fuſt opiniaſtré à vouloir ſurmonter des choſes impoſſibles, ſe fuſt contenté de partager le Royaume à diuerſes perſonnes: puis ſur les differens qui ont accouſtumé d'arriuer entre les uſurpateurs, il luy euſt eſté beaucoup plus aiſé de ſ'acquérir par

pieces ce qu'il a voulu emporter tou d'un coup : En tout cas ce luy eust esté un assez grand gain de separer ce grand Royaume , qui estant vny s'oppose à luy en tous les lieux où l'Espagne se veut accroistre.



DISCOVRS SVR

LA GVERRE DE

SAVOYE.



L sembloit que la Paix de Veruins eust restably à la Chrestienté une tranquillité solide, & que ces deux grandes Puissances de France & d'Espagne, lassées de se trauailler l'une l'autre, fussent bien aises de goustier le repos. Mais comme c'est l'ordinaire qu'en toutes les Paix qui se font entre les Princes & Estats souuerains, on laisse indecises les pretentions dont on ne se peut accorder : Aussi en cette-cy la restitution du Marquisat de Saluces fut remise en une autre saison ; tellement que Henry, apres auoir employé quelques années à remettre en bon ordre les affaires de son Royaume, se resolut d'auoir raison du Duc de Savoie, sur l'inuasion dudit Marquisat, si bien qu'il

ſe fiſt entendre clairement d'en vouloir la reſtitution. Cette piece, quoy que petite, eſt tres importante ; c'eſt la porte d'Italie, par où les François peuuent paſſer pour l'attaquer ou la ſecourir. Ceux qui craignoient leur uiſſance, auoient raiſon de s'oppoſer au deſſein de Henry ; mais ceux qui en apprehendoient quelque autre le fauoriſoient. Ainſi les intereſts d'Italie eſtoient partagez. Emanuël Duc de Sauoye, comme le plus intereſſé de tous en l'affaire, met toute pierre en œuvre pour d'uertir cet orage, ſollicite le Roy d'Eſpagne de ne le point abandonner, & gaigne le Cardinal Aldobrandin pour auoir le Pape fauorable, qui eſtoit ſon oncle : mais ſe fiât ſur toutes choſes en ſa dextérité & adreſſe, il ſe reſolut d'aller en France, afin que ſous ce pre-
texte de traiter cette affaire, il gagnât quelques vns des principaux Miniſtres de Henry, ou excitât brouillerie dans ſon Royaume ; en quoy il fit de grandes deſpences & uſa de tels artifices, qu'il ſ'en ſalut peu qu'il n'en vint à bout. Neantmoins ſ'eſtant trop fié ſur vne choſe incertaine, & ayant trop négligé les moyens de ſa vraye déſiance, il ſe trouua ſi ſurpris, qu'en trois mois il fut deſpouillé de toute la Breſſe & la Sauoye. Ce rude commencement le reſueilla. Il continua ſes pratiques dans la France, il haſte le ſecours d'Eſpagne, & recherché l'interceſſion du Pape pour faire la paix, lequel à cet eſſet enuoye le Cardinal Aldobrandin vers Henry pour
la

la traiter. Cependant chacun se prepare, les vns pour attaquer le Piedmont, les autres pour le defendre: mais l'entremise de la Paix fut la plus forte. Car elle fut concludë l'an 1600. en laquelle la Sa-uoie fut renduë au Duc, & la Bresse demeura à Henry pour eschange du Marquisat de Saluces.

Ce qui fit commettre cette erreur à Henry contre son interest, fut le desir de gouster le repos, estant vne chose certaine que l'homme se flatte ordinairement en ce à quoy son imagination le porte. Ce Prince ayroit naturellement ses plaisirs; & la necessité de ses affaires l'auoit tousiours porté dans les trauaux: tellement que se voyant paisible dans son Royaume, & croyant auoir satisfait à son honneur, il aima mieux prendre vne recompense dudit Marquisat, que de s'embarquer en vne guerre de longue haleine.

Cette Paix toucha si fort au cœur de Ferdinand, grand Duc de Toscane, pour le preiudice qu'elle portoit à la liberté des Princes d'Italie, qu'il s'offrit de la rompre, moyennant 200000. escus que luy & la Republique de Venise fourniroient au Cardinal Aldobradin. Mais Henry n'y voulut point entendre.

En cette affaire & en la suite deux choses sont remarquables, la perte que la France a fait par le delaissement du Marquisat de Saluces, & l'auantage qu'on reçoit des'acquiescer les Nepueux du Pape.

Par la premiere le François a perdu tout credit en affaires d'Italie, & l'Eſpagnol en eſt demeuré Monſieur, n'ayant plus de contredifant. Et par la deuxieſme, comme c'eſt choſe reconnuë que l'approbation du Pape dans le party Catholique eſt de grande conſideration, auſſi eſt-il certain que pour l'acquérir il faut gagner ſes nepueux: Ce qui ne ſe peut obtenir que par des auantages reels & prompts. Car l'eſtabliſſement de leur maiſon eſtant fondée ſur la vie de leur Oncle qui eſt d'ordinaire vieil, ils ne veulent conſumer le temps en vain, tellement que celuy qui plus promptement les gratifie, eſt celuy qui les emporte de ſon party.

D'où ie conclus, que le vray intereſt de l'Eſpagnol eſt d'empêcher l'entrée des François en Italie, afin de n'y auoir aucun contrecarre.

Que le vray intereſt du François eſt d'y auoir vne porte ouuerte, afin d'y conſeruer ſa reputation & y partager les affaires avec l'Eſpagnol.

Et le vray intereſt des Italiens eſt bien de chaffer tous les eſtrangers d'Italie; mais ne le pouuant faire c'eſt de conſeruer leur liberté par le contrepoids de ces deux Puiffances, de France & d'Eſpagne.



T R O I S I E S M E

D I C O V R S S V R L E D I F F E -
rend suruenu entre le Pape Paul V. & la Re-
publique de Venise, l'an 1605.

DE P V I S que le S. Siege de Rome s'est
veu eleué à ce haut point de Maïesté
que nous le voyons auïourd'huy il est
certain qu'il a eu des desseins propor-
tionnez à sa grandeur, qui ont tantost plus, tantost
moins éclaté, selon le naturel de ceux qui se sont
trouuez seans au Pontificat. Car les Papes doiuez
de la prudence necessaire, pour soustenir le poids
d'vne telle grandeur, ont bien tousiours tasché de
faire quelque progresz pour s'acheminers vers ce but;
mais neantmoins ils ont si accortement dissimulé
leur entreprise, que de là il n'est arriué aucun scanda-
le à la Crestienté, ny aucun deshonneur à l'Eglise.
Les autres poussez d'un zele inconsideré, ou en-
flammez du desir de se signaler à la posterité, ou
emportez par la violence de leurs passions, en sont
venus si auant, que de descouurir ce mystere de
Hierarchie Romaine, qui par toute raison de pru-

dence & de ſage gouuernement ne deuoit eſtre iamais reuelé qu'après eſtre accomplý.

Du nombre de ces derniers a eſté Paul V. qui des le commencement de ſon Pontificat, blaſmant la moderation de ſes predeceſſeurs, ſe reſolut de prendre vne voye contraire, & de faire durant ſa vie, & hors de temps, ce qui ne peut eſtre terminé par pluſieurs ſiecles, & par vne longue ſuite de ſauorables conionctures.

Mais parce que nos pretentions demeurent mortes, quand elles ont vn obiet auquel elles ne peuuent atteindre, Paul conſiderant qu'il n'auroit pas ſi bon marché des grands Roys, comme des Republiques, qui pour n'eſtre gouuernées que par perſonnes priuées ſemblent auoir moins de puissance, parce qu'elles ont moins d'eſclat, il ſe reſolut pour cet effet de commencer par elles. Il querella premierement celles de Lucques, & Gennes, & les fit obeyr, ou en triomphant de leur foibleſſe, ou en intereſſant dans le differend des perſonnes particulieres, qui auoiét receu ou eſperoiét recevoir de l'auancement de la Cour de Rome. Mais ne ſe contentant pas de cela, il voulut attaquer celle de Veniſe, de laquelle le S. Siege de Rome teſmoigne depuis quelque temps n'auoir pas la ſatiſfaction qu'il en preſend pour deux principales raiſons : La premiere, parce qu'elle exclud tous les Eccleſiaſtiques de la participation de ſon gouuer-

nement; La seconde, qu'elle ne donne aucune pension à la Cour de Rome.

Le Pape estoit attentif à trouver vn sujet plausible pour faire sentir les effets de son indignation à cette République, quand en l'an 1603, l'occasion se presenta telle qu'il auoit desiré.

Vn Abbé & vn Chanoine apres plusieurs scandales commis, furent accusez de crimes atroces, & conduits à Venise où ils furent emprisonnez.

Presque en ce mesme temps la République renouuella deux anciennes Loix, pour les faire obseruer en tous les lieux de sa domination; l'vne pour empescher qu'on ne peust aliener aucun bien seculier aux Ecclesiastiques; l'autre, par laquelle il fut deffendu de bastir aucune Eglise sans la permission du Senat.

Paul s'en offensa, & dit qu'il ne pouuoit souffrir que les Ecclesiastiques fussent iugez par la Iustice seculiere, pour quelque crime que ce fust; & qu'à luy seul appartenoit de les condamner ou absoudre, selon que bon luy sembleroit. Quant aux deux Loix, il dit qu'elles ne pouuoient subsister, estans contraires aux Conciles & aux Constitutions Imperiales.

Les Venitiens apres auoir meurement delibéré sur cette matiere, & pesé d'vn costé l'indignation du Pape, & del'autre la liberté publique, responderent qu'ils ne pouuoient rendre les Ecclesiasti-

ques iustement emprisonnez, ny abolir les Loix iustement establies, sans preiudicier à la liberté que Dieu leur a donnée, & qu'ils ont conseruée depuis tant de siècles par le sang de leurs predecesseurs. Que leur Estat ayant prospéré par telles Loix, il leur sembloit ne les pouuoir changer sans encourir vne marque éternelle d'infamie à la postérité.

Le Pape s'aheürte de plus en plus, & prend vne ferme résolution de se faire obeir. Les Venitiens taschent par toute sorte de moyens d'accommoder cette affaire à l'amiable: Ils alleguent leurs raisons avec des soumissions inaccoustumées, enuoyent à Rome vn Ambassadeur extraordinaire, pour oster au Pape par cette demonstration de reuerence, l'opinion, qu'il auoit conceüe qu'on le mesprisast, & pour luy donner aussi par là vn honneste pretexte de se retirer du precipice où il s'estoit ietté: estant chose certaine, que tel souuent fait le fâché, qui voudroit bien estre apaisé. Ils recoiuent les Brefs du Pape, qui estoient autant de fulminations contre eux, avec tout honneur & respect. Ils remonstrent avec humilité le desir qu'ils auoient de contenter le Pape si cela se pouuoit, sans faire tort à l'intérêt commun de tous les Princes, & aux loix fondamentales de leur gouuernement, qui les oblige à prendre connoissance des bastimens qui se font dans leurs villes, afin que delà il n'arriue rien de dommageable à la seureté publique: Que pour l'al-

liénation des biens Ecclesiastiques, ils ne le peuuent permettre sans ruiner tout à fait les forces de leur Estat.

Quant à ne chastier point les gens d'Eglise, outre que c'est deroger à leur Souueraineté, & à la puissance qu'ils tiennent immédiatement de Dieu, c'est introduire dans l'Estat des exemples de dangereuse consequence.

Le Pape respond, qu'il ne se soucie point que leur loix soient vieilles ou nouuelles, & que c'est à luy de les changer selon sa volonté; Qu'il ne veut point de negotiation, mais vne obeissance auueugle.

Cependant il se porte à vouloir declarer nulle l'election du Prince de Venise, parce qu'elle auoit esté faite dans le commencement de ce different; & tandis qu'il procede comme cela, le Prince de Venise luy donne part de son election avec l'accoustumée reuerence.

Les Venitiens pour faire connoistre la iustice de leur cause, font consulter cette affaire par personnages versez en telles matieres, & en demandent l'aduis des plus celebres Docteurs de l'Europe. Ils rendent conte du poinct de la Controuerse à tous les Roys: & Princes leurs alliez; & afin qu'il apparaisse mesme à la posterité de leur droit, ils font rendre au Pape leur response, afin que si le different s'appaisoit, tout le monde sceust qu'ils s'estoient iustifiez.

Il est mesme à remarquer qu'ils ne s'appelleraient jamais leur Ambassadeur, qu'après que le Pape eut retiré son Nonce. Car bien que l'extraordinaire se retirast, pour tesmoigner quelque ressentiment après tant de dégouts receus, l'ordinaire demeura néanmoins, pour monstrier qu'ils auroient toujours vne oreille ouuerte à l'accommodement. Finalement quand ils ne peuuent plus différer la rupture; ils prennent resolution de deffendre leur liberté, avec vn tel consentement, qu'il n'y eut pas vne voix contraire dans le Senat. Ostant par là l'esperance que le Pape auoit de les desvnr, suiuant ce qu'iluy auoit esté promis par les Iesuites.

Le Pape prit tout vn autre biais: car il ne se soucia point qu'on creust s'il estoit bien ou mal fondé. Ne donna part de cet affaire que fort tard aux autres Princes; mesme ne demanda l'aduis des Cardinaux que par forme.

Voila ce qui se passa deuant la rupture entre le Pape & les Venitiens: en quoy les Venitiens suiui-
rent exactement ce qui estoit de leur intérêt. Car leur Republique estant plustost fondée dans la paix que dans la guerre: & estant plus considerable par le conseil que par les armes, ils doloient rousiours par dextérité euitier toute sorte de rupture.

Durant la rupture les Venitiens se surmonterent eux-mesmes, ayans donné en cette affaire vn exemple de parfaite conduite à la posterité. Ils ressemblerent

generent autant de fermeté & de courage à se ressentir du tort qu'ils pretendoient leur estre fait, qu'ils auoient montré de soumission pour l'empescher: firent entendre pour toute response à ceux qui leur parlerent d'accommodement, qu'ils falloit appliquer le remede à la partie d'où vient le mal; Que le Pape auoit receu vn déplaisir volontaire, auquel le remede estoit vne volontaire repentance. Avec cela neantmoins ils ne reietterent aucune proposition, mais bien demeurerent ils fermes sur ce point qu'ils ont fait ce qu'ils ont deu. Que le Pape en retirant son Nonce a fermé le chemin à l'accommodement, que c'est à luy d'accommoder ce qu'il a gasté, & que quand il aura leué les censures pretendues, ils ne se monstrent pas esloignez de la paix. Mais ce qu'il y eut de plus considerable, fut qu'ils ne s'esmeurent point pour cette tempeste, pouruoyans avec tant de prudence au dedans & au dehors de leur Estat, à tout ce qui estoit necessaire pour soustenir vn tel choc, qu'on ne s'y apperceut d'aucun changement. Les peuples demeurent dans l'obeissance; les Villes de leur domination leur offrent leurs forces & leurs moyens; les Religieux sans contrainte obeissent; il n'est pas respendu vne goutte de sang. Le Pape au lieu de monstrier de la fermeté en sa resolution, se ralentit aussitost qu'il eut apporté son indignation pour l'interdit, se laissant entendre

sous main, qu'il presteroit l'oreille à quelque accommodement, pourueu qu'il y peût sauuer sa reputation. Mais voyant la fermeté inflexible des Venitiens se resolut d'auoir recours à la force, & d'intéresser en icelle les Princes Catholiques.

La France n'eut autre but en cét affaire, que d'auoir la gloire de decider vne si importante question entre deux Princes si considerables en la Chrestienté. Pour cet effet elle ne monstra aucune partialité. Bien est vray que Villeroy, pour l'ambition qu'il auoit de s'esleuer au Cardinalat, pencha du commencement du costé du Pape, se seruant en cela du ministere de son fils lors Ambassadeur à Rome; mais se voyant frustré de son esperance, il retourna au temperament que doit tenir vn vray mediateur. C'est ainsi que souuent l'intérêt particulier préiudicie au public. Bien-heureux les Estats, dans lesquels ceux qui sont assis au gouuernement ont le courage si haut qu'ils ne visent à autre grandeur, qu'à celle qui est inseparablement coniointe avec la gloire du Prince auquel ils seruent.

Les Espagnols iugent deuoir fomentér la discorde entre les deux partis, estimans qu'il estoit en leur puissance d'empescher la guerre, si leur vilité le requeroit, ou s'en seruir à leur auantage. C'est pourquoy ils laisserent l'affaire aller son cours, sans rien commander à leur Ambassadeur qui estoit à Rome; lequel dextrement entretenoit le Pape en

son opinion, afin d'obtenir par cette voye vn Cardinalat pour son pere.

L'Empereur se porta mediateur. Le Roy de Pologne fauorisa la Republique; Les Princes d'Allemagne s'en meslerent point.

Le Roy d'Angleterre se reioüissoit de voir cette affaire s'eschauffer de iour en iour. Il promettoit à la Republique de Venise toute assistance; & aussi par toute raison estoit-il obligé d'en vser de la sorte. Car il croyoit que cela resueilleroit les autres Princes Catholiques qui se trouueroient interessez à conseruer leurs loix, & que ce seroit vne occasion pour parler d'vn Concile qui peût mettre fin à tant de controuerses.

Les Estats des Prouinces vnies offrent aux Venitiens secours d'armes & de viures.

Les Princes d'Italie, depuis qu'ils eurent veu que le Pape estoit demeuré confus, & flottant en soy-mesme, comme s'il se fust manifestement repenty, se monstrerent tous neutres en cette affaire, suivant ce qui estoit de leur vray interest.

Le Duc de Sauoye seul se laissa emporter par sa passion. Car ayant la Republique escrit à ses enfans avec tiltre d'Excellence, ainsi qu'elle auoit accoustumé, luy par despit fit Chappelle, sans y admettre l'Ambassadeur de Venise, & ce à l'instance du Nonce residant aupres de luy. Ce n'est pas en cette affaire seulement que ce Prince s'est gouuerné

plustost par caprice que par la vraye maxime de son intérêt.

La France continuoit à procurer l'accommodement, sans témoigner passion ny pour l'un, ny pour l'autre party, suivant en cela sa vraye maxime. Pource qu'entre deux Princes si pacifiques estant difficile de voir vne guerre formée; elle ne pouvoit retirer autre avantage de ce différent, que la réputation de l'avoir accommodé.

Les Espagnols s'apperceuvans de cela commencerent à changer de batterie, & à desirer d'avoir part à la paix, puis qu'ils n'en pouvoient avoir à la guerre; Ils jugéient bien le Pape disposé de se jecter entre leurs bras, & d'en passer par où ils voudroient; pour ce qui regardoit l'accommodement; mais ils voyoient aussi les Venitiens si fermes en leur résolution, qu'ils n'esperoient point de les fléchir. C'est pourquoy ils tascherent de les broüiller avec le Turc, afin qu'ils fussent contraints d'avoir recours à eux; & que par ainsi ils eussent le pouvoir de porter le Senat à accepter telles conditions du Pape qu'il leur eust pleu. Mais tant s'en faut que ce qu'ils tentèrent par le moyen du Turc leur réussist; que la République au contraire en tira avantage. Car le Marquis de Sainto-Croix ayant saccagé Duras, & croyant que les Turcs pour s'en venger se tourneroient contre la République, comme plus voisine, ou pour le moins entreroient dans le Gol-

fe; Il arriva que le Turc s'apperceuant des ruses Espagnoles; commanda au Capitaine General de son armée navale, de secourir les Venitiens contre le Pape & les Espagnols. Mais la Republique ne jugeant point à propos de se preualoir d'un tel secours, de peur que le remede ne fust pire que le mal mesme, détourna ce coup si dextrement, que le Grand Seigneur n'en eut aucun dégoust; faisant neantmoins comprendre au Pape, qu'en cas qu'elle fust pressée elle scauroit bien où recourir.

Les Espagnols hors du temps, offrent vne armée toute entiere au Pape. Quelques vns croyent, que c'estoit mettre par là les Venitiens à la raison, & ce n'estoit rien moins. Car tout ce que les Espagnols faisoient en ce temps-là pour le Pape, ne procedoit que de ce que le Duc de Lermé se trouuoit chatoüillé de vaine gloire que le Pape luy donnoit dans ses brefs, où il le traitoit d'Excellence.

Finalement on s'apperceut en Espagne que cette affaire se termineroit par accommodement, & que la France estoit pour en auoir toute la gloire; c'est ce qui luy fit penser d'envoyer des Ambassadeurs extraordinaires de part & d'autre; mais il n'estoit plus temps. Car la negociation estoit si avancée par les François, qu'on ne pouuoit plus la tirer de leurs mains. De sorte que quoy que fissent les Espagnols pour trauerfer l'accodemēt, l'honneur en demeura tout entier à Henry, qui termina

l'affaire par la dextérité & prudence du Cardinal de
loyeuse, & du Sieur de Frenes-Canaye, Ambassa-
deur ordinaire à Venise. Les prisonniers furent mis
entre les mains de l'Ambassadeur; Les loix de la
Republique demeurèrent sans estre altercées; & le
Pape fut contraint de lever l'interdit sans aucune
marque de submission du costé de ladite Repu-
blique.

C'a esté vne guerre de negociation de laquelle les Venitiens ont emporté la victoire toute entiere: aussi faut-il confesser, que c'estoit les prendre par la partie où ils sont les plus forts.

• Ils fuirient en cela toutes les maximes de leur
vray interest. Le Pape fit tout le rebours. L'Es-
pagne s'amusa apres des chimeres : Et la France eut le
but qu'elle devoit avoir ; C'est pourquoy aussi elle
en a eu la gloire.



QVATRIÈME

DISCOVRS DE LA TREFVE

des Pais-bas auec le Roy d'Espagne.



A trefue des Pays-bas auec le Roy d'Espagne, est vne pierre de touche de l'excellence des Espagnols en matiere de negociation. Le Roy d'Espagne voyant que depuis quarante ans la guerre auoit accru & enrichy cét Estat-là, au lieu de l'abatre, & que ce seroit à la grande diminution de sa reputation, s'il traitoit de paix avec ceux que iusques alors il auoit traitez de Rebelles; se resolut de faire vn grand effort pour entrer dans le pays, & leur faire sentir iusques dans leurs entrailles l'incommodité de la guerre. A quoy il employa les deux dernieres compagnies, sous le commandement du Marquis Spinola, l'vn des plus renommez Capitaines du siecle; lequel auec de puissantes armées s'efforça d'entrer la premiere année dans la Frise, & la seconde dans la Hollande: Neantmoins Maurice Prince d'Orange (Capitaine auquel on doit le reestablissement de l'ancien discipline) quoy que bien inferieur

aux forces de Spinola, ſe preualut ſi bien de la ſituation de ſon pays, qu'il rendit vains ſes efforts. Ce qui ayant oſté au Roy d'Eſpagne toute eſperance de pouuoir vaincre par la force, ſe reſolut en fin de tenter vn accommodement aux deſpens meſme de ſa reputation; mais ce fut afin d'aſſeurer le trafic des Indes, où ils l'incommodoient; de les diuiſer dans le repos; & de porter ſes armes plus vtilement contre des peuples moins aguerris & plus faciles à ſubiuguer, s'aſſurant bien que le ſucces de quelque bonne affaire, luy recouureront cette reputation qu'il hazardoit lors, & d'où il a toujours eſté ialoux. Vn Moine en fit la premiere ouverture à vn Marchand Hollandois. L'eſperance donnée aux Eſtats qu'en l'accord le Roy d'Eſpagne les reconnoiſtroit pour Eſtats libres; les fit eſcouter, dont ſ'enſuiuit vne ſuſpenſion d'armes pour en traiter à plein fonds.

Cette ſurſeance reueilla les Princes voiſins & intereſſez. Henry eſtoit combattu en ſon eſprit du vray intereſt de ſon Eſtat, qu'il reconnoiſſoit tres bien, & de ſes paſſions particulieres. Les Eſtats en ſa neceſſité (a cauſe de leur intereſt) l'auoient ſecouru, luy en ſa proſperité pour la meſme raiſon les aſſiſtoit puiffamment. Il deſiroit bien faire continuer la guerre, pour uen qu'il n'augmentaſt point ſon aſſiſtance. Eux s'offroient de la continuer, à condition qu'il redoublat l'argent qu'il leur bailloit

loit annuellement. Le desir du mesnage luy fit biaiser & non abandonner tout à fait le vray interest, se flattant de l'avantage que celuy seroit d'oster de son voisinage de si bonnes armes qu'une paix ou vne longue trefue dissiperoit, & l'honneur qu'il acquerroit d'avoir fait declarer ce pays libre; tellement qu'il tourna ses pensées à se rendre l'arbitre de cette negociation, & de la faire reüssir à l'avantage des Pays-bas.

Iacques premier, Roy d'Angleterre, l'humeur pacifique duquel ne luy permettoit non plus de suivre le vray interest de son Royaume, qui estoit de maintenir la guerre en ce país là, pour consumer les forces d'Espagne & l'empescher d'entreprendre sur luy, se contente d'avoir part à la negociation par ses Ambassadeurs. Plusieurs Princes Protestans d'Allemagne, qui ugoient bien que les armes d'Espagne n'estans plus occupées là pourroient tomber sur eux, enuoyent aussi leurs Ambassadeurs, afin de destourner cet accord, ou de procurer la protection de ceux qui s'en entremettoient. Maurice, dont l'interest particulier estoit ioint avec le vray interest des Estats, s'opposoit entierement à l'accord. Bernaueld le plus puissant dans les affaires d'Estat du pays, voyant que dans le repos son credit croistroit plus que dans les armes; veut accommoder les interests de l'Estat aux siens. Voila le tableau au vray des humeurs de ceux qui s'entremirent de cette affaire.

Mais pour mieux prendre le vray intereſt des Eſtats, il faut remonter plus haut & venir à la ſource. Guillaume de Naſſau Prince d'Orange, qui le ſeul en ce ſiecle a eul l'honneur de fonder vn Eſtat, ſais que ces diſgraces receuës, ny les efforts de Philippe le plus puisſant & habile Prince de ſon temps, l'en ayent pû empêcher, a eſté cōtraint d'en aſſembler les pièces pour en compoſer le corps, avec telle condition que chaque Prouince & ville a deſiré: Car ayant rencontré des peuples qui en tous ſiecles ont affecté plus leur liberté que leurs propres vies, il n'a pû changer les conditions auxquelles ils ſe ioignoient à luy. Ce qui a cauſé en cet Eſtat autant de Republicques que de villes, entre leſquelles en vne reſolution generale la pluralité de voix n'a point de lieu: pource que ſi vne ville ne l'approuue, elle n'eſt pas obligée de la ſuiure. Tellement qu'il a pluſtoſt ſongé à les flater en leur liberté, pour leur oſter tout à fait l'enuie de ſ'accommoder avec Philippe, que de leur propoſer de bonnes loix pour ſe maintenir durant la paix. Maurice ſon fils, eſleué dès ſon enfance dans les armes, a ſongé principalement à l'eſtabliſſement de la diſcipline militaire, comme la ſeule neceſſaire; alors pour maintenir l'Eſtat: En quoy il a ſurpaſſé tous les Capitaines de ſon temps; ſi bien que cet Eſtat ſe trouuant tres-bien eſtably pour ſubſiſter à la guerre, & tres-mal pour ſe maintenir dans la paix, il eſt euident, que ſon vray in-

terest, est de continuer la guerre.

Suiuant donc l'interest de chaque Prince leurs Ambassadeurs assemblez à la Haye trauaillent. Les Espagnols font vne grande difficulté de ratifier la declaration des Archiducs, qui reconnoissoient les Estats libres & souuerains, afin de la faire mieux gouster, & qu'en se relaschans ils obtinssent d'eux des conditions qui leur fussent ruineuses: Comme la concession de la liberté de conscienc aux Catholiques afin de les diuiser; la priuation du trafic des Indes pour mutiner les Marchands, corps tres considerable parmy eux; & le change de quelques places tres-avantageuses au Roy d'Espagne, & tres-preiudiciables ausdits Estats.

Maurice crioit haut contre telles conditions: Bernaeld n'osoit les fauoriser; La France & l'Angleterre s'aperceuant du venin caché là dessous, ne les pouuoient digerer. Tellement que tout Traité de paix estant rompu, on renoüa celuy d'une trefue pour longues années: Maurice fait les efforts pour l'empescher; Bernaeld maintenu par la France & l'Angleterre fait resoudre qu'on y entendroit. On trauaille de Nouveau. Les Espagnols voyans ne pouoir surmonter les conditions qu'ils desiroient, & jugeant le repos leur estre du tout necessaire, en fin se relascherent, moyennant quel article qui declare les Estats libres, & deluy du trafic des Indes fussent couchez si obscurément qu'ils y peussent

ſauuer leur reputation, & ſelon les occaſions les interpreter à leur auantage.

De l'autre part les François, pour induire les Eſtats à conclure ſon ligue avec eux, en laquelle ils s'obligent de leur ſoldoyer dix mille hommes, notamment pour faire obſeruer là trefue en cas de contrauention ; dont les Eſpagnols ſe plaignans, on leur reſpond, que ce que l'on en fait eſt pour leur bien, & que ſans cela on ne pouuoit rien obtenir. Maurice de ſon coſté acquieſce à ce qu'il ne peut empeſcher, moyennant que pour la ſeureté de l'Eſtat l'armée ſoit maintenüe. Henry approuue cette condition, contribüe l'entretien de 4000. hommes de pied François, & 200. Cheuaux. Tellement que la trefue fut conclüe pour douze ans ; les Eſtats reconnus libres & ſouuerains, & leurs Ambaſſadeurs receus en cette qualité par les Princes. Ainſi finit cette negociation qui dura deux ans, où chacun s'efforça de ſe tromper l'un l'autre, puis de ſe flatter ſoy-melme, ſe perſuadant d'auoir obtenu ce qu'il auoit deſiré. En effet Henry auoit la principale gloire de cette affaire, & les Eſtats par ſon moyen le principal profit. Mais luy mort, & Louys ſur le troſne en l'âge de neuf ans, toutes choſes changerent tout auſſi-toſt de face en France. Car Marie auoit obtenu la Regence, & voulant affermir ſon autorité contre les Princes du Sang & Grands du Royaume, procura la deſ-

vnion parmy eux, & se'ietta entre les bras de Rome & d'Espagne, croyant auoir besoin pour lors de la premiere Puissance, & en tout temps de l'autre; si bien que durant son gouuernement, les vrais interets de France estans abandonnez on en prit le contrepied.

Les Espagnols ne perdirent vne si belle occasion, sur tout au Pays-bas en l'affaire des Armeniens, laquelle Bernaueld se voyant soustenu de la France par pratiques d'Espagne, entreprit de maintenir contre le Prince d'Orange: tellement, que d'une dispute de Religion il s'en forma vne affaire d'Estat, si pernicieuse qu'elle pensa ruiner cette Republique. Ce fut icy où l'Espagnol desploya toutes ses ruses, pour faire agir Marie en ce Pays-là suiuant ses interets, luy persuada que sa des-vnion luy estoit auantageuse pour maintenir son autorité, afin qu'il ne peut assister les Princes du Sang mescontens d'elle, ny mesme les Protestans de France qui pourroient se ioinde ausdits Princes; fait iouer la bigotterie, qui est vne mauuaise conseillete à qui s'en coiffe; tellement que les Ambassadeurs de France, sous pretexte de zele à la Religion, se trouuent solliciteurs des affaires d'Espagne en Hollande, fauorisent la cause de Bernaueld formentent la diuision dans l'Estat, le portent sur le bord de son precipice, & sans la patience & la fermeté de courage de Maurice assisté des gens de

guerre, cette Republique couroit fortune de se voir aussitost esteinte que née.

Par ce que dessus & par la suite des affaires on peut iuger que les vrais interests del'Estat des Provinces vnies, soit de maintenir la guerre contre l'Espagne, sans quoy il se ruineroit de soy-mesme: Ceux de France & d'Angleterre de l'assister, pour donner cet os à ronger à l'Espagne: Ceux des Princes d'Allemagne à l'y fomentier, afin que le faix ne tombe sur eux & ne les accable: Ceux d'Espagne, de tenir tous les autres en broüillerie entr'eux, ou les vns contre les autres, afin qu'ils ne s'accordent tous contre luy: car soudain que les vns & les autres ont abandonné ces maximes, leurs affaires sont descheües.





CINQVIESME

DISCOVRS SVR L'AF-

faire de la succession de Cleues &
Iuliers.



Allemagne depuis Charles cin-
quiesme vescu heureuse, tandis
qu'elle se trouua dans son vray in-
terest, & quel'Empereur s'est tenu
dans les bornes des loix de l'Empi-
re, lesquels balançant sa puissance
auec celle des Princes & Republiques d'Allema-
gne, empeschoiét quel'vne n'empierast sur l'autre.

Les premiers qui ont delaisé cet interest, ont
esté les Princes Electeurs, qui ont continué la di-
gnité de l'Empire sans interruption à plusieurs
d'une mesme famille, lesquels par succession de
temps l'ont esleuée au preiudice des loix de l'Empi-
re; ce qui principalement est arriué à celle d'Au-
strie, sur tout depuis que leur maison & celle
d'Espagne n'a esté qu'une mesme chose. Car se
voyant affermie en une si haute dignité, & souste-
nuë par une telle puissance, elle a voulu s'y perpe-

tuer, & pour n'y vouloir estre choquée à l'auenir, elle tasché d'abaisser ceux qui auoient droit legitime d'en interrompre le cours, & s'esleuer par l'abolition des loix de l'Empire, & l'vsurpation des principaux Estats & Villes d'iceluy.

La premiere occasion esclatante & qui a fait paroistre en nos iours ce dessein, a esté sur la succession de Cleues & de Iulliers, auenuë au commencement de Mars l'an 1609. par la mort de Iean Guillaume, qui n'ayant aucuns enfans laissa ce bel heritage à quatre sœurs mariées à l'Electeur de Brandebourg, au Duc de Neubourg, au Duc de Deux-ponts, & au Marquis de Turgau. Le premier pretendoit la succession entiere comme indiuisible, ayant espousé l'aînée. Le second la mesme chose, pour ce que la premiere estoit morte auant le frere, & la femme l'aînée des sœurs viuantes. Les deux autres, qu'elle deuoit estre partagée esgalement aux quatre sœurs. Outre cela, l'Electeur de Saxe réueille vne vieille pretention, comme aussi le Duc de Neuers la sienne. Brandebourg & Neubourg entrent en possession; l'Empereur s'en offence, pretendant que tout l'heritage doit estre sequestre entre ses mains, & chacun subir son iugement; y enuoye Leopold Prince de sa Maison, qui se fait de Iulliers la principale forteresse du pays.

Les Princes possedans voyans vn tel obstacle, iugerent bien que ce sequestre tendoit à vne vsurpation;

pation ; & ne se sentans d'eux mesmes assez puissans pour y resister, veu le voisinage de Flandre, & des meilleures forces d'Espagne, qui en vne occasion si auantageuse pour la Maison d'Autriche ne manqueroit d'assister son parent, ont recours à ceux qui auoient le principal interest à empescher l'accroissement de ladite Maison ; rallient à leur deffence la France, l'Angleterre & les Pays-bas, avec la plus-part des Protestans d'Allemagne, qui firent vn armement si puissant pour recouper l'uliers, occupé par ledit Léopold, que nonobstant la mort inopinée de Henry interuenue auant l'exécution, le dessein ne laissa de s'acheuer heureusement, sans que l'Espagne s'y osast opposer.

Voicy donc en cette affaire les vrais interests d'un chacun. Celuy de l'Empereur, de se seruir de l'occasion pour s'emparer d'un tel Estat en Allemagne. Celuy du Roy d'Espagne, de l'y assister, tant pour le principal but, qui est l'accroissement de toute la Maison, que pour le voisinage dudit Estat avec la Flandre. Celuy des vrais successeurs, de conseruer le leur. Ceux des Princes d'Allemagne, de ne laisser fortifier la puissance qui leur est suspecte par leur affoiblissement. Et ceux de la France, Angleterre, & Hollande, de ne permettre l'accroissement de toute la Maison d'Autriche. Iusques icy chacun auoit iouï le droit de son ieu : mais Marie pour appuyer les interests d'Espagne qui luy pro-

mettoit de maintenir les siens iusques au bout; abandonne ceux de France, & le fauorise à broüiller de nouueau cette succession.

L'occasion luy fut ouuerte par vne imprudence des Princes possédans, qui donna matiere au Roy d'Espagne de retenter l'affaire. Les enfans de Brandebourg & de Neubourg gouernoient ce bel Estat ensemble; les forteresses estoient gardées par garnisons égales; il habitoient en mesme Palais, & traitoient leurs affaires d'une commune main. Ce qui ne dura gueres, estant difficile qu'un Estat se puisse gouverner long-temps de la sorte sans diuision, sur tout entre deux Princes de diuerse maison; où il y a quelque diuersité en leur Religion. Ils commencerent à entrer en vne jalousie l'un de l'autre: leurs amis communs & interessez en leur subsistance s'en apperceuans, & craignans que leur mesintelligence ne s'accreust, leur persuaderent de s'allier ensemble pour mieux fomentier leur amitié: Neubourg s'y accommode, va trouuer l'Electeur de Brandebourg, & luy demande sa fille en mariage; mais comme les meilleures viandes estans corrompues se conuertissent en un plus grand venin, aussi dans le plus salutaire conseil donné à ces Princes pour affermir leur amitié, se trouua le suiet d'une haine implacable, qui a causé la ruine des deux en ladite succession. Car tandis qu'ils estoient dans les desbauches de leurs festins, l'Electeur sur quelques

discours qui ne luy pleurent pas dans sa propre maison, & à sa table; offensa Neubourg, iusques à luy donner vn soufflet, dont encor depuis il ne luy voulut faire aucune satisfaction conuenable. Tellement qu'au lieu d'une femme il remporta vne offense si grauee dans le cœur, qu'il n'admit plus autre conseil que celui de la vengeance. Cét esprit ainsi vlcéré estant de retour au pays de Cleues, il fut facile aux Espagnols de se l'acquérir. Ils luy moyennerent son mariage avec la sœur du Duc de Bauieres, luy persuaderent de se faire Catholique, pour auoir favorable toute la Ligue Catholique d'Allemagne, le prennent en protection & luy donnent pension.


Les Estats vnis voyans combien ce changement leur estoit preiudiciable, appuyerent Brandebourg. Ces Princes des soupçons en viennent aux attétats: Neubourg se saisit de Dusseldorp: Brandebourg de Iulliers, dont le Roy d'Espagne prend pretexte de s'emouuoir, & arme puissamment pour le reprendre: Les Estats de l'autre part se preparent à la defendre, la munissent de troupes & choses necessaires pour soustenir vn grand siege. De France les vrayes interets n'ayans plus lieu, on n'en a que des paroles & des Ambassades. L'Angleterre, voyant la France auoit lâché le pied se contente de l'imiter, en enuoyant ses Ambassadeurs. Les Princes d'Allemagne se voyant abandonnez de ces deux Couronnes, & diuisez entr'eux par la Religion, &

par les affections diuerſes qu'ils portoient à ces deux Princes, ne ſe remuent point. L'Eſpagne ne ſe voyant plus que les Eſtats oppoſez, pourſuit ſa pointe ; & tandis qu'elle amuſe les Ambaſſadeurs de ces deux Roys, elle enuoye Spinola dans le pays avec vne puiffante armée, lequel au lieu d'attaquer Iulliers qui eſtoit pour lors vne rude entrepriſe, il ſ'en va emparant de ſes Eſtats, paſſe le Rhin, attaque & prend Vvezel en quatre iours.

Maurice voyant cét exploit ne marchande plus, laiſſe les Ambaſſadeurs en leur negociation, ſ'empare de Rex, & Emerile ; & en ſuite, choſe non iamais veüe, deux armées ſe faiſſent de cette ſucceſſion ſans empeſchement l'vne de l'autre, ſans alterer la Treue, & ſans qu'il ſe ſoit donné vn coup de pée. Car le premier des deux Capitaines qui auoit occupé vne place, l'autre ſe retiroit ſans y rien pretendre, tellement que le plus diligent eſtoit celuy qui faiſoit plus de progrès. Ce qui cauſa cette douceur, fut que Spinola reconnoiſſoit l'armée de Maurice meilleure que la ſienne ; Maurice, que le ſalut des Eſtats conſiſtoit en la ſubſiſtence de ſon armée ; tellement que ſans rien hazarder il creut ſon action aſſez glorieuſe de partager cette deſpoüille avec le Roy d'Eſpagne.

Il eſt maintenant aiſé à iuger que la ruine des Princes proteſtans eſt proueuüe, de ce que Neubourg abandonnant ſon vray intereſt pour ſuiure

sa passion, s'est ietté entre les bras d'Espagne; De ce que les Princes Protestans d'Allemagne sans considerer leur interest sont demeurez immobiles; De ce que la France n'embrassant l'interest de Maurice a quitté le sien; Et de ce que l'Angleterre imitant la France a fait le semblable. De l'autre part; l'accroissement que l'Espagne & le Pays-bas ont fait en cette conqueste, est prouenu de ce que l'un & l'autre est entierement attaché à son vray interest.



SIXIESME DIS- COURS SVR L'ELECTION

du Comte Palatin au Royaume
de Boheme.



La quantité des batailles données, ou le nombre des personnes peries, ou la reuolution de plusieurs Estats, ou la qualité des Princes interessez, ou la durée, peuuent rendre vne guerre memorable, celle dont l'Allemagne patit maintenant, l'est en suprême degré, puis qu'il s'y est desia donné plus de quinze batailles; que trois cens mille, hommes y ont laissé la vie; que presque

tous les Eſtats d'Allemagne y ont changé de face & de maître ; que tous les Princes de l'Europe s'en ſont meſlez, & qu'il y a quatorze ans qu'elle eſt commencée ſans eſtre finie.

Le ſuiet en a eſté la reiection de Ferdinand d'Autriche du Royaume de Boheme, & l'Election du dit Royaume conſérée en la perſonne de Frederic Comte Palatin du Rhin. Le premier a voulu ſ'eſtablir en vne dignité qu'il a creu luy auoir eſté iniuſtement oſtée.

Le ſecond a voulu ſ'y maintenir, comme y ayant eſté iuſtement eſteué. Le premier en a voulu faire vne affaire de Religion, pour y intereſſer tous les Princes Catholiques de l'Europe. Le ſecond a voulu monſtrer que ce n'eſtoit qu'une guerre d'Eſtat, afin d'y intereſſer tous ceux à qui la grandeur d'Eſpagne eſt ſuſpecte.

Mais pour bien iuger de ce grand mouuement Il faut remonter vn peu plus haut. Il eſt certain que depuis la guerre interuenüe pour la ſucceſſion de Cleues & Iuliers, l'Allemagne ſ'eſtoit comme par tagée en deux factions ; & à l'imitation des Catholiques les Proteſtans auoiēt auſſi formé vne Ligue, dont l'Elector Palatin fut eſleu chef, comme le Duc de Bauieres l'auoit eſté de l'autre. Le pretexte que chacun prit de la deſſenſe de ſa Religion, apporta de l'aigreur entr'eux : & la profonde paix dont cette nation auoit iouy depuis long-temps,

neluy permit (ſuiuant la reuolution de ce monde) d'y demeurer dauantage. Il ne manquoit que d'vn ſuiet pour la faire heurter contre ſoy-mefme.

Les Bohemiens en fourniffent, ſoit ou à cauſe de leur legereté naturelle, ou pour eſtre mal traictez en la liberté de leurs conſciences, ou pour le meſcontentement des principaux d'entr'eux, ou pour toutes ces raiſons enſemble. Ils reiettent Ferdinand leur Roy, & éliſent en ſa place Frederic : & afin de ſe rendre d'autant plus irreconciliables avec luy, font en pleins Eſtats ſauter les feneftrés à ſes Partifans.

Cette action arriua en l'an 1619. apres laquelle chacun ſe mit aux champs. Les Proteſtans furent les plus prompts; car ils eſtoient preparez, & n'attendoient que l'eſclat de cette Election pour commencer le ieu. Celuy des Partifans de Frederic qui y contribua le plus puiſſamment, fut Bethleem Gabor, lequel de ſimple Gentilhomme s'eſtant fait Prince de Tranſſiluanie, & apprehendant la Maifon d'Auſtriché, qui a touſiours taſché de ſ'approprier cet Eſtat, s'eſtoit mis en la protection du Turc pour s'en garentir, & trouuant vne ſi belle occaſion pour abaiffer cette Maifon, ſon intereſt neluy permit de la perdre. Les Eſtats vnīs, pour ne manquer a leur, y contribuent de leur part: le Roy de Dannemarck pour pareille raiſon, & pour l'honneur & ſa reputation aſſiſte ſon nepueu. Le Roy

d'Angleterre plus intereſſé que luy en l'un & en l'autre, abandonne ſon intereſt & ſon Gendre. Le Roy de France laſche le pied & ſe tient neutre. Ace commencement Ferdinand eſt mal mené, & réduit à de grandes extremitez.

Icy l'Eſpagne voyant qu'il luy failloit jouïr de ſon reſte, ou perdre ſes eſperances & ſa reputation, n'eſpargne rien, & met toute pierre en œuvre: En Allemagne, picque d'honneur l'Electeur de Saxe, contre le Palatin, luy remonſtre qu'il tient ſon Electorat de la Maïſon d'Auſtriche & qu'il ne peut le maintenir ſans elle: A Rome, perſuadé que ſa perte eſt la ruine de la Religion Catholique, & le moyen de mettre la Chreſtienté en proye du Turc; ſi bien que le Pape abandonnant ſon propre intereſt ſe rend ſon partial, fournit hommes & argent, & traueille à faire declarer les autres Princes Catholiques pout ſa déſſenſe: En Angleterre, maintient facilement le Roy Iacques en ſon humeur pacifique: En France, avec l'ayde du Nonce gagné le Duc de Luinë: lequel ayant empieté au pres de Louis l'autorité que Marie y poſſedoit, en prit auſſi les meſmes maximes, s'appuyant d'Eſpagne, qui ne manque en telles occaſions de maintenir ceux leſquels ſe deſſians de leur propre vertu, cherchent leur ſeureté hors du Royaume. Tellement que l'intereſt du fauory eſtant preferé à celui de l'Eſtat, on aſſiſte l'Eſpagne. Mais afin que ce fuſt avec
plus

plus defruit, & moins d'eclat, on s'entremet d'un accommodement, on enuoye des Ambassadeurs vers les deux partis, on amuse les Protestans de belles esperances, on leur fait perdre l'occasion de la victoire qu'ils auoient en main, on les induit à desarmer. Cependant les Catholiques ayant ce temps pour respirer, se renforcent de tous costez, se seruent de leur auantage, poursuient leur pointe, & par le gain de la bataille de Prague ruinent tout à fait leurs ennemis.

En cette reuolution d'affaires l'Espagne profite de sa victoire, continue ses pratiques parmy ses voisins, afin de n'estre diuertie en ses conquestes. Ioint ses forces de Flandre avec celles d'Italie, pour assuiettir l'Empire. La peur & la corruption se meslent parmy les Princes d'Allemagne & les Villes Imperiales; chacun se haste de se mettre sous le ioug, apprehendant de n'y estre pas receu assez à temps; on interesse par argent les Conseillers des Princes & les Magistrats des Republiques, & tous contribuent à forger les fers de leur seruitude.

Vn tel progres fait craindre au Roy de Danemark, que l'embrasement d'Allemagne ne le consume; il en prend la deffence, il se met en campagne; mais il est vaincu, perd vne partie de ses Estats, & est contraint pour la recouurer de faire vne paix desauantageuse. Le Transiluiain voyant ce desordre fait aussi la sienne, mais meilleure à cause de la protection du Turc.

Voilà quelle fut l'issue de la seconde révolution des affaires d'Allemagne, prouvenue principalement de ce que la France prostitua son intérêt à la grandeur d'Espagne.

Il faut venir à la troisième révolution. Il est souvent plus difficile de se bien gouverner en vne grande prospérité qu'en l'adversité, pource que l'une engendre le mépris, & nous endort en l'oisiveté; mais la nécessité de l'autre nous tient réveillés, & nous fait chercher les moyens de nostre restauration. Ce qui est arrivé à la Maison d'Autriche; qui se voyant d'une si lourde atteinte autorisée au delà de ses esperances, maîtresse absolue d'Allemagne, des armées innombrables entretenues aux despens de ses ennemis, la France immobile à ses progres, & embrouillée en guerre civile, l'Angleterre prendre plaisir à se laisser tromper, la Hollande assez empêchée à se conserver, l'Italie sans apparence de se pouvoir deffendre; elle ne craint plus rien & mesprise tout. Tellement que sans plus cacher son dessein sous le pretexte de la Religion, dont elles estoit si utilement servie jusques à present, elle attaque ouvertement les Estats du Duc de Mantoue, Prince grand Catholique, se vantant de ne pouvoir souffrir qu'un Prince né François possédast aucun Estat en Italie; qui est le premier manquement remarquable qu'elle a fait contre son intérêt. Car cette usurpation fit con-

noistre à tous les Princes & Estats d'Italie, quel orage venoit fondre sur eux; si bien que le Duc de Mantouë trouua de l'assistance parmi les plus résolus d'entr'eux.

Louis ne peut digerer cet affront; & se trouuant assisté d'un conseil, dont la prudence & resolution estoit necessaire en vne conioncture d'affaires si perilleuse, il employe heureusement ses armes pour le maintenir; qui fut la premiere occasion importante où il reprit l'usage de son vray interest. Mais voyant que les diuersions en Allemagne luy estoient necessaires; & n'en pouuant trouuer parmi les Allemans accablez sous le fâs d'une dure seruitude, va les chercher dans les glaces du Septentrion. La reputation de Gustaue Roy de Suede estoit penetrée iusques à luy. Ce Prince dont le desir de gloire faisoit aussi bien surmonter les difficultez qu'il trouuoient dans son esprit, & ses vastes & grands desseins, comme par son courage il les surmontoit en l'exécution, ne se fit pas tirer l'oreille. Les cōquistes du Vvalstain (General de l'armée de l'Empereur) sur la mer Baltique, & les prouisions qu'il y faisoit pour s'en rendre maistre, luy firent connoistre que la grandeur de la Maison d'Autriche luy estoit suspecte, & que son interest estoit de s'y opposer. Il s'allie donc avec la France, & se prepare d'entrer en Allemagne pour la deliurer du ioug où elle estoit reduite.

Voicy la ſeconde faute que l'Eſpagne commit contre ſon intereſt; à ſçauoir de meſpriſer ce Prince. Car tandis que d'un coſté il entre en Allemagne, l'Empereur, à la ſolicitation du Roy d'Eſpagne, fait paſſer ſes meilleures troupes en Italie contre le Duc de Mantoue, lesquelles y perirent preſque toutes ſans grand fruit. Et les progres de Guſtaue dans l'Allemagne eſtoient tels, que les Imperiaux & Eſpagnols, furent contraints de conclure la paix en Italie avec les François, aux deſpens de ce qu'ils y auoient acquis, & de cette reputation dont ils font tant de cas, pour ramener le debris de leurs troupes au ſecours de l'Allemagne, laiſſans es mains des François Cazal pour place d'armes en Italie, & Pignerol comme la porte pour y entrer; Tellement quel deſir d'embrasser la conqueſte d'Italie, auant que d'auoir bien aſſeuré celle d'Allemagne, leur a fait perdre l'une & l'autre.

Cet heureux exploit de Louis luy fit reconnoiſtre ſes fautes paſſées, & embrasser de toutes parts ſon vray intereſt. Il deliure les Garniſons de leur ſeruitude, deſtoute les Eſtats d'accepter vne treue, maintient le party Suedois, nonobſtant la mort de Guſtaue; conſerue l'Electeur de Treues contre les perſecutions des Eſpagnols; & chaſtie le Duc de Lorraine pour l'adherence qu'il auoit avec l'Empereur. En vn mot, il reprend glorieuſement ſa place, que ſes mauuais conſeillers luy auoient fait per-


dre. Urbain se voyant deliuré de l'apprehension des Espagnols & Allemans, & ayant reconnu par l'inuasion du Mantoüan, qu'il en vouloit aussi bien aux Estats Catholiques comme aux Protestans s'oppose à eux. La Republique de Venise, qui reconnoist mieux qu'aucun autre Estat ce qui est de son vray interest, & qui ne manque qu'en trop de circospection, ce qui est ordinaire aux Republiques qui ne sont fondées sur les armes, continue néanmoins son assistance au Duc de Mantoüe. Amedée Duc de Sauoye, faisant só profit du peril queluy & son Pere auoient couru de perdre leurs Estats, pour auoir abandonné leur vray interest, se ratache à la France. Les autres Princes d'Italie voyans que le secours de la France ne leur peut estre empesché, perdent l'apprehension qu'ils auoient des Espagnols. Les Princes Allemans & villes Imperiales, se voyans espaulés des armes de France & de Suede, assistez par diuersion de leurs autres allies, & rassureez par les progres de leurs prosperantes affaires, reprennent courage. L'Angleterre seule, comme si elle estoit dans vn autre monde, demeure les bras croisez.

De l'autre part, l'Espagne ne manque d'animer sa cause, reprend le pretexte de la Religion Catholique, qu'elle auoit comme delaisée, & s'aperceuant de la faute qu'elle auoit faite en cela, crie plus que iamais contre les Protestans, persecute le Pape

pour auoir de luy ſon argent & ſes foudres, careſſe les Venitiens, cajolle l'Anglois, entretient la diuiſion dans la maiſon Royale de France, s'eſſorce d'attirer à vne trefue les Eſtats vnis, taſche de deſtacher le Duc de Saxe du party Suedois, ne ſe rebute de nul refus; Et cependant n'eſpargne les threſors deſes Indes ny ſes hommes à former des armées nouuelles pour s'oppoſer à ſes ennemis. Bref la neceſſité a remis chacun à ſuiure ſon vray intereſt. Ce qui eſt cauſe qu'en cette derniere reuolution les affaires y ſont contées & de plus longue durée.



SEPTIESME DIS- COVRS SVR LES MOUV- emens ſuruenus en Italie pour la ſucceſſion des Duchez de Mantoüe & de Montferrat.

 'Italie iouyſſoit d'une profonde paix, & ſe trouuoit entierement exempt de ſou-
pçons qui ont accouſtumé de troubler le
repos des Eſtats, quand inopinément ſuruint la
mort de François Duc de Mantoüe, laquelle
on peut dire auoir produit les ſemences des trou-

bles qui depuis ont agité cette Prouince à diuerse reprises. Car Charles Emanuel Duc de Sauoye, querellant pour le droit de Marie sa petite fille, le Duché de Montferrat à Ferdinand, alluma le feu de la guerre en Italie; de sorte que depuis il n'a iamais esté si bien esteint, que de temps en temps ses cendres n'ayent causé de nouveaux embrasemens.

Ferdinand appuyé de la Iustice de sa cause, plustost que de ses forces, imploroit à son secours tous les Princes, qui par interest commun estoient obligez à ne souffrir vne telle violence.

Marie, entre les mains de laquelle estoit pour lors le gouuernement de la France, ne pensant durant le bas âge du Roy son fils, qu'à se maintenir en paix, croyoit estre assez empeschée d'estouffer les factions du Royaume, & d'appaiser par toutes sortes de moyens ceux qui estoient capables de choquer son autorité. Ainsi elle ne regarda ces mouuements d'Italie que pour tascher de les assoupir, & n'employa son credit que pour induire le Pape à s'entremettre entre les deux partis pour les accorder.

Le Roy d'Espagne considera bien autrement la naissance de cette diuision. Car comprenant l'auantage qui luy en pouuoit venir, il s'entremist si auant en tout le cours de cette affaire, que peu s'en fallut qu'il n'en tirast des auantages proportionnez à ses desseins.

Les Princes d'Italie regardoient iouer ce ieu sans s'en meller. Le Grand Duc entreprit la deffence du Duc de Mantouë, croyant estre obligé par son propre intérêt d'assister le plus foible contre le plus fort, outre les raisons particulieres qu'il y incitoient.

Le Duc de Sauoye voyant le peu d'auancement qu'il pouuoit esperer de son entreprise, ouurit les oreilles à l'accommodement qui luy estoit proposé, & laissant mettre l'affaire en negociation se contenta de la gloire, d'auoir osé entreprendre d'empieter sur son voisin; & ainsi tout ce beau dessein s'en alla en fumée. Aussi auoit-il esté formé contre toute raison, n'estant l'intérêt d'un Duc de Sauoye ny d'un autre Prince d'Italie, de se brouiller avec ses voyfins; puisque tout l'auantage qui en peut reuenir, est de voir le différent accommodé par l'autorité d'un des deux Roys, ce qui ne se peut sans manifeste danger.

Cette affaire ainsi terminée, le Roy d'Espagne, qui de tout temps a regardé le Piedmont comme vne piece qui est à sa bien seance, chercha un prétexte plausible de quereller le Duc de Sauoye. Car considerant la France hors d'estat de se meller des affaires d'Italie, le Duc de Sauoye par la guerre passée espuisé de forces & de moyens, & les autres Princes d'Italie desunis entr'eux; Il creut deuoir prendre ce temps pour entrer dans le Piedmont, esperant,

perant, comme il auoit eu la gloire d'estre arbitre du premier different, sans se preualoir d'une si fauorable occasion pour son profit particulier, il repare-roit le coup qu'il auoit manqué, en ralumant vne seconde guerre. Il attaqua donc les Estats du Duc de Sauoye, où trouuant plus de resistance qu'il ne s'estoit promis il fut enfin contraint de faire la paix. Il est vray que la France se reueillit en cette seconde occasion; mais la principale louüange en est deuë au Maréchal de Lesdiguières, qui en toute cette guerre, bien qu'il suiuit ses fins particulieres, engagea la France à embrasser son vray interest, comme elle auoit deu faire dans le premier mouuement.

Ce second trouble appaisé, les plus entendus iu-gerent bien que l'Italie n'estoit pas pour demeurer long temps en paix. Car on voyoit Ferdinand Duc de Mantouë sans enfans, & son frere Vincent tel-lement se desborder en sa vie, qu'on ne croyoit pas qu'il la deût faire de longue durée. Et l'euénement respondit au iugement qu'on en auoit fait. Car apres la mort de Ferdinand, Vincent continuât les desordres qui auoient v'sé son corps auant le temps, deceda l'aisant heritier de ses Estats Charles de Gonzague, Duc de Neuers son cousin, qui seul par tout droit y pouuoit pretendre.

La mort de Vincent, bien qu'elle fut assez pre-ueüe, estonna neantmoins de telle façon tous les Princes d'Italie, que chacun commença à penser serieusement à ses affaires.

L

Les Venitiens preuoyans que les Eſpagnols ne pourroient ſouffrir que la ſucceſſion fût conſérée au Duc de Neuers, & que par ainſi ils deſtourneroyent l'Empereur de luy donner l'inaueſtiture, ſe reſolurent de mettre toute pierre en œuvre pour rendre vains leurs deſſeins, eſtimans, que ce leur ſeroit vn coup trop preiudiciable, que de voir eſtablir en vn Eſtat enclaué dans leur, vn Prince dependant de la Maiſon d'Auſtriche. Ce qui troublait plus la Republique, eſtoit le ſiege de la Rochelle, où le Roy de France ſe trouuoit tellement engagé, qu'il n'y auoit pas d'eſperance qu'il peût de long temps s'en retirer. Le Pape eſtoit pouſſé par les memes mouuements que la Republique de Veniſe: mais il ne pouuoit ſi ouuertement monſtrer au Roy le deſir qu'il auoit de le voir deſgagé de là, pour ne teſmoigner que ſon intereſt particulier preualût à celui de l'Egliſe Catholique, de l'honneur de laquelle il s'agiſſoit en abaiffant les Huguenots.

Les autres Princes d'Italie ſe tenoient çoy, n'oſans monſtrer où leur inclination les portoit.

Le Duc de Sauoye ſeul ſ'imagina qu'il pouuoit profiter de cette guerre, & ſur la bonne opinion qu'il eut de ſon eſprit, ſe perſuada qu'il pouuoit partager la conqueſte du Montferrat avec la Maiſon d'Auſtriche.

Le Roy d'Eſpagne ſe ſeruant de l'occaſion du ſiege de la Rochelle, & de la preſomption du Duc

de Sauoye, creut deuoir prendre son temps pour s'emparer de Casal. Il faut confesser que son dessein estoit bien conçu, & avec grande apparence de pouuoir heureusement reüssir. Jusques-là, les Espagnols auoient en toutes choses si bien pris leurs mesures, qu'il sembloit que leurs desseins ne pouuoient estre trauersez; neantmoins icy commença des'arrester la rouë de leurs prosperitez. Et de là nous auons veu vne suite continuelle de mauuaises rencontres pour eux, qui dure encor aujourd'hui. Car Louis par vne resolution & diligence incroyable, prend la Rochelle malgré l'Anglois, force le Pas de Suze, secourt Casal, & met le Duché de Milan en tel hazard, que sans les affaires de Languedoc qu'il voulut terminer, il pouuoit de ce premier coup l'enleuer au Roy d'Espagne.

Les Espagnols serasseurerent, & reprenant les errements de leur ordinaire prudence, se faissient, des Grisons, font passer de tres grandes troupes par là, enuoyent le Marquis Spinola au gouuernement de Milan, forment vne armée en Italie, & de nouveau posent le siege deuant Casal.

Louis fait passer de puissantes forces en Piedmont. Le Duc de Sauoye le veut amuser par des esperances de paix: mais il rencontra vn esprit à l'espreuue de ses souplesses, & si resolu, qu'à la veüe & de Spinola, il luy enleua Pignerol, qui sera vn monument eternal à la posterité du Regne de Louis.

Le siege de Casal continuë. La peste fait ravage dans les deux armées. Les Venitiens reçoivent un eschec vers le Mantouïan. La ville de Mantouë est emportée par surprise. Nonobstant tous ces accidens Louis assemble de nouvelles forces, & se prepare au secours de Casal. Sur ces entrefaites il tombe malade à Lyon. L'Espagnol seme la diuision dans son Conseil, ce qui interrompt le cours heureux de tant d'actions heroïques: Et apres tant d'orages on se trouue comme sur le point de faire naufrage dans le port. Là parut la vertu de celuy contre lequel toutes ces machines estoient dressées; car enfin il sortit de ce labyrinthe par le fil de l'honneur. Le Roy recouure sa santé. Casal est glorieusement secouru: Et le Duc de Mantouë non seulement en restably ses Estats, mais (ce qui semblera incroyable à ceux qui viendront apres nous) il en est inuerty par l'Empereur. Les Grisons sont remis en liberté. L'Italie est deliurée des armes Estrangeres; la porteluy demeure ouuerte à son secours; & pour diuers manquemens du Duc de Lorraine, on s'assure de ses Estats, par le moyen desquels la con-iunction d'Italie en Flandre est trauersee.

Voilà le vif tableau de ces differens; où l'on remarque premièrement la faute du Duc de Savoie, de s'être imaginé qu'il partageroit le Montferrat avec la Maison d'Autriche malgré la France, étant chose toute claire, qu'il ne pouvoit manquer d'e-

estre despoüille des vns ou des autres, ou de tous les deux ensemble, si on neust vñ enuersluy d'vne extraordinaire indulgence.

C'est aussi vne chose toute manifeste, que le Duc de Lorraine a quitté la maxime de son vray interest, en prenant de gayeté de cœur le party de l'Empereur contre celuy de la France, en vn temps où la Maison d'Autriche estoit si empeschée à se maintenir, & celle de France si libre pour entreprendre.

Pour l'Empereur il ne scauroit s'excuser, d'auoir attaqué l'Italie auant que d'asseurer l'Allemagne, & d'auoir quitté le pretexte de la Religion, qui luy a tant seruy en opprimant le Duc de Mantoue grand Catholique.

La resolution de la France sera à iamais memorable, laquelle nonobstant le siege de la Rochelle assistée de l'Anglois, la guerre du Languedoc que l'Espagnol faisoit mine de secourir, n'a cependant iamais abandonné ses vrayes maximes, en assistant puissamment ses voisins, & choquant par tout les desseins d'Espagne. D'où ie conclus, que la gloire du Roy; la grandeur de son Estat, & la haute reputation dont il iouyt, dureront autant qu'il se tiendra ferme en cette resolution.

F I N



TABLE
DES CHAPITRES
DE L'INTEREST DES PRINCES
& Estats de la Chrestienté.
SCAVOIR.

D E l'interest d'Espagne,	fol. 3
Del'interest de France,	fol. 10
Del'interest des Princes d'Italie,	13
Del'interest du siege de Rome,	16
Discours sur la guerre de Sauoye,	39
De l'interest des Suisses & Prouinces vnies des Pays-bas.	fol. 22
Del'interest d'Angleterre,	fol. 23
Discours sur l'affaire de la Ligue,	fol. 27
De l'interest d'Allemagne.	fol. 18
Les articles entre le Roy & le Duc de Sauoye pour les affaires d'Italie,	fol. 43
Discours sur le different suruenu entre le Pape Paul cinquiesme, & la Republique de Venise,	fol. 43
Discours sur la treue des Pays-bas avec le Roy d'Es- pagne,	fol. 55